

دينا عماد

هل يشفع الحبيب؟



عصير الكتب للنشر الإلكتروني

ديننا عماد

هل يشفع الحب؟

(رواية)

جميع الحقوق محفوظة © عصير الكتب للنشر الإلكتروني

<http://book-juice.com>

هل يشفع الحب ؟

المؤلف : دينا عماد

نشر في : أكتوبر ٢٠١٤



هل يشفع الحب؟ ←

(١)

عالية قاعدة ف فصل دراسى .. قدام بنات اعمارهم مختلفة من ٣ ل ٦ سنين

"وماتت ستنا آمنة ام الرسول عليه الصلاة والسلام"

تقف عالية ف الكلام... تبص للبنات

"ها قلنا نقول ايه"

يردوا البنات

"عليه الصلاة والسلام"

تكمل عالية" كان عنده وقتها ٦ سنين لما بقى يتيم من غير ام او اب... اخده جده عبد المطلب يريه"

تسأل بنت من اللى قاعدين

"يعنى الرسول مكنش عنده ام واب زينا"

ابتسمت لها عالية

"ايوه يا جيحى كان يتيم زينا... بس ربنا كان بيحبه وقال ان كل الناس لازم تحب الايتام... بسم

الله الرحمن الرحيم واما اليتيم فلا تقهر"

سألت بنت تانية

"يعنى ايه"

عالية" يعنى ربنا قال ان اللى يزعلنا هيزعل منه والرسول عليه الصلاة والسلام"

ردوا البنات

"عليه الصلاة والسلام"

كملت عالية" قال ان اللى بيحبنا ويخلى باله مننا بيدخل الجنة معاه"

اتفتح باب الفصل... دخلت هدير

"ياللا يا عالية نزلى البنات الجنية"

عالية" يالا يابنات كل واحدة تمسك ايد اختها"

فى الجنية... بنات كتير اعمار مختلفة بيلعبوا

هدير وعالية قاعدين جنب بعض وعينهم على البنات

"مالك يا عالية... سرحانة ف ايه"

"مفيش يا حبيبتى... بس كل ما افتكر اننا هنبعد عن بعض بخاف"

"نبعد عن بعض... هو انا ليا غيرك يا عالية... فاكرة يوم كتب كتابي"

ردت بأسى "فاكرة"

وضحكت عالية وهى بتغير نبرة الاسى

"كنتى زى القمر والله يا هدير"

ابتسمت هدير بأسى

"قمر بالستر... كل ما افتكر والقاعة فاضية ومفيش حد... كل الموجودين ميجوش ١٠ انفار"

"واحنا هنعمل ايه بالناس بس.. مش بيقولوا العروسة للعريس"

"بمناسبة العروسة للعريس... امبارح بعد ما نمتي عصام كلمنى وقال قدامه شقتين وهروح معاه النهاردة"

نختار واحدة منهم"

"مبروك... بقاله كتير بيدور"

"الحمد لله لقي دول ايجارهم معقول"

شافوا ثريا مديرة الحضانة بتقرب منهم... ابتسموا لها بحب

قعدت معاهم

"صباح الخير يابنات"

ردوا هدير وعالية

"صباح النور"

هدير "ابلة ثريا عندى ليكى خبير حلو"

ثريا "ايه يا هدير فرحيني"

هدير "عصام لقي شقتين ايجارهم معقول وهنروح العصر نشوفهم"

ثريا "الف مبروك"

ردت عالية بسرعة

"العصر؟؟ النهاردة الاثنين يا هدير عندى درس تحفيظ"

هدير "ااه صحيح... طيب لما تيجى نبقي نروح"

عالية "ابلة... عايزة اقولك حاجة"

ثريا "خير؟"

عالية "عايزة ادور على شغل"

ثريا"شغل ايه يا بنتى ...انتي مش ماسكة فصل البنات الصغيرين هنا ف الدار وتروحي دروس
التحفيظ...كفاية عليكى"
عالية"المدارس قربت يا ابلة ومش هيبقى فيه غير الصغيرين يعنى ممكن يقعدوا مع سعاد ولا وجيدة"
ثريا بتفكر"بس هتشتغلى ايه؟"
عالية"اهو هدور وان شاءالله الاقى"

عالية ماشية ف الشارع ...صوت اذان العصر
عالية حسست بدوخة... ووقفت لحظات وكملت طريقها

طه ف عربيته... جنبه خالد صاحبه
"نزلنى هنا ياطه...شكرا ع التوصيلة"
"العفو...استنى اما اركن"
"ليه رايح فين"
"اصلى العصر بالمره هنا"

ركن طه...نزل هو وزميله بعد ما ركن جنب سور الجامع
عدت عالية من جنبهم... داخت تان
سندت على سور الجامع ووقفت
لخوها طه وخالد
خالد"مالها دى شكلها تعبانة"
راحوا ناحيتها
خالد"خير يا انسة...تعبانة ولا حاجة"
ارتبكت عالية من احراجها وردت
"لا كويسة...شكرا"
طه"نوصلك اى حته طيب؟"
عالية"شكرا"
قربت منهم ست كبيرة كانت رايجة الجامع

"عالية؟! مالك يا بنتي"
عالية"مفيش يا حاجة زينب دوخت شوية بس"
فتحت زينب شنطتها وطلعت زجاجة مياه
"خدى اشربي شوية مياه"
عالية"صايمه يا حاجة شكرا"
مسكتها زينب من ايدها
"طب امسكى فيا تعالى...الف سلامة عليكى"
حطت عالية ايديها ف ايد زينب
التفتت زينب لظه وخالد
"شكرا يا ولاد..ربنا ما يرميكم ف ضيقه"
ردوا "العفو...اي خدمة"

مشيت عالية مع زينب ودخلوا الجامع
ومشى طه عكس الاتجاه ودخل الجامع يلحق الصلاة

بعد الصلاة خرج طه من الجامع... وهو يبص على مكان مصلى السيدات والمصليات خارجين منه

ركب العربية... واول ما ركب سمع موبايله بيرن

"الو"

صوت بيزعق

"ايه ياطه... عشرتلاف مرة بتصل بيك"

"كنت بصلى يا ماما والموبايل ف العربية"

"مش تقولى قبلها بدل ماتسييني اتصل كده"

"معلش ياماما"

"انت جاي امتي؟؟ وروحت جبت الفلوس ولا لسه"

"لسه ياماما...هروح اهو وساعة بالكثير اكون عندك"

"طيب متتأخرش... بقولك ايه اخدت اجازة بكرة"

"لا ياماما معرفتش"

"ازاي معرفتش...انا مش قايلالك من امبارح"
"عندنا شغل ومش هينفع حد ياخذ اجازة الاسبوع ده"
"يعنى شغل الحكومة يمشى وشغلنا احنا يقف ومناقيش ناكل بقى علشان معرفتش تاخذ اجازة"
"ماما...ممكن نكمل كلامنا لما اجى...ومتقلقيش شغلنا مش هيقف ولا حاجة"
"طيب مستنياك... انا متغديتش لسه..متأخرش"
"حاضر يا حبيبتي مش هتاخر...مع السلامة"
"مع السلامة"
قفط طه مع مامته...وبص على باب مصلى السيدات...لقى ان كل الناسى خرجوا...مشى بالعربية

عالية قاعدة ف الجامع...بعد الصلاة
زينب"ايه يا عالية هتقعدى برضه؟"
عالية"اه هحضر الدرس علشان بعده فيه بنات جاية درس التحفيظ"
زينب"يا بنتى شكلك تعبان"
عالية"لا والله انا كويسة انا دوخت بس علشان الصيام والحر"
زينب"ما تطفى هو احنا ف رمضان"
ابتسمت عالية لزينب علشان تغير الموضوع...حست بيها زينب
"قوليلى يا عالية...هدير مجتث معاكى ليه"
"رايحة تشوف شقة مع خطيبها"
"ربنا يصلح حالهم... قوليلها تظمن انا كلمت مجموعة اصحابى وزمايلى ف الشغل على اول الشهر
هنلم مبلغ كده وانزل معاكم نشوف الحاجات المهمة اللى ناقصاها"
عالية بفرحة"بجد يا حاجة...ربنا يكرمك يارب...ده احنا كنا شايلين المهم علشان مش عارفين
هتجهز مينين"
زينب"سيبها ع الله"

صوت الشيخ ف الميكروفون

"السلام عليكم ورحمة الله وبركاته... درس النهاردة هنكمل فيه نفس موضوع الدرس اللى فات"

فاتن واقفة ف المطبخ... دخلت لها بنتها ميار

"ماما"

"نعم"

"الشامبو خلص"

فاتن "مفيش ولا كيس؟؟ دورى كويس"

ميار "مفيش والله اخر مرة كنتى جايبه ٤ اكياس وخلصوا"

فاتن "هجيلك بكرة وانا جايبه م الشغل"

ميار بتردد "اتصل بابا اقوله؟"

فاتن "اتصلى... يمكن يجيب"

خرجت ميار من المطبخ... وكملت فاتن قلية البتنجان

رجعت ميار بعد اقل من دقيقة... بصت لها فاتن

"ايه؟؟ قالك ايه؟"

ميار باستسلام "قالى اغسلى بالصابون او استنى امك تجييلك بكرة"

فاتن ساكنة ومبتعلقش... سألتها ميار

"اعمل ايه؟"

"هجيلك بكرة"

"ياماما كيس شامبو بربع جنيه ميرضاش يجيبه ليه"

فاتن ساكنة وتقلب اللي ع النار

"ياماما... انتى ليه ساكنة كده"

ردت بنفاد صبر

"هعمل ايه... عملت كل اللي ممكن تخليه خلاص لحد ماتعبت... ابو كى مش هيتغير الحمد لله انه

بيجبلنا اللقمة"

"ياماما انا مطلبتش حاجة كبيرة"

"عارفة... وهجيلك اللي انتى عايزاه.. انا عمرى حرمتك من حاجة"

"لا... بس انتى هتعملى ايه ولا ايه بس"

"اهو بعمل اللي بقدر عليه"
"الدروس هتبدأ... اصحابي كلهم حجزوا... وانا لسه"
"احجزى"
"عايزين فلوس مقدم"
"طب استنى عليا شوية"
"حاضر ما انا مستتية اهو"

فاتن وميار وعبد الحميد ع الغدا...بعد ماتقوم ميار
فاتن بابتسامه "بقولك ايه يا عبد الحميد...ميار عايزة تحجز الدروس"
عبد الحميد وهو بياكل "ما تحجز"
"المدرسين عايزين الفلوس مقدم"
"مقدم ولا مؤخر انا مالي"
"ادفع لها بس اول شهر وانا اكمل"
"لا ده مش اتفاننا...انتى صممتى تدخليها ثانوى وقلتى مش هكلفك حاجة خليكى قد
كلامك...قلتلك تدخل صنايع ولا تجارة و ٣ سنين ونخلص"
"ده اسمه كلام برضه...فيه حد دلوقتى بيقول الكلام ده... وبعدين هبقى انا معايا بكالوريوس واقعد
بنتى بدبلوم"
"ماله الدبلوم ياحتى... حوش حوش اخدتى الدكتوراة"
"والله ما اقصد حاجة...انا بتكلم على ميار"
"فلوس معايش فلوس... انتى فاكرة البيت ده بيصرف ايه ورق كوتشينة"
قام عبد الحميد...قامت وراه فاتن
"الشهر ده بس يا عبد الحميد"
"منين...عايزة فلوس روى خدى من اخوكى انما انا مفيش عندى فلوس"

طه داخل المحل "محل مفروشات"...مامته قاعدة ع المكتب...راح قعد قدامها وعليه علامات الاجهاد

"اتاخرت ليه ياطه؟"

"جبت فلوس البضاعة الاخيرة من سالم"

"ومقالش على طلبية تانية"

"قال"

"وان شاءالله مين هيسافر يجيها"

"انا ياماما حاضر"

"مش قلت مش عارف تاخذ اجازة"

"بكرة ولا بعده بعد الشغل هروح اجيب بضاعة جديدة...متشيليش هم انتى بس"

"طيب"

قامت نرجس...دخلت ورا ستارة ورجعت بصينية فيها اكل

"ياللا... قوم اغسل ايديك وتعالى نتغدا قبل ما امشى"

"ونرمين فين؟"

"ف البيت...هنبقى نجملك بالليل علشان لما تقفل المحل تيجى معانا بالعربية نجيلها هدموم المدرسة"

هدير راجعة من الحمام...بتصحى عالية

"عالية عالية"

قامت عالية بخضة

"ايه... فى ايه"

"مالك...قومى يالا"

"كويس انك صحيتينى...استغفر الله العظيم يارب"

"ايه مالك"

"كنت بحلم حلم وحش اوى"

"كابوس؟"

"لا حلو وحش استغفر الله العظيم يارب... اعوذبالله من الشيطان الرجيم"

"بتستغفرى على ايه"

"الحلم"

(٢)

عالية وهدير داخلين اوضة مديرة الدار
هدير "حضرتك عايزانا يا ابلة"
ثرىا "اه اقعدوا يا بنات"
قعدوا... وهما بيصوا لبعض على تردد ثرىا
ثرىا "انتم طبعا عارفين انا بحبكم قد ايه... وعارفة انكم بتحبوني"
هدير "طبعا يا ابلة... احنا مشفناش راحة ف حياتنا الا لما جينا الدار هنا وده كله بسبب حنانك
علينا"
عالية "اه والله... ده احنا اتعدبنا اوى من يوم ماوعينا ع الدنيا... محسناش ان القلوب فيها رحمة الا لما
جينا الدار هنا"
ثرىا "انا يعز عليا انى اسبيكم... بس انا طالعة معاش الاسبوع الجاى وقلت لازم اعرفكم علشان
مشيش فجأة"
عالية وعنيها مدمعة "معاش؟؟ وهدير هتمشى؟؟ وانا هبقى لوحدى"
قامت هدير حضنتها والدموع ف عينيها
"احنا مش ممكن نتفرق ابدا يا عالية... احنا مالناش الا بعض... ده انتى كل عيلتى"
ثرىا بتحاول تخفف عليهم
"جرى ايه يا بنات... انتوا عايزين تعيطوا وخلص... مين قال بس اننا هنتفرق... هو المعاش هيمعننى
انى اجى ازورككم"
عالية وهى بتمسح دموع هدير
"انتوا بس هتوحشوني... وبعدين بتعيطى ليه احنا ما صدقنا ان فرحنا قرب تقومى تعيطى"
هدير "هو مينفعش يا ابلة عالية تيجى تعيش معانا"
ثرىا "مينفعش يا هدير"
عالية بتبتسم علشان هدير مترعلش
"ومين قال انى هوافق ابقى عزولة"
هدير "عزولة ايه بس... هو انتى غريبة على عصام"

ثريا"هو عصام كان معاكم ف الدار زمان"
هدير"اه... كان ف الدار اللي كنا فيها قبل ما يفصلونا البنات لوحدها والولاد لوحدهم"
ثريا"دى قصة حب قديمة بقى"
ضحكت هدير بكسوف...كملت ثريا
"المهم بقى...انا عايزة اوصيكم...ايا كان مين اللي هتيجى مكانى...تطلع كويسة تطلع وحشة انتم
مبقتوش صغيرين... محمش يقدر يدوس لكم على طرف... اللي جاية دى مجرد موظفة وانتم
اصحاب الدار...محمش له فضل عليكم فاهمين... اى حاجة تضايقكم تليفون صغير ولا تيجوا لى
وانا اتصرف"

طه ف المحل واقف بيرص علب على الارفف
نرجس قاعدة ع المكتب
"طه...انت بترص البضاعة الجديدة؟"
"ايوه ياماما"
بتبص ف الفواتير اللي قدامها
"ايه الاسعار دى"
"مالها"
"بدوى ضحك عليك ياطه...انا قلت له هاخذ بالسعر القديم"
"ده قالى انه اتفق معاكى ع الاسعار الجديدة"
"تصدق عايز يتهزأ"
ورفعت السماعة من التليفون اللي جنبها
"نتعملى ايه ياماما"
"هبهدل اللي خلفوه"
قاطعها طه بحزم
"ميصحش انا اجى من عنده بعد ما اتفقنا ع السعر الجديد وانتي تصغرين ياماما"
"اصغرك... معاش ولا كان"
"يبقى معلش اعتبريها غلطتى انى مسألتكيش الاول...لو على فرق الفلوس هدفهم"

"انت بتقول ايه ياطه... هو انا عاملة ع الفلوس ولا عاملة ان محدش يضحك علينا... انا فلوسى
وحالى ومالى لمين مش ليك انت ونرمين... انا مش عايزة حد يضحك عليكم انا مش عايشة لكم"
"متقوليش كده ياماما... ربنا يخليكى ويديكى الصحة"

فاتن ف الشغل... ماسكة ورقة وبتكتب

لبس المدرسة

جزمة

شنطة مدرسة

مصاريف المدرسة

حجز دروس وملازم

بتتكلم ف سرها

"نقول اللبس والجزمة والشنطة من ٢٠٠ ل ٢٥٠.. طب والمصاريف هتعملها ٦٠ ولا ٧٠... نقول
٥٠ ونوفر من الهدوم... طب الدروس هيطلبوا مقدم... اخليها تحجز ٤ مواد بس دلوقتى... طب
وبعدين... يارب افرجها يارب... اجيب منين كل ده"

سابت القلم والورقة وهى سرحانة ومش شايفة مركزة مع كل الموجودين حوالها على مكاتبهم...
فجأة خطرت لها فكرة

قامت من مكتبها... وخرجت الطرقة وراحت مكتب سكرتارية المدير

راحت سلمت على واحدة ف سنها تقريبا

"ازيك يافاتن.. مالك"

"ازيك يا عبير... انا جاية قاصداكى ف خدمة"

"أومرى"

"عايزة اتنقل"

"ليه؟؟ ده انتى ملكيش مشاكل مع حد... حصل حاجة؟"

"لا الموضوع مش كده"

وسكنت شوية وكملت وهى مترددة

"بصى انا هجيبلك م الاخر... انا محتاجة فلوس وكنت عايزاكي تشوفى لى اى حته تبع الوزارة بس

تكون حوافرها زيادة شوية ولا فيها اى دخل تانى اكبر من اللي باخده هنا"

سكتت عبير شوية بتفكر

"كويس انك جيتى... لسه المدير العام باعتلى على كذا مكان عايز اشرح ناس ليهم"

"اهم حاجة الحوافز"

"طب والمواعيد يافاتن؟"

"لا عادى مش مهم المواعيد...حتى لو فترتين مش مشكلة"

فتحت عبير ورق قدامها

"بصى اللي موجود قدامى ويناسب درجتك... مكتب فرعى وحضانتين ودار ايتام"

"الحوافز يا عبير...ايه اكثر حاجة"

"دار الايتام... بس هتقعدى طول النهار تقريبا وتبقى مستعدة ف اى وقت ف الاجازة تنزلى لو

حصل اى حاجة"

"حوافرها حلوة؟"

"اه...فيها حوافز ومكافات وكويسة لانك هتروحي مديرة للدار"

"طيب خير... اطفال ولا كبار"

"بنات اعمار مختلفة... المديرية طالعة معاش وعلشان كده عايزين حد مكافئها"

"استلم امتى؟"

"هبقى اكلمك اقولك...انتي رقمك زى ماهو ولا اتغير"

"لا زى ماهو البيت والموبايل"

عالية ف الجامع...قايمة من ع الارض وكل الناس قايمن

زينب"عاهة"الية"

عالية"نعم يا حاجة"

"هاتى رقم تليفونك علشان هبقى اكلمك لما نلم الفلوس نزل نجيب حاجة هدير"

"انا معايش تليفون... بس معايا رقم هدير"

"هاتيه"

فتحت عالية شنطتها...وطلعت ورقة صغيرة

"اتفضلى...اصل انا مش حافظاه"
"طب معاكى قلم انقله"
"لا...حضرتك خدى الرقم وانا هبقى اخليها تكتبهولى"
"طيب...هبقى اكلمكم تتقابل ونروح نشترى اللى يقدرنا عليه ربنا"
"ربنا يخليكى يا حاجة"
"وعقبال ما اجييلك يا عالية"
ردت عالية بصوت واطى بلا امل
"ان شاءالله"

عالية وهدير رايجين اوضة ثريا
بيخبطوا ع الباب المفتوح ويدخلوا
ثرىا قاعدة على مكتبها... وقدامها فاتن
ثرىا"تعالوا يا بنات... مدام فاتن اللى هستلم الدار مكان...هدير وعالية دول مقيمات هنا ف
الدار... ويراعوا اخواتهم الصغيرين...عالية ماسكة سن من ٣ ل ٦ وهدير من ٦ ل ١٠"
فاتن"اهلا يا بنات"
ردوا البنتين"اهلا بحضرتك"
فاتن لثرىا"هو مفيش رضع هنا؟"
ثرىا"لا مفيش...احنا عندنا من ٣ سنين وانتي طالعة لحد الاعدادية... انا عرفتك على عالية وهدير
لوحدهم لان شغلهم هنا متطوعات... اما باقى المشرفات والاحصائيات هعرفك عليهم مع
بعض...موصكيش عليهم علشان دول بناتى"
ابتسمت فاتن"ف عنيا"
ثرىا"اتفضلوا يا بنات"
خرجوا البنات من المكتب...وسألت فاتن
"مقيمات؟؟"
"اه... يتيمات الاتنين..اول ماجيت كانوا ٤ بس ٢ اتجوزوا وهدير مكتوب كتابها وهتجوز قريب
ولسه عالية... البنتين دول متربين ف الملاجئ من واحد للتانى من وهما رضع"
"هما ماهومش اهل خالص؟"

"لأ... لقيطات...هتلاقى صورة المحضر اللي جت بيه كل بنت ف ملفها لو عايزة تعرفى التفاصيل"

"لا حول ولا قوة الا بالله"

هدير وعالية ماشيين ف الشارع بيتفرجوا على المحلات

زينب وققت قدام محل نرجس

"تعالوا نجيب الفرش من هنا مرة واحدة"

دخلت زينب والبنات وراها

زينب "سلامو عليكو"

قامت نرجس من مكانها

"وعليكو السلام"

"بقولك ايه يا مدام... انا عايزة شوية حاجات لجهاز عروسة...ملايات على فوط على كوفرات"

نرجس "عيونى...وعندى بطاطين ولانجيريهات كمان...مين العروسة ف القمرات"

شاورت زينب على هدير

نرجس "ربنا يتمملها بخير وتشيلى ولادها...عقبال اختها"

رن موبايل نرجس... جابت من ع الرف كتالوج ملايات

"طب نقى من دول اللي يعجبك... كل اللي فيه عندى.. ثوانى ارد ع التلفزيون"

"الو... ايوه يانرمين... زمانه جالك يابنتى مشى من عندى من بدرى... بتهزرى؟؟ ده وقته... هاتى

اخو كى.. ايوه يا طه... يالا وصلها ومنتأخرش عليها... اه فيه شغل وانا لوحدى...مع السلامة"

طه بيركن العربية قريب من المحل

نرجس بتلف المشتروات ف شنط كبيرة

طه رايح ع المحل...دخل

"سلامو عليكو"

بيردوا كلهم السلام

شافته عالية... قبل ما يشوفها... ارتبكت لما افتكرت الحلم
نرجس "تعالى لف باقى الحاجات دى لحد ما اعمل الحساب"

عالية قربت من هدير وحطت ايدها ف ذراعها
طه بيلف الحاجات وبيص قدامه... شاف عالية
افتكرها... لحظات بيص لها وهو مبتسم لها.. ارتبكت زيادة

شاف طه ارتباكها... محبش يزوده فكملة شغله
حست هدير بارتباك عالية... مالت عليها وشوشتها
"مالك؟"

عالية بهمس "مفيش"

طه بيختلس نظرات لعالية... وخطر على باله سؤال مين فيهم العروسة... وفجأة وهو بيلف اخر

حاجة

"مبروك"

ردت هدير بتلقائية "الله يبارك فيك"

زينب خلصت دفع الحساب

"شكرا يامدام... حاجتكم اسعارها حلوة"

"العفو... وعقبال ماتيجوا تاخدوا حاجة النونو"

"ان شاءالله... هدير... شوطينا تاكسى نخط فيه الحاجة"

هدير خرجت من المحل... وعالية معاها

طه بيتصنع الهدوء... راح ناحية الباب بيص عليهم

هدير وقفت تاكسى... وعالية ماشية وراها بتحاول تدارى ارتباكها بانها مش عارفة تتكلم ولا

تتصرف

راحت زينب قعدت ف التاكسى

طه عايز يكلم عالية...بيفكر بسرعة وهما بياخدوا الحاجة يحطوها ف التاكسى

"اسألها عن اسمها ولا عن رقم تليفونها... هيبقى منظرى ايه لو سألتها كده... اقولها ايه قبل ماتمشى"

وهو بيفكر شاف اخر لفة كبيرة...اخدها وراح يوصلها...كانت عالية راجعة تاخذها...

وقف قصادها يناولها اللفة... اخدتها منه

"ابقى تعالى نورينا"

"شكرا"

اخذت منه الحاجة بسرعة ورجعت للتاكسى بسرعة...مشى التاكسى وهو واقف يبص عليهم

وهو يقول لنفسه

"انت اهيل...فيه حد يقول لواحدة ابقى تعالى...طب قولها بتدرسى ايه ولا ساكنة فين ولا حتى

اسمك ايه... غبي"

عالية وهدير ف اوضتهم ف الدار

هدير عمالة تضحك

"هو يقولك تعالى نورينا انتى تقويله شكرا...ده مش رد ده خالص"

عالية متغاظة"اعمل ايه انا اتلخبطت اول ما شفته... حسيت انى مش مجمعة...انا كويس ان صوتى

طلع اصلا"

"وانا اقول البت مالها لزقت فيا كده ليه"

"انا اول ما شفته وافتكرتة وانا حسيت بالاحراج"

"ايه يابنتى...احراج ايه ده كان حتة حلم...يعنى هو ميعرفش حاجة عنه"

"معرفةش بقى...الحمدلله انا مشينا...لو كنا فضلنا شوية كمان مش عارفة كان ممكن يحصل ايه"

"ايه الحكاية يالولو... هو القلب دق ولا ايه"

"بتقولى ايه ياهدير..انا بتاعة الكلام ده...استغفر الله العظيم"

"هو انا قلت انتى بتعملى حاجة غلط...بس لخبطتك دى يعنى.."

"ميعنيش حاجة... احراج مش اكثر...نامى نامى"

فاتن قاعدة مع ميار بالليل
"ماما المدارس الاسبوع الجاي"
"بكرة هنترل نجيب لبس المدرسة ياميار متقلقيش"
"والدروس"
"احجزى وعلى تانى حصة اكون قبضت المرتب"
"قبضتى فلوس الشغل الجديد"
"لا لسه بدرى عليها مش اقل من شهرين"
"اومال هتصرفى منين"
"هبيع الدبلة واجيب واحدة صيني...ومش هتبان"
"هتبيعي دبلتك ياماما"
"هبقى اجيب غيرها ان شاءالله...مش هيحصل حاجة يعنى...المهم انتى تذاكرى ومتفرحيش ابو كى
فيا"
"حاضر ياماما والله مش هتندمى ان شاءالله"



جرس الباب رن

قامت فاتن تفتح... لقيت طه قدامها
ابتسمت بترحيب وهى بتوسع له يدخل
"طه... اهلا وسهلا... ايه المفاجئة الحلوة دى"
دخل طه وسلم عليها وباسها
"ازيك يافاتن عاملة ايه"
"الحمدلله... خطوة عزيزة"

قامت ميار تسلم عليه
"ازيك يا خالو... واحشنى"
"ازيك انتى يا حبيبتى... عاملة ايه"

قعد طه وقعدت معاه فاتن وميار
"ازيك يا طه وازى نرمين"
"الحمدلله بخير... انتى عاملة ايه... مبيتصليش تسألنى خالص كده قلت اسأل انا"
"فيك الخير طول عمرك احسن منى... قومى اعملى شاي لخالك ياميار"
طه "مفيش داعى انا نازل على طول"
شاورت فاتن لميار انها متسمعش كلامه... دخلت ميار المطبخ
"طمينى عليكى يافاتن اخبارك ايه؟؟"
"الحمدلله ف نعمه... ربنا يخليك يا طه انك بتودنى وتسأل عليا"
"ان مكتتش اود اختى الكبيرة... لولا انى مش عايز اكبرك كنت قلت اللى مريبانى"
ردت فاتن بضحك
"ما انا مريباك فعلا... ولا هتنكر"
"لا يا ستى مقدرش انكر ابدا... اخبار الحاج عبد الحميد ايه"

ردت باقتضاب "بخير...نحمده"
قام طه "طب هقوم انا علشان ارجع المحل"
"وانت لحقت...نرمين عاملة ايه ف الدروس"
"ما انتى مبتسألين عليها"
ردت بانكسار "مانت عارف نرمين وابلة نرجس مبيحبونيش فمحبش اكون ثقيلة"
طه بيحاول ينفي الحقيقة اللي عارفها
"لا ازاي متقوليش كده... هي مشاغل بس"
فاتن بترد عليه بصدق
"انا مش زعلانة منهم...وعارفة ان كل واحد عنده مشاغل...كفاية انك كل فترة بتجيلي وتسال
عليا"
"انا كنت هعدى عليكى الصبح ف الشغل بس مفضيتش"
"اه صحيح انا سبت الشغل"
"ايه؟؟ليه؟؟"
"لا اتنقلت يعنى...قصدي انا سبت هناك وروحت دار ايتام"
"مرتاحة هناك؟"
"الحمد لله"
حط طه ايده ف جيبيه...وطلع فلوس كان محضرها
مسك ايد فاتن وحط ف ايدها الفلوس
"خلي دول معاكى"
فاتن وهى بتبعد ايديها عن الفلوس
"لا والنبي يا طه..خيرك سابق"
طه وهو بيديها الفلوس ويسيبها ف ايديها
"متقوليش كده...هو انا غريب"
جت ميار بالشاى
"الشاى يا خالو"
"معلش ياميار..مستعجل... سلامو عليكو"
فتح طه الباب وخرج...وفاتن بتدعيه
قفلت الباب وراه...فتحت الفلوس

"ياحبيبي...ربنا مايرميك ف ضيقة ابدأ"

"اذاكى فلوس؟"

"الحمدلله ربنا فرجها"

"الحمدلله...سبحان الله ياماما خالو طه غير نرمين ومامته خالص...بحس انه طيب زيك كده انما هما

اعوذ بالله"

"وانتى شفتى ايه من نرجس ... انا اللى شفت منها المر كله...ماعلينا ربنا يسهلها...ويرضيك

يااخويا"

عالية فى اوضتها ف الدار...دخلت عليها هدير

"ايه ده؟؟جيتى امتى"

"من ساعة كده.. وانتي عملتى ايه"

"شكلنا كده يا لولو مش هنعرف نجيب غير اوضة نوم بس"

"وماله... اللى يقدر عليه يجيبه وبعدين يبقى ربنا يكرمكم"

"والله انا مش طالبة اى حاجة...انا عارفة انه بيتعب اوى علشان نعمل البيت...بس كان نفسنا

نجيب انتريه مع الاوضة"

"يا ستي المهم يكون لك بيت"

"معاكى حق...واحنا يعنى مين هيجيلنا...لا لينا اهل ولا معارف ولا حد خالص...يوه خدتك ف

الكلام ومسألتكيش .. عملتى ايه؟"

"ولا حاجة... مش لاقية شغل مناسب"

"هى دروس التحفيظ خلصت؟"

"اه من يوم ما الدراسة بدأت ومبقاش فيه تحفيظ...يحضر الدروس بس"

"مشفتيش حد هناك"

قالتها هدير وهى بتضحك...ومخدتش عالية بالها من قصدها

"لا بشوف كل اللى بيحضروا عادى"

"لا مش قصدى...انا اقصد بتاع الحلم"

ردت بحزم"لا"

"ومالك بتتكلمى كده ليه"

مها بتسلم على طه

"ازيك"

طه "الحمد لله"

مها بتبص لرمين "اما انتى زباله ولا اسلم عليكى ولا اعبرك"

نرمين "حوش حوش مستنية سلامك... يالا هنتأخر"

اخذت نرمين مفتاح العريية وايدها ف ايد مها

"يالا ياطه... حصلنا"

فاتن ف مكتبها... وقاعدة معاها هدير وعالية

هدير "والنبي يا ابلة ابقى تعالى اتفرجى على شقتى"

فاتن "طبعاً يا هدير... وهاجى احضر الفرحة وباركلك ف بيتك وكل حاجة"

هدير بجزن "فرح!! احنا مش هنعمل فرح... احنا بعد ما عصام يكمل فلوس الاوضة ونستلمها هبقى

اروح معاها وخالص"

عالية "مش مهم الفرحة يا هدير المهم انك تبقى ف بيتك"

هدير "يالا الحمد لله على كل حاجة... من وانا صغيرة كنت بحلم بفستان الفرحة زى اى بنت... بس

يعنى هى جت ع الفرحة... ما احنا طول عمرنا محرومين من كل حاجة اشعنى دى اللى هتحققها"

فاتن بتأثر "اتوا هتوجعوا قلبى ليه... ياريتنى ما سألت"

هدير "اسفة يا ابلة... بس اصلك متعرفيش احساسى ايه دلوقتي... كان نفسى يبقى لى اهل... بلاش

اهل... ام بس تبقى معايا ف فرحتى"

فاتن بدموع "قلبتى عليها المواجه يا هدير... مين قال بس انى مش عارفة احساسك... انا كمان كنت

يتيمة زيكم"

بصوا لها هدير وعالية... بتساؤل ف عينيهما

وسألتهما هدير بتردد

"يعنى حضرتك كنتى ف ملجأ زينا"

فاتن "لأ... انا امى ماتت وانا عندى ٨ سنين ولان اهل امى واهل ابويا محدش فيهم استحملنى

عنده... كان لازم ابويا يتجوز.. واتجوز واحدة مكنتش عندها رحمة ورتنى العذاب اشكال والوان"

عالية "وباباكى"

فاتن "الله يرحمه كان طيب وبيصدقها وهي كانت بتقنعه انها بتعاملني عادى وانها زى اى ام بتربى بنتها
وتعلمها"

هدير "يعنى كانت بتعمل ايه"

فاتن "كان عندها محل وتمسكة بالشغل بيه ومرضتش تقعد ف البيت فكان شغل البيت كله عليا مع
المدرسة ده مع المعاملة السيئة منها واهمالها ليا لا تجيب لى لبس ولا تتكلم معايا ف فترة اى بنت
بتبقى محتاجة حد يكلمها"

عالية "ربنا احن من اى حد"

فاتن "اه والله يا عالية... كنت حاسة ان ربنا مش سايبني كان ليا واحدة صاحبتى مامتها حنينة اوى
وكانت بتحبني وتحن عليا...كنت محتاجة الحنان اكثر من الاكل والشرب واللبس والفسح اللي كنت
محرومة منهم طبعاً...مامة صاحبتى دى اللي كانت بتديني الحنان كله كنت بجبها اوى...هى اللي
كانت دايماً تصبرني وبتقولى ان اكيد ربنا زى ما بيحرمنا من حاجة بيعوضنا بحاجة تانية...وده قبل
ما تتفرق ف الكليات انا وصاحبتى والدنيا تشغلنا"

هدير "الحمدلله...ربنا عوضك بايه يا ابلة؟"

فاتن "كنت متفوقة اوى ف دراستي...ورغم اني كنت شغالة ف البيت ودادة لاخويا اللي هي خلفته
كنت دايماً بيجيب درجات عالية طول سنين الدراسة"

عالية "ماشاءالله ربنا بيعوض فعلاً"

فاتن "وشوفوا حكمة ربنا..وانا ف الكلية اتقدم لى عريس وهي اقنعت بابا الله يرحمه اني لازم اوافق
والعريس مكنتش عايزني اكمل دراستي وهما وافقوا ومحدش اهتم برفضى وكنت هموت ان تعبي
هيضع"

هدير وعالية ف نفس الوقت باهتمام

"وبعدبييين"

فاتن بابتسامة راحة

"مرات ابويا اكتشفت انها حامل والحمل ده كان ف مصلحتي...حامل وبتشتغل يبقى محتاجة حد
يراعياها ويراعى البيت وبابا واخويا وفركشت الخطوبة الحمدلله"

ضحكوا الاتنين

"الحمدلله...ربنا كبير"

فاتن "الحمدلله على كل حال...لولا اني كملت دراستي مكنتش اشتغلت ودى نعمه كبيرة اوى
الحمدلله"

هدير "واكيد ربنا عوض حضرتك بزوج احسن من الاولانى"
سكنت فاتن ووشها اتغير لما افتكرت انما اتجوزت عبد الحميد الاكبر منها ب ١٧ سنة علشان بس
تبعد عن عيشتها مع نرجس
وردت على هدير بابتسامة تدارى بيها حزنها
"الحمد لله على كل شئ"
قامت عالية من ع الكرسي وقربت من فاتن
"ابلة...عايزة احضنك ممكن؟"
خدتها فاتن ف حضنها..وعيطت عالية كثير
هدير ودموعها نازلة
"طيب بتعيطى ليه دلوقتى...المفروض انا اللى اعيط"
عالية وهى بتمسح دموعها
"كنت خايفة اوى بعد ابلة ثريا ما طلعت معاش وانتي هتمشى بعدها انى ابقى لوحدى...ربنا بعت
لى ابلة فاتن اللى حسيت انما اطيب واحن حد قابلته"
فاتن "ربنا يعلم يا بنات انا ببحبكم قد ايه انتم وكل بنات الدار...بحس انى كان ممكن ابقى مكانكم
فبعتركم كلكم بناتى"

رن موبايل فاتن...

"الو...ايه ياميار مالك؟؟ مفيش درس؟؟ طب تعالى ونبقى نروح مع بعض...بالا مستنياكى"
قفلت فاتن مع ميار
"هقوم امر على البنات لحد ميار ما تيجى...واهو فرصة تتعرفوا عليها"
هدير وعالية قاموا وراها
"هنقعد نستناها ف الجنية"
"طيب هخلص واجيلكم"

نرمين ومها ف المدرسة مع بعض
"ما تروحي معايا يا مها وبعدين نروح الدروس مع بعض"
"ماشى...بس قوليلى هو اخوكى هيوصلنا برضه؟"

"اه"

"اففف بقى"

"ليه؟"

"ليه ايه؟... واحنا صغيرين اننا نروح ونيجى لوحدنا... يا شيخة انا زهقت دى ماما وبابا مش خنقنى

كده... اكيد مبيثقش فيكى"

"لا طبعا بيثق فيا"

"او مال ليه رايح جاي معاكى... وانا بقيت مربوطة بيكم وانتم بتجرونى وراكم"

"هو بيخاف عليا بس... بدل ما اركب مواصلات ولا تاكسيات وحد يضايقنى"

"بذمتك انتى مصدقة؟"

"قصدك ايه"

"مقصدهش... بصى لو اخوكى هيفضل يودينا ويحبنا كده هبقى اقبالك ف الدروس... مش معقول

تبقى خنقة ف كل حنة كده... ياستى نمشى لوحدنا فيها ايه"

"وافرضى حد عاكسنا"

"ماتسيبى اللى يعاكس يعاكس... هيخطفنا يعنى"

فاتن مع ميار وعبد الحميد ف البيت بيتعشوا

عبد الحميد "امتحاناتك امتى يا ميار"

ميار "لسه متحددتش يا بابا بس اكيد قريب مش هتبعد عن النص الاولانى من يناير"

عبد الحميد "صعبة الدراسة عليكى؟"

ميار "لا الحمد لله... اهو الدروس والمدرسة ماشية"

عبد الحميد "وقلة تواجد امك ف البيت... مش مأثر عليكى"

فاتن "انا مستعدة ارجع تانى للشغل اللى بخلصه بدرى... بس ادفع انت فلوس الدروس"

عبد الحميد "هو انا كل كلمة اتكلمها فلوس... فلوس... فلوس... انتى ايه فاكرانى قاعدلك على بنك"

فاتن "لا حول ولا قوة الا بالله... مش انت اللى بترمى كلام على شغلى... هو انا يعنى فرحانة وانا

طول اليوم بره"

عبد الحميد "الواحد ميتكلمش كلمة الا تعملى منها حكاية ورواية... انتى ايه يا شيخة فاضية"

قام عبد الحميد... وميار بتبص لفاتن وتشاورها على راسها... وبتقول بهمس

"طنشى"

وحذفت لها بوسة وهى بتكمل عشا...ضحكت لها فاتن وردت ببوسة تانية

طه ونرجس ونرمين داخلين شقتهم

وقبل طه ما يدخل اوضته

"طه... استنى...عايزة اسألك سؤال"

التفت ليها طه

"نعم؟"

نرمين"انت ليه مبتتشش فيا"

طه باستغراب"نعم؟؟ مبتتشش فيكى؟؟ مين قال كده"

نرمين"اومال ليه على طول ملازم خطواتى كده ورجلك على رجلى ف كل حته"

نرجس"اخوكى ويوصلك ويخلى باله منك"

نرمين"اشمعى انا...ماكل البنات مش كده...على فكرة انت خليت شكلى وحش اوى...بنات كتير

بقوا فاكرينى وحشة من كتر مانت مراقبينى كده"

طه"بنات مين...ومالنا احنا بالناس...اللى يفتكر يفتكر المهم انا نيى ايه"

نرمين بزغيق"اسمعوا بقى... انا مش صغيرة...كلها كام شهر وهدخل الجامعة... لو فضلت تودينى

وتجيبينى كده زى عيال الحضانة مش رايحة مدرسة ولادروس ولا امتحانات كمان"

نرجس"يا خرابى...وتضيعى مستقبلك"

نرمين"ماهو انا مش عيلة صغيرة اخوها بيراقبها"

نرجس"خلاص... كله الا تعليمك"

طه"ايه ياماما...مش فاهم يعنى ايه اللى حصل وبعدين هى بتهددنا"

نرمين وهى داخلة اوضتها بتزعق

"اخر كلام عندى قلته"

بعد ما دخلت اوضتها

طه"شايفة طريقتها"

نرجس بضحك وبتطبطب عليه

"اختك الصغيرة وبتدلح عليك...سيبها براحتها وهى هترجع تقولك ابقى وصلنى"

"انا خايف عليها"

"من ايه... ماهى مبتقتش صغيرة وليها حق تتكسف من صاحباتها... يالا هغير هدومي واحضر العشا

وانت غير هدومك وادخل راضى اختك وخليها تيجى تتعشا معانا"

طه وهو مستنكر كلام مامته

"تتعشا متتعشاش هي حرة... تصبى على خير انا داخل انام عندى شغل بدرى"

طه ف اوضته على السرير... ويفتكر عالية يوم ماشافها ف المحل

بيتسم وهو بيفتكر ارتباكها وهما ف المحل

وافتكر يوم ما شافها عند الجامع

بص ف النتيجة... شاف اليوم الاربعاء

وخطرت على باله فكرة

"يارب اعرف اشوفك تانى"

(٤)

فاتن خارجة من مكتبها... راحت الجنيئة لعالية وهى قاعدة مع البنات قدام المراجيح

قعدت جنبها

"عالية انتى لسه بتدروى على شغل"

"اه يا ابلة... ومفيش اى شغل مواعيده تناسب شغل الدار هنا"

"بقولك ايه... اول السنة بيتزل عقود ف الوزارة عندنا وانا كده كده هطلب حد للدار علشان هدير

هتمشى... ايه رأيك؟"

"بجد؟؟ ياريت"

"بس العقد بيبقى ضعيف اوى... يعنى ب ١٥٠ جنيه تقريبا"

"ماشى مش مهم احسن من مفيش... مش عارفة اقولك ايه يا ابلة ولا اشكرك ازاي ربنا يخليكى

يارب"

"تشكرينى على ايه بس... يالا العصر قرب قومى علشان تلحقى معاد الدرس"

"مفيش درس النهاردة... الشيخ مسافر عمرة وأجل الدروس لحد ما بيحى"

طه ف عربيته ومعاه خالد

"يا عم طه والله ما كان له لزوم توصلنى"

"انا كده كده كنت جاى الناحية دى"

خالد وهو بيتزل

"طب متشكر ع التوصيلة... سلام"

"اى خدمة... مع السلامة"

نزل خالد... وركن طه على سور الجامع وفضل قاعد ف العربية

عينيه بتدور ف الشارع شوية يبص قدامه وشوية فى المراية وراه

سمع صوت الاذان... فضل مستنى يمكن يشوف عالية جاية

ولما سمع الاقامة... نزل بسرعة يلحق الصلاة

بعد الصلاة قعد مستنى ف العربية نص ساعة...ولما فقد الامل مشى

طول الطريق وهو ماشى بي فكر ف عالية

"هو علشان قابلتها مرة هنا...ييقى هتيجى تانى ف نفس المعاد ونفس اليوم...مش شرط
طبعاً...يمكن جت صدفة... يارب ارزقنى بصدفة تانية زى صدفة المحل كده...وساعتها مش هفوت
الفرصة دى تانى ابدأ"

نرمين ومها رايحين المدرسة

شدت مها نرمين على مدخل عمارة...على السلم...فتحت مها شنطتها...طلعت روج وماسكارا

ومرايا

"امسكى لى كده المرايا يا نرمين"

"انتى هتعملى ايه"

"رتوش خفيفة كده بس تظبط وشى"

"ف المدرسة!!"

"وايه يعنى...ده روج خفيف كأنه زبدة كاكاو...مش اول مرة احط يعنى"

"مكنتش باخد بالى"

"احطلك؟"

"اخاف"

"عبيطة وجبانه"

خلصت مها...ورجعت الحاجة ف شنطتها تانى وقالت لنرمين

"ياللا بينا"

طه بيلبس...دخلت له مامته

"انت لسه منزلتش ياطه...هتتأخر؟"

"راحت عليا نومة ياماما"

"مالك يا حبيبي... بقالك كام يوم كده مش طبيعى...سرحان كثير...تكونش بتحب"

قالتها نرجس وهى بتضحك له...ضحك طه
"تفتكرى؟"

"ياريت ده يبقى يوم المنى...شاور انت بس"

"لو لقيتها مش هشاور انا همسك فيها واقولها هاتى عنوانك"
"انا مش فاهمة حاجة"

"لو قعدت احكيلك مش هروح الشغل"

"ف داھية الشغل..مش هتتحرك الا لما تحكىلى"

طه كان بيخلص لبس...وكمل كلامه وهو خارج من الاوضة

"الحكاية تتلخص ف انى شفتها مرة صدفة ف الشارع...ومرة تانية انا جيت المحل لقيتها هى ومامتها

واختها بيشتروا جهاز لاختها...وبس..لااعرف اسمها ولا عنوانها ولا حتى بتدرس فين؟"

نرجس كانت وراه وهو رايح يفتح الباب

"انا بيورد عليا كتير...انھى واحدة فيهم"

"مش هتفتكرىها اكيد...الكلام ده كان من بيحى ٣ \ ٤ شهور كده...يالا انا نازل...ادعيلى"

"رنا يكرمك يا حبيبى ويرزقك ببنت الحلال اللى تريح قلبك"

هدير داخله على فاتن مكتبها

"صباح الخير يا ابلة"

"صباح النور يا هدير"

"بعد اذنك هستأذن عايزة اروح بس انضف الشقة عشان الاوضة جاية النهاردة العصر"

"الف مبروك يا حبيبتي...روحي"

"واقولك حاجة كمان"

"خير"

"عصام اتصرف ف مبلغ كده وهيشترى انتريه مستعمل...اصل حسينا ان الشقة هتبقى فاضية اوى"

"معلش اھى خطوة وبعد كده نجيبوا كل حاجة"

"ان شاءالله...انا هبتدى افرش وتوكل على الله يوم ٢ \ ٢"

"كويس يعنى بعد ٣ اسابيع تقريبا...هتوحشينا يا هدير"

"ربنا يخليكى يا ابلة... وانتوا كمان هتوحشونى بس متقلقيش انا مستغناش عن عالية وهتلاقينى كل

شوية عندكم"

"تنورى...ربنا يسعدك يارب"

"بعد اذنك يا ابلة"

فاتن وميار ماشيين ف الشارع

ميار حاضنة كتبها وماسكة ف ايد فاتن ويتمشوا

"ماما عايزة آيس كريم"

"ف الشتا كده"

"حلاوته ف الشتا انتى مسمعتيش عمرو دياب ولا ايه...ايس كريم ف ديسمبر ايس كريم ف جليم"

"هههه ماشى...هاتى ايس كريم...مناسبة ان بكره اخر يوم امتحانات"

وفتحت فاتن شنطتها ادبتها فلوس

"انا هقف اتفرج ع المحلات هنا مش هبعده"

راحت ميار تشتري ايس كريم...على مرمى بصر فاتن

ومشيت فاتن بخطوات بطيئة ووقفت قدام محل...وسرحت

ميار جت بالاييس كريم

"اتفضلى ياماما...ايه سرحانة ف فستان فرح ليه؟ عايزة عريس ولا ايه"

"تعالى كده"

ودخلت فاتن المحل...جت البنت اللى بتشتغل ف المحل

"اهلا وسهلا...اوامرى حضرتك"

"الفساتين دى تأجير مش كده؟"

"اه عندنا تأجير وتفصيل وبيع"

"التأجير بكام"

"مش كله زى بعضه...حسب موديله او حالته"

ميار واقفة مستغربة ومش عارفة تسأل فاتن

فاتن كملت اسئلة

"يعنى ف حدود من كام لكام"

"طب حضرتك يامدام قوليلى طلبك وانا اقولك...عندى حاجات من ٤٠٠ ل ١٠٠٠...بس ابو

الف ده اول لبسة"

فاتن وهى بتشاور على ست قاعدة على مكتب...

"المدام تبقى صاحبة المحل"

ردت البنت وهى مستغربة وخايفة

"اه"

راحت فاتن على صاحبة المحل وميار وراها مش فاهمة

طه و نرجس داخلين البيت

شافوا مها ونرمين قاعدين مع بعض بلبس البيت

ارتبك طه من احراجه...وهما فضلوا قاعدين زى ماهما

دخل على اوضته بعد ما سلم عليهم

غير هدومه... وفضل مستنى ف اوضته وهو سامع صوت البنات بره ... لحظات والباب خبط عليه

كان مستنى نرجس تدخل...الباب خبط تانى

قام فتح....لقى مها قدامه

"ياللا ياطه...العشا جاهز"

قالتها ومشيت وهو فضل واقف مستغرب من اللى بتتعامل معاه كأنها واحدة من البيت وكل اللى

كان بينهم كلام عابر

فاتن بترتب اوضة ميار

"ياللا نامى يا حبيبى وهصحيكى بدرى تذاكرى قبل الامتحان"

ميار وهى ع السرير بتتغطا

"ماما...انتي فكرتي امتي ف حكاية فستان الفرحة دي"
"والله ولا فكرت ولا حاجة...لما روحتي تجيى الايس كريم ولقيت الفساتين قدامى...وافكرت كلام
هدير قلبي وجعنى...فجت الفكرة ف دماغى ودخلت وزى ما شفنى كده"
"متكسفتيش وانتي بتحكى لصاحبة المحل"
"اتكسف من ايه...انا كل اللى طلبته اها تعمل تخفيض كبير لبنت يتيمة تفرحها يوم جوازها...
ومعتقدش يعنى ده هيخسرها حاجة"
"بس قالت لك النص بالنص...هتدفعى منين"
"اهو اللى هنوفره من الدروس ف اجازة نص السنة ينفع ف فستان هدير"
"ماما...انتي شايلة همها اوى كده ليه"
"حاسة بيها وصعبانة عليا...مالهاش حد خالص ونفسى افرحها...ياللا نامى انتى تصبحى على خير"
قربت فاتن من ميار باستها وغطتها وقفلت النور وخرجت م الاوضة

طه خارج من اوضته الصبح
سمع صوت نرجس ف المطبخ...راح لها
"صباح الخير ياماما"
"صباح النور يا طه"
"ماما...هى مها بايئة هنا ليه؟ انا معرفتش اسألك امبارح"
"عادى...بتذاكر مع اختك"
"واهلها فين؟"
"فين ايه...انا استأذنت امها..مالك؟"
"لا ابدا بس مستغرب...عموما لو قالتك ان نزمين تروح هى كمان تبات... متخليهاش تروح"
"طيب...هتفطر"
"لا هفطر ف الشغل...سلام"

طه رايح ناحية الباب... شاف مها رايحة المطبخ
"صباح الخير يا طه"
طه وهو مش يبص لها "صباح النور"

مها وهى واقفة قصاده
"توانى"
وقف قدامها بص لها
قربت منه...مسحت على خده بايديها
رجع لورا فجأة..ضحكت
"ايه مالك... كان فيه حطة من منديل مبلول على وشك"
مسح طه على وشه بايديه...عشان يمسخ اى اثر للمنديل بارتباك
"شكرا"
ومشى طه بسرعة وخرج ومها واقفة تضحك على ارتبائه

فاتن مع هدير وعالية ف المكتب
هدير بتعيط وعالية بتحضنها
فاتن "وانا اللي بقول هتفرحى تعيطى كل العياط ده"
هدير "مش مصدقة يا ابلة والله...ربنا يخليكى لينا يارب"
فاتن "مش انا لوحدى على فكرة"
هدير "مش فاهمة"
فاتن "مدام ثريا اتصلت بيا من شوية... وسألت عليكم حكيت لها انك فرشتى وحددتى معاد الفرح
وحكيت كل اللي فات...قالت انها هتجزلك كوافير نقوط فرحك...ابسطى يا ستى وهنعملك
احلى هيصة وانتي بالفستان الابيض والطرحة"
زادت هدير ف العياط...وهى بتقول
"انا مش مصدقة كل ده.... شكرا يا ابلة...شكرا اوى...اشكرك يارب"

فى شقة هدير... هدير قاعدة جنب عريسها
ومعاها عالية وميار وفاتن وثرىا وزينب
واصحاب عصام جايين طبله وبيغنوا ويرقصوا

رن موبایل فاتن... قامت فاتن خرجت ترد
"الو... ازيك يا طه... الحمد لله بخير... انت عامل ايه؟... لا مش ف البيت انا ف مشوار كده... تنور
اي وقت... متحرمش منك ابد... هبقى موجودة ف البيت يوم الجمعة مش نازلة... والنبي ماتكلف
نفسك... كفاية انك بتسأل عليا بس.. ربنا يخليك.. مع السلامة"
رجعت فاتن... وكانوا اصحاب عصام خلصوا طبل ورقص

سلموا على العروسين... ونزلوا
بعد ما نزلوا... وقفت فاتن وميار وزينب وثرى وعالية وسلموا على بعض ف الشارع
زينب " تعالی يا عالية معايا اوصلك الدار ف سكتي... علشان متركيبش تاكسى لوحذك"
"حاضر"
وقفت زينب تاكسى... ركبت قدام وعالية ورا

ف الطريق... وهما ماشيين
كان الطريق للدار ممكن يمر من عند محل طه
فضلت عالية تدعى ف سرها ان السواق يعدى من قدام المحل مش من طريق تانى... وفعلا مشى
السواق ف نفس الشارع

عالية كان قلبها بيدق بشدة وهى بتقرب من المحل وجواها تساؤل
"ياترى هشوفه ولا لأ؟"

(٥)

طه ف المحل... نرجس قاعدة ع المكتب
"ماما يالا... الساعة ١١"
"طب هقفل حساباتي واقوم... ٥ بس"
"طيب"

راح طه وقف على باب المحل... لحد نرجس ما تخلص

عالية بتقرب بالتاكسى... ولما لمحت حد واقف على باب المحل وهى مش مفسرة مين... بقى قلبها
يدق بشدة

قرب التاكسى... وعالية اتأكدت ان اللى واقف طه
قرب التاكسى اكر لحد ما بقى قدام طه... شافته... وعينيها جت ف عينيها... شافت نظرة مفاجئة
سريعة وابتسامة

طه وهو على باب المحل... فجأة شاف عالية ف التاكسى
اتفاجئ... وابتسم لها بفرحة من المفاجئة

عالية مقدرتش تبعد عينيها عنه.. كأنها بتحاول تشبع من نظرتة... ولما التاكسى عدا... التفتت براسها
كلها تبص له

طه فضلت عينيها على عالية... حتى بعد ما التاكسى مشى فضلت نظراتهم متعلقة لبعض... وشافها
وهى ملتفتة ليه... اتقدم خطوات على الرصيف وهو بيودعها بعينيها لحد التاكسى ما اختفى

رجع طه دخل المحل... نرجس قامت وقفلت المكتب

"يا لا خلصت... طه... طه"
"نعم ياماما... خلاص؟؟"
"اه خلاص... مالك مسهم كده ليه"
"البت اللي قتلتك عليها شفتها معدية ف تاكسى دلوقتي مع مامتها... عارفة ياماما كل ما اقول
خلاص مش هشوفها تاني ولا اعرف اوصلها ازاي اشوفها صدفة... ميعرفش انساها"
"محدث عارف يا بني النصيب فين... لو ليك نصيب معاها هتشوفها هتشوفها"

عالية ف اوضتها ف الدار
بعد ما غيرت هدومها وراحت تنام
كل ما تغمض عينيها تشوف نظرة طه ليها... تفرح انه شافها وفاكرها... وترجع تحس بالذنب من
تفكيرها فيه
"استغفر الله العظيم... يارب... يارب يكون من نصيبي"

طه قاعد بيخطر لوحده
جت مها وقفت جنبه
"اجييلك حاجة من طنط"
"لا شكرا"
قعدت معاها ع السفارة
"هو انتي زعلان مني ف حاجة"
"انا؟؟ ليه"
"بتتكلم معايا جد اوى كده يعني"
واستغرب طه من كلامها
"لا انا بتكلم معاكي بطريقتي العادية... مش متعمد طريقة معينة"
"بالراحة عليا شوية طيب وبلاش الجد اوى ده... ده انا زى اختك"
قامت مها من جنبه وسندت على رجله وهي بتقوم
بعد ما مدخلت المطبخ...

قعد طه مستغرب مسكنها ليه
"هى البت دى قليلة الادب ولا عبيطة ولا ايه"
جت نرجس وقعدت معاه
"ايه يا طه"
"ايه؟؟"
"مها جت المطبخ ومكسوفة انها لما بتتكلم معاك عادى انت بتصدها"
"لا بصدها ولا حاجة... انا عادى"
"هى اتكسفت منك وبتعتبر نفسها زى نرمن وواحدة م البيت... ابقى خلى بالك من كلامك معاه"
"لاهما حساسة شوية"
"حاضر... لو انى شايف ان ميصحش وجودها كثير ف البيت كده"
"ششش لتسمعك... اهى بتونس اختك واحنا مش موجودين.. كتر خير امها انها سايباها مع اختك"

طه عند فاتن ف البيت
"والنبى يا طه تتغدا معانا"
"معلش يافاتن... مش هقدر"
"مش عايز تتغدا معانا ليه... انت موراكش حاجة النهاردة"
"معلش... النهاردة اليوم اللي بتغدا فيه ف البيت... طمني بس عليكى انتى عاملة ايه... وميار عاملة"
"ايه"
"الحمد لله.. ميار راحت تجيب حاجة وزمانها جاية.. هتفرح لما تشوفك"
"ان شاءالله... يوم ما كلمتك كنت جاي لك... الحمد لله انى اتصلت الاول"
"كنت ف فرح عقبالك"
"يارب... فرح مين؟"
"واحدة من الدار عندى... والله ياطه البنات والولد ايتام بس اتعمل لهم ليلة ع القدر كده بس كانت"
"جميلة"
"ربنا يسعدهم عقبال ما تفرحى بميار"
"وانت مش ناوى تفرحنا"

"ادعيلي"

"ربنا يراضيك يارب"

وطلع طه فلوس من جيبيه

"خلى دول معاكى يا فاتن"

"ليه بس...ربنا يكرمك يارب"

"هو انتى ف المملجأ بتقبلوا تبرعات؟"

"اه طبعا"

طلع فلوس تانية

"طب دول للملجأ"

اخذت منه الفلوس...

"والله يا طه الايتام دول بيحتاجوا المشاعر والحنية اكثر من الفلوس...دول بيستنوا يوم اليتيم من السنة

للسنة علشان الناس بتروح تسأل عليهم وتقعدهم معاهم"

سكت طه شوية ويفكر

"هو يوم اليتيم قدامه شهرين تقريبا...هما اللى عندك اطفال؟"

"اه بنات صغيرين"

"يوم اليتيم هاجى واعملهم مفاجئة حلوة ان شاءالله"

"بجد يا طه...ربنا يفرح قلبك على قد نيتك الحلوة دى"

فى الدار... وفى الجنية... بعد صلاة الجمعة

بنات الدار كلهم فى الجنية... وناس تانيين موجودين

فاتن بتمر بينهم والاطفال مبسوطين

هدير جت هى وعصام...وعلى باب الدار راحت عالية تستقبلهم بفرحة...وبعد ما سلمت عليهم

هدير"ياللا يا عالية...جايبين بالونات...شدى حيلك وتعالى اتفخى معانا"

عالية"شكلنا كده نَفَسْنَا هيتقطع النهاردة"

هدير"فين ابلة فاتن"

عالية"تعالى...هى وميار هنا"

راحوا يسلموا على فاتن...وبعدها راحوا يقعدوا مع البنات الصغيرين

عالية كانت واقفة مع فاتن لما رن موبايلها
"الو...ابوه ياطه انا ف الدار...انت فين؟؟ هقابلك ع الباب حاضر...ايه المفاجئة دى؟؟ماشى
هصبر...هتلاقيني حالا"
بعد ما قفلت
"اخويا بيقول عامل مفاجئة للاطفال...هروح استقبله"
"وانا هروح انفخ البالين"

فاتن واقفة ع الباب... شافت عربية طه بيركن
نزل سلم عليها
"افتحى الباب الكبير يا فاتن...فيه عربية عايزها تدخل"
"عربية ايه؟"
"دى المفاجئة"
قالت فاتن للبواب يفتح الباب...ودخلت عربية ربع نقل
"ايه ده يا طه؟"
"ده dj ومسرح عرايس وارجوز للاطفال"
"الله... هيفرحوا اوى "
"هقف معاهم لحد ما ينصبوا حاجتهم واجيلك"

راح طه للناس وهما بيتزلوا حاجتهم
اتلموا عليهم بعض الاطفال وهما فرحانين
طه بيدور بعينه على فاتن.... شافها من بعيد..راح لها

عالية مع هدير وعصام وحواليهم اطفال كثير
"انا تعبت...هروح اشوف ابلة فاتن وارجعلكم"

طه ماشى... وعالية ماشية... واتقابلوا قصاد بعض
بينهم ٣ امتار... متقابلين... المفاجئة وقفتهم
لحظات يفوقوا من المفاجئة... طه يتقدم ناحية عالية وهو مبتسم بفرحة الصدفة... عالية ثابتة مكانها

لما بقى بينهم خطوات... مد ايده يسلم عليها
"ازيك"
مدت ايدها تسلم عليه... واول ما ايديهم تلامست
سحبت ايديها بسرعة لما حسست ان قلبها بيرتجف
"دائما كانت بتجمعنا صدف... بس احلى صدفة صدفة النهاردة... على الاقل هعرف اسمك ايه... انا
طه"

عالية بتحاول تتكلم... صوتها طلع همس
"عالية"
"الله... اسمك حلو اوى يا عالية"
"شكرا... بعد اذنك"
خطت خطوات تبعد... راح وراها
"انتى رايحة فين؟؟ انا ماصدقت قابلتك وعازير اتكلم معاكى... انا مكنتش اعرف ان ليكى ف العمل
الاجتماعى... انتى هنا لوحدك ولا مامتك معاكى؟"
اتفاجئت باستنتاجه... وحسست ان الكلام صعب عليها... فضلت ساكنة
جه واحد من العمال
"يا استاذ لو سمحت... حاسب السواق قبل ما يمشى"
التفت له طه "حاضر ثوانى"
بص لعالية "ثوانى هحاسب السواق وارجعلك... انتى قاعدة لامتى؟"
ردت باستلام لقدرها وتواجدها فالدار
"قاعدة"
"هرجعلك"

راح طه يحاسب السواق... وراحت عالية قعدت جنب هدير
عالية ماشية مغيبة... فرحتها انها شافت طه تانى راحت لما افكرت ووضعها ووضعها الاجتماعى

عالية سرحانة وهدير جنبها بتكلم الاطفال

التفتت لها هدير

"مالك"

"بصى"

وبصت عالية ناحية العربية وطه بيحاسب السواق

"ابص على ايه؟؟"

"طه هنا"

"طه مين؟ مالك يا عالية انتى بتخرفى ولا ايه"

"طه اللي حكيت لك عنه"

"بتاع المحل"

"هو"

"وايه اللي جابه هنا...وبدل ماتفرحى تعملى كده"

وهما بيصموا عليه...شافوا ميار بتسلم عليه وتبوسه

هدير برقت عينيها

"ايه ده؟؟ ميار بتبوسه؟؟ هو قرييها ولا ايه؟"

"اخو ابلة فاتن"

سكتت هدير هي كمان لما عرفت وهي مستغربة من الصدف اللي جمعتهم...والفرق الكبير بين عالية

وطه

طه واقف عينيه على عالية وهو بيكلم ميار...ولما جت فاتن واخذته يقعد على ترابيزة معاها...

وكان ال dj بيبدأ

عالية شايفاه قاعد مع فاتن... عينها غصب عنها بتيجى ف عينيه...تبعدها عنه بسرعة

طه بيتكلم مع فاتن عن الدار وفرحة الاطفال وبيجوا الاطفال يسلموا عليه...وكل ده وعينيه مش

بتفارق عالية الا لحظات

وتوقع انه موجودة مع اختها وجوز اختها اللي كان شافها معاها

هدير بتابع نظراتهم من غير ما ياخذوا بالهم وهى قلقانة من الجاى

جت طفلة "ابلة عالية... ابلة عالية... نورا وقعت واتعورت وبتخر دم"

جريت عليها عالية... شافت البنت واقعة

"مالك يا نورا... تعالى يا حبيبتى متخافيش"

شالتها عالية... وراحت بيها الحمام

غسلت لها الجرح... وطبطبت عليها

"رجلى بتوجعنى يا ابلة"

"معلش يا حبيبتى تعويرة صغيرة... هنروح نلفها وهتبقى كويسة... علشان تلحقى تتفرجى على

الاراجوز"

ضحكت البنت ولسه الدموع ف عينها

راحت عالية على اوضة مكتب فاتن... كان فيها صيدلية صغيرة

اخذت منها ميكروكروم وشاش وبلاستر وقعدت البنت قدامها

وفجأة دخل طه... اتفاجئت عالية... وتماسكت وكملت لف الجرح

طه واقف ساكت... لحد ما عالية خلصت

"اروح العب يا ابلة؟"

"روحي يا حبيبتى"

خرجت البنت من المكتب... وقامت عالية تحط الادوات ف الصيدلية

"عالية مالك؟؟؟ انا كنت فاكرك هتفرحى لما تشوفينى"

"اه طبعا... فرصة سعيدة"

"انا عايز اتكلم معاكى ومجيتش اكلمك واختك وجوزها معاكم... ممكن نتكلم هنا علشان

مسبيلكيش مشاكل"

"لا ابدا مفيش مشاكل ولا حاجة"

"هى مامتك جاية؟"

"استاذ طه... حضرتك فاهم غلط... اللي شفتها قبل كده مش امى... انا مليش ام ولا اب ولا

عيلة... انا من فتيات الدار هنا"

وقف طه جامد للحظات... بدون اى رد فعل... من المفاجئة

لاحظت عالية تغير تعبيرات وشه

قالت ف سرها "كنت متوقعة"

وبصوت مسموع

"عن اذنك اروح اشوف البنات... دى مسئولية وشكرا على تعبك والحاجات اللي عملتها"

"استنى هنا رايحة فين"

"ماشية"

"مش بقولك عايز اتكلم معاكى"

"اتفضل"

"احنا اتقابلنا مرات قليلة... ومع ذلك مغبتيش عن تفكيرى ابدا... وكنت بدعى ربنا انى اقابلك تانى

واعرف اتكلم معاكى... وبعد ما لقيتك مش هضيع وقت... عايز اخطبك... موافقة؟؟؟؟"

(٦)

المفاجئة عقدت لسان عالية وثلت تفكيرها
فرحة وقلق واستغراب خلوها مفيش اى تعبيرات على وشها
سألها طه بقلق وحزن
"انا غلظت؟؟ انتى مخطوبة ولا حاجة؟؟ اتسرعت صح؟"
ردت عالية بابتسامة طمنته
"انا اتفاجئت بس"
قالتها وقعدت... قعد طه قصادها
"عندى كلام كثير واسئلة وحكايات وحاسس انى نسيت كل حاجة لما شفتك"
احمر وشها... متكلمتش... كمل
"فاكرة يوم ماشفتك ف التاكسى"
هزت عالية راسها
"يومها حسيت ان دار بيننا كلام كثير... اللحظات اللى شفتك فيها قالت لى انك فاكراى وعارفانى
زى ما انا فاكرك وعارفك... كنت بروح ادور عليكى عند الجامع اللى شفتك فيه اول مرة بس
مكنتش بلاقيكى"
"انا بروح"
"مشفتكىش هناك... انتى بتروحي كل يوم؟"
"لا"
"يبقى انا كنت بروح ف ايام غير اللى انتى بتروحي فيها... احكى لى عن نفسك يا عالية"
"معنديش حاجة احكيها... زى ما انت شايف.. حياتى هنا"
"انتى هنا من زمان... قصدى يعنى اهلك توفوا امتى؟؟ وايه اللى جابك هنا ملكيش قرايب تانيين"
قبل ماترد عليه... دخلت فاتن المكتب
استغربت اهتم قاعدين مع بعض
"مالكم... فيه حاجة... قاعدين هنا ليه وسايين الحفلة"
عالية وهى بتقوم من مكانها مكسوفة

"نورا وقعت واتعورت وكنت بربطلها الجرح...انا رايحة اشوف البنات"
طه حس بكسوفها...محبش يكسفها اكثر...سكت
بعد ما خرجت عالية...بص طه لفاتن
"اقعدى بقى اما احكيك الحكاية من اولها...وشك حلو عليا يافاتن"
فاتن شافت فرحته...فرحت لفرحته لانها بتحبه...وقعدت تسمعه

نرمين ومها قاعدين ف الاوضة بيذاكروا
"انا جعت يامها...هقول لماما تحضرلنا الغدا"
"لا استنى شوية...مش الجمعة بتتغدوا كلكم مع بعض..استنى طه"
"قوليلى بقى...ايه حكاية اهتمامك بطه؟"
ردت مها وهى بتضحك بجرأة
"باين عليا اوى يعنى"
"اه"
"اومال هو مش فاهم ولا بيستعبط"
"انتي قصدك ايه"
"قصدى انه عاجبنى...عينى فيه بصراحة"
"بتحبيه يعنى...انتي مش كنتى بتحى واحد جاركم السنة اللى فاتت"
"اه بس لقيته مش ف دماغه قلت اشوف حد تانى"
"اللى اعرفه ان اللى يحب حد بيفضل يحبه"
"عبيطة... انتى فاكرة الحب ده كلمتين وتنهيدتين وخلص"
"اومال ايه"

"الحب انك توقعى عريس مناسب يجييلك اللى نفسك فيه ويفسحك ويدلعك وتمنظرى بيه على
صحابك"
"يا سلااااام"

"اومال ايه يابنتى...انتى فاكرة حب الافلام القديمة ده حب...اسكتى اسكتى احنا زمن تانى
خالص...قومى اتصلى كده بطه شوفيه جاي امتى"
"هو كان قايل رايح ملجأ علشان يوم اليتيم"

"يوم يتيم.. طيب... بقولك ايه انتى مش صاحبتى والمفروض تساعدين زى ما ساعدتك وخلصت

مامتك توافق اننا نروح درس مستر محمود علشان تبقى قريبة منه"

"يعنى هو اخد باله منى اساسا"

"المهم انى ساعدتك... صح ولا لا"

"صح... يبقى ساعدين وخلصي طه ياخذ باله منى"

"ازاى"

"بينى له انى مهمة بيه... ولحى له وشوفى رد فعله ايه وابقى قوليلى"

"طيب"

"قومى اتصلى بيه بقى"

طه قاعد مع فاتن... فاتن ساكنة

"ايه يا فاتن... مالك وشك اتقلب ليه كده... انتى تعرفى حاجة عن عالية تعلق؟"

"عالية مفيش زيها دلوقتى... انا دائما بضرب بيها المثل ف كل حاجة... تدين.. اخلاق... حنان"

"او مال ايه بقى... سكوتك ده قلقتنى"

"كل اللى حكيتيه حلوا اوى ليكم اتم الاتنين... مفكرتش بقى ف مامتك؟"

"ماما نفسها اخطب واتحوز... وحكيتها عن عالية وانى نفسى اشوفها تانى علشان اقولها انى عايز

ارتبط بيها"

"بس الكلام ده على ان عالية بنت عادية... تفتكر ظروفها دى مش هتأثر على رد فعل مامتك؟"

"لا مش هتأثر"

قالها طه بثقة... بصت له فاتن بعدم تصديق... كمل

"حتى لو اعترضت يا فاتن... هقنعها وانى عارفة ان ماما كل همها انها تسعدنا"

ابستمت فاتن بسخرية

"ياريت... انت وعالية مناسبين لبعض فعلا... انا متأكدة انك مش هتلاقى زيها ولا هى هتلاقى

زيك... بس لسه قلقانة من مامتك وهتشوف"

"انتى بس اللى شايفها وحشة"

قالها طه بدون تفكير... اتضايقت فاتن

"الله يسامحك يا طه"

حس طه ان فاتن زعلت

"انا اسف يافاتن... بس بجد انا مش عارف انتم ليه كده مع بعض... يعنى لو على انها كانت

بتتعصب عليكمى زمان فزى اى ام بتتفرز على ولادها"

"سيبك منى وخلينا فيك انت وعالية... هتعمل ايه"

"هكلم ماما لما اروح طبعاً"

"ماشى ياطه... بس فكر ف كلامى واعقله قبل ماتتصرف"

هدير وعالية قاعدين على جنب لوحدهم بعيد عن عصام

"مبروك يا عالية... ربنا يعوضك خير"

"انا قلقانة يا هدير... لما يسألنى عن اهلى هقوله ايه"

"زى ما متغيرش لما عرف انك من الدار مش هتفرق معاه ليكى اهل او لأ"

"قلقانة اوى... متنسش كلام ابلة فاتن عن مامته"

"بقولك ايه... هو لو راجل بجد ويستاهلك هيعمل المستحيل علشانك... اما لو طلع عيل يبقى

ميلزمكيش... احنا شفنا كتير ومش ناقصنا وجع قلب"

"ياخوفى من وجع القلب"

"اهو جاي مع ابلة فاتن... هروح انا لعصام واسيبكم تتكلموا براحتكم"

قامت هدير... وراحت فاتن تشوف الاطفال... وقرب طه لعالية وقعد معاها

"اتاخرت عليكمى؟"

"لا"

"كنت بحكى لفاتن عنك"

اتكسفت عالية وابتسمت... كمل طه

"قبل ما انسى... ادينى رقمك علشان ابقى اطمن عليكمى"

"معيش تليفون"

"بجد ولا مش عايزة تدينى الرقم؟"

"لا والله بجد"

"طب مش مهم... هعرف اطمن عليكمى برضه... احكى لى يا عالية عنك... عايز اعرفك اكثر واكثر"

"احكى ايه... احكيلى انت طيب"

"حاضر... شوفي يا ستي... انا طه"

"بجد؟"

اتفاجئ طه ان عالية بتهزر... اكتشف حاجة جديدة فيها... ان سكوتها وقلة كلامها كان من

كسوفها... وانهم فعلا بدأوا يقربوا من بعض

طه داخل البيت... شاف نرmin ومها قاعدين

"سلامو عليكو"

قالها وهو داخل... غمزت مها لنرmin

قامت نرmin وراه وهو داخل اوضته

"اناخرت ليه ياطه... احنا متغدناش مستنينك"

"استنتوني ليه كل ده"

"مها صممت انها تستناك وانا قلت استنى معاها"

"وماما؟"

"ماما لما لقت محدش هيتغدا دخلت نامت لحد ماتيجي"

"طيب انا داخل اصحيتها وسخني انتي"

"ماشى"

راحت نرmin لمها... دخلوا الاتنين المطبخ

"ايه قلتيله ايه"

"قلت له انك انتي اللي قلتى نستناه"

"طيب"

"حقا يا بت يامها لو صحيح تبقى مرات اخويا ونبقى على طول مع بعض"

"شدى حيلك معايا يا اختي... ساعتها بقى عايزين نخرج ولا نروح ولا نيحي محدش يقولنا

حاجة... خلينا نشم نفسنا شوية"

طه داخل لnr جس يصحيتها

"ماما... ماما"

دخلت عليهم نرمين

"يا لا الاكل جاهز"

تالى يوم... فاتن ف مكتبها...لقت طه داخل عليها

"صباح الخير"

"صباح النور ياطه...ايوه ايوه كده هبقى اشوفك كثير"

ضحك طه لفاتن اللي كانت بتضحك وهى بتكلمه...قعد

"عاملة ايه"

"انا الحمد لله كويسة...انت ايه اللي جابك"

"الهوا رمانى"

"يا سيدى يا سيدى... ربنا يسعدك ياطه زى ما بتسعد كل اللي حواليك"

"هى فين؟"

"ف الفصل"

"ينفع اشوفها"

"الا ينفع... طبعا ده انت اخو المديرة"

"مش حكيت لماما"

"وبعدين؟"

"افتكرت كلامك...حسيت ان معاكى حق...فمقلتش كل التفاصيل"

"وبعدين"

"بصى عالية امبارح حكيت لى كل حاجة...ودى حاجة هى مالهاش ذنب فيها... فانا مش عارف"

بقى هقول لماما ولا لا"

"مينفعش تخنى الحقيقة"

"بس ممكن اقول نصها"

"انت ادرى بمامتك"

"انا فكرت انها تتعرف على عالية الاول..ولما تحبها تبقى تتقبل ظروفها"

"مش عارفة ده حل ولا لأ...ومعرفش عالية هتوافق ولا لأ"

"هتكلم معاه واشوف"

"طيب...استناها ف الجنية وهبعت حد يناديها...علشان تتكلموا براحتكم"

عالية نازلة الجنية...شافت طه قاعد...فرحت

راحت له... قام طه...سلم عليها

"ازيك يا عالية"

عالية وهى بتسحب ايادها ببطء وبدون ارتباك

"الحمدلله...ازيك انت"

"الحمدلله"

قعدت معاه... مد علبة كانت معاه قدامها

"اتفضلى"

"ايه ده"

"موبايل وخط"

"لا شكرا مش محتاجه"

"بس انا محتاج اكلمك واطمن عليكى...وبعدين بترفضى ليه"

"متعودتش حد يجيبلى حاجة"

"من هنا ورايح لازم تتعودى...انتى هتبقى مراتى ومسئولة منى ومحدش هيجيبلك غيرى"

ترددت عالية لحظات...ومدت ايدها اخدت العلبة

"شكرا"

"العفو...كنت عايزك ف موضوع كده"

"خير"

"انا كلمت ماما عنك... بصى..زى ما انتى صريحة معايا من اول لحظة فانا هكون صريح معاكى

وعايزك تتقبلى كلامك ومتزعليش منى"

عالية بقلق "خير"

"انا عايزك تقابلى ماما الاول قبل ما تعرف حقيقة ظروفك...وف المقابلة متجيبش سيرة ظروفك

خالص...ممكن؟"

هل يشفع الحب ؟

(٧)

سكنت عالية... مفيش اى رد فعل منها... سألها طه

"زعلتى؟"

"انا عارفة ان مش من حقى ازعل... بس ف نفس الوقت مباحش الكذب"

"ليه مش من حقتك تزعلنى"

"علشان انا عارفة ان اى حد مش هيقبلنى اكون من عيلته وانا نفسى معرفيش عيلة"

"لا يا عالية متقوليش كده... انتى اى حد يتشرف بيكى"

ابتسمت عالية بسخرية ودموع محبوسة ف عينيها

"ربنا يخليك"

"انا مش بجاملك ولا انا بقولك اى كلام... يمكن انا لسه مش عارفك اوى بس انا متأكد من

اخلاقك... ده غير الكلام اللى قالته عليكى فاتن وهى اكيد عارفاكى كويس"

حست عالية بصدق كلامه... فرحت... ارتاحت... قالت له

"مامتك لازم تعرف الحقيقة"

"هتعرف طبعا... بس تتعرف عليكى الاول"

"ولما تسألنى عن اهلى اقولها ايه"

حس طه ان كلام عالية موافقة ضمنية... ارتاح

"متقلقيش... هنبقى نقول اى حاجة عايمة كده لا منها نكذب ولا منها نقول الحقيقة لحد ما اعرف

رايها فيكى"

"انا خايفة"

"متخافيش"

"افرض مامتك رفضتني بعد ماعرفت الحقيقة"

سألته وهى مرعوبة من رده... وعينيها ف عينيها... رد بدون تردد

"انا اختارتك انتى وحببتك انتى... مفيش حد ولا حاجة هتخلينى اغير رأيتى"

ابتسمت عالية بفرحة... حس طه بيها وفرح اكثر لما شاف فرحة عينيها

عالية عند هدير فى بيتها
هدير بتقدم لعالية عصير... وبتتعد معاها
"متتعبيش نفسك يا هدير"
"فين التعب ده بس... انتى تعالى لى كل يوم وملكيش دعوة"
"ما انا بجيالك كثير اهو"
"تنورى يا عالية... انتى عارفة انا مليش غيرك... احكيلى بقى عاملة ايه مع طه"
وابتسمت عالية وهى بتحكى
"بيكلمنى كل يوم... لا مش كل يوم كل شوية... وبيجلى الدار كل كام يوم... طلب منى اكر من
مرة نتقابل بره بس انا محببتش نتقابل ونخرج ولسه مفيش حاجة رسمى"
"ومامته؟؟ هتقابلها امتى"
"انا خايفة من المقابلة دى اوى... وحمد ربنا اها بتتأجل"
"وليه بتتأجل"
"هى مبتقاش فاضية غير الجمعة بس... فيه جمعة جت كان لازم طه يسافر يجيب بضاعة وجمعة تانية
كانت بنتها تعبانة ورايحة معاها للدكتور وجمعة تالته مش فاكرة حصل ايه"
"طب خلى بالك من التآجيلات دى"
ردت عالية بقلق
"ليه؟"
"يعنى... انتى تعرفى طه منين انه مش بيكذب ولا يلعب بيكى ويعلقك بيه ع الفاضى"
"معقول؟؟"
"ليه لأ... احنا ف زمن وحش واى حد ممكن يطمع فينا علشان عارف ان مالناش اهل ولا لينا حد
يقف جنبنا لو حصلنا اى مشكلة"
سرحت عالية وهى بتفكر... وقالت بصوت واطى كأنها بتكلم نفسها
"بس هو هيعوز منى ايه واحنا كل اللى بيننا كلام وبس"
"معرفش يا عالية... انا بقولك خلى بالك بس مبقولش هو وحش"
"وابلة فاتن.. معقول هتضحك عليا"
"لا طبعا.. بس ابلة فاتن هتعرف نيته منين اللى ربنا وحده هو العالم بيها"

"بقولك ايه... عايزة تفضلي ف خيبتك دى انتى حرة... محدش لاقى عرسان دلوقتى ومش عيب اننا

ندور على عريس"

"يا بنتى احنا لسه بدرى على ما نخلص"

"لا والنبي ايه... اللي قدنا ياماما ف الفلاحين والصعيد بتبقى متجوزة ومخلفة عيل ولا اتنين...وانا

مبقولش هقوم اتجوز دلوقتى... نقضيها خطوبة سنتين ولا حاجة وبعدين انا نفسى اتجوز ف الكلية

واروح الكلية كده وانا متجوزة ولا حامل وامشى اتنظر بجوزى"

نرمين سرحانة ف كلامها...كملت مها

"هاا اقول لمصطفى يشوف لك واحد صاحبه ولا ملكيش مزاج"

نرمين وهى بتتصنع اللامبالاة

"بس يكون ابن ناس بلاش سواق"

طه عند عالية ف الدار... بيفتح علبة أكل

"بدل انتى مش عايزة اعزملك ع الغدا بره قلت اجيب الغدا وتتغدا مع بعض هنا"

"لا شكرا...انا باكل مع البنات ف الدار"

ساب طه اللي ف ايده... وبص لها شافها مكشرة

"مالك يا عالية؟"

"احنا داخلين على شهر من ساعة ما اتقابلنا وبصراحة شكلى بقى وحش قدام الموظفين والبنات هنا"

"شكلك وحش ليه...احنا مبنعملش حاجة غلط"

"معلش يا طه... مقابلتنا كل يوم والتانى كده غلط"

قامت عالية

"استنى يا عالية...ايه اللي غيرك كده؟"

"بصراحة انا مش شايفة اى خطوة...انت قلت مامتك تشوفنى الاول معترضتش...انما فين المقابلة

دى مبتجيش ليه...يا طه انت لو غيرت رأيك مش هزعل...اللى يزعلنى انك تضحك عليا"

"اضحك عليكى !!طب استنى...اقعدى من فضلك"

قعدت عالية...طلع طه الموبايل من جيبه

"الو...ازيك ياماما...انتي فين...طب بصى ايه رايك تقابلي عالية دلوقتي...اه دلوقتي ايه المشكلة...
لا متفليس ولا حاجة انا هجيبها لك لحد عندك... لو فضلنا نستنى الجمعة اللي فاضية فيها مش

هنخلص...نص ساعة ونكون عندك...مع السلامة"

عالية كانت مستغربة تصرف طه

"قومي يالا"

عالية بارتباك "اقوم فين؟"

"انتي مش سمعتي المكالمه... قومي هنروح لماما"

"فجأة كده"

"عالية...انتي هتحريريني ليه... لا عاجبك نستنى ولا عاجبك نروح دلوقتي...قوليلي اعمل ايه علشان

اثبت حسن نيتي"

فرحت عالية ان كل شكوكها ف طه كانت غلط

قامت وقفت

"هروح استأذن ابلة فاتن واجي"

"هستنامي ف العربية... انا كنت عند فاتن من شوية"

عالية قاعدة جنب طه ف العربية...مكسوفة

وقفوا قبل المحل بشارع

"انا بركن هنا كل يوم"

هزت عالية راسها

"ايه مالك؟؟"

"خايفة ومكسوفة ومتلخبطة ومش عارفة اتلم على نفسي"

"ههههه ليه كل ده"

"مش عارفة هقول ايه ولا اتكلم ف ايه ولا ممكن مامتك تسألني على ايه"

"متخافيش انا معاكي اهو...ومش هنطول"

نرجس قاعدة ع المكتب و فاتحة التلفزيون

دخل عليها طه... ووراه عالية ماشية بخطوات مترددة"
"ازيك ياماما... تعالى يا عالية"
شاور طه لعالية... اللي قربت من نرجس تسلم عليها
"ازيك ياطنط"
نرجس بتبص لها من فوق لتحت نظرة متفحصة
"اهلا يا حبيبتى"
جاب طه كرسى لعالية وشد كرسى لنفسه وقعدوا قدام المكتب
نرجس "شوف عالية تشرب ايه وابتعت هات م القهوة"
عالية بتبص لطه... بتتمسك بيه انه ميقومش
"لالا... شكرا... متجيش حاجة"
نرجس "ليه يا عالية... هو احنا بخلا"
عالية "لا العفو ياطنط... بس مش عايزة شكرا"
نرجس "معلش انى مش فاكراكى زى ما انتى شايقة انا كل يوم بيحيلى زباين اشكال والوان ومش
بفتكرهم كلهم"
عالية "ولا يههم حضرتك... ربنا يعينك"
نرجس "وازى ماما واختك العروسة اتجوزت ولا لسه"
ارتبكت عالية... بصت لطه... نرجس بتبص لها مستنية رد... ردت عالية بارتباك
"الحمد لله"
نرجس "شكلك صغيرة... انتى عندك كام سنة"
عالية "٢٠"
نرجس "اومال مخلصه وبتشتغلى ازاي"
عالية "معايا دبلوم تجارة"
بصت نرجس لطه وهى بتردد
"دبلوم تجارة... آآه"
طه بيحاول يبرو مميزات عالية
"عالية كمان غير شغل الدار بتدى دروس تحفيظ قران ف الجامع وحافضة القران ومتدينة واخلاقها
عالية جدا"
نرجس "ماهو باين عليها"

لحظات صمت بينهم

طه "طب يالا يا عالية اوصلك عايزة حاجة ياماما"

نرجس "متتأخرش"

طه وعالية ف العربية... ساكتين... وقبل ما يوصلوا للدار

"على فكرة... انا معجبتيش مامتك"

"ليه بتقولى كده"

"مش محتاجة ذكاء يا طه"

"لا بيتهيا لك"

"هتشوف ان معايا حق لما ترجع وتقولك رأيها فيا"

"انتى غلطانة"

"يارب اكون غلطانة"

وقفوا قدام باب الدار

نزلت عالية... وهى بتقفل الباب

طه "شوية وهكلمك"

عالية هزت راسها وهى مبتسمة... وتقول ف سرها

"يارب متكونش اخر مرة اشوفك فيها"

طه داخل المحل... شاف زباين

وقف يساعد نرجس ف البيع

خلصوا وخرجوا الزباين

رجعت نرجس ع المكتب... مسكت الريموت وقعدت تقلب ف قنوات التلفزيون... طه مستغرب

انها معلقتش على عالية خالص

راح قعد قصادها... وسألها

"ها... ايه رأيك"

"ف ايه"

"ف عالية ياماما"

"من ناحية ايه يعنى"

"من كل النواحي"

واتعدلت نرجس وسندت ظهرها ع الكرسي

"شكلها بنت غلبانة"

"يعنى عجبتك؟"

"لا طبعا معجبتنيش"

"ليه"

وفقدت نرجس هدوئها اللي كانت بتحاول تظهره

"لا لبس ولا شكل وبابن اوى ان اهلها غلابة وكمان شهادة اى كلام"

"اولا شكلها مش وحش وطالما انا شايفة حلوة خلاص...ثانيا اللبس ممكن يتغير وابقى اجييلها

احسن...الشهادة بقى انا هتجوزها مش هوظفها عندى"

"ابوها بيشتغل ايه"

"ميت"

"وامها"

"ميتة"

"وعايشة مع مين"

"ف دار ايتام"

نرجس وهى بتجز على سنانها

"لو مكنتش ف المحل كان زمانى رقعت بالصوت الحياى جبت التايهين"

"ليه يعنى ياماما... هى شخصيا مالها"

"متنفعكش"

"حببتها"

"وماله...حبها...امشى معاها شوية لحد ماتزهق منها"

"لا انا ولا هى بتوع مشى مع بعض والكلام ده"

"لما تيجى تتجوز لازم تناسب عيلة محترمة وعروسة تشرفك مش تعرك"

"انا شايف ان عالية تشرف اى حد"

"وانا مش شايفة كده"

"والحل"

"معرفش...المهم انك مش هتتجوزها"

"اسف ياماما... انا اللي هتجوز مش انتي"

"هتتجوزها غصب عني مثلا؟"

"انا جيت اخذ رأيك وبحكيك كل حاجة م الاول اهو...انما لو رفضتي علشان اسباب مش مقنعة

زي اللي قلتيهالي...فانا هتجوزها برضه...انا اللي هعيش معاها مش انتي ياماما"

سكتت نرجس...بتفكر...وتصنعت ابتسامة كذابة

"طيب...سيبي افكر كام يوم كده واشوف هنعمل ايه"

(٨)

فاتن قاعدة ف المكتب...عالية قصادها

عالية بتبص ف الارض وساكنة

فاتن بتتنهد وبتقول

"استغفر الله العظيم يارب...انتي هتقدرى البلا قبل وقوعه ليه بس"

بصت لها عالية وهو بتبتسم علشان تمنع الدموع اللي ف عينها من التزول

"باينة يا ابلة"

فاتن بتحاول تطمئنها وغير مش مقتنعة باللى بتقوله

"ردودها دى مش مقياس انها رافضاكى"

"بلاش ردودها...احساسى بمقابلتها بيقول انى معجبتهاش"

"لا اله الا الله...يا بنتى مقابلة ايه اللي مكملتش ١٠ دقائق اللي خلتك تحسى وتنبأى بالقرار"

"يارب اكون غلطانة"

"غلطانة ان شاءالله... شوية كده واتصل بطه واشوف"

"لا بلاش يا ابلة الله يخليكى"

"بلاش ليه"

"مش عايزة اخرجته"

"انا اللي هتصل مش انتى"

"بس هيبقى واضح انك بتسألينه علشان...بلاش علشان خاطرى"

"طيب... انا لازم امشى...متفقه مع ميار هروح بدرى النهاردة شوية"

"طيب يا ابلة...هى عاملة ايه"

"الحمدلله... امتحنت وخلصت والنتيجة ظهرت ونجحت"

"ميروك"

فاتن وهى بتقوم بتلم حاجتها وتاخذ شنطتها... وعلى باب المكتب

"لو كلمك ابقى طمئنين"

عالية ف اوضتها...بتصلى وبتعيط
رن الموبايل... رن رنات طويلة لحد ما خلصت صلاة
اول ما قامت...جريت ع الموبايل بلهفة
"الو"

طه فى العربية...بيتصل بعالية...اتأخرت لحد ما ردت
"الو... ايه يا عالية مردتيش ليه على طول"
"كنت بصلى يا طه معلىش"
"تقبل الله"
"منا ومنكم"

لحظات صمت...مرت بسرعة...قطعها طه
"مالك؟"

"خايفة م اللي هسمعه"
"ليه متوقعة هتسمعى ايه"
"زى ما قلت لك...مامتك رفضتني"
"لدرجة دى مش واثقة فيا"
"مش فاهمة"
"مش واثقة انى بحبك... مش واثقة انى قد كلمتى لما قتلتك هنتجوز"
عالية بتضحك ودموعها نازلة
"بجد؟؟ يعنى مامتك مش معترضة"
"لا يا ستي... هى كل اللي قالتها عايزة شوية وقت تفكر نشوف هنعمل ايه"
"براحتها المهم انما مرفضتنيش"
"لا طبعا... هاا قوليلى بقى...بتحبينى زى ما بحبك"
عالية بتدارى فرحتها وبترد عليه مؤنبة
"طه...وبعدين"
"بعدين ايه...مش خلاص كلها حاجة بسيطة وتبقى مراتي"
عالية وهى مكسوفة

"لما ابقى"

وغيرت الموضوع

"انت بتكلمنى منين؟؟ انت ف الشارع"

"انا ف العربية... رايح اجيب فلوس من تجار"

"ربنا يسلم طريقك"

"ربنا يخليكى ليا... بقولك عايزك يوم كده نزل مع بعض نشترى شوية حاجات"

"حاجات ايه... وانت عارف رايبى ف الخروج مع بعض يا طه"

"ياحبيبتى هنتزل نجيب لك لبس علشان المناسبات اللي جاية لنا ان شاءالله"

نرجس خارجة من اوضتها الصبح

شافت مها ونرمين

"انتوا منتمتوش"

نرمين"لا لسه... شوية وهننام ونقوم نكمل مذاكرة"

نرجس"واحدة فيكم تعملى كوباية شاي قبل ما انزل"

مها"مالك ياطنظ... شكلك مقريفة كده ليه"

نرمين"هنتزلى بدرى ليه"

نرجس بعصبية"هروح للهبابة اللي لايفة على اخوكى علشان اخليها تتلم وتبعد عنه"

مها بفرحة بتتابع الكلام

نرمين"هتروحي لها فين"

نرجس"ف الملجأ اللي عايشة فيه... وقعت طه ف الكلام وعرفت العنوان"

مها ونرمين ف وقت واحد

"ملجأ!!!"

نرجس"آآه شفتوا الخيبة"

مها"يعنى اهلها فين"

نرجس"ميتين"

مها"لو ليها اصل من اصله"

بصت لها نرجس بتساؤل...ردت مها

"مش ف اللي بيلاقوه ف الشارع بيودوه ملجأ"
سكتت نرجس بتفكر ف كلام مها
"يالاه الحقونى بكوباية شاي قبل دماغى ما تضرب لحد ما ادخل الحمام والبس"

راحت نرجس دخلت الحمام... ودخلت مها ونرمين المطبخ

نرجس على باب الملجأ... بتتكلم مع بتاع العامل
العامل يبشاور لها على الجنية

نرجس ماشية ناحية الجنية اللي بيلعبوا فيها الاطفال
عالية ضهرها ليها ووشها للاطفال... نرجس بتقرب ناحيتها

وقفت وراها

"عالية"

التفتت عالية... اتفاجئت

"اهلا يا طنط"

الف سؤال بيدور ف راس عالية... طه كان بيتهرب من انه يحكى لها تفاصيل الكلام اللي دار بينه

وبين مامته

ياترى هي عارفة ايه... الحقيقة ولا انها بتشتغل ف الدار

فاجأها نرجس

"اتضايقتى لما شفتينى ولا ايه"

"لا ابدأ... اتفضلى حضرتك"

قعدت معاها نرجس... وهى بتبص حواليتها

"انتى عايشة هنا بقى"

تلعثمت عالية... مش عارفة ترد

"طه حكاالى... بس عايزة اعرف منك حكايتك ايه"

"حضرتك عايزة تعرفى ايه"

"انتى مين اللي جابك هنا وملكيش اى قرايب خالص"

"بابا الله يرحمه هو اللي علمني وجوزني قبل ما يموت...محدث له فضل عليا"

نرجس بترد بصوتها العالي

"اسمعي بقى انتي وهى... خطتكم دى مش هتعدى عليا... سامعيني"

وبصت لعالية

"وانتي... اوعى تفتكري ان ممكن اجوز ابني لواحدة زيك لا ليها اصل ولا فصل ولا حد عارف

جيتي من انهي داهية"

وبصت لفاتن "اوعى انتي كمان"

زقت فاتن ف كتفها وهى ماشية وخارجة من باب الدار

عالية منهارة من العياط... فاتن بتبص حواليتها

بتطبطب على عالية

"روحي اغسلي وشك وتعالى...متعيطيش"

"انا مش قتلتك يا ابلة... انا كنت حاسة...الله يسامحك يا طه"

"طه ذنبه ايه بس"

"مقاليش الحقيقة انها مش عايزان... ولما هو حكى لها كل حاجة عنى مقاليش ليه... ليه يسيني

اتفاجئ بيها هنا كده ليه"

عالية بتعيط... فاتن نادت لواحدة من العاملات

"خلي بالك من البنات...روحي يا عالية اغسلي وشك وتعالى المكتب"

عالية قاعدة قدام فاتن... بتحط كوباية عصير خلصت قدامها ع المكتب

"شكرا يا ابلة"

"العفو"

دخل طه المكتب عند فاتن ملهوف

"في ايه يافاتن... عالية حصل لها حاجة"

اتفاجئت عالية بطه... بصت له بغضب وقامت

فاتن "استني يا عالية"

طه مش فاهم حاجة" فى ايه"
فاتن" انا اتصلت لظه علشان لازم يعرف اللي حصل...واللى انا متأكدة انه ميعرفش حاجة عنه"
انفجرت عالية ف العياط تانى... وقعدت مكانها
طه مش فاهم ولا عارف يوجه كلامه لمين
"فيه ايه فهمونى"
وحكت فاتن لظه اللي حصل بالظبط
طه لعالية" وانتي متخيلة انى كنت اعرف حاجة زى دى وسكت؟؟"
عالية"وهى عرفت كل حاجة منين"
طه فكر" انا مقلتلهاش حاجة غير ان اهلك متوفين... وف وسط الكلام سألتنى انتى ساكنة
فين؟؟على مكان الدار يعنى قتلها"
فاتن"مامتك مش غيبه يا طه... عرفت توقعك بالكلام وتوقع عالية بالكلام وربطت كله ببعضه"
طه وهو قايم"بصى يا عالية... انتى موافقة عليا ايا كانت ظروفى ولا لأ؟"
عالية"يعنى ايه ايا كانت ظروفك؟"
طه"يعنى لو اخدتك وروحنا بدأنا حياة بسيطة... موافقة ولا لأ؟"
عالية"شايفنى زى ما مامتك شايفانى...انى عايزة استغلك؟"
طه"كل اللي قصده هتقدرى تتحملى معايا اى ظروف"
عالية"ايوه"
طه وهو رايح ع الباب
"لو ماما فضلت رافضة...هنقل شغلى اى محافظة بعيد عن هنا ونكتب الكتاب واخذك معايا"
خرج طه من المكتب وعالية مستغربة
فاتن بتبص لها ومبتسمة
"مخيش ظنى فيه... غير امه خالص...ربنا يحميك يا اخويا... مبروك يا عالية"

نرجس بتفتح الباب وتدخل
شافت مها ونرمين قاعدين
نرجس" هو فين؟"
نرمين"ف اوضته"

دخلت نرجس مندفة وفتحت اوضة طه
"فى ايه؟؟؟ مجيتش المحل ليه زى كل يوم؟"
"علشان الكلام اللى لازم نقوله مينفعش يكون ف المحل"
"كلام ايه"
"روحى لعالية ليه"
"آآآآآه... ودودتلك وقومتك عليا... قالتلك ايه الكذابة دى"
"فاتن اللى حكى لى اللى حصل"
"يا بنى فوق... دول عاملين عصابة مع بعض... فاتن وزت بنت الحرام دى عليك علشان عارفينك
طيب"
"ماما لو سمحتى متكلميش عنها كده... هى مالهش ذنب ف اى حاجة حصلت... مش ربنا قال لا
تزر وازرة وزر اخرى... عايزة تاخديها بذنب ناس هى متعرفهمش ليه"
"العرق يمد لسابع جد... زى ما امها رمتها قبل كده هى مش هيبقى لها امان"
"مش شرط... وبعدين ايه دخل فاتن بالموضوع كله"
"هى اللى مخططة كل حاجة"
"مش صحيح انا شفت عالية قبل ما اعرف ان فاتن تعرفها"
نرجس بتقعد على طرف السرير
"يا بنى فكر... انت شفت البت دى ف المحل اللى فاتن عارفة مكانه كويس... وشفتها تانى ف
الملجأ اللى اكيد فاتن هى اللى قالتلك تروح"
"اولا انا شفت عالية اول مرة خالص ف الشارع وهى رايحة الجامع... هنعدى مرة المحل ويوم اليتيم
انا اللى قلت لفاتن انى رايح"
نرجس بنفاد صبر"الموضوع منتهى... جواز من البت دى مش هيحصل"
طه وقف لحظات... وفتح الدولاب طلع شنطة وبدأ يحط فيها هدومه
"تمام...الموضوع فعلا منتهى"
نرجس باستغراب وقلق
"انت بتعمل ايه"
"هسيبك كل حاجة علشان تطمنى ان عالية وفاتن مالهمش دعوة... لا هسكن ف الشقة اللى
حييتهاى ولا هاجى المحل بتاعك... هقعد ف اى فندق لحد ما انقل شغلى واكتب كتابى على عالية
واحدها ونبعد خالص"

هل يشفع الحب ؟

(٩)

سكتت نرجس لحظات... وعيقت
"عايز تسيينا... عايز تسيب امك واختك لو حدهم... ده انت راجلنا وسندنا... عايز تسيينا علشان
واحدة منعرفهاش... نُهون عليك يا طه"
واتأثر طه بدموعها... قعد جنبها وحط ايده على كتفها وبايده التاني مسك ايدها وباسها
"ياماما انتي اللي اضطرتيني لكده... انتي اللي صغرتيني وانتي اللي مش عاملة اى اعتبار لمشاعري وانتي
اللي قررتي اني متجوزش اللي اخترتها"
"يااااااه... معي منى للدرجة دى"
"ياماما انتي على عيني وراسي بس برضه انا مقدرش اتخلي عن وعدى للانسانة الوحيدة اللي حبيتها"
"اشمعى هي؟"
"معرفش... هي اللي حبيتها دوننا عن الناس كلها"
"مش مطمئة لها"
"ادى فرصة لنفسك تعرفيها... واديهها فرصة تثبتلك انها كويسة"
"مش قابلاها"
"لو مش عايزة تشوفيها بلاش... بس مترفضيش جوازنا"
"بتلوى دراعى"
"بالعكس انا بطلب منك الموافقة... رغم اللي حصل ف الدار بس كله يعدى مش مشكلة"
"اوعى تفتكر اني ممكن اعتذرلهم"
"مش مهم تعتذرى لهم.. المهم انك توافقي وتباركى جوازي"
"عملت فيك ايه البت دى"
"ولا حاجة... ارجو كى ياماما انا مش عايز ازعلك ولا عايز اسيب عالية... متحطيش ف الاختيار
ده"
"لما اتخيرت اختارتها هي"
"اخترت اني استقل يا ماما... لانى حسيت انك بتتحكمى فيا... مترعيلش منى... لو لسه عند رأيك
انا هفضل على كلامى"

قامت نرجس وهى بتعيط وتتعد عينها عن طه

"رجع هدومك الدولاب وروح افتح المحل"

"وعالية؟"

"قطيعة متجلبش سيرتها... اسمها بيعصبني"

"يعنى ايه"

"اتحوزوا ولا اتيلوا... اللي بيشيل قرية مخرومة بتخر على دماغه لوحده"

طه ف المحل بيتكلم ف التليفون

"خلاص يا عالية... ماما وافقت اخيرا"

"بجد ولا بتضحك عليا زى المرة اللي فاتت"

"انا ضحكت عليكى؟"

"ايوه انت قلت لى وافقت ولقيتها جت بهدلتنى"

"هى جت من ورايا... وبعدين خلاص يا عالية ماما استنتجت ان فاتن مرتبة كل ده"

"ابلة فاتن!! وهتعامل كده ليه"

"ماما وفاتن مبيحبوش بعض من زمان... خلافات بقى مالناش دعوة بيها"

"يعنى مامتك وافقت بجد اخر كلام"

"ايوه والله... بصى بقى هرتب يوم كده ونترل نجيب الشبكة"

عالية بفرحة "شبكة!!"

"اه طبعا... انتى مش عروسة ولا ايه... وبعدين اوريكى الشقة ونبتدى نجيب العفش"

"طه"

"نعم"

"انت فرحتى الوحيدة اللي حسيتها ف حياتى... ربنا يخليك ليا"

"الله الله... ايه الخلاوة دى"

عالية سكتت من كسوفها

"ايه... سكتى ليه... كملى"

"انت اخرجتنى على فكرة... المهم عايز اطلب منك طلب"

"اؤميرينى"

"ممكن هدير تبقى معانا ف الشبكة والتجهيزات والفرش وكده...هدير هي عيلتي"

"طبعا يا حبيبتى... اى حد بتحييه يبقى على عيني وراسى"

"تسلم لى عينيك"

سكت طه... لحظات صمت

"الو...طه انت فين"

"مش عايز اقاطعك علشان تكملى الكلام الخلو ده"

ودخلوا زباين للمحل...وطا طه صوته

"عالية هقفل معاكى وابقى اكلمك لما اخلص... سلام يا حبيبتى"

طه داخل البيت...شاف نرمين قاعدة

"ماما ف اوضتها برضه؟"

نرمين" اه...مها روح و سابتنى وماما ف اوضتها طول اليوم عيانة من ساعة كلامك معاها"

قالتها نرمين وهى بتحاول تحسسه بالذنب

تجاهل كلامها ودخل لمرجس

طه بيفتح الباب...يبص على مرجس...كانت صاحية

قعد جنبها على طرف السرير

"مالك ياماما... مش هنتزلى الخل تانى ولا ايه"

"اللى فى مكفينى...صدمتى فىك كبيرة"

"لو تعبانة اجييلك دكتور"

"تعى مش عايز دكتور...تعى من جوازة الندامة"

طه وهو قائم

"سلامتك ياماما...لو احتاجتى حاجة انا ف اوضتى"

راح ع الباب...سمع مرجس

"هو مفيش امل تفكر تانى"

"لا خلاص... وهنتزل نجيب الشبكة لو هتقدرى تيجى معانا قوليلى لو مش هتقدرى اروح انا

وعالية نجيبها"

نرجس بغيظ

"مش لما اختك تخلص امتحانات... ولا مش عايزنا نفرح بيك"
"مفيش مشكلة... نرمى هتخلص كمان يومين... لما نرمى تخلص... تصبى على خير"

مها ورمى خارجين من الامتحان

شافوا مصطفى ف التاكسى

مها "مصطفى ومعتز اهم... تعالى تعالى"

راحوا على التاكسى... سلموا عليهم وركبوا

ركبت مها جنب مصطفى قدام

ونرمى جنب معتز ورا

مصطفى "نقول ميروك"

مها "اخيرا خلاص... ده احنا طهقنا من المذاكرة"

معتز لها "عملتى ايه"

مها "الحمد لله"

مصطفى "احنا لازم نحتفل بيكم بالاجازة... هنعزمكم عزومة حلوة"

مها بفرحة "هنروح فين"

مصطفى "لا دى مفاجئة بقى"

مشى مصطفى بالتاكسى... وكل مها ولا نرمى ما يسألوا يردوا الاتنين

"هتعرفوا"

وقفوا قدام عمارة... وركن مصطفى

ونزل معتز وفتحوا لهم الباب

نرمى بتبص لها بتساؤل

مها "انت ركنت هنا ليه"

مصطفى "مش قلنا هنحتفل بيكم... اصحابنا مستنييننا فوق هنطلع نقعد معاها شوية"

نرمين "نطلع فين... انا مش هطلع عند حد"
مها ساكتة بتبص لمصطفى ومعتز
معتز "ليه مش هتطلعى... هنقعد شوية مع بعض ونترل مش هنتأخر"
ومسك ذراعها
"ياللا بدل وقفة الشارع كده"
مها فجأة وهى بتشاور على بعييد
"بابا يا نرمين... بابا شافنا"
التفتت نرمين تبص حوالبيها... وارتيك مصطفى ومعتز
مها شدت نرمين
"تعالى قبل ما يشوفنا... ابعدوا انتوا"

وقفت مها تاكسى... ركبت فيه هى ونرمين بسرعة
واول ما التاكسى اتحرك
"بابا كى فين يا مها؟؟"
ضحكت مها
"الحمد لله... فلتنا"
"انتى بتضحكى على ايه... بابا كى فين اصلا هو بابا كى جه من بره"
"بابا ايه... انا اخر مرة شفت بابا من سنين"
"اومال"
شاورت مها على سواق التاكسى...
"ف البيت نتكلم"

نرمين داخلة البيت ووراها مها... دخلت مها تبص ف الاوض وباقى البيت ورجعت لها
"مفيش حد هنا... فهمينى بقى ايه اللى حصل"
"انتى مشفتيش كنا هنتدبس ف ايه... شفنى كان بيشدك ازاي... ولاد الكلب فاكرينا من بتوع
الشقق"
"كان ممكن نصوت ونلم عليهم الناس"

"اه ياحتى ونكبر الموضوع وتفضح... لما قلت بابا هما كمان خافوا"
رن موبایل مها... بصت فيه... وقفلته
"اهو بيتصل... بقولك ايه انا هجيب رقم تانى علشان اريح دماغى وانتي خلى طه يجيبك خط جديد"
"وبعدين دول عارفين البيت هنا والبيت عند مامتك"
سكنت مها لحظات تفكر
"ميتهاأليش يقدرُوا يعملوا لنا حاجة"
نرمين برعب حقيقى
"بصى بقى... انا مش هكلم حد تانى ولا ادى لحد رقمى ولا عنوان البيت... انا هموت م الرعب
وافرضى مكناش عرفنا نتصرف كانوا عملوا فينا ايه... لا يا ستي توبة"
ردت عليها مها وهى بتقعد وبنبرة حزينة
"انا بحب الاهتمام يا نرمين... انا بحب احساس الحب نفسه"
"كنا هنروح ف داهية"
"انتي بتتكلمى كده واحنا ف نفس الظروف... ماانتي كمان راميينك لوحدك طول اليوم زى ما امى
مشغولة بجوزها والجري وراه ونسيانى"
"ايوه محدش بيهتم بينا...ايوه الحب والاهتمام حلوا ونفسنا فيه... بس انا كل ما اتخيل كان ممكن
يحصلنا ايه اترعب... بصى المرة دى ربنا ستر منضمنش يحصل ايه بعد كده"
"ماشى اهو بتتعلم... احنا بس نتجح والكلية هتبقى مجالها اوسع كل واحدة فينا تلاقى النص التانى
بقى ونرتاح"

عالية قاعدة عند هدير ف البيت
عالية مظهرها اتغير بقت اشيك
هدير بتحط صينية شاي وبتقعد
"منورة يا عالية"
"ربنا يخليكى يا هدير... بصى بقى انا عايزة اقولك حاجة ومنتكسفيش"
"خير"
"لو انتي تعبانة من الحمل ومش هتقدرى تيجى تفرشى معايا بلاش تتعبى نفسك"
سكنت هدير وحست عالية انها زعلت

"انتى زعلتى منى...والله انا خايفة عليكى"
"خايفة عليا ولا حماتك مش عايزانى"
"لا والله ماجابت سيرتك خالص...وطه عارف انتى بالنسبة لى ايه ومش بيتضايق من وجودنا مع بعض ابدا...بالعكس ده جابنى وقالى اقعدى براحتك وابقى كلمينى لما تخلصى"
"يوم ما كنا بنجيب الشبكة كانت نظراتها ليا مش حلوة ابدا"
"مش ليكى لوحدك...وليا انا كمان"
"وبعدين؟؟ انا خايفة عليكى يا عالية منها...هتعرفى تتعاملى معاها ازاي...انتى نسيتى ابلة فاتن كانت حككت لنا ايه عنها"
"منسيتهش...بس انا ممكن استحملها علشان طه...انتى مش متخيلة انا بحب طه قد ايه وممكن استحمل ايه علشانه"
"معقول؟؟"
"ايوه... اكرت كمان ما تتخيلى..انا مبقتش قادرة تخيل حياتى من غيره...هو يستاهل الحب ده واكثر... قبل ما اقول نفسى ف حاجة بيحبيهاالى...حنيته وخوفه عليا ميتوصفش... الكام شهر اللى فاتوا دول حاسة انه عوضنى عن حرمان السنين"
"يا بختك يا عم طه...ايه ده يابنتى ولا كان بيان عليكى"
"يا بختى انا بيه"
"بس برضه حماتك شكلها شرانية...ولا بنتها شكلها زيبها بالظبط"
"مش مهم...المهم طه عندى"
"ربنا يسعدكم"
"المشكلة بقى دلوقتى اللى محيرانى"
"ايه"
"يوم كتب الكتاب عايزة اعزم ابلة فاتن وخايفة من حماتى بعد الحناقة اياها"
"بقولك ايه...ابلة فاتن عاقلة وطيبة...خرجى نفسك من المواضيع دى خالص"
"ازاي"
"هما عيلة ف بعض...اخوها يعزمها ميعزمهاش ملكيش انتى دعوة"
"انتى شايفة كده يعنى... طيب"

عالية قاعدة مع طه ف العربية...واقفين قدام الدار

"عالية"

"نعم"

"عايزة نكتب مؤخر كام"

"مؤخر؟؟ انت بتفكر تطلقني ولا ايه"

"لاقدر الله لا طبعاً... انا مش عايز احسك اني ضيقت اى حق ليكى"

"مش عايزة حاجة يا طه...ولو فكرنا ف الحقوق ما كان فيه حاجات كتير المفروض ان اجيها

وانت متخلتنيش اجيب حاجة خالص"

"علشان مفيش فرق بيننا"

"يقي ليه فاكرني انا عاملة فرق ف دماغى"

"زعلانة علشان مش هنعمل فرح...والله لو كنت اقدر كنت عملتلك احلى فرح"

"يا طه انت فرحتى...وبعيدن هنعمل فرح وتعزم اصحابك ومعارفك ويلاقوا عروستك من غير

اهل؟...خلينا مداريين كده احسن"

"مقصدش والله..انا بس تجهيز البيت بسرعة كده اخذ كل اللي حيلتى وماما ساعدتني ومش عايز

اطلب منها تاني"

"انا عارفة كويس انك متقصدش...ياطه انا فاهمك من غير ما تتكلم... وزى ما قلتلك انت فرحتى

مش الفرحة والهيفة"

"ربنا ما يجرمنيش منك... ان شاءالله هنكتب الكتاب واسبوعين تلاتة بالكثير ونتجوز"

"ان شاءالله...عايزة اسألك على حاجة كده"

"اسألى"

"هتعزم ابلة فاتن ولا لأ؟؟ يعنى علشان اللي حصل بينها وبين مامتك ف الدار"

"لازم اعزمها ان شاءالله"

"طب مش تقول لمامتك الاول"

سكت طه لحظات يفكر

"شايفة كده؟"

"اه علشان مامتك متفاجئتتش وتعمل مشكلة"

هل يشفع الحب؟ ←

(١٠)

طه داخل البيت... نرجس بتحط العشاع السفرة
"ياللا ياطه... اغسل ايدك وتعالى"
"البنات فين"
"جوه ف الاوضة"
"ماما... انا هعزم فاتن ف كتب الكتاب"
التفتت له واتغيرت ملاحظها
"لأ... متعزمهاش"
"ماما انا بقولك هعزمها مش بقولك اعزمها ولا لأ"
وزعقت نرجس
"جرى ايه يا طه... هو انت يابني شريك مخالف وخلاص مش كفاية الجوازرة اللي غضب عني
كمان... كمان هتجيلي فاتن اللي بتكرهني"
"اصول ولا مش اصول... يعني احتى الكبيرة متحضرش كتب كتابي؟؟ وبعدين الحكاية كلها ساعة
هنكتب الكتاب وخلاص"
نرجس بنرفزة وهي ماشية
"اعمل اللي انت عايزه"

في قاعة كتب الكتاب

قاعة بسيطة... واسعة فيها كراسي على شكل صفوف
وفي المقدمة تراييزة طويلة... وعلى يمين القاعة كنبتين جنب بعض للعروسة والعريس
عالية قاعدة... لابسة تاير بيح وطرحه ملفوفة لفة بسيطة وميك اب بسيط... رغم بساطته الا ان
النور اللي بيشح من وشها زادها جمال على جمالها

هدير واقفة جنبها... لابسة عباية سودة مطرزة

نرجس ونرمين ومها قاعدين ف الصف الاول من الكراسى
ال ٣ لابسين فساتين وطرح سواريه وميك اب يناسب ملابسهم

طه واقف يبسلم على اصحابه وزمايله ف الشغل اللي بيباركوله بعد كتب الكتاب

دخلت فاتن وميار القاعة... وراحوا على طه وعالية

سلمت فاتن على طه وباسته

فاتن "مبروك يا طه"

طه "الله يبارك فيكى اتأخرتى كده ليه"

فاتن "كنت جاية من بدرى والله بس حصلت ظروف كده عطلتنا"

طه "خير"

فاتن "لا خير مفيش حاجة... ميار بنطلونها اتقطع فرجعنا البيت غيرت وجينا"

ميار "مبروك ياخالو"

طه "الله يبارك فيكى يا حبيبتى عقبالك"

سلمت فاتن على عالية وهدير اللي فرحوا لما شافوها

نرمين لما شافت فاتن مالت على نرجس

"الخرباية اهى"

مها "هى ادى اختك؟"

نرمين "خوت يَخوتها...هى"

نرجس بتبص بعيد عن فاتن

نرمين وهى بتغمزها ف ذراعها

"جاية علينا"

بصت نرجس شافت فاتن جاية

وقفت فاتن قصادها...مدت ايدها تسلم

"مبروك"

نظرة خاطفة بصت فيها نرجس لظه...لما شافته يبص لها

مدت ايدها ببرود

"الله يبارك فيكى"

سلمت ميار على نرجس من غير ماتتكلم..وسلمت عليها نرجس بنفس البرود

سلمت فاتن على نزمين وباستها...وراحت قعدت على كرسى بعيد عنهم ف صف تانى

نزمين مكشرة وتسلم بنفس الطريقة اللي سلمت بيها نرجس

قربت ميار من نزمين...وبكل ود وابتسامة واسعة

"ازيك يا نزمين... عاملة ايه"

"كويسة"

"اتغيرتى كتير عن اخر مرة شفتك فيها...بقيت زى القمر"

نزمين بسخافة

"والله؟؟ وانا الاول كنت وحشة مثلا"

ارتبكت ميار

"مقصدهش انا..."

"خلاص خلاص...روحي اقعدى"

حست ميار بالاحراج...راحت بسرعة جنب فاتن

واول ما وصلت مقدرتش تمسك دموعها لحد ما ترجع البيت

مها ونزمين يبصوا عليها ويتوشوشوا ويضحكوا

فاتن "بتعيطى ليه"

"نزمين بتكلمنى بطريقة وحشة اوى ياماما..والله ماقلتلهما حاجة"

"معلش ماهى طالعة لامها..متعيطيش معلش علشان عالية وطه"

حاولت ميار تسيطر على نفسها...مقدرتش

"احنا قاعدين ليه...قومى نمشى"

طه وعالية قاعدين على ترايزة ف كازينو

الترايزة ف جنب بعيد عن الزحمة
قاعدین جنب بعض على كنبه والجرسون بيشيل الاطباق
طه ماسك ايد عالية
"مبسوطة؟"
"اوى اوى"
وبصت عالية ف الساعة
"طه الساعة بقت ١ مش كفاية كده"
"زهقتى؟"
"لا طبعا... انا مش ممكن ازهق وانا معاك"
"خلاص خلىنا قاعدین شوية كمان"
"خلىنا... بدل هتبقى مبسوط... يبقى خلاص"

طه داخل البيت... الساعة ٣
اول ما قفل الباب سمع صوت نرجس
"ما لسه بدرى"
انخض من صوت نرجس اللي طلعت فجأة
"ماما!!!!"
"ايوه ماما او مال عفريت... كنت فين ياطه كل ده"
"كنت بتعشنا انا وعالية"
"عشنا ده ولا سحور"
ضحك طه
"مش معقول تكونى هتزعقبلى علشان تأخرت"
"لا... انا متغاضبة من اللي احدثك مننا من اول يوم دى... اللي ما قلت تعالى يا ماما انتى واخيتى
اتعشوا معانا"
"انا اسف... فاتتني والله... حقاك عليا ملحوقة.. بكرة نتعشنا كلنا مع بعض"
"مش لما تقول للهانم اللي مرضتتش تخليك تاخذنا معاكم النهاردة"
"والله ولا جنبنا سيرتكم خالص"

"طبعاً من لقي احبابه نسي اصحابه"
قرب منها طه وهو بيحضنها واخذها وداخل على اوضتها
"هو فيه حد يقدر ياخذني من احلى ام ف الدنيا... كل اللي انتي عايزاه هعملهولك... ايه اللي
يرضيكي"
وصلوا على باب اوضتها
"متبعدهش عني"
باس راسها
"انا مقدرش ابعد عنك... هو انا عندي كام نرجس يعني... يالا ادخلي نامي علشان عندك شغل
الصبح... تصبحي على خير"
"وانت من اهله... بقولك يا طه"
"نعم"
"انت اديت لها مفتاح؟"
"اه"
"وانا؟؟؟"
"عايزة مفتاح ليه"
"ليه يعني ايه... افرض عايزة اجيب حاجة واوديها هناك ولا مليش حق ف بيت ابني"
"لا طبعاً ليكي... ثواني"
وطلع طه ميدالية مفاتيحه
"اتفضلي"

عالية وهدير بيفتحوا باب الشقة
دخلوا لقوا مها ونرمين قاعدين على الانترية وشايلين من عليه الورق وبياكلوا شيبسي وشيكولاته
وحاطين كاترات على ايد الكنب
استغربوا الاتنين... ودخلوا
عالية "اهلا يا نرمين... اهلا بيكم منورين"
نرمين "هو طه عارف انك جاية؟"
عالية "اه... ليه؟"

نرمين "بسأل... بلاش؟"
عالية "لا عادى... بس انتم جيتوا هنا ازاي"
مها "مع طنط... اصل معاها مفتاح وجينا نساعدكم"
اتلون وش عالية من الضيق
وجت نرجس من الاوضة
"انتى فين هدومك؟؟"
عالية متفاجئة "هه"
نرجس "فين هدومك... الدولاب فاضى"
عالية "لسه مجبتش"
مها ونرمين ضحكوا... بصت لهم عالية مستغربة
ردت هدير عليهم "كده عيب على فكرة"
نرجس "بتقولى لمين عيب؟؟"
هدير "حضرتك اسألينى بقول عيب ليه الاول"
نرجس "نعم ياختى... هتقوليلى اقول ايه ولا مقولش ايه... انتى مين اصلا ولا تقربى لنا ايه علشان
تتكلمى"
عالية "هدير اختى"
نرجس "اخطك منين... والله ما انا عارفة ارميتوا علينا من الهى داهية"
هدير عيظت... وراحت ع الباب... وراحت وراها عالية ونزلوا

هدير وعالية ف ميكروباص
هدير بتعيظ وعالية بتهدىها
"انا اسفة يا هدير... انا السبب... متزعليش علشان خاطرى"
"وانتى ذنبك ايه... هما اللى قلالة الادب ومعندهمش تربية"
"هو انتى قلتى لهم عيب على ايه؟"

نرجس بعد ما عالية وهدير نزلوا
مسكت التليفون واتصلت بطه

"الو... ايوه يا طه... شفت مراتك عملت فينا ايه؟؟ البت دى مش سهلة... مش هي لوحدها دى
التانية كمان صاحبته دى ولا اختها ولا ابصر ايه... انا عارفة تلاقيها هتتصل بيك وتترلها دمعتين
علشان تتسهوك عليك... وانا اللي قافلة المحل علشان اساعدها... متستاهلش والله... والله يا طه لو
ما جبتلى حتى لا تبقى ابني ولا اعرفك ولا دخلة لك بيت... ابقى اشبع بيها بقى واخسر اهلك
علشاهما"

قفلت نرجس مع طه وبعصبية
"يالالا...لموا زبالتكم دى وقوموا هنمشى"

عالية وهى ماشية مع هدير
النتين ماشيين بدموعهم... ومكسورين
وصلوا عند العمارة اللي فيها هدير
"اطلعي معايا"
"لا هرجع الدار"
"مش هتكلمى طه تحكى له"

"مش عايزة اعطله وهو ف الشغل..لما يخلص هيتصل بيا واحكى له"
سلموا على بعض...حضنوا بعض اكثر...دمعوا تان
"متزعليش منى يا هدير...انا مليش غيرك"
"مش زعلانة منك...انا خايفة عليكى منهم يا عالية...مستقويين اوى"
"ربنا موجود"

عالية قاعدة مع فاتن ف المكتب...وبتعيط
"متزعليش يا عالية... انتى عارفة انها صعبة... اكيد طه هيجيلك حقا"
رن موبايل عالية...ردت بسرعة وهى بتقول لفاتن انه طه
"الو... انا ف الدار... طيب مستنيك...مع السلامة"

سألته فأتى "ايه؟؟"
عالية باستغراب
"صوته متغير وسألني انا فين قلت له وقالى جايلك وقفل على طول"
فاتن ف سرها
"ربنا يستر ومتكونش نرجس قلبته عليها"

دخل طه المكتب عند فاتن...وباندفاع قبل ما يقعد ولا يسلم
"ايه اللي حصل ده يا عالية... انتى زعلتى ماما ونرمين ليه بالطريقة دى وهدير ازاي تتدخل فى اللي
مالهاش فيه"
عالية باستغراب وارتابك
"انت فاهم ايه؟؟ اسمع منى الاول"
قعد طه
"سمعيني"
قامت فاتن وهى بتطبطب على كتف طه
"هبعثلك لمون يا طه وهستناكم فى الجنة"
خرجت فاتن من المكتب...بدأت عالية تحاول تجمع كلامها
"الاول...انت مقلتليش ليه ان مامتك رايحة"
"مقالتيش...ومهباش محتاجة تاخذ اذن منك يا عالية"
"مقلتش اذن...انا بس اتفاجئت"
"المفاجئة متسمحلكيش انك تتعاملى معاهم على انك صاحبة البيت وهما مالهمش فيه"
"والله ما عملت كده... مع انى اول مادخلت لقيت اختك وصاحبته قاعدين ياكلوا ويشربوا حاجة
ساقعة وحطينها على الاتريه... متكلمتش والله بالعكس رحبت بيهم"
"وبعدين"
"مامتك جت من جوه...ومن غير لا سلام ولا اى حاجة لقيتها بتقولى فين هدومك"
"كانت عايزة ترتب الدولاب لانها اخدت جزء من هدومى ورتبته هناك... هدير تزعق مع نرمين
ومها ليه"
"مها دى ايه اللي جايها طيب يا طه"

"بصى...مها ونرمين مبيفارقوش بعض ودى حاجة مش هتغيريها"
"حاضر...مش مهم... بس المهم ان اختك لما مامتك سألتنى على الهدوم وانا قلت لسه مجبتش قامت
قالت لصاحبيتها قال يعنى هى هتجيب حاجة...فهدير ردت عليها قامت مامتك مزعقة لها"
"والمفروض ان اصدق ان كل اللي حصل علشان الهيافة دى"
اتفاجئت عالية
"يعنى انت مش مصدقنى؟"
"بقولك ايه يا عالية... انا مش من اول يوم هلاقى مشاكل بينكم... مهما حصل متنسيش ان دى
امى واللى يرضيها يرضيني واللى يزعلها يزعلنى"
"والله ما زعلتها...ده هى اللي طردت هدير"
"هى ليها ف بيت ابنها انما صاحبتك ليها ايه عندنا"
عالية بتبص له كأنها شايفة واحد تانى...كمل طه كلامه
"قومى معايا تروحي تراضى ماما وتخلصى المشكلة دى وهدير اللي هتعمل مشاكل... بلاش منها"

(١١)

سكنت عالية وهى بتبص له... شافت علامات الغضب على وشه

"ايه...مش هتقومى معايا"

"حاضر يا طه...هقوم معاك واجى لمامتك اراضيهها علشان خاطر ك مش علشان انا غلطت"

قام طه وقف

"ياللا"

"ممكن اطلع اغير هدومى"

"وكده ماله؟"

"مالوش...عايزة اغير هدومى ممكن"

"متتأخريش"

خرجت عالية بسرعة... تلحق دموعها اللي هتترل

فاتن قاعدة ف الجنينة بعيد...وشافت عالية وهى طالعة بسرعة من المكتب...راحت فاتن لظه..

"ايه ياطه اللي حصل...عالية مالها"

"مفيش...طلعت تغير هدومها علشان تيجى معايا لماما"

سكنت...مترددة...تتكلم وتبقى بتدخل ولا تسكت علشان متدخلش

حسنت ترددها بسؤاله

"انت شايف مين غلطان يا طه؟"

"عالية طبعا"

"ليه"

"ليه ايه؟؟ هى محكتكيش"

"لا...حككت انا بس عايزة اعرف غلطانة ليه"

"هو يصح تقابل ماما وحش وترد عليها وتقولها ان ده بيتى وبيت اخى على هدير وهدير تزعق

لنرمين"

"هدير وعالية يقولوا كده ويعملوا كده...دول اغلب م الغلب"

"قصدك ايه يا فاتن...ماما هتكذب يعنى"

حاولت فاتن اختار كلامها كويس وردت
"بص يا طه... انت مكنتش صغير ساعة ما انا اتجوزت... كنت واعى وشايف اللي بيحصل... لما
كانت مامتك تشتكى لبابا منى كانت بتقول المواقف بالظبط ولا كانت بتزود شوية من عندها
وكنت انت بتشهد الحق دائما"
سكت طه بيفتكر ويفكر... كملت فاتن
"خليك حقانى يا طه ومتظلمش عالية"

عالية اول ما دخلت اوضتها ف الدار
قعدت تعيط... عياط بحرقة وهى بتكلم ربنا
"يارب... بعد ماقلت خلاص الدنيا ضحكت لى... اتظلم كده... يارب انت شايف انى
مغلطتش... حنن قلب طه عليا"
بدأت تهدا... غيرت هدومها بسرعة .. راحت غسلت وشها ونزلت لطفه

طه وعالية ف العربية... ساكتين... محدش فيهم اتكلم
لكن كل واحد جواه كلام كثير... مقالش منه ولا كلمة
ركن طه قبل المحل بشوية... نزلت عالية ونزل طه
بعد ما قفل العربية... لف مشى جنبها... مسك ايدها
التفتت له عالية... كانت فاكره مخاصمها
الامان اللي حسنت بيه لما مسك ايدها... طمنها وهما داخلين المحل

اول ما دخلوا... كانت نرجس قاعدة ع المكتب... لما شافتهم كشرت زيادة
"ماماااا"
نرجس "عايز ايه... ايه اللي جاها هنا بعد ما طردتنا"
عالية "انا طردتكم؟؟ ازاي وهو بيتك"
نرجس "انتى مشفتيش وشك اتقلب ازاي اول ما شفتينا... ولا صاحبتك بتزقق لبنتى... على اخر
الزمن بنات الشوارع هيعلموا بنات الناس الادب"

طعنة تلققتها عالية من نرجس... وجعتها... الالم بان ف عينيها وهي بتبص لظه تستنجد بيه
ظه مش متوقع الكلمة القاسية دي... وجعته زى ما وجعت عالية
نرجس ندمت لما انتبهت ان كلامها ف وجود طه

نرجس "انا طبعا مقصد كيش انتى ... انا اقصد صاحبك ان مالهاش حق تيجى بيتنا وتعيب فينا"
ظه "موضوع صاحبها ده انتهى ياماما خلاص... لو عايزة تساعدى عالية ف الفرش روحى انتى
وهى بس"

نرجس "يعنى ايه انا وهى بس... قصدك اختك لأ... مليتك من جبهة اختك"
عالية ساكتة مش عارفة تتكلم ولا تدافع عن نفسها
ظه "عالية متكلمتش خالص بدليل انها كانت جاية تراضيكى... بس اللي انا شايفة انك عايزة تطلعها
غلطانة وخلاص"

نرجس باستعطاف "انا يا طه... الله يسامحك يابنى"
ظه "دلوقتي انا مش عايز كتر مشاكل من اولها... انا مش كل يوم هاجى اخلص خناقات... انتم
الأتين ايه اللي يرضيكم"
نطقت عالية بتلقائية صادقة
"انا مش عايزة غير رضاكم"
ظه بص لنرجس مستنى ردها

ردت بتصنع البراءة وهي بتبص لعالية من تحت لتحت
"وانا هعوز ايه م الدنيا غير انى اشوف ولادى مرتاحين وبيحبوا بعض ومحدث يفرقهم"

ظه "طيب عايزانى ف حاجة"
نرجس "رايح فين"
ظه "كام مشوار كده هجيب حاجات مع عالية واوصلها واجى"
عالية وهي بتسلم على نرجس
"انا اسفة لو لسه زعلانة منى ف حاجة"
هزت نرجس راسها ببرود وابتسامة مصطنعة

خرجت عالية ورا طه... فتح لها العربية وقعدت ولف جنبها

وهما ف العربية... عالية بتبص قدامها... طه بيص لها نظرات مختلصة بطرف عينيه

"على فكرة... انتي النهاردة كبرتي ف نظري اوى"

"ليه"

"انك استحملتيني وانا متنرفز... انا عارف اني جيت عليكى شوية بس لازم تعرفي ان دى امي

ومقدرش ازعلها وخصوصا انها وافقت على جوازنا وساعدتني كمان... مش معقول يبقى جزائها اني

اجي معاكي ضدها"

"وانا مش ممكن اساعدك على انك تغضبها ابدأ"

"علشان خاطري متزعليش منها على اى كلمة... متزعليش الا مني"

"وانا مقدرش ازعل منك ياطه"

كانوا واقفين ف اشارة... قرب منها وباس راسها

"طه... الناس"

"واحد بيصالح مراته... محدش له عندنا حاجة"

ضحكت عالية... ضحكة فرحة بانها حسست ان اللي معاها دلوقتي طه اللي حبته مش اللي جالها وهو

متضايق وبيكدها

فتحت الاشارة... ومشى طه

"بصى يا عالية... احسن حاجة متقابليش انتي وماما الا لو انا معاكم"

"ياريت"

"ياريت ليه"

"بصراحة بخاف منها"

ضحك طه "ليه ببيع"

"لا شديدة قوى ومبعرفش اتكلم معاها... بحس ان اى كلمة هقولها هبقى غلطانة فيها"

"لا متخافيش... بقولك ايه... مش كفاية علينا اسبوع نخلصوا البيت بقى ونتجوز"

عالية بفرحة "ياريت... انا نفسي يبقى لى بيت"

طه "خلاص... ومعلش اى حاجة ماما تعملها ف البيت سيبها براحتها ولما نستقر ابقى غيرى اللي

انتي عايزاه"

"حاضر... بس ممكن طلب"

"اطلبى"

"هدير"

اتغيرت ملامح طه... وقَلب وشه لما جت سيرتها

"ياطه انا مليش غير هدير... احنا مع بعض ع الحلوة والمره من يوم ماوعينا ع الدنيا... هي كل اهلى وانا كل اهلها... مقدرش ابعدها وهي اكيد هتبقى محتاجالى الايام الجاية... انت عارف انها حامل ومفيش غيرى يقف جنبها وزى ماهقف جنبها هي كمان مش هتسييني لما احتاج لها... انا مليش غيرها ارجوك ياطه متحرمينش منها لانك لو صممت انا مش هقدر اقولك لأ بس تبقى بتقهرنى"

صوتها كان مخنوق بدموع لمعت ف عينها وقت كلامها عن هدير

بدأ طه يلين لما حس بيها

"خلاص يا عالية... خلاص"

سألته بعد فهم "خلاص ايه"

"انا مقلتش قاطعيها... بس بلاش اليومين دول ف الفرش علشان ماما وميحصلش مشاكل

...ماشى"

فرحت عالية انها مش هتبعده عن هدير

فاتن داخلة على ميار اوضتها

"هاا... خلصتى"

ميار وهي بتستعرض فستانها وبتلف قدام فاتن

"حلو؟؟"

"قمر"

"كان نفسى ف فستان سواريه مش فستان عادى"

"هنجيب السواريه على ساعة ونرميه... وبعدين ده مش فرح كبير يعنى... دى زفة بسيطة كده

هيتزفوا ويتصوروا ويروحوا"

"نفسى اشوف عالية وهي عروسة"

فاتن وهي خارجة من الاوضة

"طب يالا علشان تروحي تشوفيها"

دخلت فاتن اوضتها...وهي بتصحى عبد الحميد بصوت واطى

"عبد الحميد...عبد الحميد"

"أممم"

"مش جاي الفرحة معانا برضه"

"لا عايز انام"

"طب احنا نازلين"

"فين ميار"

"عايزها؟"

"اه"

نادت فاتن على ميار

دخلت لهم ميار

"نعم ياماما"

"كلمى ابو كى"

اتعدل لها عبد الحميد وبص لها شوية

"نعم يا بابا"

"مفيش كنت عايز اشوفك قبل ماتتلى"

بصت ميار لفاتن مستغربة

عبد الحميد "تعالى ياميار"

فتح حضنه ليها...قربت منه ميار حضنته

"انتى زعلانة منى علشان زعقتلك امبارح وقلت لك الاكل شايط"

"لا يا بابا...ماهو كان شايط معاك حق"

فاتن "ياللا يا ميار...عايز حاجة يا عبده"

عبد الحميد "متأخروش...خدى علشان تركبوا"

سحب عبد الحميد المحفظة من تحت المخدة...طلع منها ٢٠ جنيه

بيناولها لفاتن...وقعت الفلوس من ايده ع السرير

"ايدى منملة شكلى كنت نايم عليها"

اخذت فاتن الفلوس

"شكرا يا عبده...مش هنتأخر ساعتين بالكثير"

عالية لابسة فستان الفرحة عند الكوافيرة...بتبص لنفسها ف المراية مش مصدقة نفسها
هدير جنبها..نظراتهم اتقابلوا ف المراية...ابتسموا لبعض بحب

دخلت نرجس وهى مبهجة زى عروسة المولد وشخبطت ف عالية
"انتى هتسيينا ملطوعين كثير...ياللا"
خافت عالية...وردت بسرعة
"خلاص...خلصت اهو"

خرجت عالية ووراها هدير...واول عينيها ما جت فى عيني طه
نسيت نرجس وسخافتها ونسيت كل اللى حواليتها

طه اول ما شاف عالية... حس انه اول مرة يشوفها
اتقدم ليها وهو مبتسم بخطوات سريعة
عالية بتتقدم ناحيته... عينيهم بتتكلم من غير صوت
واول ما مسك ايديها... قالت له بكل ثبات وصدق بمس
"بحبك اوى"

مكش سامع غير صوتها رغم كل الاصوات اللى حواليه
قرب من ودنها
"انا بحبك اكرت"

ابتسمت بفرحة وهى بتبص له ف عينيه

مصور الفيديو بيصورهم

ومصور الفوتوغرافيا ييلقط ليهم صور وهما مش شايفين غير بعض

هدير واقفة مع فاتن وميار... فرحانين بيهم وليهم

نرجس واقفة مع مها ونرمين
مها"انا مش عارفة عاجبه فيها ايه"
نرمين بتضحك"دول ف دنيا تانية خالص"
نرجس متغاظة...راحت ناحيته ب غل
شدت طه ناحيتها وكلمته ف ودنه
"ايه مش قادر تصير لما تروحوا...مش تحترموا نفسكم شوية"
صوتها كان مسموع لعالية... حست بالاحراج ومبصتتش ناحية طه تاني لحد الزفة ما خلصت

ميار داخلة سابقة فاتن...فاتن بتدخل وراها وبتقفل الباب
"عقبالك ياميار"
"انا نفسى ف فرح كبيبير ياماما"
"مش بشكل الفرحة ولا مكانه...بالرجال اللي هتعيشي معاه عمرك كله"
"معاكى حق...هغير هدومي واجى نرغى شوية"
"طيب"

دخلت فاتن اوضتها تغير هدومها
فتحت النور وهى عارفة ان عبد الحميد هيزعلها علشان فتحت النور وهو نايم

عبد الحميد مزعقش...بصت عليه حست انه معوج وهو نايم
قربت منه وهى قلقانة
"عبد الحميد... عبد الحميد"
مردش عليها... بدأت تمز فيه وتعلو صوتها
"عبد الحمييد"
جت ميار تجرى على صوتها...وقفت ع الباب
"ماله بابا"
فاتن بترد عليها بفرع وهى بتهز ايده
"مبيتحركش ومبيردش عليا"

قربت ميار وهي بتعيط

"بابا...باباااااااااا"

فكرت فائن بسرعة تتصرف ازاي... اتطمنت انه عايش لما لاحظت نفسه... واتصلت بالاسعاف

(١٢)

في المستشفى... ميار قاعدة بتعيط وساندة على كتف فاتن
فاتن مسحت دموعها قبل ما ميار تشوفها
"وبعدين ياميار... ان شاءالله هيبقى كويس"
"انا خايفة اوى على بابا"
"متخافيش... لما يخلصوا الاشعة هنظمن ان شاءالله"

خرجوا المرضى بالسريير المتحرك من الاشعة للعناية المركزة
سألت فاتن الدكتور بلهفة
"ماله يادكتور"
"جلطة ع المخ"
شهقت فاتن وزاد عياط ميار... سألهم الدكتور
"اول مرة؟؟"
فاتن "ايوه"
الدكتور "بياخد علاج للضغط والكوليسترول؟"
فاتن "لا"

الدكتور "مش ماشى ع العلاج مطبوط يعنى؟"
فاتن "لا هو مبيحبش يوهم نفسه بالمرض ولما بيتعب مش بيكشف"
الدكتور "الضغط العالي وارتفاع الكوليسترول ف الدم واهماله ليهم سبب الجلطة"
فاتن ومقدرتش تمسك نفسها
"يعنى حالته خطيرة؟"

الدكتور "لا.. ان شاءالله متسيبش اثر... وكويس انكم اكتشفتموها بسرعة وقدرنا نلحقه... هيفضل
ف العناية المركزة وانتوا تقدروا تفضلوا وتيجوا ف مواعيد الزيارة"
فاتن بتبص للدكتور... وهو شاب صغير... ترددت وسألته

"معلش يا دكتور... متأخذنيش يعني... مش احسن انقله ف مستشفى خاص؟؟ انا اسفة بس خايفة

اوى"

ابتسم لها يطمئنها

"متخافيش... الدكاترة هنا ممتازين والمستشفى الخاص مش هيعمل ازيد م اللي هيتعمل هنا...

والتكاليف هنا عالية مش بسيطة والخاص هيبقى اضعاف"

فاتن "شكرا يادكتور"

طه فتح عينيه من النوم... بص جنبه ملقاش عالية

بص ف الساعة... او نص الضهر

قام طه يدور على عالية اللي مش سامع لها صوت

دخل المطبخ... فاضى

راح عند الحمام... الباب مفتوح وفاضى

راح اوضة الاطفال... وقف على باب الاوضة ساكت

عالية كانت واقفة تصلى وضهرها ليه

وقف مكانه من غير ما تحس بيه

فضل يراقبها لحد ما خلصت صلاة... بعد ما خلصت فضلت قاعدة ورافعة ايديها للسما وبتدعى

بصوت مش متفسر لطه

لما خلصت دعاء وفضلت قاعدة سرحانة

قرب منها طه... مسك كتفها وباس راسها وقالها بكمس

"تقبل الله"

التفتت له وهى بتقوم وهو بيمسك ايدها يساعدها تقوم

"منا ومنكم... صحيت امتي؟"

"من شوية صغيرين"

قلعت الاسدال وطبقته وحطته على طرف السرير هو والمصلية

قعد طه على الكنبه الموجوده ف الاوضه
"احضر الفطار؟"
"لا تعالى اقعدى جنبى"
قعدت جنبه...حط ايده على كتفها وسندت راسها على كتفه
"قوليلى كنتى بتدعى لى ولا لا؟"
"طبعا يا حبيبى... هو انا ليا غيرك ادعى له"
"ربنا يخليكى ليا... عارفة انا من يوم ماشفتك تانى مرة وانا بدعى بيايه؟"
"بيايه؟"
"انى اشوفك تانى وانك تبقى من نصيبى وام ولادى"
"وانا كمان كنت بدعى تكون من نصيبى بس بصراحة مجبتش سيرة ولادى دى "
"ليه...اوعى تكونى مبتحبيش الاطفال"
"لا طبعا بحبهم ... انت نسيت انى عايشة معاهم"
"عارفة يا عالية... نفسى يبقى عندنا ولاد وبنات كلهم شبهك"
"لا يا سيدى انا عايزاهم شبهك انت"
"المهم انى عايز كتيبيير... متقوليليش تعبت ولا زهقت"
"ازهق ايه بس... انا كمان نفسى احلف كتير علشان يبقى ليا عيلة واللى اتحرمت منه اعوضه ف
ولادى"
"ان شاءالله ..ربنا يقدرنى واعوضك عن كل اللى فات"
رن موبايل طه ف الاوضه الثانية
"دى اكيد ماما"
قام طه يرد عليها ودخلت عالية تحضر الفطار

نرجس ونرمين ومها قاعدين بيتعشوا
نرمين"تصدقى ياماما غياب طه عامل اثر برضه"
نرجس"طبعا ..ربنا ميحرمناش منه"
مها"وهو رجع المحل ولا لسه يا طنط؟"
نرجس"لا ياخيتى لسه...اسبوع وقاعدلى جنب الهانم بتاعته"

نرمين "انا مش عارفة بيحبها على ايه"
مها باستنكار "اذواق"
نرجس "هى النتيجة بتاعتكم امتى؟"
مها "كمان اسبوع بالكثير"
نرجس "ربنا يستر...ياعالم كنتوا بتذاكروا ولا بتدلعوا"
نرمين وهى بتضحك مع مها
"الاتنين"

فاتن بتفتح الباب بالمفتاح... جريت عليها منار
"بابا ازيه؟"
"خشى جوه حطى حاجة عليكى... الجيران مطلعينه"
دخلت ميار اوضتها... وظهر ٢ شباب مسندين عبد الحميد... كأهم عكاز لانه غير قادر على
المشى لوحده

دخلوه على السرير...
فاتن "شكرا يا ولاد ربنا يخليكم"
الشباب "العفو... ان شاء الله يبقى احسن... سلامو عليكو"

بعد ما مشيوا... قربت منه فاتن وعدلت قعدته
بص لها بدموع ف عينيه... ولاول مرة تحس بضعفه
"ايه يا عبد الحميد... وحد الله... ان شاء الله هتبقى كويس"
دخلت ميار وحضنته

"حمدالله ع السلامة يا بابا... نورت البيت"
حضنها وهو بيعيط... عيطت ميار لما لاحظت اعوجاج بؤه
فاتن شاورت لميار انها متعيطش... غيرت هدومها
"تعالى ياميار ساعدينى اعمل اكل لبابا"

ميار لعبد الحميد "هساعد ماما واجيلك اقعد معاك... مش هسيبك تقعد لوحدك يا بابا"

باست ايده وراحت لفاتن المطبخ

اول ما دخلت المطبخ

"مينفعش كده ياميار...لازم نتحكم ف نفسنا شوية الدكتور قال نفسيته مهمة وای زعل هيتعبه

اكثر"

"هو بابا ماله...مش هيتكلم تانى؟"

"يارب يرجع يتكلم وبمشى تانى"

"هو ايه اللي حصل بالظبط"

"الجلطة عملت شلل نصفى للجنب اليمين كله"

"ياحبيى يا بابا"

"انا دلوقتى ويلي ويلين... خدمة ابو كى مش سهلة وانا بقعد طول اليوم ف الشغل... غير مصاريف

البيت والعلاج مش عارفة اتصرف منين ولا ازاي"

"هو لسه فيه مصاريف علاج"

"كثير يا ميار..كتييير"

"حلقى ودبلك اللي بعيتهم مكفوش"

"الاسبوع اللي قعده ف المستشفى اخد كل حاجة... بس يالا المهم حسه ف الدنيا ربنا يشفيه

يارب"

فاتن قاعدة جنب عبد الحميد... وميار بتأكله

بعد ما خلص...اخذت ميار الصينية

بص عبد الحميد ل فاتن...وبصعوبة نطق

"متسيينيش"

استغربت فاتن من تفكيره

"اسيبك؟؟ الله يسامحك يا عبده"

شاورها بايده انه ميقصدش اللي فهمته

"اومال قصدك ايه؟؟"

وبنفس الصعوبة وبصوت متقطع

"الشغل"

حاولت تفهم بعد ما كررها مرتين

"عايزنى مروحش الشغل؟؟"

هز راسه انه يقصد كده فعلا

"بس يا عبد الحميد انا لازم اروح الشغل... هنصرف منين انا اتصرفت ف فلوس المستشفى بس

معنديش صرفة ثانية"

شاور لها بأيده اشارة بمعنى الفلوس منين

"اتصرفت... اخدت حلق ميار ودبلى"

دمعت عينيه تانى

"لا حول ولا قوة الا بالله...يعنى اكذب عليك علشان متزعلش"

شاور لها على الدولار... واشارة بمعنى مفتاح

"عايز مفتاح الدولار؟؟"

شاور لها بالنفى

"عايز حاجة من الدولار"

شاور لها بالايجاب...قامت فتحت الدولار

"عايز ايه؟؟"

شاور لها على الهدوم... وبيشاور بمعنى مفتاح

"هدومك؟"

شاور لها بالايجاب...ونطق بصعوبة واضح انه جاهد علشان يقدر يقولها

"مفتاح المحل"

جابت مفاتيحه من جيب بنطلون ف الدولار...وقعدت جنبه

"انت تعبت؟"

شاور لها بالايجاب

"اجيبلك ورقة وقلم وتحاول تكتبلى بالشمال؟"

شاور لها بالايجاب

دخلت ميار "ماما انا غسلت المواعين وخلصت المطبخ"

"هاتى ورقة وقلم ياميار بسرعة"

راحت ميار ورجعت... بورقة وقلم
وكتب عبد الحميد بخط متعرج
"افتحى المحل وجيبى كل الفلوس اللى فى الدرج"

طه فى المحل بيرتب بضاعة ... نرجس ع المكتب
"عامل ايه مع مراتك... زهقت منها ولا لسه"
استغرب طه وبص لها
"ازهق منها ليه؟"
"زى ما اى حد يبشيط فى حاجة جديدة"
ساب طه اللى فى ايده... وراح قعد قصادها
"عالية مراتى اللى بحبها واتحوزتها عن اقتناع... مش لعبة هلعب بيها وازهق منها... انا عايش سعيد
جدا مع عالية... مش عايزانى مبسوط؟"
"وهما الاسبوعين يخليك تحكم انك سعيد؟"
"ع الاقل لحد دلوقتى مشفتش منها اللى يضايقنى او يخلينى احس انى اخترت غلط"
"بكرة تشوف"
"هنشوف السعادة دايما ان شاءالله"

"يارب"

ورن موبايل نرجس... قام طه يكمل ترتيب البضاعة
"الو... ايسيبويه... بجد مش معقول"
"ايه ياماما اللى حصل"
"اختك نجحت... مبروك يا حبيبى الف مبروك... ومها عملت ايه؟؟ مبروك ليكم ... اه طبعا الهدية
اللى انتى عايزاها... فكرى لحد ما ارجع... خدى اخوكى عايز يباركلك"

اخذ طه السماعة وبفرحة

"مروك يا نونا... الف مروك يا حبيبتى... ليكى هدية كبيرة طبعا... اجيب انا على ذوقى... ماشى
يا ستى وهجيبلك الهدية بكرة... يالا سلام"

"مروك ياماما... عقبال البكالوريوس"

"يارب... عقبال ما افرح بعوضك"

"اه... ربنا يخليكى... خليكى ف الدعوة الحلوة دى وبلاش الكلام الوحش بتاع من شوية ده"

"هتيجى بكرة؟"

"ان شاءالله"

"هتجيبها معاك؟؟"

"اللى يريحك؟؟ لو هيحصل مشاكل خلى كل واحد ف حاله احسن"

ردت وهى بتدور وشها بعيد

"هاتما وتعالوا... نحتفل بنجاح اختك"

عالية بتلبس الطرحة... جه طه وقف لها

"لسه يا عالية"

"خلاص اهو"

"ايه القمر والشياكة دى"

بصت عالية لنفسها ف المراية

"يجد؟؟ شكلى حلو يجد؟"

قرب منها ووقف وراها وهما بيصوا لبعض ف المراية

"قمر طبعا... انتى مش شايفة ولا ايه"

"اقولك سر"

"قولى"

"انا ساعات بقول لنفسى البنات كتير واحلى منى الف مرة... اشعنى انا حبتنى كده"

"واشعنى انا حبتنى كده"

"معرفش"

"ولا انا اعرف... الحب مالوش اى مقاييس... هو بيحصل كده ... ربنا عايزنا نحب بعض فحبينا

بعض...من غير امتى وليه وفين وازاى"

"جوزى حبيى فيلسوف"

"مش فيلسوف... بس بيحب"

لفها ناحيته

"وبعدين...لو فضلنا كده مش هنروح لماما...يالاهنتأخر"

"هنجيب ايه لنرمين"

"هجيلها سلسلة ذهب...ايه رأيك"

"فكرة حلوة اوى"

طه بيضرب الجرس...وعالية ماسكة ف ايده وهى خايفة من لقائها بـرجس..زمن غير ما تبين خوفها

لطه

نرمين فتحت الباب...اخدت طه بالحضن

"حبيى وحشتنى اوى"

"وانتى يا حبيبتى...الف ميروك"

سلمت عليها عالية... وقربت منها تبوسها

نرمين شايمة ان طه بيثوف رد فعلها

سلمت على عالية وباستها وهى مبتسمة ابتسامة صغيرة

"ميروك يانرمين"

"الله يبارك فيكى...ادخلوا"

مال طه على نرمين

"مين جوه؟"

"دى مامة مها...جاية تحتفل معانا"

بعد العشا...قامت عالية هى اللى تشيل الاطباق وتغسل المواعين

دخلت لها نرجس

"بتعملى ايه"

"مفيش دى حاجة بسيطة علشان متتعيش"

"طب تعالى كفاية كده... انتى عايزة تبيينى قدام طه اننا بنشغلك"

"لا ابدا... انا بعمل كده بحب والله... قربت اخلص خلاص اهو"

"بت انتى... انتى طيبة ولا بتستعطى ولا ايه"

"والله العظيم انا بحبكم... بس مش عارفة انتم ليه مش بتحبونى"

"بايدك انتى... هنجبك او مش هنجبك بايدك انتى"

سمعوا صوت اغاني وتصفيق...

"سىبى اللى ف ايدك وتعالى علشان نقطع التورته"

"حاضر... ثوانى وهاجى وراكى"

خرجت نرجس من المطبخ... وبعد ١٠ دقائق

خرجت عالية من المطبخ... شافت مها بترقص

بمنتهى الجرأة والدلع والاهتمام ب طه

(١٣)

عالية شافت طه محرج...والكل حوالياه بيصقف عادى
حست بالغيرة... ووقفت مكانها مش عارفة تتصرف

ردود افعال كثير بتيجى ف دماغها
خافت تبين ضيقها لانها متأكدة ان نرجس هتكون ضدها

بهدوء راحت قعدت على كنبه... وقاومت ضيقها وارتابكها بابتسامة صغيرة لظه...اللى قام وقعد
جنبها لما رجعت من المطبخ

مها كانت بتراقب تصرفات طه وعالية
لما قام قعد جنب عالية... بطلت رقص ووقلت الاغنية
"كفاية انا تعبت... وبعدين عالية شكلها اتضايقت"

بصوا كلهم لعالية مستنيين ردها

ابتسمت عالية بهدوء

"ابدا...هتضايق ليه"

مها"علشان برقص... لو عايزة تقومى ترقصى قومى"
عالية"لأ انا مبعرفش ارقص... انا بتفرج بس... كملى خيلنا نتفرج"

طه اتضايق من جرأة مها... ومها اتعاظت من رد عالية

نرمين مش اخدة بالها من حرب الكلام

نرجس حست بالتوتر اللى بين عالية ومها.. وعلامات الضيق اللى بدأت تظهر على طه...ولانها

خافت على زعل طه... قاطعتهم كلهم

"هقطع التورته... كفاية اغانى... صدعت"

قامت لها عالية ووقفت جنبها

"خلينى اساعدك"

طه داخل الاوضة...وعالية بتعلق هدومهم
طه قعد على طرف السرير وهو يبص لعالية بحب وهى بتحط الهدوم ف الدولاب
بعد ما خلصت قعدت جنبه ع السرير...سألته وهى مبتسمة
"ايه مالك؟؟ بتبص لى كده ليه"
"خايف تكونى زعلانة"
"من ايه"
"من كلام مها البايخ"
"اللى كنت خايفة منه مامتك...والحمدلله محصلش منها اى حاجة تضايقتى...بالعكس كانت طيبة
معايا"
"ماما طيبة والله"
"طبعا... كفاية اها ام حبيى"
"اى حد يزعلك قوليلى...ماشى"
حظنها وهو بيظمنها..حست بالامان اللى عمرها ما حسته غير وهى معاه
"طول ما انت معايا...يبقى مش ممكن ازعل ابدا...ربنا يخليك ليا"

مها ونرمين بيصوا لنفسهم ف المراية
مها"لالا مش حلو الفاتح..فين الروح النبى اللى اشتريناه الاسبوع اللى فات"
نرمين"عندك ف العلبة"
مسكت مها مندبل ومسحت الروح اللى كانت حاطاه ودورت على الروح التانى...حطت منه
وبصت لنفسها
"اه...كده احلى"
نرمين"هنتأخر يا مها يالا بقى"
مها"ياختى مستعجلة على ايه هو احنا ورانا معاد"
"بقالنا ساعتين بنلبس ونقلع ونغير ف شكلنا...احنا رايحين كلية مش رايحين فرح"
"الانطباعات الاولى تدوم"
"يعنى ايه"

"يعنى نروح كده متأنتكين على سنجة ١٠ علشان من اول يوم نلقت النظر لينا... ماهو احنا لو
مخرجناش من الكلية دى كل واحدة فينا بجوازة حلوة يبقى يا خسارة تعبنا وكنا اخدناها من قاصرها
وقعدنا ف البيت بدرى بدرى"

"ايه يامها...معقول كان ممكن تقعدى ف البيت"

"اه ياحتى...لو كان اخوكى اتجوزنى ودلعنى زى ما بيدلع مراته كده كنت سبت الكلية وقعدت ف
البيت أدلعه وبس"

"بس اخويا مبيدلعش مراته...انتى عرفتى منين"

مها وهى بتضحك

"انتى ميتشوفيش ولا ايه...البت المصدية اللي جاها م الملجأ بقت بتلبس واحلوت ووشها بتنط منه
السعادة يبقى كل ده ومش مدلعا...اسكتى اسكتى هتفضلى خايبة"

"انتى بتعرفى كل ده منين"

"م الدنيا ياحتى"

"يكونش عندك ١٠٠ سنة وانا معرفش"

وقفت مها وقفة حكيمة وحطت ايدها على كتف نرمين

"نرمين يا بنتى... انا كنت بقعد مع امى وجيراتها واسمع حكاياتهم وهزارهم وحتى كلامهم عن
نومهم مع اجوازهم من وانا صغيرة.. كانوا فاكرينى عيلة صغيرة مش فاهمة حاجة..بس على مين انا
كنت بسجل كل اللي بسمعه ف دماغى علشان استفيد"

"واستفدتى"

واتنهدت مها وهى بتبص لنفسها ف المراية

"هستفيد... مسيرى استفيد"

طه ف المحل... واقف مع زباين

موبايله رن... شاور لنرجس تكمل معاهم لحد ما يرد

رد على عالية

"الو.. ايه مالك؟؟ لا استنى متترليش انا جاي لك... مسافة السكة...مع السلامة"

قفل طه... ونرجس بتبص له عايزة تسأله

استنى لما الزباين دفعوا ومشىوا

"ايه يا طه؟؟ فى ايه"

"هدير صاحبة عالية بتولد واتصلوا بيها وعازرة تروح"

"وانت هتروح ليه؟؟"

"اوصلها وابقى ارجعلك"

"روح وصل النونو... اللى هتتخطف لو مشيت لوحدها"

ضحك طه

"نفسى اعرف انتى لسه مش طايقاها ليه"

"انا مش طايقاها؟؟... مش كنتم عندى الاسبوع اللى فات و كنت شايلاكم ف عنيا"

"ما انا مستغرب"

"خلاص يا طه... روح انت هتفتح لى محضر... متأخرش بس"

عالية مع طه ف العربية... واقفين قدام المستشفى

"اجيلك امي؟؟"

"طه... ينفع ارواح ابات معاها... علشان خاطرى متقولش لأ"

"تباتى ازاي يا عالية... وانا هتسييني لوحدى؟؟"

"انا مقدرش ابعده عنك يا حبيبي والله بس هدير معهاش حد غير ربنا... ولازم اكون معاها ع الاقل

اول يوم بس تشد حيلها وبعد كده هبقى ارواح لها زيارات"

سكت طه... متضايق

"علشان خاطرى يا طه... متقولش لأ... انا كمان لو احتجتها هي مش هتسييني"

"ماشى يا عالية... بس هتنامى فين وجوزها هيبقى فين؟"

"متقلقش... لو لقيت مفيش مكان او ينفع ارواح هتصل بيك وابقى اجيلها بكرة... اتفقنا"

"ماشى... بس اول واخر مرة تباتى بره البيت"

"حاضر يا حبيبي... يالا سلام"

"انا هروح مع ماما ابات هناك... بس اى وقت ممكن اجى اخذك لو كلمتيني"

"خلاص اتفقنا... سلام"

طه داخل البيت مع مامته...وزى ما توقع لقي مها قاعدة مع نرمين

اول ما نرمين شافته...جريت عليه

"طه راجع مع ماما بالليل زى زمان"

طه "ازيك يانرمين..ازيك يامها"

مها "الحمد لله انت عامل ايه"

نرجس وهى داخلة

"حضروا العشا يابنات...هدومك ف الدولاب ياطه...غير وتعالى اتعشا"

بصت مها ونرمين لبعض مستغربين

نرمين "طه هيبات ليه؟"

مها "اكيد متخانق مع مراته"

طه وهو ماشى ورا مامته رايح على اوضته

"لا مش متخانقين ولا حاجة...هما العيال دى حشريين ليه ياماما"

نرجس "سيبك منهم هما كده على طول"

مها ونرمين ف الاوضة...

نرمين "مها متنسيش تعملى موبايلك فيبريشن علشان لما احمد يكلمك طه ميسمعش رنة الموبايل

بالليل"

مها "متخافيش متفوتنيش حاجة زى دى"

نرمين "هااا مقالتيش هيخطبك امتى"

مها "لما يخلص طبعا... على فكرة محمود صاحبه عايز رقمك وانا قلت اسألك الاول"

نرمين "لالا خلاص توبة... انا كنت هموت المرة اللي فاتت"

مها "هتفضلى جبانة كده...انتى حرة"

نرمين "ايوه جبانة... احسن ما يحصل مصيبة وارجع اقول ياريتنى"

مها "ما انا قدامك اهو... عارفة ان محمش يقدر ياخذ منى حاجة غصب عنى"

نرمين "يا ستى انا غيرك...انتى بتعرفى تلحقى نفسك انا لأ"

نرجس قاعدة قدامه تبص له وتسمعه... لما شافها .. كمل
"ولا اقولك... هتغدى مع ماما ف المحل وابقى اخذك بالليل"
شاف ابتسامه نرجس ... فهم انها فرحت... وكمل مع عالية
"يالاهبقى اكلمك تانى... مع السلامة"
بعد ما قفل مع عالية
"انا قلت اقعد معاك انت يا جميل النهاردة"
"يخليك ليا يا حبيبي... صاحبته ولدت؟"
"اه"
"عقابلكم"
"ان شاءالله"
"لسه مفيش حاجة؟"
"ربنا يكرم"
"انتوا بقالكم ٦ شهور يا طه... انتوا مطنشين كده ليه"
"نعمل ايه يعنى ياماما... دى حاجة بتاعة ربنا"
"ايوه مقلناش حاجة... بس برضه ٦ شهور كتير"
"مش كتير ولا حاجة"
"ماهى صاحبة مراتك اهى خلقت على طول"
"نصيب ياماما"
"مش انت ومراتك طبيعين يعنى ف حياتكم"
اتخرج طه من تلميحها... قام
"الحمدلله... هبقى اجيب غدا وانا جاى م الشغل"
قامت وراه
"استنى... مجاوبتنيش ليه؟؟ هو فيه حاجة؟"
"حاجة ايه بس... مفيش حاجة"
"اومال ليه محبتش لحد دلوقتي"
"معرفش"
"يبقى لازم توديها تكشف"
"ماما... لسه بدرى ع الكلام ده"

"مديرش ولا حاجة... انا كل ما اسألها ولا اسألك تقولى لسه... نروح نشوف لسه ليه"

"ان شاءالله"

"هحجز انا عند دكتور كويس ونوديه"

"ان شاءالله"

طه مستنى عالية تحت بيت هدير

نزلت... ركبت جنبه

"ازيك يا طه"

"وحشتيني"

"وانت كمان وحشتنى اوى"

"بصى بقى... مفيش بيات بره تانى ابدأ"

عالية وهى فرحانة بحب طه ليها

"حاضر يا حبيبي"

"اكلتى ونمتى كويس"

"الحمدلله... بس البيت وحشتنى اوى"

"نتمشى شوية بالعربية تغيرى جو... وتنعشا ونروح"

عالية مش لاقية كلام تقوله لظه... اللى بيعبر عن حبه ليها بالكلام والافعال... نظراتها ليه بتنطق

بالحب والشكر

رن موبايل طه وهما ف العربية... بص ف الموبايل... استغرب

"دى ماما... ياترى خير؟ ما انا لسه سايبها"

"طب رد بسرعة شوف مالها"

طه بيرد"الو... مالك يا ماما... انتى لحقتى؟؟.. طيب طيب... خلاص هقولها انا... ماشى... مع

السلامة"

عالية بتبص له بقلق

"خير؟"

"ماما حجزت لك عند الدكتور"

عالية بتساؤل

"دكتور ايه"

طه وهو محرج من موقفه وتدخل مامته...بيتحاشى انه يبص لها

"اصل سألتنى اتأخرنا ليه ف الخلفة... وقالت انها قلقانة وحجزت لك عند دكتور كويس"

عالية سكتت...مستغربة المفاجئة... اول مرة يقولها طه اهتم اتأخروا... ويفاجئوها بمعاد الدكتور

مع كل الافكار اللي ف دماغها... كانت ساكتة

عالية...وطه...ونرجس...قاعدين قدام الدكتور

ماسك اشعات وتحاليل يبص فيها

نرجس"خير يا دكتور؟؟ ليه خلتها تعمل كل الاشعات والتحاليل دى"

الدكتور بيحط الحاجة اللي ف ايده ع المكتب...وبيكلمهم

"نفس اللي استنتجته الزيارة اللي فاتت...المدام عندها مشاكل كتير وهتحتاج علاج طويل... ويبقى

الامل ضعيف"

عالية بدأت دموع صامطة تنزل من عينيها...وطه المفاجأة أجمت لسانه

سألته نرجس

"يعنى ايه ممكن تخلف ولا مفيش امل خالص؟؟"

الدكتور"والله يا مدام دى حاجة بتاعة ربنا... هي حاليا مستحيل تخلف طبعاً...انما فيه امل ضعيف

ف العلاج على المدى الطويل"

(١٤)

نزلوا من عند الدكتور ومحدث بيتكلم مع حد
كل واحد اکتفى بجزنه جواه وساکت
عالية دموعها كانت اقوى منها...بتعيط بصمت

راحوا على العربية...فتح لهم طه
رکت نرجس جنبه...وعالية ورا
وهما ماشيين... طه يبص قدامه وغصب عنه نزلت دموعه
شافت نرجس دموعه

"استهدى بالله يا طه... متزعلش نفسك بس"

مسح طه دموعه بسرعة

"مفیش حاجة ياماما... امر ربنا وانا راضى بقضاؤه"

"يا عينى عليك يا بنى... كل ما تفرح فرحتك مش كاملة... لا فرحت ف جواز ولا خلفه"

"مين قال بس انى مفرحتش... انا الحمد لله مبسوط مع عالية... صح يا عالية"

بص لها ف المراية... شاف دموعها اللي مبتوقفش

ردت نرجس

"هى اكيد مبسوطه معاك لانها مكنتش تحلم بربع الاملة اللي هى فيها... المهم انت ازاي مبسوط

معاها كده"

عالية دموعها مبقتش صامته... زاد عياطها وبقي بحرقه

رد طه "مبسوط معاها علشان بجهها... وراضى بكل ظروفها"

وفرمل قبل ما يخطف عربيه قدامه... وكمل بعصبية

"ماما... ممكن متجيبيليش سيرة كلام الدكتور ده تانى... هنبقى نروح لدكتور واتين وتلاتة

ونشوف... مش يمكن ده حمار ومبيفهمش حاجة"

ردت نرجس "ده دكتور كبير وشاطر"

طه "مفیش حد مبيغلطش... هيطلع غلطان ان شاء الله... انتهينا بقى"

سكنت نرجس مجرة... وكلام طه أحيا الامل ف قلب عالية
بدأت تمدا ودموعها تقل

وصل طه قدام بيت نرجس...نزلت...رزعت الباب وراها من غير ما تكلم حد فيهم
التفت طه بابتسامة حزينة لعالية
"تعالى اقعدى جنبى"

طه وعالية اول ما وصلوا البيت...دخلوا اوضتهم يغيروا هدومهم
واتكلمت عالية بعد تفكير طول الطريق
"طه... مامتك معاها حق ف اللى قالتة"
بص لها طه
"مش فاهم؟"

قعدت على طرف السرير وهى بتتجنب انما تبص له
"انا مكنتش احلم بربع حياتى معاك...انما انت هتبقى مبسوط بايه؟؟ هى مغلطتش هى قالت الحقيقة"
"والحب اللى مجبهولك ده ايه؟؟ انا محدش ضربنى على ايدى علشان اتجوزك"
"ودلوقتى؟؟ انا عارفة قد ايه انت بتحب الاطفال ونفسك فيهم...وانا.."
قاطعها طه

"انتى ايه... الدكتور قال فيه علاج وبعدين انا قلت مش واثق ف كلامه...لما بقى نروح لدكتور
واتنين...لو قالوا نفس الكلام بقى نشوف"
"لو قالوا نفس الكلام يبقى حقك..."
وعيطت ومقدرتش تتكلم...قرب منه طه وحضنها
"لو قالوا نفس الكلام يبقى نبدأ العلاج ونتوكل على الله وهو اللى بيرزق... انا مجبك ومش هسيبك"
ابدا مهما حصل"

نرمين ومها فى كافتيريا الجامعة...قاعدين وسط شلة كبيرة
هما الاتنين قاعدين جنب بعض...نرمين عينها بتدور على حد

مالت عليها مها
"مش معانا خالص انتى"
"السنة هتخلص ولحد دلوقتى ولا كلمنى ولا كلمته"
"ماهو انتى مش عايزة تبدأى معاه واللى زى ده ميحيش بطريقتك القديمة دى بتاعة تقعدى تستنى هو
اللى يكلمك"
واترسمت ابتسامة واسعة على شفائيف نرمين
"اهو... طارق جه هناك اهو"
وكملت بزعل
"ورايح على الشلة بتاعته"
مها بتضحك
"بتغيرى؟"
"مش شايفة البنات اللى حواليه قد ايه"
"بت يا نرمين... انا هقوم لك بالمهمة دى"
"هتعملى ايه؟؟"
"هوصل له كلام... من حد لحد انك بتحببيه من اول السنة وساكتة"
"لا اتكسف"
"انا هوصله الكلام بطريقة متخليكيش تظهرى ف الصورة خالص... بصى لو اهتم بيقى هيكلمك
والباقى عليكى انتى بقى... لو مهتمش خلاص بيقى مش ف دماغه"
"طيب... وانى ايه الاخبار انا ممكن اصالحكم على بعض"
"لالالا خلاص زهقت... يخربيت الارتباط وقرفه انا كده حلوة اوى مش عايزة ارتبط تانى... ع الاقل
دلوقتى"

نرجس ف المحل... طه بيتكلم ف الموبايل
"اجهزى يا عالية... جاي لك... مسافة السكة وهكون عندك... هرن عليكى تنزلى على طول... مع
السلامة"
طه لنرجس "انا ماشى ومش هرجع على هنا اكيد هنتأخر... عايزة حاجة منى قبل ما امشى؟"
نرجس "وبعدين بقى"

"وبعدين ايه"
"هتفضل من دكتور للتانى كده"
"لا...الدكتور ده كويس وهنمشى على علاجه"
"وبعدين يعنى"
"والله انا تحت امر ربنا...اللى رايده هيكون"
"بص يا طه... انت اتجوزتها وانا سكتت ..انما تحرموني من حته حفيد ينلا علينا الدنيا يبقى لأ"
"مش بايدينا"
"مش بايدها هي...انما انت تفضل قاعد جنبها ليه"
"علشان مش ذنبها"
"مقتلكش ذنبها...انما حرام عليك عليك تحرم نفسك وتحرميني من انك تخلف"
"طه وهو خارج من المحل"
"مش هسيبها ياماما.. سلامو عليكو"

فاتن ف البيت...داخلة بصينية اكل لعبد الحميد
حطت الاكل على ترايزة صغيرة...وساعدت عبدالحמיד يتعدل
عبد الحميد بيتكلم احسن
"هى ميار فين؟"
"لسه مرجعتش م المدرسة"
"مش كنا نستناها"
"انا قلت اغديك الاول علشان تاخذ الدواء"
"انا تعبتك معايا الشهور اللى فاتت دى"
"ربنا يشفيك ويخليك لينا..متقولش كده"
"بقولك ايه... انا بقول نأجر المحل علشان يساعدنا شوية"
"اول مرة تاخذ رأيي ف حاجة تخصك"
رد عليها وهو مكسوف
"انا كنت غلطان... حاجات كثير كنت فاهمها غلط بس انتي معدنك اصيل يافاتن ..انا محقوقك"
"متتعيش نفسك بالكلام الكثير ويالا علشان تنغدا... وحلوة فكرة تأجير المحل"

"جربى يا عالية وان شاءالله يبقى خير"
"ماهى التجارب دى مش ببلاش... ده عايز ٢٠ الف جنيه غير المتابعة"
"ياااااه كتير اوى"
"طه تعب مصاريف...بقالنا ٥ سنين فى علاج وعمليات وفلوس بتترمى فى الارض ومفيش فائدة"
"ربنا كبير ومش هيضيع تعبكم ابدأ"
"يارب ياهدير... انا مليش عين اقوله نجرب...وانا عارفة انه معهوش فلوس...انا هسيب الموضوع
كله فى ايده وهو اللي يقرر... وربنا يكتب لنا الخير"

طه داخل المحل... وشكله مهموم
نرجس بلهفة
"ايه عملتوا ايه؟؟"
"الحمدلله...قال هي عملها حقن مجهرى... ب ٢٠ الف"
"ومضمون ده يعنى؟؟"
"مفيش حاجة مضمونة"
"يبقى كفاية الفلوس اللي اتصرفت طول السنين اللي فاتت"
"انا ما بصدق بتعلق بأمل"
"انت اللي معلق نفسك ع الفاضى...قتلتك ١٠٠ مرة طلقها واتجوز"
"وانا قتلتك ١٠٠ مرة برضه مقدرش اسببها"
"هتفضل طول عمرك كده فى متاهات الدكاترة والعمليات"
"نصيبنا كده"
"ايه الاستسلام اللي انت فيه ده...انت بقيت ولا اللي عنده ١٠٠ سنة من الهم اللي انت
شايه...يابنى حرام عليك نفسك"
"هتقدرى تسلفين؟؟"
نرجس وهى بتدور وشها
"كفاية اللي اخدته... اختك على وش جواز وهتحتاج ومش معقول كل اللي حيلتى يروح على
مراتك اللي مفيش منها رجا"
طه وهو ماشى

"خلاص ماشى...انا ماشى"
"انت زعلت؟"
"لا..هروح اشم شوية هوا...مخنوق"

طه واقف على الكورنيش... سرحان
بيفكر ... مين صح ومين غلط
هو صح لما كل شوية يتعلق بأمل
مامته صح لما بتقوله يطلق عالية

كل الفلوس اللي صرفها دى اترمت صحيح زى مانرجس قالت
هيجيب مين ال ٢٠ الف جنيه للعملية

رن الموبايل...شاف انها عالية
"ايوه يا عالية... لا مش ف المحل...ف الشارع... مبعملش حاجة... قبل ما اجيلك هتصل
بيكى...مفيش حاجة انا كويس...مع السلامة"

عالية وطه ف اوضتهم
"اطفى النور يا عالية لو مش هتنامي"
"انت هتنام من غير ما تتعشا"
"شبعان مش قادر"
"مالك ياطه...انت بتكلمني كده ليه النهاردة"
طه وهو منفعل
"بكلمك ازاي؟؟ انا عملت لك حاجة"
"انا عارفة انك شايل هم فلوس العملية...مش مهم"
"انا مشتكيتش يا عالية"

"مش لازم تشتكى انا حاسة بيك... لو كان معايا فلوس مكنتش هأخرها عنك... حتى اللي باقى من

الشبكة ميحييش حاجة"

وزعق طه

"عايزة تفكرينى ان بيعت لك شبكتك... انا كمان مبقاش حيلتى حاجة يا عالية... انا مش مستخسر

فيكى انا مش لاقى بجد"

وعيطت عالية

"مقصدش... والله ما قصدى"

"ومش كل شوية تعيطى لى... انا هفضل لحد امتى كده... اراضيكى من ناحية واشد مع ماما من

ناحية تانية... هو محمش حاسس بيا ليه"

عالية وهى بتعيط اكر

"انا عارفة انك استحملت معايا كتير... وخلاص يا طه انا مش طالبة منك حاجة... بس مترعلش

... انا حاسة بيك والله... انت مش ذنبك... اعمل اللي يرضيك... عايز تطلقنى طلقنى... عايز تتجوز

اتجوز... انا عارفة انى مش من حقى افرح ابدا... الدنيا مستخسرة فيا الفرحة"

خرجت عالية من اوضتها وهى منهارة... دخلت اوضة الاطفال وقفلتها عليها... وقعدت تعيط

نرمين فى اوضتها... قاعدة ع الكمبيوتر وحاطة السماعات فى ودانها وفتحة الكاميرا

"هفضل لحد امتى كده يا طارق... قتلنى لما تتخرج واتخرجت بقالك ٣ سنين... قلت لى لما اشتغل

ولما اشتغلت مبقتش تستقر ف شغل... قلت لى لما تستقر ف شغل... واستقرت بقالك سنة

...هتيجى تخطبى امتى"

"اجى اقول لاهلك ايه... لا عندى شغل ثابت ولا شقة ولا حيلتى فلوس اجهز"

"تعالى اخطبنى الاول وكل ده بيعى على مهله"

"انتى اللي هامك خطوبة وخلاص"

"ماهو انا مش ضمناك... كل شوية الاقى واحدة عمالة تتمرقع معاك فى كومنتات الفيس واخلص من

واحدة يطلعلى غيرها"

"قتلتك قبل كده اصحاب عادى... انتى المفروض يكون عندك ثقة فيا"

"طمنى... تعالى اخطبنى علشان اطمن انى مش زيهم"

"انتى عارفة انى بجبك انتى.. ومن ايام الكلية وانا ليا اصحاب بنات كتير وانى غيرهم"

"قلقانة برضه"

"انتى مكنتيش كده انتى من ساعة ما خلصتى وانتي فضيتى لى بقى"
"هو ليه محدش حاسس بيا ابدا...ماما ف شغلها واخويا ف همومه وانت ف شغلك...حتى مها من
ساعة ما اتخطبت ومبقتش قاعدة معايا زى الاول...هو محدش بيحبني ليه؟"
"هو الحب انك تفضلى تكلميني كل شوية..وان مامتك تسبب شغلها وتقعدي جنبك؟"
"لا...افضل انا لوحدي على طول...بص بقى يا طارق... ياتيحي تخطيني يا اخر كلام بيني وبينك
...كفاية اوى ال ٥ سنين اللي فاتوا...سلاااااام"
قفلت نرمين مع طارق.... واتصلت بمها وهي بتعيط
"الو... انا اتخانقت مع طارق... قلت له يا يخطيني يا مفيش كلام تاني بيني وبينه... ايه؟؟؟ معقول؟؟
طيب...طيب.. هستناكى بكرة...مع السلامة"

(١٥)

طه بيقوم قبل ما المنبه يرن
يفتح باب اوضته... يشوف عالية ف المطبخ
يدخل الحمام وبعد ما يخرج يروح يلبس
وهو مستعد للتزول يشوف الفطار ع السفرة زى كل يوم

تقوله عالية بانكسار
"الفطار يا طه"
يروح يقعد ع السفرة... تقعد معاه
"مش هتاكلى؟"
تمسك العيش وتبدأ تاكل ببطء واضح انها علشان تراضيه
يبدأ هو كمان يفطر... ببطء ومن غير نفس

يسيب الاكل ودموعه ف عينيه
"انا مقصدتش ازعلك... انا حاسس بالعجز انى مش عارف اتصرف"
اندفعت الدموع من عينين عالية
"بس الحقيقة انى انا اللي عاجزة عن انى اكون ام وبسببى انت محروم تكون اب"
"مفيش انتى وانا... احنا الاتنين واحد يا عالية... مش معقول بعد العشرة دى ومنفهمش بعض
ويبقى بين حساسية ف الكلام البسيط ده"
"انا امبارح مقصدتش انك بيعتنى الشبكة زى ما فهمت.... بالعكس انا عارفة انك اتكلفت كتير
اوى ومش هطلب منك حاجة تانى... انا خلاص راضية بقضاء ربنا ومش عايزة اروح لدكاترة"
"ان شاءالله كل حاجة هتتحل وهتصرف ف الفلوس"
"هتتصرف منين"
"مفيش غير انى اشوف اجراءات القرض ايه واعمل قرض يكفى العملية ومتابعته"
"لا يا طه... القرض حرام وانا مش عايزة اخلف بفلوس حرام"
"طب والعمل"

"مش عارفة...بجد مش عارفة... بس بلاش القرض"

طه بعد ما قام من ع السفره

"ربنا يفرجها يا عالية...محاوول افكر ف اى حل تانى"

قامت عالية وراه

"مش هتفطر طيب"

"مليش نفس خالص"

قربها منه وحضنها

"متزعلش منى بقى"

ردت وهى ف حضنه

"انا مقدرش ازعل منك ابدأ... انت كمان متزعلش منى...انا حاسة انك من ساعة ما تجوزتنى وانا

منكدة عليك"

مسك كتفها وبعدها عنه علشان تبقى قدام عينيه...وابتسم لها

"اهو انتى كده بتنكدى عليا بكلامك ده"

ابتسمت ابتسامه كلها ألم وطبطبت على صدره

"خلاص...مش هنكد تانى"

راح ناحية الباب... وقبل ما يفتح

"ادعى ربنا يفرجها ويرزقنا بالفلوس والذرية الصالحة"

"مش محتاجة توصية...انا طول الليل والنهار ميبطلش دُعا"

نرمين ومها ف المطبخ...بيعملوا نسكافيه

مها"هو ايه الحظ اللى احنا فيه ده"

نرمين"انا مش مستوعبة اللى بتقوليه والله"

مها"اهو ده اللى حصل...خناقة كانت كبيرة وقالى مش عايزك قمت طلعت له القديم والجديد خليته

يتزل مش شايف قدامه"

"ومش زعلانة عليه"

"ازعل على ايه بس... ده انا كل ما اقوله خرجنى يقولى مش فاضى...اقوله زهقت وعاززة لتفسح
ياخدنى يقعدنى ع الكورنيش ونشرب حاجة ساقعة ونروح...ايه اللي سكتنى عليه سنة مش عارفة..."

ده نتن يا بنتى"

"بس هو م الاول قال انه بيجهز كل حاجة لوحده وانتي كنتى بتحكى لى ان فلوسه بيحطها ف
الشقة"

"يا فرحتى...يحطها ف الشقة واولع انا من غيظى...فاكرة ايام الكلية لما كنا بنتفسح ونروح ونيجى
براحتنا...من ساعة ما اتخطبت وهو رايحة فين وليه وعلشان ايه لما خنقنى...اسكتى يا شيخة انا عاززة

اشم نفسى"

سألته نرمين بفرحة

"يعنى هترجعى تقعدى معايا زى الاول"

"اه طبعا...هو احنا لينا الا بعض"

خرجوا من المطبخ وكل واحدة ماسكة المچ بتاعها

دخلوا اوضة نرمين...بصت نرمين ع الكمبيوتر

"مبعتش حاجة ولاظهر النهاردة"

"ابعتيله انتى"

قعدت نرمين جنبها

"يمكن يحس بغياي ويتأثر...انا زهقت يا مها كل السنين دى على امل وكل ما اقول خلاص هانت

الاقيه يتحجج لى بحجة جديدة...مرة اما يتخرج ومرة لما يشتغل"

"خلاص كبرى دماغك منه"

"بجبه يا مها...بجبه ومقدرش استغنى عنه ابدأ"

"وبعدين"

"مش عارفة...هستنى يمكن يكلمنى ولا يبقى اون لايين...لو مظهرش هتصل بيه واصالحه واحاول

معاه تانى"

طه داخل المحل...بيحط فلوس قدام نرجس

"دى كل الفلوس اللي لميتها م التجار...فيه ناس اجلوا جزء وفيه دفعوا"

نرجس بتاخذ الفلوس...وورقة مكتوب فيها اسماء التجار

"وهتروح تجيب بضاعة جديدة امتي"

"خذت اجازة الاربع والخميس...هروح الخميس علشان ابقى اجازة بعدها"

سكت طه وراح قعد على كرسي بعيد عنها...مسك الريموت وفضل يقلب ف التلفزيون

نرجس بتبص له نظرات مختلصة...صعب عليها

"مالك؟"

"مفيش"

"هتعمل ايه ف حكاية العملية؟"

"لسه مش عارف...بس هنعملها ان شاءالله"

"اتصرفت ف فلوس يعنى"

"لا هتصرف مين"

سكتت لحظات

"امرى لله...هديلك الفلوس"

قام طه من مكانه مش مصدق انها اتحلت بالسهولة دى

"بجد يا ماما...بجد هتديلى الفلوس؟"

"اه...بس بشرط؟؟"

قلق طه من كلام نرجس

"شرط ايه؟"

"دى اخر محاولة يا طه... لو نفعت يبقى خير وبركة...لو منفعتش يبقى تطلقها وتشوف حالك

بقى"

"لا مش هطلقها"

"خلاص...وانا معنديش فلوس الا بالشرط ده... وتبقى هي كمان عارفة بيه علشان يبقى كل حاجة

على عينك ياتاجر"

"كفاية اللي هي فيه...مقدرش اجرحها اكر من كده"

"انت ايه يا بنى... خايف على شعورها ومش هامك نفسك...حرام عليك اللي بتعمله ف نفسك

وفيا...انت ليه قاصد توجع قلبى"

"انا؟؟"

"ايوه... نفسى اشوف ولادك ويجروا ويتنططوا حواليا كده زى بقية خلق الله"

"يعنى انا منفسيش... ما انا كمان نفسى بس ربنا ميبتعاندش"
"هو ربنا مش حلل الطلاق والجواز علشان الظروف اللي زى دى... يبقى تحرمه على نفسك ليه"
"ياماما عالية مالهاش حد غيرى... انتى ليه مش حاسة انها مالهاش حد... مقدرش اخلى
بيها... مقدرش"
"بقولك ايه... انا قلت اللي عندى وروح واتكلم معاها وهاتولى رد... وعلى ايه استنى... انا هكلمها
واقولها"

فاتن قاعدة مع عبد الحميد... وجنبه عكاز سانده ع الكنبه

يبص ف الساعة

"هى ميار فين؟؟ نامت ولا ايه"

"بتذاكر"

"ما تنادى لها تقعد معنا شوية"

"حاضر"

قامت فاتن دخلت اوضة ميار

شافتها قاعدة ع الكمبيوتر

"ابوكى عايزك"

ميار باستياء

"دلوقتي"

"اه ياميار... ده مش هيطير"

بصت لها ميار برجاء

"حاضر... بس لو ملحققتوش هينام"

"ابوكى اهم"

"حاضر"

خرجت فاتن من الاوضة... ووراها ميار

قعدت ميار جنب عبد الحميد

"كنت عايزنى يا بابا"
عبدالحميد "كنت عايزك تقعدى معانا شوية"
ميّار "اه... اصل كان عندى مذاكرة"
عبدالحميد "قومى ذاكرى متعطّيش نفسك"
فاتن وهى بتبص لها بتحذير
"المذاكرة مش هتطير"
ميّار "اه طبعاً"
فاتن "دلعتها اوى يا عبده"
ميّار "ابه ياماما.. يعنى الاول كان احسن"
عبدالحميد "قوليلها يا بنتى... لا كده عاجب ولا كده عاجب"
ميّار "انت خليك كده... بس الله يخليك لما اطلب حاجة متقوليش قولى لماما"
عبدالحميد "معلش لازم اقولك كده علشان هى اللى ماسكة المصروف كله"
قامت فاتن "وانا بستخسر فيكى يا ميّار"
ميّار "اهى هتزعل بقى"
قامت ميّار وراها باستها
"بجزر ياماما... بجزر"
وبصت لبابها
"بابا عايز حاجة منى"
عبد الحميد وهو بيقوم ويبسند على عكازه
"لا هدخل انا... تصبحو على خير"
دخلت ميّار اوضتها تجرى .. وفاتن بتساعد عبدالحميد يدخل اوضته

طه داخل البيت بالليل... وهو شايل هم مواجهة عالية بعد الكلام والشرط اللى شرطته عليهم نرجس

اتفاجئ بعالية بتستقبله بحب وفرحة
"حمدالله ع السلامة يا طه"
طه افتكر ايام جوازهم الاولى من مظهر عالية ولبسها وابتسامتها

قبل الهموم اللي ملات حياتكم

"الله يسلمك...ايه الجمال ده"

"ربنا يخليك ليا...ياللا غير هدومك وتعالى نتعشا انت بقالك كام يوم مبتاكلش خالص"

عالية وطه قاعدين بيتعشوا...طه بيص لها ومستغربها

"عالية"

"نعم"

"انتى عاملة كل ده ليه"

سابت الاكل اللي ف ايدها... حاولت تدور على كلام تقوله...سبتها طه

"انا متوقع اجى الايكي زعانة"

"طه...مامتك معاها حق..انا طول اليوم بفكر فى اللي قالته بس هى فعلا معاها حق... دى اخر

فرصة لينا"

رغم ابتسامتها مقدرتش تمنع دمعتها اللي نزلت غصب عنها

قام طه حضنها

"متقوليش كده... انا مقدرش استغنى عنك"

مسحت دموعها بسرعة...وقفت قدامه

"مامتك هتساعدنا المرة دى...لو ربنا رايد لى اخلف هيرزقنا...لو مش رايد يبقى انت لازم تسمع

كلامها...بس.."

"بس ايه؟؟ انتى ازاي متخيلة انى ممكن ابعد عنك"

"ماهو ده طلبى الوحيد منك...متطلقينش"

قالتها وجريت دخلت اوضة الاطفال وقفلت عليها وهى بتعيط بحرقة

طه فضل واقف مكانه...بيصارع قلبه وعقله

قلبه اللي بيقول انه يتقبل ظروف عالية ف كل الاحوال

وعقله اللي بيقول انه يسمع كلام مامته

قعد مكانه يفكر...فى الرد اللي هيرد بيه على نرجس

موافقين على شرطها ولا لأ

"الو...ازيك يطارق"

"لسه فاكرة تسألني"

مها تشاور لنرمين على دموع تنزل من عينيها

نرمين تتصنع العياط وتسمع كلام حفظته من مها

"انا برضه اللي مسألتش...انت لو كنت بتحبيني كنت اثبتلي الحب ده... وانت عارف اني عايزاك

وهقف جنبك"

"هتقفني جنبى هتعمليلى ايه يعنى"

"مش هطلب منك حاجة...بس لازم اللي بينا يبقى رسمى حتى بدبلة وانا ممكن اسلفك لو مش

معاك"

"واهلك؟؟ ما انا خايف اجى يدبسوني"

نرمين بتبص لها بفرحة...مها بتشاور لها تشجعها على الكلام

"لا محدش هيطلب منك حاجة زيادة... انا هتكلم معاهم واقولهم انا بنحب بعض"

"طيب سيبيني افكر"

"هى لسه فيها تفكير يطارق...هو ده الحب...بقولك انا قابله بكل ظروفك"

"طيب مهدي لهم وفهميهم كل ظروفى وشوفى ردهم ايه وقوليلى"

نرجس فى المحل الصبح وطه مش موجود...بتتكلم فى التليفون

"ايوه كده يا عالية...عين العقل... ربنا يديكم... اتفقوا مع الدكتور وانا جاهزة بالفلوس...مع

السلامة"

١٦

عالية قاعدة وماسكة التليفون بتتكلم

"ايوه موافقين...شكرا ياماما ربنا يخليكى ... حاضر هقولك اكيد... مع السلامة"

قفلت معاها...رفعت ايديها للسما

"يارب انت عالم بحالى...يارب ارزقنا ولو بطفل واحد بس... مش طالبة اكر من كده... يارب انا

مش معترضة على حكمك...انا خايفة على بيتى وجوزى يروحوا منى...يارب مليش غيرك"

أخذت نفس سيطرت بيه على اعصابها... حاولت ترسم ابتسامة علشان حزنها ميانش ف صوتها
واتصلت بظه

"الو... عامل ايه؟؟ مش هعطلك كثير... انا كلمت مامتك وقولتلها اننا موافقين وقالت نحجز مع
الدكتور وهى جاهزة... ان شاء الله خير... ماشى يا حبيبى متتأخرش... مع السلامة"

قعدت عالية مكانها تبص لبيتها حوالها... ولصورتها هى وطه اللى على الحيط... ابتسمت وهى
بتفتكر يوم فرحهم

قاطع تفكيرها صوت جرس الباب... قامت تشوف مين؟

عالية بتفتح الباب... ابتسمت بفرحة وترحيب

"ابلة فاتن... اهلا وسهلا"

سلمت عليها فاتن وهى داخلة

"ازيك يا عالية... عامله ايه"

دخلت فاتن وقعدت هى وعالية

"الحمد لله... الله ع المفاجئة الحلوة"

"كنت بعمل كام مشوار كده وخلصتهم بدرى قلت اعدى عليكى اسأل عليكى"

"ده انتى نورتيينى والله... تشربى ايه"

عالية وفاتن قاعدين وقدامهم فناجين القهوة فاضية

"وده معقول يا عالية... توافقى على شرط زى ده بنفسك"

عالية وهى بتصنع اللامبالاة

"الحوجة مرة وخلصت هى معاها حق.. ده اخر امل لينا"

"يعنى ايه؟؟ هتتطلقوا"

ردت عالية بسرعة

"لا... لوعايز يتحوز يتحوز بس ميطلقنيش"

وعيطت عالية

"انا مقدرش اتخيل حياتي من غير طه"

نرجس داخلة البيت... اول ما مها ونرمين يسمعو صوت الباب من الاوضة... يطلعوا يجروا عليها

نرمين "حمدالله ع السلامة ياماما"

مها "ازيك ياطنط"

نرجس "الحمدالله"

نرمين "هحضرك العشا وتتعشا مع بعض"

نرجس بتبص لهم

"مالكم... مش على بعضكم ليه؟"

مها ونرمين بيصوا لبعض ويضحكوا

وهما الاتنين "مالنا... عاديين اهو"

نرجس "طيب... يارب دايما عاديين كده"

مها بتغمز لنرمين. معنى اتكلمى... شافتها نرجس

"جرى ايه يا بت منك ليه... مالكم... انطقوا"

نرمين "قوليلها يا مها... مكسوفة"

مها "مكسوفة... من امى ياختى"

تضربها نرمين وهى بتضحك... تنترفز نرجس

"هنقضيها مياعة ولا هتنطقوا فيه ايه"

مها "اصل يا طنط... كان لينا واحد زميلنا ف الكلية... بس اكبر مننا يعنى... من زمان وهو بيحب

نرمين وعايز يتقدم لها"

قعدت نرجس وسألت بأهتمام

"مين ده؟؟ ويشتغل ايه وابن مين"

قعدت نرمين جنبها

"هو يشتغل ف مصنع حاليا وباباه موظف عادى ومامته ست بيت... ناس عاديين يعنى ياماما"

نرجس "كحيان يعنى"

نرمين "مش كحيان ولا حاجة... شاب عادى لسه بيدأ حياته"

نرجس وهى قائمة

"وايه اللي يرمى الرمية دى... انتى كده قاعدة لما يجيلك اللي يستاهلك"

نرمين شاورت لمها.. والاتنين مشيوا وراها

مها"ياطنط بس هو بيحبها... وهى كمان"

نرجس بتلتفت لنرمين

"هى كمان ايه؟"

مها بتلحقها"يعنى هى كمان عايزاه... مش احسن ما تتجوز واحد مبتحبوش وبعد الشر

يتطلقوا... انما لما تتجوز واحد بتحبه اكيد هيبقوا مبسوطين مع بعض"

نرجس"هياكلوا ويشربوا حب... هيسكنوا بالحب... هيفرشوا بيتهم حب"

نرمين بتعيط"علشان خاطرى ياماما وافقى... انا وهو بنحب بعض وبعدين انه عايز يتقدم مش احسن

ما نفضل نحب بعض من وراكم"

مها"صح ياطنط... يعنى بترفضوا الصح وتدفعوهم للغلط"

كانت نرجس ف اوضتها وهما لسه وراها

"سيبوني افكر مع نفسى واخذ رأى طه"

نرمين"طه ماله.. المهم انتى"

نرجس بشحط"اخوكى الكبير وراجل البيت والكلمة كلمته... مش معنى انى مكنتش بخليه يمشى

كلامه عليكى انك تنسى انه راجل البيت"

سكتت نرمين... وقالت بصوت واطى

"المهم كلامك هو اللي هيخليه يوافق او يرفض"

نرجس"بس نخلص من عملية مراته وبعد كده ربنا يحلها"

طه ونرجس قاعدين مع طارق

طه"يعنى برضه مش فاهم... ناوى على ايه"

طارق"ما انا بقولك انى لسه بادئ شغل قريب ومرتبى ٩٠٠ جنيه اول عن اخر"

طه"ماشى... هتجيب شبكة امى... هتجيب شقة امى... جاي تتجوز ازاي يعنى"

طارق"انا جاي وعارف انرمين فهمتكم كل حاجة"

مها ونرمين ف المطبخ واقفين ع الباب ووداهم بره
عالية بتحضر صينية الجاتوه

مها"اخوكى شكله هيبوظ الدنيا"
اتضايقت عالية من كلام مها وسكتت على مضض
عالية"خدى يانرمين طلعى الصينية"
نرمين وهى بتاخذ الصينية
"هاتى...علشان ألحق طه"

اخذت نرمين الصينية وراحت تقدم لطارق
كانوا بيتكلموا

طه"ازاى تتخطبوا وربنا يسهل بعد كده...لما نرمين قالت هتيجى لوحدك نتفق الاول مكتتش فاكر
انك لسه تحت الصفر كده"

نرمين"طه ثوانى لوسمحت"
طه"بعدين يانرمين"
نرمين"لا دلوقتى ياطه"

قام معاها...نرجس استأذنت من طارق وقامت وراهم
راحوا يتكلموا ف الطرقة قريب من المطبخ
ولما قربوا مها راحت لهم
نرمين"انت عمال تكلمه كده ليه...زى ماتكون بتتلكك له"
طه"انتى شايفاه ينفعاك؟"
نرمين"ماله؟"

طه"ده محيلتوش اى حاجة...ده عايز يخطبك كده بدبلة من غير ما نتفق على اى حاجة"
"ايه المشكلة يعنى"

"ايه اللى ايه المشكلة... ده مايناسبكيش يا نرمين... فيه فرق كبير بيننا وبينه"
واتكلمت نرمين بعصبية وهى بتعيط

"والله؟؟ ومقلتش الكلام ده لنفسك ليه وانت اتجوزت واحدة من ملجأ"

اتنفرز عليها طه... ورفع ايده يضرها
"اخرسى يا قليلة الادب"
جريت عليه عالية تحوشه... وشدت نرجس نر مين بعيد عنه
نرجس "انتوا اتجنتوا... هتفضحونا قدام الراجل"
طه وهو يباعد عالية عنه
"خلاص... مش انتى عايزاه... مترجعيش تعيطى وتشتكى"

راح طه بعصية وقعد مع طارق
"انا مراتى هتعمل عملية الاسبوع الجاى ومش ضامن ظروفى بعدها... خلال يومين ثلاثة بالكثير
هات اهلك ونقرا الفاتحة"

عالية داخله البيت... وطه يبسندها
وورا هم نرجس شايلة شنطة هدوم

سبقتهم نرجس ع الاوضة... عدلت السرير لعالية
طه يبسند عالية وهى بتنام على السرير

نرجس "ربنا يكملك على خير... واسمعى كلام الدكتور ومتتحركيش كثير"
عالية "حاضر"
طه بيقول لنرجس

"ماما... انا مش هعرف اجى المحل زى الاول... مش هينفع اسيب عالية طول اليوم"
نرجس "اه طبعا... مش مهم... هعمل اعلان اشوف اى بنت تيجى تساعدنى ف المحل وعلشان كمان
ابقى اجى اطمن عليها او لو عايزه حاجة اعملها لها"
عالية مش مصدقة اللي بتسمعه
"شكرا ياماما... مش عايزه اتعبك"
نرجس "احنا اللي مش عايزينك تتعبى ولا تتحركى زى الدكتور ما قال... كفاية اوى المتابعة اللي
هتروحيها له"

رن جرس الباب
طه "هروح اشوف مين"

راح طه يفتح الباب
كانت هدير وبناتها قدامه
"سلامو عليكو"
"اهلا وسهلا... اتفضلى"
هدير وهى ع الباب
"انا رocht لكم المستشفى قالوا لى لسه ماشيين"
طه وهو بيوسع لها تدخل
"اه فعلا لسه جاين... اتفضلى عالية جوه"

هدير دخلت على اوضة عالية.. شافت نرجس قاعدة... خافت من اللى ممكن تسمعه من

نرجس... وبانكسار
"سلامو عليكو"

نرجس "اهلا وسهلا... اتفضلى"

هدير برقت من الاستغراب والمقابلة الحلوة اللى بتقابلها نرجس

سلمت عليها ذوقيا

"ازى حضرتك ياطنط"

نرجس "الحمد لله يا بنتى... ماشاء الله مين القمرات دول"

هدير وهى بتبص لعالية وعايزة تقولها مين دى؟ نرجس ولا واحدة شبهها

هدير "عالية وهنا بناتى"

نرجس "ربنا يخليهو ملك ويقومك بالسلامة"

هدير "ربنا يخليكى... وان شاء الله عالية ربنا يكملها على خير"

قعدت هدير جنب عالية بعد ما سلمت عليها... واتكلموا كلهم ف مواضيع عادية.. ولما حكوا ان

الدكتور قال متتحر كشر كثير وان طه هيقعد معاها وميرو حش المحل

هدير "والصبح متشيلوش هم... انا هجيلها كل يوم الصبح شوية"

نرجس "وبيتك وجوزك وعيالك"
هدير "عياي معايا وجوزي بيرجع بالليل من الشغل...يعنى انا لو جيت لعالية ساعتين تلاتة الصبح
اشوف طلباتها مش هياثروا على بيتي ف حاجة"
نرجس "ربنا يقويكى ويديكى الصحة...صاحبك جدعة اوى يا عالية"
عالية وهى بتبص بحب لهدير
"هدير اختي واكثر من اختي"
هدير وهى بتبص لعالية
"احنا مالناش غير بعض"

طارق ونرمين قاعدين مع بعض ف كافيه
طارق مكشر ونرمين بتكلمه
"مالك يا طارق...كل ما اكلمك ترد عليها بغلاسة كده"
"يعنى انا غلس؟"
"كلامك وطريقتك معايا وحشة جدا"
"واللى حصل من اخو كى كان حلو"
"ايه اللى حصل ماهو نفذ اللى احنا عايزينه واتخطبنا"
"بعد ما حسسني انه مش طايقني لا انا ولا اهلي"
"اخويا معملش حاجة لاهلك بالعكس هو استقبلهم بكل ذوق"
"لا كان مبوز ف وشنا"
"هو عنده ظروف شاغلاه ومراته كانت رايحة تاني يوم تعمل عملية...يعنى مكش كبوز لكم انتم
مخصوص...وبعدين يعنى هنفضل نتكلم على اخويا ولا نتكلم عن نفسنا"
"ما انا متضايق...اعمل ايه"
"معلش علشان خاطرى متتضايقش...خلينا نفرح ببعض مش نعكن على بعض"
طارق بيرد عليها بالعافية
"طيب"

طه داخل الاوضة وعالية ع السرير قدامها التلفزيون

"حبيبتي... انا اسف ان اتأخرت عليكى"

بيقرب منها ييوسها من راسها

"حمدالله على سلامتك"

قعد قدامها

"الله يسلمك...ها عاملة ايه؟"

"الحمدلله كويسة"

"هدخل اخد دش سريع واجى اغير هدومى علشان نلحق معاد الدكتور"

"طه...انت لسه جاي من السفر...نام ساعة ولا حاجة ونأجل معاد الدكتور لبالليل متأخر"

"لا نروح نظمن وبعدين لما نرجع ابقى انام براحتى"

"انا مش عارفة اقولك ايه"

"على ايه"

"طول الشهر ونص اللي فاتوا وانت ومامتك وهدير شايلنى على كفوف الراحة...انا حاسة انى

تعبتكم كلكم"

"متقوليش كده... احنا بنحبك وبنخاف عليكى وياما انتى عملتى لنا كلنا...المهم بس ان ربنا

يكملك على خير ويرزقنا باللى نفسنا فيه"

"يارب... انا كل ما بصلى او وانا قاعدة بدعى ربنا ان يرزقنا الذرية الصالحة ويكملنى على خير"

عالية وطه و نرجس عند الدكتور

عالية على سرير الكشف والدكتور بيعمل السونار

طه و نرجس عينيهم على الشاشة

عالية عينيها على الدكتور اللي لاحظت انه كثر فجأة

عالية" فى ايه يا دكتور"

الدكتور"للاسف...الجنين مش بينمو فهائى"

طه بصدمة"يعنى ايه"

الدكتور"ربنا يعوضكم ان شاءالله...الجنين لازم يتزل"

قام الدكتور وراح قعد على مكتبه

بصت عالية لظه... وهى بتعيط بحرقة وبصوت على
ظه بيحاول يدور على كلام يقوله لعالية...مطلعش منه كلام...نزلت دموعه
نرجس بتعيط من غير ما تتكلم
عالية وهى بتعيط
"كان نفسى اخلف يا ظه...كان نفسى ابقى ام ولادك... كده خلاص اخر امل لينا راح"
ظه بيحضنها
"متقوليش كده...ان شاءالله ربنا هيعوضنا"
"انا بحبك اوى...واللى انا فيه ده غصب عنى"
"انا عارف...قدر الله وماشاء فعل...هنحاول تانى الحياة مبتقفش"
التفتت لهم نرجس
"تحاول تانى ف ايه... ربنا مش رايدلكم خلفه من بعض وربنا مبيتعاندش... ومعدش ييجى منه
محاولات تانية...انا ذنبى ايه تحرمونى من اى اشوف ولاد ابنى... احنا اتفقنا اتفاق ولازم يتنفذ"
ظه وهو بيضطرب على عالية
"انا مقدرش اسيب عالية ابدا...ابدا يا ماما"

(١٧)

عالية على السرير بتعيط...ضهرها لظه
ظه ع الناحية الثانية...دموعه نازلة
يمسح دموعه...ويتعدل يقعد
"عالية... انتي لسه منمتيش"
عالية بتعيط ومبتردش عليه
"عالية وبعدين... مينفعش اللي بتعمله ده.. وانا اللي فاكر ايمانك اقوى من كده"
بترد عليه عالية وهي ف مكانها
"غصب عني حزينة ع الفرحة اللي مكملتش وحياتي اللي بتتدمر قدام عيني ومش قادرة اعمل حاجة
ولا عارفة هعمل ايه ف اللي جاي"
"هتعملي ايه ف ايه"
واتعدلت عالية وقعدت جنبه وهي بتتصنع القوة
"لما تطلقني...مش عارفة هروح فين واعمل ايه"
خانتها دموعها... كل ما تفكر انها هتبعده عن طه مبتقدرش تتحمل مجرد الفكرة
طه مستغرب من كلامها
"اطلقك ايه...مين قال كده...مش هيحصل طبعاً"
عالية وهي بتعيط
"انا عارفة ان ده حقك...انت بقالك ٣ ايام قاعد تراعييني بعد العملية وانا عارفة انك مش عايزني
احس انك زعلان...او عي تكون فاكر اني مش حاسة بيك... انت ذنبك ايه تفضل عمرك كله مع
واحدة زبي"
"يا عالية انتي حبيبتى ومراتي وان شاء الله هتبقى ام ولادى...ايه يعني محصلش نصيب مرة ياما ناس
حصلها كده"

"كلامك بيوجعني اكثر من انه يخفف عني... انا عارفة ان جواك كثير ومحبية... متشيلش كل ده جواك لوحدك... اتكلم معايا زى ما بتكلم معاك... بين حزنك اللي محبيه وشايفاه ف عنيك وسامعاه ف صوتك... متفضلش تخفف عني وتشيل كل الام جواك لوحدك"

دموعه نزلت غصب عنه

قربت منه عالية وحضنته وهى بتطبطب عليه وتعيط

"انا مش زعلان منك... انا زعلان على اللي بيحصل لنا ده... استغفر الله العظيم انا راضى بقضاء ربنا بس..."

"انا فاهمة... متخبيش جواك يا طه... متشيلش همك وهمى وتخبيه... متحاولش تخفف عني وانت متلقاش اللي يخفف عنك"

"انا بحبك انتى يا عالية... لازم تفهمى كده انى بحبك اكثر من طفل لسه ف علم الغيب"
"واتفاقنا مع مامتك"

"معرفش... انا مقدرش استغنى عنك ده كل اللي اعرفه"

طه ف المحل... قاعد سرحان وحزين ع المكتب

ونرجس واقفة مع الزباين... بعد ما يمشوا يتصل طه بعالية

"ايه الاخبار... عاملة ايه؟؟ قلقان تكونى تعبانة ولا حاجة... هرجع بالليل... لو فيه حاجة كلمينى... مع السلامة"

راحت نرجس قعدت قدامه

"صحتها عاملة ايه"

"الحمد لله احسن"

"انت بقالك اسبوع قاعد جنبها بعد العملية... وانا قلت استنى لحد ما تشد حيلها"

"ماما... انتى اجبرتينا على الموافقة على كلامك... بس بجد مش هقدر... مش هقدر اطلق عالية ابدأ"

سكنت نرجس... بتفكر

"ماشى ياطه... انا مقلتش لازم تطلقها"

"ولا ينفع..."

"لأبقى... ربنا حلل الجواز الثاني وخصوصا ف حالتك دى... ذنبك ايه انك تفضل طول عمرك جنبها وهى مفيش منها رجا... بتحبها ومش عايز تسيبها ماشى... بس كمان متقولش متتجوزش

واحدة تانية وتخلف منها"

طه ساكت... بيتخيل الفكرة

"لا لا لا... مينفعش... مقدرش اتجوز عليها واجرحها الجرح ده"

"يعنى مشكلتك انك خايف عليها"

"اللى بيحب حد مقدرش يجرحه"

سكتت نرجس... وقالت بصوت واطى

"معاك حق"

عالية بتروق اوضتها الصبح بعد ما طه نزل

جرس الباب یرن... تتوقع اها هدير

تروح تفتح... تتفاجئ بنرجس قدامها

"اهلا يا ماما اتفضلى"

"ازيك يا عالية... عاملة ايه؟"

"الحمد لله"

نرجس بتدخل تقعد... تروح عالية تقعد معاها وهى مش مطمئة للزيارة

"اعملك شاي ولا قهوة"

"لا مش عايزة اتعبك... انا جيت اطمئن عليكى"

قعدت عالية وهى مستغربة

"ايه صحتك عاملة ايه دلوقتى"

"الحمد لله كويسة"

سكتوا الاتنين... اللحظات بتمر بتقتل عالية بالبطنى من خوفها من سبب الزيارة

"بتحى طه؟؟"

اخر حاجة كانت تتوقعها عالية اها تتسأل السؤال ده... وردت من غير تفكير

"طبعاً"

"اللى بيحب حد بيخاف عليه وعلى مصلحته... كده ولا لأ"

"طبعا"

"طه كمان بيحبك وخايف على زعلك علشان كده رفض الاتفاق اللي اتفقناه"

سكتت عالية... مش عارفة ترد تقول ايه؟

كملت نرجس

"بس لو كنتى بتحبيه كنتى حبيبتى تشوفيه فرحان مش تشجعيه انه يفضل جنبك كده"

فهمت عالية سبب الزيارة... بكل وضوح مبقاش فيه مجال للشك

"عايزانى اقله يطلبنى... ازاي وانا مقدرش ابعده عنه... والله العظيم بحبه وهو كل حياتى... تفتكرى

انا ممكن اعيش من غيره... طب هعيش ليه ولمين"

"ان كان هو متمسك بيكى دلوقتي... متضمنيش بعد كام سنة لما يحس ان العمر فات هيحس

بياه... ساعتها ممكن يكرهك ويلعن اليوم اللي اتجوزك فيه"

عالية بتحاول تتماسك مش قادرة... بتعيط ومش عارفة ترد

"بصى يا عالية... انتى بتحبيه صحيح وعايزة تفضلى معاه طول العمر؟؟"

"ايوه طبعا"

"خلاص... انا هساعدك وانتي تساعدين"

عالية بعدم فهم

"مش فاهمة؟؟"

"اقنعيه انه يتجوز واحدة تانية... من غير ما يطلقك... وان كان على فتح بيتين انا مش هسيبه منها

يبقى اتنوا مبعدتوش عن بعض ومنها كمان ميتحرمش من الخلفة"

"يتجوز!!"

فكرت عالية ان الكلام ده قالته قبل كده لظه... بس مكنتش تتخيل انه بيوجع اوى كده لو اتنفذ

بجد... ساعتها كان مجرد كلام... دلوقتي مطلوب منها انها تقنعه بالتنفيذ

"صعب اوى... اللى طلبتبه ده صعب اوى"

"تبقى انانية ومبتحبيش طه... مبتحبيش الا نفسك"

"والله ابدا... انا بحبه وغيرتى عليه غصب عنى"

نرجس وهى قائمة

"فكرى ف كلامى كويس وردى عليا... عايزاكي بس تعرفى ان لو فضل مصمم على موقفه كده

مسيره يفوق... وان كان مستحمل دلوقتي مسيره يزهق... ومتنسيش انه استحمل وحاول معاكى

كثير وانه مبقاش حيلته حيلة لعمليات وعلاج تانى...وانا كده بح خلاص انسوا انكم تطولوا منى
جنيه...اعقلى الكلام كده ف دماغك واعرفى انه مش هيفضل العمر جنبك...وان مكنش دلوقتي
بمزاجك فهيبقى غضب عنك...لو اقنعتيه اوعدك انه مش هيطلقك وهتفضلى على ذمته الا لو انتى
اللى عايزة تطلقى...اما لو رفضتى فوحياة ولادى لاحرمك منه واخليه يطلقك زى ما انتى واقفة لى
كده وحرمانى انى اشوف ولاده... واياكى يعرف انى جيتلك النهاردة"

خلصت نرجس كلامها وخرجت ورزعت الباب وراها
قعدت عالية بعد ما اتجمدت دموعها وهى بتفكر بجد ف كلام نرجس

طه قاعد بيتفرج على التلفزيون
تيجى عالية تحط له شاي قدامه وتقعد جنبه وتحط ايدها ف ايده وهو قاعد
"ها... فكرت"
طه بيص لها ويشيل ايدها من ايده
"انتى بقالك كام يوم مش طبيعية...فيه واحدة تطلب من جوزها يتجوز...ايه اللى حصل؟؟ شكلك
مخيبة عليا حاجة"
عالية بتقرب منه اكتر وبلهجة عادية وابتسامة
"فكرت...ولقيت ان بما انا نفسنا ف طفل هيحصل ايه لو انت اتجوزت وخلفت وابنتك بيقى ابنتى
برضه وهنفرح بيه كلنا"
"ده كلام يعقل"
"طبعا يعقل...بذمتك منفسكش ف بيى حلو كده شبهك"
قالتها وهى بتضحك...سرح طه لما الامل داعب خياله...واتنهد
"نفسى طبعا"
"خلاص...يبقى ليه نستنى"
"وانتى؟"
"انا هفضل مراتك حببتك برضه...ولا ايه"
حضرها طه
"طبعا...انتى مراتى وحببتى لحد ما اموت"

"بعد الشر عليك"

عالية وهى ف حضنه بتجز على سناها علشان تفضل متحكمة ف اعصابها اطول مدة ممكنة قبل ما

حزفها يهزمها وتستسلم لدموعها اللي بتحاول تفتح عينها

سألته وهى ف حضنه

"ها...موافق؟"

"الفكرة صعبة...مش متخيلها"

"بس ده الحل الوحيد اللي قدامنا علشان نفرح بطفل...ماشى"

طه ساكت متردد

"انتى بجد مش هتزعلى؟"

"لا طبعا...بالعكس لما اشوفك فرحان انا كمان هبقى فرحانة"

كانت اكثر حاجة بتخليهم يتكلموا براحتهم

اهم حاضنين بعض...وعيونهم مش متواجهه

عالية بتكلم نرجس ف التليفون

"ازيك ياماما... انا خلاص اقنعت طه... اتصرفى انتى انا مش هقدر اتكلم ف الموضوع ده اكثر من

كده... لا زى ما اتفقنا ميعرفش حاجة هو فاكر ان الكلام منى انا... مش هتفرق مين انا معرفش

حد ... مع السلامة"

قفلت عالية مع نرجس... وسابت دموعها تنزل براحتها وهى قاعدة لوحدها ومحدث شايفها

طه داخل المحل...شايف الفرحة ف عيون نرجس

بعد ما مشيوا الزباين اللي كانوا معاها...قعدت معاها

"كنت بكلم عالية الصبح وقالته انكم اتفقتوا"

رد بلامبالاة"آه"

"ومالك بتقولها كده"

"قلبي مش مطاوعنى اتجوز عليها وف نفس الوقت ده الحل الوحيد علشان كلنا نرتاح"

"ده عين العقل يا طه وبعدين لا انت اول ولا اخر واحد يتجوز على مراته"

"روح"

"روح!! يعنى اليوم اللي عايزاها فيه الاقيها روح"

"عادى ياماما... ماهى قالت جاية تانى بكرة بالليل... انتى عايزاها ف حاجة"

وقعدت نرجس

"اه... كنت عايزة اجس نبضها كده ممكن توافق على طه"

"طه؟؟؟!"

"ايوه... بدور له على عروسة ومفيش اقرب من مها"

قعدت نرمين... وهى بتضحك

"بتضحكى على ايه"

"تعرفى ان مها كانت عينها على طه من زمان من قبل ماتظهر عالية"

"بجد؟"

"اه والله... ولما ظهرت عالية فهمت مها انه مبيحبهاش فكبرت دماغها"

"تفتكرى ممكن توافق"

"اهو لما تيجى نكلمها... وانا من ناحية وانتي من ناحية ونقنعها"

طه وعالية قاعدين بيتعشوا

"ماما قالت لى انكم اتكلمتوا الصبح"

عالية مش عارفة نرجس قالت له ايه بالظبط على اتفاقهم

"اه اتكلمنا عادى... هى قالت لك ايه؟"

"قالت يعنى اها هتدور على واحدة"

عالية وهى بتحاول تتقبل الامر الواقع

"طب كويس... ولقيت حد"

"لأ... لسه"

"طيب ابقى عرفنى الاخبار"

"هو انتى مش هتكونى معايا ف كل خطوة"

"مش لازم اكون موجودة... بس انا موافقة على اى حاجة ممكن تسعدك"

قامت عالية بسرعة... بعد ما فكرت ف حجة

"شكلى نسيت البوتاجاز مفتوح"

دخلت المطبخ وهى بتحاول السيطرة على نفسها

حست بظه وهو داخل وراها

"مالك"

"مفيش يا حبيبي"

"عالية... انتى زعلانة... صح؟"

عالية بعد ما مسحت دموعها... وبنبرة هادية

"بص يا طه.. انا موافقة ومفكرة ومقررة بعقلى... انما غصب عنى بتضايق... ارجوك متحملنيش فوق

طاقتى ولا تطلب منى انى اكون مبسوطة وسعيدة وانا بجوز جوزى"

"مش انتى اللى طلبتى"

"ايوه ومش هرجع ف كلامى... بس كمان متطلبش منى مزعلش"

مها ونرمين ونرجس فى اوضة نرمين

نرجس "ها... ايه رأيك يامها؟"

مها "انا عارفة ان واحد زى طه تتمناه الف واحدة وانا اولهم بس الكلام ده كان قبل ما يتجوز"

نرجس "يعنى ايه"

مها "متزعلش منى ياطنط... ايه اللى يخلينى اتجوز واحد متجوز"

نرجس "انتى عارفة طه ابني طيب وحنين واخلاقه عالية وراجل مفيش زيه دلوقتى... ده غير ان طلباتك

كلها هتجاب زى اى عروسة... يعنى هجيلك شبكة وعفش جديد واعملك فرح... المهم انتى

توافقى... ولو انتى وافقتى معتقدش مامتك هترفض لما نقولها"

"ومراته"

"مالها"

"هترضى؟"

"ملكيش دعوة بيها... انا اللى بقولك وهى هتوافق ع اللى بقوله"

"طيب كل الكلام ده كويس... بس نسييتى اهم حاجة"

"ايه هى؟"

"طه نفسه..عايزنى ولا انا مفروضة عليه"

"عايزك طبعا"

"خلاص اقعد معاه ونتكلم وبعدها اقرر"

(١٨)

نرجس بتفتح المحل... اول ما دخلت...فتحت الراديو على القران

واتصلت ببطه

"الو...صباح الخير ياطه"

"صباح النور ياماما..عاملة ايه"

"انا كويسة الحمدلله...انت ف الشغل"

"اه ف الشغل"

"كويس...انا واختك اتكلمنا مع مها امبارح...وبعد اخد ورد علشان حكاية جوازك دى... تقريبا

وافقت"

"يعنى ايه تقريبا...يا آه يا لآ"

"هى بتقول عايزة تقعد معاك الاول لانها خايفة تكون مفروضة عليك"

"يعنى اعمل ايه"

"يعنى تقعد معاها وتكلموا...بس تخلى بالك انما زى اى بنت عايزة تفرح بعريسها...يعنى اوعى

تفضل تقولها بحب مراتى ومش عايز ازعلها والكلام ده خالص"

"هبتدى معاها بكذب؟"

"هو ده كذب... متجيش سيرة مراتك خالص معاها كأنها مش موجودة... ايه لازمة سيرتها

يعنى...بقولك ايه مها مفيش زيها وقابلة ان تفضل عالية على ذمتك بس تحسسها انك عايزها"

"طيب ماشى"

"مها عندنا النهاردة هترجع م الشغل ع البيت عندى ولا نبقى نروح بالليل بعد المحل"

"مش عارف..بس اصل عالية مبتغداش لوحدها"

"هى لازم تتعود ع الوضع الجديد...بس اسمع اوعى تقولها حاجة غير لما ناخذ الموافقة النهائية من

مها...ربنا يجعلكم نصيب يارب"

"طيب...بالليل هبقى ارجع معاكى...نبقى نقفل بدرى ساعة"

"طيب مش مشكلة نقفل بدرى...ربنا يجعله بفايدة"

مها قاعدة قدام المراية... بتحط ميك اب
"شكلى كده حلو؟"
"يعنى هو طه مش عارفك؟"
"عارفنى حاجة والنهاردة حاجة تانية... قوليلى شكلى كده حلو"
"زى القمر طبعا هى حاجة جديدة يعنى"
تبص مها لنفسها ف المراية باعجاب
نرمين"مش لو كان طه متجوزش الزفته دى كان زمانك مراته من زمان"
"والله يا نرمين لحد دلوقتى مقررتش.. لسه لما اقعده مع طه واشوف دماغه ايه ومشاعره من ناحيتى"
"انتى مش بتحببيه من زمان... يعنى المفروض تفرحى"
"لا يا حبيبتى زمان حاجة ودلوقتى حاجة... زمان كنت انا اللي عايزاه... دلوقتى هو اللي
عايزنى... تفرق"
"تفرق ف ايه مش فاهمة"
"متاخذيش ف بالك... المهم بس هما جاين امتى"
"زمانهم جاين ماما كلمتى كانوا قفلوا المحل وجاين"

طه ونرجس داخلين البيت... طه بيدخل بتردد
"ماتدخل هو انت داخل بيت غريب"
"شوفيهم فين الاول طيب"

سبقت نرجس... ونادت عليهم
خرجت لها نرمين... سلمت على طه
"ازيك يا طه... تعالى ادخل مها جوه ف الاوضة"

دخل طه قعد فى الصالون... نرجس وراه
"احنا هندخل ونناديها لك... زى مافهمتك ياطه"
طه يهز راسه باستسلام

قعد... بي فكر هي قول ايه ويتكلم ف ايه
سمع صوت خطوات مها
جت مها... قام وقف
سلمت عليه... سلم عليها
"ازيك ياطه"
"الحمد لله... عاملة ايه... اتفضلى"
قعدت مها... وقعد طه
طه بيص ف الارض... بي فكر يتكلم ف ايه
مها ساكتة... بتبص له نظرات خاطفة ومستنياه يتكلم

لما طال الصمت... قامت مها وقفت
"طيب واضح ان مفيش كلام عندك عايز تقوله... بعد اذنك"
استغرب طه من رد فعلها... غير متوقع
وقف
"استنى"
"استنى ايه... هنفضل ساكتين"
"بصراحة انا محرج"
"مخرج ولا جاى غضب عنك؟"
"مخرج"
ابتسمت مها
"كده يبقى نقعد"
قعدت تاني وقعد طه
"مش ماما اتكلمت معاكى... ومتهيألى انتى عارفة كل ظروفى"
"اه عارفاها... وراضية بيها لو انت عايز تتجوزنى بجد"
"او مال بجزر؟"
"مقصدهش... قصدى عايز تتجوزنى علشانى مش علشان مامتك قالتلك عليا"
ارتبك طه... مش عارف يرد... وافتكى تحذيرات مامته

"اه طبعاً... بس احنا لسه مقربناش من بعض يعنى علشان كده هتلاقيني مخرج شوية... معلىش
استحليلين وبعد كده اكيد هناخد على بعض اكثر"
"استحمل... علشان خاطر ك هستحمل حاضر"
رن موبايل طه... طلعه من جيبه
ارتبك لما شاف ان اللى بتتصل عالية
لاحظت مها ارتباطه... فهمت... وابتسامة عادية
"لو مراتك رد... انا فاهمة طبعاً انى لازم اتعود على وجودها"
حس براحة من رد فعلها... رد وهى قاعدة
"الو... اه شوية وجاى... اجيب ايه وانا جاى... ماشى مع السلامة"
قفل مع عالية... وهو بيصص لمها بارتياح
"شكرا يا مها انك مقدرة ظروفى... يمكن مكناش قريين اوى بس ان شاءالله شكلنا هنكون
متفاهمين"
"ان شاءالله"
وبدأ يتكلم بارتياح اكثر
"قلتي لمامتك ولا لسه"
"كنت مستنية لما نتكلم مع بعض الاول"
"وبعدين... دلوقتي ايه رأيك"
ابتسمت مها بكسوف وهى بتحط وشها ف الارض ورجعت بصت له
"لو ممكن توصلني هاروح النهاردة واقولها"
طه "ممكن"
قامت مها "هجيب شنطتي حالا"
دخلت مها بفرحة... كانت نرجس و نرمين مستنيتها
نرجس "طمينين؟؟ اتفقتوا"
مها بفخر "تقريباً... هو هيوصلني علشان اكلم ماما واتفق معاها"
نرجس "بجد؟؟ يا الف بركة... اما ارواح اشوفه"
خرجت نرجس من الاوضة
نرمين وهى بتبصص لمها

"اتفقتوا بجد؟؟ وهو صلك البيت"

"طبعاً يا بنتى بستقلى بيا"

"يا بنت اللذينة... انا قلت طه مش هيتكلم كلمتين على بعض من كسوفه"

"مين ده يا بنتى... هو فيه راجل بيتكسف... هو كان محتاج انكشه بس وجاب نتيجة اسرع ما كنت"

"اتخيل"

"انتى بجد فرحانة بيه"

"طبعاً"

"مش متضايقه انه متجوز"

"الصبر حلو... بكرة مش هيشوف غيرى... يالا بقى علشان متأخرش عليه"

نرجس لما طلعت لظه

"ايه الاخبار ياطه"

"شكلها طيبة اوى ياماما... واحسن حاجة فيها انها متقبلة وجود عالية ومش متضايقه"

"طب الحمد لله... ربنا يوفقكم ويتمم بخير يارب"

عالية قاعدة تبص ف الساعة... اتصلت تانى بطه

رن الموبايل لحد ما فصل... بعدها سمعت الباب بيتفتح

راحت تجرى ع الباب

"طه... تأخرت كده ليه"

"مفيش... بس اصلى بعد ما وصلت ماما مسكت فيا اطلع معاها"

"طيب احضرك العشا"

"معلش يا حبيبتي... ماما مسكت فيا واتعشيت معاها هناك... لو لسه مأكليش هقعده معاكى"

عالية بعد ما حسست بتغيير طه

"لا... انا مكنتش ليا نفس بس قلقت عليك"

"متقلقيش"

دخل الاوضة... دخلت وراه عالية

قعدت على طرف السرير... بتبص له وهو يغير هدومه ومش يبص ناحيتها... شكله

متغير... احساسها انه مخي عليها حاجة مش قادرة تفسره... وبكل هدوء سألته

"فيه جديد؟"

"بالنسبة لايه؟"

"العروسة"

ارتبك وقعت من الشماعة وهو يعلق عليها الهدوم

قامت شالتها عالية

"ولا يهمك... سيب هعلقهم انا"

"شكرا"

"ها.. مقتليش فيه جديد؟"

"لا... لما يكون فيه جديد هقولك اكيد"

طه صاحي يبص لعالية... عالية نايمة

"بجبك يا عالية... بس غصب عني اني كذبت عليكى... مش عايز اضايك كل يوم بالموضوع ده..."

وانتي اللي ضغطتي عليا اوافق على اقتراح ماما... انا كنت راضى علشان مجر حكيش... بس انا نفسى

ابقى اب... نفسى اشوف ابن ليا يكبر قدام عيني... ساحبيني يا عالية"

رن موبايله... اخده بسرعة من الكومودينو

شاف رقم... وافتكر ان وهو مع مها ف العربية... اخدوا ارقام بعض ومسجلوش خوفا على شعور

عالية لو شافته

بس اللي فاكره ان اول رقمين هما نفس اول رقمين عنده

كل ده فكر فيه ف ثواني... وعمل الرنين صامت

وقام اتسحب من جنب عالية وخرج من الاوضة

راح البلكونة... رد على مها

"الو.. نمت ولا لسه؟"

"لا لسه"

"انا سببت لك مشكلة ولا حاجة"

"لا عالية نايمة"

"انا بس حبيت اقولك انى اتكلمت مع ماما وهى كانت رافضة ف الاول بس انا اقنعتها"

"كويس"

"مفرحتش؟"

"ليه بتقولى كده"

"يعنى حسيت"

"لا طبعا...اكيد فرحت...بس اصل انا لسه مقولتش حاجة لعالية فعلشان كده بتكلم من غير"

ماتعرف"

"ماشى براحتك...المهم انا قلت لماما انكم جاينين يوم الجمعة علشان انا عارفة انك بتلبقى اجازة من"

المحل والشغل"

"تمام"

"واضح انك مش عارف تتكلم...لو عايز نأجل ولا نلغى عادى"

"لا زى ما اتفقى مع مامتك"

"ماشى...ابقى عرف طنط"

"تمام...مع السلامة"

قفل طه...بص وراه اطمئن ان عالية مش واقفة...رجع للاوضة يتسحب كانت عالية لسه

نايمة...اطمن...ونام

فاتن قاعدة مع عبدالحميد وميار بيتغدوا

ميار عمالة تغمز لها...شاورت لها فاتن بكرة راسها

قامت بعدها ميار

ميار"الحمدلله...تسلم ايدك ياماما"

بعد ما مشيت ميار

فاتن"عبد الحميد...فاكر دكتور ايمن"

عبد الحميد بعد ما سرح شوية

"بتاع العلاج الطبيعى ولا مين"

فاتن "اه هو"

"ماله"

"مامته اتصلت بيا وعايزين يجوا يزورونا"

"مامته؟؟ وجابت رقمنا منين؟"

"يا سلام يا عبده... وهى دى مشكلة يعنى... هتسبب المهم وتمسك ف الهايفة"

"يعنى عايزين يزورونا ليه؟"

"ابنهم شاب وعندنا بنت... بدمتك انت يبقى ليه"

وضحك عبدالحميد

"هى البت كبرت بجد... انا لسه شايفها عيلة صغيرة"

"انت تشوفها عيلة انما هى اسم الله عليها بقت عروسة والخطاب بيدقوا بابها"

"انتى شايفة ايه يعنى"

"انا شايفة ان ايمن ابن حلال وهو بقاله ٣ سنين بيشتغل ف السعودية ولسه نازل اجازة من اسبوع"

...مامته اللي قالتلى"

"السعودية... يعنى بنتنا هتتغرب؟؟؟"

"ايه؟"

وانتبعت فاتن لسؤال عبدالحميد اللي مفكرتش فيه قبل كده

وردت كأنها بتترد على نفسها

"لأ طبعا... بنتى الوحيدة متتجوزش غير جنينى... ولازم يعرفوا كده من قبل ما يجوا"

هدير قاعدة مع عالية ف بيت هدير

"انتى هتنقطينى يا عالية"

"بعد الشر عليكى ليه بس"

"دلوقتي جوزك راح يخطب وانتى قاعدة معايا بالبرود ده"

عالية بابتسامة لا مبالة

"هعمل ايه يعنى؟"

"لو مش راضى بقضاء ربنا ومستعجل اوى كده ع الخلفة سيبه انما ميتجوزش عليكى"

"انا مليش غيره"

"بس ده ميخليهوش يذلك كده"

"ذل ايه بس...انا اللي طلبت منه يتجوز...وهو معملش حاجة من ورايا...بالعكس ده وصلني هنا"

قبل ما يروح وهيرجع ياخدني"

تصرخ هدير

"هموتتنتنتنتنتنتني مفروسة ياعالية... ده انا لو عصام فكر بس تفكير انه يفكر ف واحدة تانية كنت"

موته قبل ما يفكر"

"ربنا ما يكتب عليكى ابدا اللي انا فيه"

تحس هدير بلهجة عالية...تقعده جنبها...بعد ما كل شوية تقوم وتقعده من عصبيتها

"يا حبيبتي لو شايلة هم ان مفيش حتة تقعدى فيها انا بيتى مفتوح لك العمر كله...وانتى مش غريبة"

عنى ولا عن عصام"

"عارفة يا حبيبتي والله...مش دى المشكلة"

"طيب ايه المشكلة؟"

"انى فعلا مقدرش استغنى عن طه...بجبه فوق ما اى حد يتخيل...كل المشاعر اللي اتحرمت منها"

اديتها واخذتها من طه... بجد مقدرش ابعده عنه وهبقى مبسوطه لو شايلاه مبسوط"

"لا انتى كده عبيطة بقى"

"مش عبيطة...انا بجه وعاجزة انى احقق له حلمه انه يكون اب"

"طب اتضايقى...اتنرفزى...عيطى...صوتى...كسرى"

"تصدقى ان دموعى نشفت...خلاص مبعثش قادرة اعيط"

"انتى ازاي كده"

"طول الفترة اللي فاتت كنت بدعى ربنا يلهمنى الصبر... اهو انا راضية بكل اللي ربنا كاتبهولى"

ومش معترضة...المهم بس انه ميسبنيش"

"وملقاش غير البومة صاحبة اخته...دى شبه امه..ازاي وافقتى عليها"

"يعنى انا وافقت على جوازه...هتفرق معايا ف ايه هى او غيرها"

"ربنا يصبرك ياعالية"

"ايوه...ادعى لى بالصبر مش عايزة اكر من كده"

طه و نرجس و نزمين قاعدين مع مها ومامتها و جوز مامتها
مها و طه بيتبادلوا نظرات اعجاب
ام مها "والله يا نرجس احنا عشرة سنين وانا اتشرف بنسبكم...ومها بدل مقتنعة ومش متضايقه ان
مراته على ذمته هقول ايه بس"
نرجس "نقرا الفاتحة بقى"
ام مها "لا قبل ما نقرا الفاتحة لازم نتفق على شوية تفاصيل"
نرجس "مها بنيتي وهعملها زي اى عروسة جديدة...شبكة وعفش وفرح"
طه "فرح لأ...معلش بلاش فرح"
ام مها بتبص لنرجس
نرجس لطه "وليه لأ؟؟"
طه "معلش.. اى حاجة انتم عايزينها بس فرح لأ... مش هينفع؟"
مها "علشان مراتك؟؟"
طه وهو وشه ف الارض
"كفاية اني هتجوز ومعملتلهاش فرح..واساسا انا بتخرج من الدوشة والحاجات دى...معلش يامها"
ام مها "طب والشقة...بنيتي هتعيش فين؟"
نرجس "هاجر لهم شقة"
ام مها وهى بتبص لمها اعتراضا
"يعنى مراته الاولانية تبقى قاعدة ف شقة تمليك وبنيتي تدخل ف ايجار وميتعملهاش فرح...مش كفاية
راضية بانها تدخل على ضرة...لا يا ام طه مكنتش فاكراكى شايفة مها قليلة اوى كده"
نرجس "قليلة؟؟ اخص عليكى ده انا بقولك مها بنيتي"
ام مها "وانتي ترضى ده لبنتك"
سكنت نرجس...وبصت لمها
"ايه يامها؟ ما انتوا عارفين يا جماعة الشقق نار وانا مقدرش اشترى شقة وافرشها"
ام مها "خلاص...انا عندى فكرة تريح الكل"

(١٩)

رن موبایل جوز ام امها... قام يرد وساهم... كملوا كلام
نرجس "الحقينا بالفكرة اللي عندك"
ام مها "قبل بس ما اقولها... لازم طه يعرف انه لولا مها ضغطت عليا انا مكنتش وافقت على جواز
بالظروف دي ايدا"
طه "عارف والله مها قالت لي"
ام مها "طيب اقل حاجة تقدر بيها بنتي انما تتجوز ف شقتك"
طه باستغراب "مع عالية؟؟؟!!!"
ام مها "لا طبعا كفاية انما هتتجوز على ضرة عايزها تسكن معاها كمان"
نرجس "قصدك يعنى ياخذ الاولانية ف ايجار"
ام مها وهى بترمي الخيار ف ايديهم
"والله ياخذها ف ايجار... ياخذها ف اى حته دي مشكلتهم"
مها "بس ياطه لو اخدتها ف ايجار هتبقى قاعدة لوحدها فترات طويلة يا عيني وهى مالهاش حد
ومحدش عارف الوحدة تعمل فيها ايه... تصعب عليا برضه"
ام مها "يا حبيبتى يا بنتى... شايلة هم ضررهما... بدمتاك يا طه كنت هتلاقى واحدة كده"
طه "لا طبعا... الحمد لله ان ربنا اكرمى بمها... بس برضه مش فاهم ازاي اطلع عالية من بيتها"
نرجس "بيتها ده ايه هى عرفت البيوت الا لما اتجوزتك"
مها "الاحسن انما تروح تعيش مع طنط ف بيتها"
نرجس باستغراب "ايه؟؟ معايا؟؟؟ ليه هو انا بطيقها؟"
مها "يا طنط حضرتك بره طول اليوم وهى هتاخذ اوضة طه... وبعدين مش انتى اولى بفلوس الايجار"
نرمين "يا سلام هتجيبوها لى انا بقى"
مها "وانتى مالك بيها... اهى وجودها هيرجك ويونسك وكلها حاجة بسيطة وتجوزى"
طه ساكت بيستمع كلامهم... واول ما تكلم
"لالا... مش هينفع اقولها تخرج من البيت علشان اتجوز فيه"
ام مها "براحتك"

وبصت لها
"انا من الاول قتلتك راجل متجوز مالوش امان واهى بانث عايز ياخذك ف ايجار علشان لما يزهدق
منك يرميكى"
وعيطت مها... وارتبكوا كلهم
نرجس "ازاي بتقولى كده"
طه "لا طبعا احنا مش ممكن نكون بنفكر بالطريقة دى"
ام مها "والله القرار دلوقتى ف ايديكم... احنا عمالين نتنازل ونتنازل وانتوا مش عايزين تعملوا لنا
الحاجة الوحيدة اللى تأمن لها حياتها معاها"
نرمين "ماتيجى انتى يا مها تعيشى معانا ف البيت"
مها بتعيط "الحكاية مبقتش اعيش فين... الحكاية باينة من اولها ان طه اخدنى احتياطى ومش مقدر
التنازلات اللى تنازلتها علشانها"
طه "والله ابدأ مش كده خالص"
ام مها "معلش يا طه... احنا قلنا اخر كلام عندنا والقرار ف ايدك"

ام مها بتقف الباب وراهم بعد ما نزلوا... بصت لماما بابتسامة انتصار
مها "تفتكرى ايه؟"
ام مها "كل حاجة مشيت اهى زى ما اتفقنا... وبدل امه مقتنعة وهو متردد كده يبقى اطمنى"
مها "نفسى اعرف بيفكر ف ايه دلوقتى"
ام مها "استنى لما يروحوا وابقى كلمى نرمين وهى تحكيلك ساعتها بقى هتعرفى... ولو لسه متردد
دقى ع الحديد وهو لسه سخن"
مها "اكلمه يعنى واتصعب"
ام مها "طبعا... وشوية حنية من بتوع الايام اللى فاتت على اللعب بحلمه بالخلفة هيبقى عجينة طرية
ف ايدك"

مها بتضحك باطمئنان وهو بتفكر ف كلام مامتها

طه واقف بالعربية قدام بيت نرجس

نرجس جنبه ونرمين ورا
طه "مش هقدر اعمل كده ياماما والله"
نرجس "هو انا طول الطريق عمالة اتحايل عليك على ايه... هي كلمة يا تقولها انت بطريقتك يا اقولها
انا بطريقي... خلصت كده"
طه "ماما... لا بلاش تقوليلها الله يخليكي"
نرمين "طه... انت عايز مها ولا لأ؟... دى قالت لى ان الايام اللي فاتت كنتوا بتتكلموا كثير ...
معرفش هي قالتلك ولا لا انها بتحبك من زمان... وباريتك اتجوزتها م الاول والله مكناش وصلنا للى
احنا فيه ده"
طه وهو بيتلفت لنرمين
"من زمان ازاي؟؟"
نرمين "من قبل ما تشوف عالية... وشوف النصيب انت اتجوزت وهي اتخطبت واتجمعتوا تاني...
متعاندش بقى علشان حاجة هايقة قصاد اللي هي وافقت عليه"
سكت طه بي فكر
نرجس "وبعدين صحيح عالية هتكون ف وسطنا هنا علشان تبقى مطمئن عليها وانت مع مها"
طه "مش عارف ياماما... صعب اوى"
نرجس "مش احسن ما كنت طلققتها... انا ماصدقت انى افرح بجوازة عليها القيمة هتطلع على الست
عالية"
طه "خلاص ربنا يسهل... هحاول اقولها"

طه على السرير... ضهره لعالية
بي فكر يتكلم معاها ازاي
يرن موبايله... عالية تصحى على صوت الموبايل من غير ماتلفتت
طه يعملها صامت بسرعة... يبص على عالية اللي وشها الناحية الثانية... يلاقها متحركتش فيعرف انها
نائمة
يقوم يتسحب من جنبها... يخرج البلكونة يرد
"ايوه يامها... بتعطى ليه"

"كنت فاكراك هتتمسك بيا اكر من كده...ليه علقتنى بيك لما انت مش عايزنى وعند اول موقف

بعتنى بسهولة"

"اهدى بس ومتعيطيش...مين قال انى بعتك"

"يعنى شارينى زى ما انا شارياك"

"اه طبعا"

"بجد يا طه"

"ايوه طبعا"

"ليه مكلمتنيش طيب؟"

"كنت هكلمك الصبح اول ما انزل"

طه واقف وضهره لباب البلكونة

عالية واقفة تسمعه ودموعها نازلة

"كل حاجة هتمشى عادى...انا بس معرفتش اكلهما النهاردة"

"هتقولها امى"

"بكرة بالكثير"

"ماشى ياطه...وابقى خلى مامتك تكلم ماما"

"ماشى يالا تصبى على خير"

مسحت عالية دموعها بسرعة قبل ما يشوفها طه

التفت طه وشاف عالية واقفة بتبتسم له ببساطة

"انتى هنا من امى"

"لما حسيت انك قمت من جنى"

طه بارتباك "دى...اصل..."

"مالك؟؟ اذا كنت عارفة انك هتتجوز هزعل انك بتكلمها ف التليفون"

دخلت عالية ودخل طه وراها

قعدت على السرير..وقف قصادها

"مش انتى اللى طلبتى اتجوز"

خلاص يا طه... مش كل يوم هتبرر اللي حصل... خلىنا ف الامر الواقع من غير ما نفسر ليه
وعلشان ايه"

سكت طه... قعد على السرير وهو يبص ف الارض

سألته "هاا مقلتلش... ايه اللي هتقولهاولى بكرة"

طه وقف الكلام على لسانه

مش عارف يبدأ منين

"للدرجة دى اللي هتقوله صعب؟؟ انت عايز تطلقنى؟"

قالتها بصوت مخنوق ودموعها نزلت غصب عنها

حضرها طه

"ابدا... لا يمكن ابدا اطلقك... انتى حبيبى يا عالية مقدرش استغنى عنك"

"الحمدلله... بدل مش هتطلقنى يبقى اى حاجة هتقولها اهون بكثير... اتكلم يا طه من غير ما تزوق

الكلام"

"انا مش عايز اعمل اى حاجة ترعلك... دول حتى طلبوا منى فرح وانا رفضت خالص"

"ايه اللي مش قادر تقوله؟؟"

"كل الموضوع ان وقفت قصادنا مشكلة الشقة"

عالية ساكنة مستنية يكمل كلامه

طه ساكت مبيتكلمش... مش عارف يقوها ازاي

"هااا يا طه... وبعدين"

"يعنى الاقتراحات كلها اجمعت ان اسكن انا ومها هنا"

"هنا؟؟ عموما براحتك لو هيرجحك نبقى كلنا مع بعض اللي تشوفه"

"لا.. ما هو... اصل يعنى... هتتضايقى لما نكون هنا كلنا"

"اومال ارواح فين"

"عند ماما... اوضتى هناك موجودة هننقل فيها اوضتنا... وتعدى هناك"

سكتت عالية... مش عارفة ترد

"اصل طبعا مش هتهونى عليا تعدى ف شقة لوحدك فقلت تعدى مع ماما ونرمين يونسوكى

ومتبقيش لوحدك ف الايام اللي هبقى فيها معاها"

عالية وهى بتنام

"مفيش مشكلة... اللي شايفة اريح لنا اعمله... تصبح على خير"

فاتن وعبد الحميد...قاعدين مع ايمن واهله
الجو العام كله ود ومحبة وترحيب من الجانبين
ابو ايمن "احنا اتشرفنا بمعرفتكم يا حاج وفعلا ايمن يا زين ما اختار"
عبد الحميد "الشرف لنا...منورين والله"
ابو ايمن "طيب طلبات حضرتك ايه علشان عايزين نعمل قراية الفاتحة والشبكة قبل ما يرجع
شغله...فلو عايزين تسألوا علينا شوفوا البيانات اللي عايزها كلها بس خلى بالك م الوقت"
عبد الحميد "ايمن دخل بيتنا كتير وانا عارفه كويس ومش محتاج اسأل عليه"
ابو ايمن "على خيرة الله...نقرا الفاتحة"
فاتن بتبص لعبد الحميد ... بص لها...فهم
عبد الحميد "ام العروسة كان عندها كلمتين بس عايزة تقولهم"
ايمن "انفضلى ياطنط...خير؟"
فاتن "ميار بنتي الوحيدة... ومش هقدر ابعدها...يعنى سفر بعد الجواز لأ"
ايمن "بس ازاي...وانا محبش انا اكون ف حته ومراتي ف حته"
ام ايمن "والله خدتى الكلام من على لسانى...بلا غربة بلا قرف"
ايمن "بس الشغل هناك احسن"
فاتن "انا مليش غيرها ومش هقدر انها تتغرب"
ابو ايمن "خلاص يا ايمن... الحاجة معاها حق... الغربة وحشة يا ابنى...انت اقعد سنة ولا اتنين كمان
وتيجى تستقر هنا خالص وتتجوزوا"
عبد الحميد "حل كويس اوى"
فاتن "ياريت"
ايمن "خلاص...ماشى... نقرا الفاتحة بقى"
فاتن زغرطت وبعدين نادى على ميار

هدير قاعدة ساكنة...وعالية اخدة هنا ف حضنها وساكنة

"وبعدين...هيتجوزوا امتى؟"

راحت وقت قصاده وحطت ايدها على صدره وهي تبص له
"عارف يا طه... انا هخليك تنسى كل حاجة زعلتك قبل كده... هدلعك دلع عمرك ما شفته قبل

كده... بتحبيني؟"

مسك ايديها وشالها من عليه

"مامتك بره"

"مش عريسي حبيبي"

قربت منه اكثر

"خايفة تكون مبتحبينيش"

تأثيرها الانثوى عليه كان اقوى من تفكيره... واستسلم لاحساسه كرجل بين ايديه انثى

(٢٠)

سمعوا صوت ام مها بتنادى عليها
كانوا لسه واقفين قصاد بعض... فاقوا من نشوة احساسهم
ارتبك طه
"مامتك"
مها وهى بتجيب منديل من شنتطها بتمسح له شفايفه
"استنى فيه روج"
اخذ منها المنديل... مسح شفايفه
"طب روجى شوفها عايزة ايه... لتكون شافتنا والباب مفتوح"
"حتى لو شافتنا يعنى... كلها كام يوم وهبقى مراتك فأكيد مش هتدقق على حاجة بسيطة زى دى"
خرجت مها من الاوضة لما مامتها نادت عليها تانى
قعد طه ... وهو محرج وحاسس بالذنب وف نفس الوقت بيستعيد احساس اللحظات اللى فاتت فى
خياله

نرمين قايمه من النوم الضهر... بعد ما غسلت وشها
سمعت صوت ف المطبخ... دخلت المطبخ
كانت عالية واقفة بتطبخ
"انتى بتعملى ايه؟"
"بعمل الغدا"
"كويس... طابخة ايه بقى"
"عاملة بامية و..."
"بامية ايه مبحبش البامية... مش تسألنى الاول يا عالية"
"سألت والله.. انا مكملتش كلامى... انا عاملة جنبها صينية بطاطس"
"ايوه كده مبحبش البامية انا"
"نرمين ممكن ننظم مع بعض البيت علشان انتى بتصحى متأخر وانا بصحى بدرى"

"يعنى ايه مش فاهمة"

"يعنى لو مش هيضايقك ابقى اطبخ انا وامسك المطبخ علشان اخلص بدرى"
"يضايقنى ايه... لا ميضايقنيش طبعاً... خدى المطبخ ببقية البيت وسيبلى اوضتى انا هبقى اعملها"
"ماشى مفيش مشكلة... بس ممكن نبقى نتفق من بالليل هطبخ ايه؟؟ علشان النهاردة بقت مش
عارفة اتصرف واتصلت بماما سألتها"
"طيب ماشى"

نرمين وهى بتتكلم مع عالية... حطت براد الشاي ع النار
وعملت ساندويتش وحطته ف طبق... وحضرت كوباية شاي ف الصينية... وخرجت من المطبخ
والشاي ع النار

دخلت نرمين اوضتها... قعدت ع الكمبيوتر... فتحته وفتحت الفيس
قعدت تقلب ف اكونت طارق
بانت على وشها علامات الغضب... والغليان

ف نفس اللحظة اللي جت فيها عالية بصينية الفطار
نرمين بصوت مسموع كأنها بتكلم الكمبيوتر
"يا وسخ يا ابن الكلب"

اشتمزت عالية من سماع الشتيمة من نرمين... واستغربت
دخلت وحطت الصينية على كرسى
"مالك يا نرمين بتشتمي مين"
نرمين وهى قايمة وبتاخذ الموبايل من ع السرير
وهى بتصرخ فيها
"مفيش حاجة... سيبينى لوحدى"
خرجت عالية من الاوضة بسرعة وهى مستغربة
وسمعت صراخ نرمين ف الموبايل

"انت مفيش فايدة فيك ابدأ.. هتفضل طول عمرك وسخ ومش هتنضف ابدأ... اشتم كمان ماهو ده
اللى انت فالح فيه...خدوهم بالصوت ... انت زبالة اصلا وتحمد ربنا انى مستحمله قرفك... غور
ف ٦٠ داهية"

عالية واقفة ف الطرقة مستغربة اسلوب الكلام
افتكرت الاكل اللى ع النار...جريت ع المطبخ
وهى ف المطبخ بتفكر تسأل نرمن مالها وتكلم معاها ولا تسكت ومنتدخلش... وبعد تفكير قررت
انها منتدخلش اسلم

بعد ما خلصت وهى قاعدة مستنية طه..سمعتة بيفتح الباب
جريت عليه تستقبله
"حمدالله ع السلامة يا طه... غير هدومك لحد ما اسخن الاكل"
"الله يسلمك.. لا يا عالية مش قادر اكل دلوقتي"
عالية بانكسار
"ليه؟؟انت اكلت بره"
"لا بس مليش نفس... هريح شوية وبعدين صحيني كمان ساعتين اتغدا وانزل.. اتغدى انتى لو
عايزة"
دخل الاوضة ودخلت وراه
"لا هستناك لما تقوم من النوم"
"ماتغدى انتى ونرمن... لازم تتعودى تاكلى من غيرى"
قالها من غير ما يفكر... حس بالندم بعدها...حست بيه عالية...ردت بسرعة قبل ما يتضايق
"نرمن لسه فاطرة من شوية... هستناكم نبقى تنغدا كلنا مع بعض"

غير طه هدومه... ونام من غير ما يقولها اى حاجة

خرجت من الاوضة وقفلت الباب وراها

عالية حضرت الغدا... وراحت تصحى طه

"نعم... يا حتى... ماله لبيسى ان شاءالله... ثم ان انتى مالك تتدخلى ف حياتى ليه... اسمعى يا عالية
انتى قاعدة هنا.. ماشى... مستحلاماكى علشان خاطر اخويا.. ماشى... انما تتدخلى ف حياتى
لأ... فاهمة"

"مش قصدى اتدخل بس انا حبيت انصحك"
"انصحى نفسك وخليكى ف حالك"

جه طه على صوت نرمى

"فى ايه... مالكم"

نرمى" ادى اللى قتلولى معلىش تونسك... جاية تفربنى وتتدخل ف كل حاجة بعملها"

طه اتنرفز" اتكلمى كويس يا نرمى واحترمى نفسك"

نرمى" ما تقولها هى مالهاش دعوة بيا"

عالية حسست بالاهانة... عيظت من غير ماترد

طه" متزعلىش يا عالية حقك عليا"

نرمى" ياسلام... هى نزلتها دمعتين هتقوم مزعقلى انا"

طه بيشخط فيها" انتى مش عاملة احترام لحد"

عالية وهى بتشد طه بعد ما مسحت دموعها

"خلاص يا طه... حصل خير خلاص... يالا نتغدا يا نرمى"

نرمى" مش عايزة"

طه" ان شالله عنك ما كلتى... يالا يا عالية"

طه وعالية وهما بيتغدوا

"هو ايه اللى حصل"

"مفيش حاجة ياطه... متشغلش بالك انت سوء تفاهم بس"

"معلىش متزعلىش من نرمى ومن طريققتها... حقك عليا انا"

"انا ميهمنىش حاجة ف الدنيا غير رضالك عليا... ربنا يخليك ليا"

"ويخليكى ليا يا حبيبى"

فرحت عالية بكلامه... حسست بصدق احساسه وهو بيقولها يا حبيبى ودى كانت اكرت حاجة ممكن

تفرحها

عالية قاعدة بتتكلم ف التليفون

"الو...ازيك يا هدير... عاملة ايه.. انا كويسة الحمدلله... قاعدة لوحدى اهو قلت اطمن عليكى ...
نرمين مع خطيبها وطه ومامته بره... اه بكرة هيتجوز... مليش دعوة ميسألش.. الحمدلله على كل
حال... كل ما احس انى متضايقه اوى ومخونقه اقوم اتوضا واصلى وافضل اقرا قران وادعى ربنا لحد
ما احس ان نزل ف قلبى صبر عجيب... والله الصبر ده من عند ربنا... مفيش جديد... اه متغير
طبعاً بس معذور هيعمل ايه... لا مليش دعوة بيها من ساعة المشكلة اللى حصلت... الكلام عادى
ف حدود بس... مامته بتترل الصبح وبترجع بالليل وحرام مش محسسانى انى ضيفه ومش بتضايقنى
... بالعكس محسسانى كأنى ف بيتى.. اول كام يوم كنت بسألها اعمل ايه ف الاكل وكده كانت
بتقولى... بعد كده قالت لى اتصرفى انى كأنك ف بيتك ومتسألينش.. اهو ربنا كريم مش هيبقى من
كده... اه يا هدير بالله عليكى ادعيلى كثير يحن قلبهم كلهم عليا... سيك منى بقى وقوليلى
صحتك عاملة ايه؟؟ المرة دى شكلك تعبانة اكثر من المرات اللى فاتت... هتروحي له امى؟؟.. ابقى

قوليلى قبلها بيوم اجى معاكى"

وسمعت صوت الباب بيتفتح

"ماشى يا هدير... مش عارفة مين منهم جه... هقفل معاكى دلوقتى.. هبقى اكلمك بكرة... سلام"

دخلت نرمين وطارق

طارق "سلامو عليكو"

عالية وهى متفاجئة... جريت على باب البلكونة اللى معلقة عليه طرحة... لبستها بسرعة

نرمين "مالك متلخبطة كده... مفيش حد غريب"

عالية "اهلا وسهلا"

طارق مد ايده يسلم عليها

"اهلا بيكى"

سلمت وهى مرتبكة... وخطفت ايدها بسرعة

بصت له... كان مركز نظره عليها وهو بيص لها بابتسامة ضايقتها

نرمين اول ما دخلت... دخلت على اوضتها تحط الحاجات اللى اشترتها.. ورجعت لهم تانى

طارق "ماشى... سلام يا نرمين"
نرمين وهى بتبص لعالية شذرا... راحت ورا طارق ع الباب
"حبيبي متزعلش علشان خاطرى... ربنا بلانى بواحدة متخلفة ومعقدة تطلع عقدها عليا"
"بصى لو مامتك موقتهاش عند حدها انا مش جاى تانى"
"لا متقلقش انا هتصرف... متزعلش انت بس"
"ماشى... البت مها كانت سكرة مش دى"
"وانا مين يكفرنى ف عيشتى... مها سابتنى للعقد دى"

عالية بعد ما خلصت كلامها معاهم وشافتهم رايجين ع الباب
دخلت اوضتها وفكرت تقول لظه ولا لأ
وقررت انها متقولوش علشان ميحصلش مشاكل بسببها

ظه نايم صاحى... وعالية نايمه صاحية
"عالية"
"نعم"
"صاحية؟"
"ايوه عايز حاجة"
"اه"
قامت قعدت
"نعم يا حبيبي عايز اجييلك حاجة"
قام قعد جنبها
"انتى مسامحانى بجد... مش زعلانة منى"
"ايوه"
"ليه حاسس انك محببة عليا احساسك"
"علشان مليش حق انى ازعل... انا اهم حاجة عندى انك متبعدهش عنى وتسيبنى"
وبدأت دموعها تنزل

"انا بحبك اوى يا طه... انا عندى اتعذب وانا شايفاك بتتجوز ارحم من ابنى اموت وانت بعيد
عنى... انا بس عايزة اعرف انت لسه بتحبني"
اخدها ف حضنه وهو ييططب عليها
"طبعا بحبك"
"حاسة انك مبقتش تحبني زى الاول"
"بالعكس... انا مقدرش اتخيل حياتي من غيرك... انتى حبيبتي يا عالية... وحشتيني اوى"

نرمين قاعدة قدام الكمبيوتر...رن موبايلها
"الو...ايوه يامها ازيك...مبروك يا عروسة"
"بلا عروسة بلا زفت...طه فين"
"مالك فى ايه... دخل نام من شوية"
"والزفتة فين"
"مخمودة"
"لا واضح اوى اهمم ولا نايمين ولا نيلة... البيه كنسل عليا وقفل التلفون بعدها"
"هههههه"
"بتضحكى يا نرمين وانا والعة"
"طب اعمل ايه"
"روحي خبطى عليه خليه يكلمنى"
"لا اتكسف افرضى يعنى"
"ماهو علشان انا متأكدة اهمم صاحيين بقولك قومي خبطى عليه خليه يكلمنى...قومي يانرمين
متترفرنيش"
قامت نرمين..وراحت بتردد خبطت على الباب
نرمين "طه انت صاحي؟"
طه"ايوه...عايزة حاجة"
نرمين"مها ع التلفون عايزاك"
طه"طيب قوليلها هكلمها كمان شوية"
نرمين"طيب"

بعدت عن الباب... وكملت كلامها
"يقولك هيكلمك كمان شوية"
"اخوكي ده معندوش دم ومستفز... يحرق دمي كده انا غلطانة انا راضية بالوضع ده"
قفلت مها ف وش نرمين... نرمين استغربت
نرجس خارجة من الحمام
"واقفة كده ليه"
"تعالى بقى علشان احكيك على كل اللي حصل النهاردة لحد دلوقتى علشان تتصرفى... اخويا
هيتجوز اتنين علشان يطلعوا عيني انا"
نرجس وهى داخلة اوضتها ونرمين وراها
"تعالى احكى لى"

(٢١)

نرجس وهى قاعدة ع السرير ونرمين قصادها
"ايه ساكنة ليه؟"
"هو طارق كان بييجى غير يوم الجمعة"
"ساعات وبظروفها ومش دائما ومكنتش ببقى لوحدى"
"مكنتيش بتقولى يعنى"
"يعنى لما ييجى نص ساعة وانتى بترجعى بالليل مهدودة هحكيلك ايه...ايه المهم فيها"
"وانتى مش عارفة انه ميصحش"
"ميصحش لو انا لوحدى...انما كانت مها بتبقى معانا...ماهو لما بييجى الجمعة بتكونى انتى لوحدى"
"اللى معانا ف البيت"
نرجس ساكنة وبتفكر...كملت نرمين كلامها لما شافت نرجس ساكنة
"مالك؟"
"اوعى يكون حصل حاجة كده ولا كده"
انفعلت نرمين وهى بتدافع عن نفسها
"والله ابدأ... وبعدين ياماما انتى على طول ف المحل ... لو انتى مش واثقة فيا اقعدى معايا"
"انا عايزة اطمن عليكى بس"
"متخافيش...انا بحافظ على نفسى كويس"
"وحكاية مها ايه دى كمان...هاتيهاالى ع التليفون"
"هتقوليلها ايه"
"اطلبها بس"
واتصلت نرمين بمها بالموبايل اللى لسه ف ايدها
اخذت منها نرجس الموبايل قبل ما ترد
مها قاعدة بتغلى... اول ماشافت اتصال نرمين ردت بعصبية
"عايزة ايه يا زفتة"
"ايه يا مها اللى حصل فيه ايه؟"

مها "سورى ياطنط افتكرتك نزمين... انتى يرضيكي اللي بيحصل ده"

"ايه اللي بيحصل غريب يعنى"

مها بعصية" لما هو نام ف حضنها هيتجوزنى ليه... واتصل بيه بكل جرأة يقفل التليفون يعنى مش

هامه"

نرجس "خلصتى خلاص"

مها"انتى شايفة حرقه الدم دى عادى"

"تكونيش اتفاجئت انه متجوز"

واتفاجئت مها ان نرجس مش معاها...اتكلمت بطريقة اهدا

"يعنى يرضيكي... انا مش ممكن اسكت له على فكرة"

نرجس بهدوء

"طب بصى يا مها..طه بيحب عالية ولازم تفهمى كده كويس... زمان لما رفضت جوازهم كان هيسينى علشانها...حطيت جزمة ف بوى وسكتت علشان محسرش ابني...طول السنين اللي فاتت

بتحاييل عليه يتجوز وكان بيرفض ولما هى اللي قالت له سمع كلامها... بعاملها كويس ومستحلامها

ف بيتى وانا مبجهاش علشان خاطره... م الاخر كده لو خيرتبه بين اى حد وبينها هيختارها

هى... روى بقى اتخانقى معاها وفركشى الجوازة اللي كل الناس عارفة انها بكرة... اعقلى الكلام

ف دماغك وانتى حرة...مع السلامة"

قفلت نرجس الموبايل واديته لرمين

"ماما...هو صحيح طه بيحبها كده"

"مش شايفة يعنى"

"تفتكرى طارق بيحبني كده"

"اومال يعنى خطبك ليه؟"

وافتكرت نزمين تحاييلها على طارق علشان ييجى يخطبها

"المهم...قوليلها مالهاش دعوة بيا ياماما ولا تتدخل بينى وبين طارق تانى"

"طيب...قومى انتى واطفى النور عايزة انام"

قامت نزمين وخرجت م الاوضة

مها بعد ما قفلت مع نرجس قاعد تععض ف شفايفها من الغيظ ومامتها معاها

"احمدى ربنا انما قالت لك كده"

"ليه بقى ان شاءالله"

"علشان حذرتك قبل ما تنترزى على طه وكان ممكن ساعتها تخسرى كل حاجة"

"المفروض انى بعد كل ده ابقى عادى"

"مش عادى وبس..انتى متتكلميش ف الموضوع ده خالص"

"باردة انا؟"

"الست جابتها لك على بلاطة...وقالتلك المقارنة دلوقتى خسراة"

"وانا ايه اللي يجبرنى استحمل"

"استحملى لحد ما تخلفى العيل اللي نفسهم فيه"

"وبعدين؟"

"وبعدين كل حاجة هتقلب لصالحك انتى...ساعتها هتبقى انتى الاقوى"

"ولحد ما اخلف اطق م الغيظ"

"لا...بس عندك مليون طريقة تخليه ميقدرش يبعد عنك... وانى وشطارتك بقى"

طه على السرير... محاوط عالية بدراعه وحاضنها

عالية جنبه ساندو راسها على صدره العارى

كل واحد فيهم سرحان ويفكر من غير ماينطق

"ياترى يا عالية زعلانة منى؟"

"خايفة اوى تبعد عنى"

"انا كاره ضعفى اللي خلاق اوافق على الجواز... كاره ضعفى اللي مخلينى استسلم لرغبتى ف انى

اشوف طفل منى"

"ياترى هتفضل تحبى حتى بعد ما تخلف ولا مع الوقت هتتسان وتحبها هى؟"

همت عالية انما تقوم...حط طه ايده عليها

"رايحة فى"

"قائمة"

"لا خليكى ف حضنى... مش عايزك تبعدى عنى"

"انا خايفة انك تبعد عني وتنساني يا طه"

"معقول اللي بتقوله ده"

"ايوه... انا عارفة ان الظروف دائما بتكون اقوى من الانسان... عارفة وفاهمة ده كويس... بس انا

ممكن استحمل اى حاجة الا انك تبعد عني وتنساني"

"اطمني... انا متخيلش حياتي بعيد عنك... وان كان قصدك على اني ممكن اتجوز وانساكي ده

مستحيل... انتي روحى يا عالية... بس يمكن ف الاول شوية هبقى معاها وبعد كده هبقى هنا وهناك

اطمني"

"انا مطمنة طول ما انت بتحبيني"

"كنت عايز اقولك حاجة ومتردد"

"قول يا حبيبي"

"مش هتكوني معايا... بكرة"

ردت عالية بحزم

"لأ... ومن غير شرح اسباب"

نرمين داخله المطبخ لمرجس وعالية

"ماما انا نازلة علشان معاد الكوافير... مها قالت لي ان طه هيوصلها"

نرمين بتتكلم وعينيها على عالية علشان تغيظها

مرجس "طيب مش هيعدي عليكى ليه"

نرمين "قال لي مش فاضى... بس طبعا لمها مقالهاش لأ"

عالية سامعة الكلام ومتجاهلاه تماما

مرجس "طيب انزلي وانا هبقى اجيلكم على هناك"

نرمين "ماشى... متتأخروش بقى.. مش انتي جاية يا عالية"

عالية من غير ما تبص لها

"لأ"

شدتها مرجس بره المطبخ

"ماتسكتي"

"في ايه انا بتكلم عادى"

"طب يالا انزلى مش عايزة مشاكل النهاردة...وقوليلى متعرفيش مها وطه عملوا ايه امبارح"

"اه..كلمها بالليل ومتفتحش معاه اى كلام خالص...شكلها خافت من كلامك"

"احسن... انا هلاقىها منين ولا منين...يالا انزلى وابقى كلمينى لما توصلى"

عالية قاعدة...بتبص ف الساعة...حاسة بضربات قلبها سريعة

ونفسها بيضيق وبتتخفق كل لحظة بتعدى اكر من اللى قبلها

سمعت صوت باب الاوضة بيتفتح

وخرج طه ومامته وراه من الاوضة

طه لابس بدلة سودة جديدة ووراه نرجس بتزغرط

التفت طه لنرجس...خلالها قطعت الزغروطة

قامت عالية وقفت وهى بتبص له... وبتحاول بكل قوتها انها تتحكم ف رد فعلها

راح ناحيتها...سلم عليها

"مش عايزة حاجة قبل ما انزل"

حست عالية ان روحها بتتسحب منها وهى شايغة طه رايح يتجوز واحدة تانية... مش عارفة ترد

عليه ولا صوتها بيطلع

هزت راسها بالنفى

"هتوحشينى... لو فيه اى حاجة كلمينى اى وقت"

نرجس"ايه يا طه...انت سايبها ف غابة ماهى قاعدة معززة مكرمة"

طه وهو بيلتفت لنرجس

"خلى بالك منها...اوعى حد يزعلها"

نرجس بترد باستعجال

"متخافش مش هناكلها...يالا بقى"

باسها طه من راسها...وراح ورا نرجس

راحت وراه عالية لحد الباب
سلموا على بعض تانى عند الباب
خرجوا...وقفلت وراهم الباب
ولحظة ما قفلت الباب
مقدرتش تمشى خطوة واحدة
قعدت ع الارض ورا الباب وهى بتعيط بحرقة

نرمين ومها فى الكوافير
مها لابسة ومخلصة ونرمين كمان خلصت ومستنينين طه
تشاور مها لنرمين
"قوليلى... الزفة عملت ايه النهاردة"
"ولا حاجة"
"ولا حاجة ازاي...انتى مغيظتيهاش زى ماقلتك"
"ياختى دى باردة برود...ايه ده مشفتش كده"
"انا مش عارفة بيحب فيها ايه...طب بقولك ايه موصكيش بقى النهاردة لما تروحى... وبكرة
كلمينى قدامها ونقعد نغيظ فيها شوية"
"ماشى...ده انا مش طايقاها من الاول وحت حكاية تدخلها بينى وبين طارق دى خلتنى مش
طايقاها اكثر"
"طارق فىن صحيح؟"
"هيجى كمان شوية...مستلف عربية من واحد صاحبه وهنعملكم احلى زفة"
مها بتبص على نفسها فى المراية...بأعجاب وفرحة

عالية بتصلى وهى بتعيط... وصوت عياطها على
بتدعى ف سجودها بالصبر

يرن الموبايل.. تخلص صلاة يكون الموبايل سكت

تروح تشوف الاتصال... تتصل وهي مستغربة

"الو... عصام؟؟"

"ازيك يا عالية"

"الحمد لله...مالك؟"

"هدير تعبت اوى من شوية...وسبت البنات عند الجيران واخذتها للدكتور"

عالية قاطعته من القلق

"مالها؟؟مش لسه معادها عند الدكتور الاسبوع الجاي"

"ايوه...بس تعبت فجأة... والدكتور قال ان المرة دى صعبة ولازم يفتح قيصرى"

"يا حبيبتي... انتم عند الدكتور"

"اه"

"وهى فين"

"دخلت اوضة العمليات"

"طيب يا عصام...شوية وجاية...بس البنات"

"متخافيش البنات عند الجيران...ف امان يعنى...انا بس خايف اوى وهي قالت لى قبل ما تدخل

العمليات انها عايزاكي"

"طيب...مسافة السكة ان شاءالله"

قفلت مع عصام... وفضلت مترددة

"انزل...ولا اتصل بطه... لو اتصلت هيتضايقوا كلهم...ومقدرش انزل من غير ما اقوله"

حسنت التردد...واتصلت وهي متخوفة من رد الفعل اللى ممكن تتسبب فيه وخصوصا لما نرجس

ترجع ممكن تبهدلها وهي لوحدها

قبل ما تسمع الجرس قفلت...وقررت انها تتصل بنرجس

نرجس فى العربية مع طارق ونرمين

وقدامهم عربية طه وفيها العروسين

نرجس بتفتح الشنطة... بصت ف الموبايل
"وطى يا طارق الاغانى دى اما اشوف عايزة ايه الست عالية"
وطا طارق الكاسيت... وردت نرجس وطارق مركز مع المكالمه
"ايوه يا عالية...خير... طيب ما تروحي... لا كويس انك متصلتيش بطه واوعى تتصلى بيه اليومين
دول...روحي طيب... لو اتكلم هبقى اقوله ان انا اللي قتلتك... مع السلامة"
قفلت معاها... بصت لها نرمين
"عايزة ايه؟"
"صاحبته بتولد وعايزة تروح لها"
"واحنا مالنا"
"بتستأذن قبل ما تترل"
"اووووف... هايفة اوى... قال تستأذن قال... على ياطارق خلينا ندخل المود تانى اللي فصلتنا منه
الكثيية دى"
طارق بص لها بضيق... وهو بيعلى الكاسيت ويدور وشه بعيد عنها

(٢٢)

عالية وعصام قاعدين قدام اوضة العمليات
عالية ف حضنها المولود...عصام كل شوية يقوم بمشى شوية ويرجع يقعد تانى
عالية رغم قلقها بس فرحتها بالمولود اللي بين ايديها كانت مخففة القلق شوية

اتفتحت باب اوضة العمليات
خرجت هدير...راحوا وراها لحد الاوضة
وقبل الممرضة ما تخرج
عالية"هى ما فاقتش ليه؟"
الممرضة"لا هى كده يعتبر فاقت...دقايق بس وهترد عليكم"
عصام"يعنى هى كويسة"
الممرضة"اه كويسة... الدكتور هيمر على اللي ولدوا الصبح وبعدين يبجي لها"
خرجت الممرضة... راح عصام وقف جنب هدير
"هدير...هدير سامعانى"
هدير مبتردش... مسك ايديها
"هدير"

سابت عالية المواد على السرير...وجت بقلق ووقت جنب هدير
اول ما نطقت هدير كانت بتتألم
اطمنوا الاتنين... وبالتدريج بدأت ترد عليهم

مها وطه طالعين شقتهم
واهلهم وراهم... ام مها ونرجس ونرمين

وصلوهم وهما بيزغرطوا وفرحانين
وقبل ما يمشوا... نادت مها على نزمين
"مش هوصيكي بقى... عايزاها تولع"
نزمين "حاضر... من غير ماتقولى "

طه شافهم يتوشوشوا وهما ع الباب قرب منهم وسأل مها
"ايه فى حاجة"
مها "لا ابدا كنت بسلم على نزمين بس"
نزمين "ياللا... مع السلامة... ابقى كلميني يا مها"
نزلت نزمين وقفلت مها الباب وراها وهى بتبتسم لظه متصنعة الكسوف

هدير ع السرير وعصام واقف جنبها
عصام "هدير... هروح اطمن على البنات وارجعلك"
عالية "متخليش البنات يياتوا عند حد... بات معاهم وانا هبات مع هدير"
هدير "اه يا عصام... اطمن عالية معايا"
عصام "خلاص اللي تشوفوه... هجيب البنات واجيلكم بدرى ان شاء الله"
عالية "وتجيب البنات ليه... مش الدكتور قال هنمشى بكرة بدرى... خليههم وابقى تعالى خدنا الصبح"
عصام "ماشى... تصبحوا على خير"
قرب عصام من عالية... وباس المولود اللي شايلاه... ومشى

عالية بعد شوية...
"هدير... حاسة بإيه دلوقتى؟"
"تعبانة اوى والله... مكنتش اعرف ان القيصرى متعب كده"
"الحمد لله انك قمتى بالسلامة... كله يهون علشان عيون القمر ده... ربنا يبارك فيه"
"عقبالك يا عالية"
ابتسمت عالية بجزن... حست بيها هدير
"انا اسفة انى تعبتك معايا"

"تعبتيني ف ايه بس.. شايفاني يعني بنحت ف الصخر ما انا قاعدة اهو"
"مش قصدى... بس انى اجيبك ف مستشفى ولادة وممكن ده يتعبك اكثر"
حست هدير بالندم انها اتكلمت كده... كملت
"انا ايه اللي بقوله ده... هو البنج بيخلى الواحد معندوش احساس للدرجة دى"
ضحكت لها عالية لما فهمت ان هدير خافت على زعلها
"ايه يا هدير... انتى خايفة ازعل منك؟ هو احنا بيننا كسوف ف اى حاجة... ده انا كل اللي جوايا
بحكيهولك انتى زى ما بتحكيلى كل اللي جواكى"
"ربنا يعوض صبرك خير"
"انتى تعرفى انى النهاردة حسيت ان ربنا راضى عنى"
"النهاردة!! وجوزك رايح يتجوز"
"ايوه... انا من كام ساعة بس كنت بموت لوحدى ف البيت... مكتتش عارفة لحد ما يرجعوا
هيلاقوني لسه عايشة ولا اكون مُت م القهر اللي انا فيه... صليت ودعيت ربنا يصبرنى... قبل ما
اخلىص كان عصام بيتصل بيا ويقول اجى لك... ربنا مخذلنيش واراد انى ابعد عن البيت خالص
وانشغل معاكى وبيكى... شفقتى ربنا حنين علينا ازاي"
"ونعم بالله... ده علشان انتى صابرة يا عالية"
"مفيش قدامى حل غير انى اصبر... ربنا كريم... مقاتليش هتسموا النونو ايه؟"
"محمود ان شاءالله"
"اسم جميل زيه... وانتى حاولى تنامى اتكلمنا كثير وانتى مش قادرة... انا سهرانة مع محمود"

نرمين داخله على نرجس اوضتها بتصحياها

"ماما... ماما"

نرجس بخضة "ايه ف ايه"

"الساعة ٥ الصبح"

"اعمل ايه يعنى"

"عالية مجتتش لحد دلوقتى"

"ايوه ما انا عارفة"

"عارفة ايه"

"كلمتني وقالت هتبات عند صاحبته"

"من اول يوم طه يغيب كده هتروح تبات بره... لو طه عرف مكنش سكت لها"

اتعدلت نرجس وقعدت

"بقولك ايه... ولا تقويله ولا تحيله سيرة خالص"

"ليه يعنى... مش لازم يعرف مراته بتروح فين"

"ياختى اتوكسى... هتروح فين يعنى"

"ياسلاااااااااااا... ده ايه الثقة دى كلها"

"لو كانت وحسة كان بان عليها... سيك انتى بس منها"

قامت نرمين بغيظ

"طيب... خضرة الشريفة حضرتهما وانا امبارح تشكى فيا وتسأليني حصل حاجة بينك وبين طارق"

واتكلمت نرجس بلهجة تحذيرية

"شوفى يا نرمين... انا مبحبش الامخاخ الوسخة... لو بيتاخذ بالمظاهر كانت الناس اتكلموا عليا بعد

ابوكى ما مات... وكان الناس اتكلموا عليكى علشان اخدة حريرتك بتخرجى وتدخلى اى وقت

وتتعدى طول اليوم لوحدك... متجيش بقى للى لا بتروح ولا بتيجى وتشكى فيها"

"مش عارفة عملت لك ايه خللتك تدافعى عنها كده"

"من جهة عملت فهى عملت"

"ايه بقى"

"كفاية انما نفذت كل اللى قلت لها عليه من غير ماتقول لظه... ومكرهتش ابني فيا طول السنين اللى

فاتت... مش معنى انى مبجبهاش انكر اللى هى عملته"

نرمين بغيظ

"ماشى... انتى حرة... بس برضه مش طايقاها"

طه صحا من النوم... مها نايمة

قام من جنبها بكدوء... بيدور ع الموبايل بشويش قبل ما تصحى

ملقاهاوش ف الاوضة... خرج يدور عليه فى كل حنة ف البيت

قامت مها م النوم... شافته ف الاتريه

"صباح الخير يا حبيبي"
"صباح النور"
"مصحتنيش ليه"
"لا ابدأ انا لسه صاحي"
"طيب انا داخلة الحمام.. وانت حضر الفطار"
"احضر الفطار!!؟!"
"اه... مش انا عروسة ولازم عريسي يدلعي"
"وقربت منه وحضنته بدلع"
"مش انا كمان بدلعك"
"ضحكت بصوت عالي وراحت ناحية الحمام... نادى عليها"
"مهااا... مشفتنيش الموبايل"
"عايزه ف ايه"
"عايز اكلم ماما واطمن عليها"
"ماما برضه؟"
"مش فاهم ايه المشكلة... هكلمهم كلهم اكلن عليهم"
"لا يا حبيبي... احنا عرسان... انا اخدت موبايلي وموبايلك وقفلتهم وخبيتهم والحمدلله ان تليفون
البيت مرفوع... انا عايزة نبقي انا وانت وبس من غير اى ازعاج خالص"
"يعني منطمنش على اهلنا... ازاي ده؟"
"كده... ومتقلقش مش هتزهق خالص"

فاتن مع ميار وايمن بيشتروا حاجات
ايمن "طنط... كده لسه فاضل نحجز الجاتوه"
فاتن "خلاص نمشي احنا وكملة مشاويرك انت"
ايمن "طيب ممكن ميار تيجي معايا"
فاتن "ماشى... انا هروح اعمل كام مشوار كده وابقوا كلموني لما تخلصوا"
ميار "رايحة فين"
فاتن "هروح اعزم خالك"

ميّار "ماتكلمهم ف التليفون"
فاتن "لا ميصحش مش كفاية انا من زمان مسألئتش عليهم... لازم اروح اعزمهم واديهم الكارت
بنفسى"
ميّار "وهو خالو هيبقى ف البيت دلوقتى"
فاتن "هسيب الكارت مع عالية... يبقى اسمى اهتميت وروحت بنفسى"
ايمن "ناخد تاكسى نوصلك وبعدين نكمل انا وميّار"

فاتن واقفة بتضرب الجرس
مها وطه يسمعوا جرس الباب... يقوم طه
مها "مين؟؟"
طه "يمكن مامتك رجعت تانى لاي سبب... هشوف مين"

طه بيفتح الباب... شاف فاتن قدامه
طه مستغرب.. وف نفس الوقت رحب بيها قبل ما تاخذ بالها من استغرابه
"فاتن... اهلا وسهلا"
فاتن وهى بتسلم عليه وتبوسه
"ازيك يا طه... ايه ده انت مش ف المحل النهاردة"
طه بيوسع لها تدخل وهو مرتبك
"اتفضلى"
دخلت... قفل الباب وراها
جت مها م الاوضة... لابسة قميص نوم وروب
فاتن كانت لسه هتقعد... اول ما شافتها قامت تانى من الخضة لما شافت واحدة تانية غير عالية
كل اللى فكرت فيه ان طه جايب واحدة البيت ويبخون عالية
فاتن "مين دى؟"
مها وهى رايحة ناحية فاتن
"انتى اللى مين؟"

طه "دى فاتن اختي"
مها "آآآآه... اهلا وسهلا... اتفضلى"
فاتن باستغراب ونفس الفكرة ف دماغها
"مين دى؟؟"
طه بصوت واطى...
"مراتى"
فاتن "مراك!! وعالية فين؟"
مها "اتفضلى الاول اقعدى وقولينا مبروك بدل كل الاسئلة دى"
فاتن برقت عينيها من الطريقة اللى مها بتتكلم بيها
طه "اتفضلى اقعدى يافاتن"
فاتن حسست انها مش عارفة تتكلم ولا تقول ايه
قعدت على طرف الكنبه... وقعد معاها طه
"مها لو سمحتى اعلمى حاجة لفاتن تشرىها"
مها "انت عايزى امشى علشان تتكلم من ورايا... اللى عايز تقوله قوله قدامى"
قعدت مها معاهم متجاهلة كلام طه
طه اتفاجئ برد فعل مها اللى تجاهلت كلامه واتصرفت زى ماهى عايزة
فاتن "انا عايزة افهم حاجة بس... انت وعالية اتطلقتوا؟"
طه "لا... عالية عند ماما"
فاتن مستنكرة "وانت اتجوزت هنا"
مها "مش ملاحظة انك لسه مقلتلناش مبروك... ده حتى احنا عرسان بقالنا يومين واستغربنا مين جاي
لنا من غير معاد"
فاتن "انا اسفة جدا انى جيت من غير معاد... اصل انا لما كنت باجى لعالية مكنتش باخد مواعيد
قبلها"
طه "انتى تنورى ف اى وقت يافاتن"
فاتن وهى قايمه... فتحت شنطتها طلعت كارت
"خطوبة ميار يوم الخميس و كنت جاية اعزمك انت وعالية... انا هتصل بعالية واعزمها... هستناكم"
مها "مبروك... هنيحى ان شاءالله"
فاتن وهى بتبص لها

"انا شفتك قبل كده"

مها"اه...اتقابلنا.. انا صاحبة نرمن من زمان"

فاتن متعمدة تغيطها

"اه شفتك ف كتب كتاب طه وعالية ويوم الفرح كمان"

اتعاظت مها... وحببت ترد الغيظ لفاتن

"ياترى عزمى نرمن وطنط ولا لأ...مش نرمن حالة العروسة برضه ودى اصول"

فاتن مكنتش ناوية تعزمهم... واضطرت ترد على مها

"اه هعزمهم طبعاً...انا هبقى اودى الكارت لابلة نرجس ف المحل... استأذن انا"

راحت فاتن ع الباب...راح طه يوصلها ومها واقفة مكانها

نزلت فاتن من عند طه وهى متضايقة وموجوعة علشان عالية

"يا حبيبتى يا عالية...هو الغلبان ياربى مبيشبعش عُلب... احص عليك يا طه تتحوز عليها وتسيبها

مع العقارب"

اول حاجة عملتها وهى ف الشارع... اتصلت بعالية تطمن عليها وتواسيها

"الو...ازيك يا عالية...عاملة ايه يا حبيبتى"

"الحمدلله...وحشانى يا ابلة والله"

"وانتى يا حبيبتى... انا جيتلك البيت وعرفت اللى حصل"

"نصيب يا ابلة...الحمدلله"

"لو مكنتيش ف بيت نرجس كنت جيتلك...ابقى تعاليلى يا عالية وخطوبة ميار يوم الخميس

والكارت مع طه"

"الف مبروك يا ابلة ربنا يتم لها بخير...على فكرة هدير بتسلم عليكى"

"هى عندك؟"

"لا انا اللى عنها...هدير ولدت من يومين وانا قاعدة معاها"

"والله؟؟ طيب انا جاية لكم شوية"

"اهلا وسهلا يا ابلة تنورى...مستنينك"

مها قاعدة تحط ميك اب... وطه قاعد ع السرير
"ليه كلمتي فاتن بالطريقة دي مش عيب"
"انا عملت حاجة؟ انا بس حسستها اني بقيت مراتك زى عالية"
"وهتيجي معايا الخطوبة؟"
"اه طبعا...هنروح كلنا... انا وانت وطنط ونرمين وطارق اكيد"
قال طه مؤكدا "وعالية"
ردت مها وهي بتنفخ
"وعالية"

(٢٣)

فاتن قاعدة جنب سرير هدير
عالية بتقدم لها حاجة ساقعة وبتقعد
فاتن "معقول يا اولاد كل ده يحصل"
عالية "حقه يا ابلة"
هدير بانفعال "كسر حقه... لامؤاخذة يا ابلة... مترعليش يا عالية بس بتترفز... منها لله اللي كانت
السبب"
فاتن "نرجس برضه؟"
هدير "تخيلي يا ابلة... تخليها هي اللي تطلب انه يتحوز... انا مش عارفة ازاي فيه ناس بالجبروت ده"
فاتن "ليه وافقتي على كلامها يا عالية؟؟... ليه مرفضتيش"
عالية "علشان طه... علشان عارفة انه نفسه يخلف ومعندوش اللي يمنعه من الخلفة غيرى... علشان
طه صرف عليا كتير علاج وعمليات وكل ده من غير فائدة... علشان خفت يزهدق مني ويطلقني
واترمى ف الشارع... انا كده احسن كتير"
هدير "احسن ف ايه... بالذمة ده اسمه كلام... دى حتى الشقة خرجك منها"
عالية "وانا ليا فيها ايه... طه اخدني بطولى حتى هدومي هو اللي جاها لي... انا راضية باللي حصل"
فاتن "معاكى حق"
هدير "معلش يا ابلة... هو بس علشان اخوكى مش قادرة تغلطيه"
فاتن "لا مش علشان اخويا بس... علشان حاسة بظروف عالية اوى ومريت بنفس ظروفها.. مش
قتلكم قبل كده ظروفكم شبه ظروفى"
هدير "ازاي؟؟ جوزك اتجوز عليكى"
فاتن بتضحك "لا مش قصدى"
عالية "قصدك ايه يا ابلة"
فاتن "مش انا حكيت لكم انى اتجوزت جوزى اول ما خلصت علشان ابعد عن نرجس... وكان اكبر
منى ب ١٧ سنة وولا بجبه ولا حاجة... لما اتجوزنا اكتشفت انه بخيل... بخيل اوى الاف
الضروريات بس... قلت مش مهم معيش وخالص ولما حملت ف ميار قلت اكيد هيتغير لما يبقى له
طفل.. واتعشمت ع الفاضى وبعد ما خلفت ولا اتغير... بقيت ادعى ربنا يحلها من عنده لحد

ماجالى التعيين واتوظفت وبقيت اصرف على نفسى وعلى بنتى ف اللى مبيرضاش يجيبه... ياما
زهقت واتخنقت وفكرت اطلق... بس قلت لو اطلقت هروح فى بنيتى وكان بابا مات وقتها... يعنى

استحالة نرجس هتساعنى بنتى... سكتت وصبرت سنين طويلة عايشة ف غلب"

هدير وعالية بيصوا لبعض بتصعب على حالها

هدير"بس برضه الوضع مختلف... ده اتجوز عليها وهى بتحبه"

فاتن"الظروف والتفاصيل مختلفة... انما السبب فى الخوف من الطلاق واحد... انا مالناش حد غير

ربنا"

عالية"ونعم بالله"

فاتن"ارمى حمولك ع الله ومش هتنضامى ابدا يا عالية"

عالية"مليش غير ربنا بدعى ف كل صلاة يصبرنى"

فاتن"والله يا عالية جوزى دلوقتى اتغير خالص ولوحده من عند ربنا... انا معملتش حاجة غير انى كنت

مفوضة امرى لله"

هدير"اتغير ازاي... بقى بيصرف كويس؟"

فاتن"مش كده وبس... ده انا بقيت كل حاجة ف ايدى وكل فلوسه اللى مكنتش اعرف عنها

حاجة بقت قدامى وتحت تصرفى"

هدير"عقبال اما ربنا ينصفك يا عالية"

عالية"يارب"

فاتن"ياللا اقوم انا علشان اروح قبل ما ميار... هستناكى يا عالية يوم الخميس.. وانتي يا هدير لو تقدرى

تيجى ياريت"

هدير"لا صعب يا ابلة مش هقدر... مبروك وربنا يتمم لها بخير"

طه نام... مها بتقفل الباب عليه وهى بتتسحب

خرجت قعدت ف الانتريه... والموبايل ف ايدها

فتحتته... واتصلت

"الو... بت يانرمين عاملة ايه"

"انتى ندلة اوى... تقفلوا التليفونات"

"ما تسيبينا ياخيتى عايزة منا ايه"

"عايزاكي تحكيلى"

"بعدين لما اشوفك... المهم ايه الجديد عندك"

"مفيش جديد ولا قديم...اللى ماتتسمى قاعدة عند صاحبته من يوم جوازكم"

مها بفرحة"سابت البيت"

"لا يا حبيبتى دى لازقة"

"طب اسمعى اختك كانت عندنا"

"يووووه فاتن الرخمة"

"اه..بس انا ايه بقى...كيدتهالك ولسه... عزمتنا على خطوبة بنتها وانا اخرجتها وقلت لها تعزمكم"

ونروح كلنا"

"ودى نروح لها ليه واحنا لا بنطبقها وبتطبقنا"

"علشان اخوكى يا هانم هياخد اللى ماتتسمى ويروحوا"

"وانا مالى"

"هاتى طارق وتعالى...اهو نكيد الارشانتين اختك واللى ماتتسمى"

"طيب ماشى"

مها خارجة من الحمام بتنشف شعرها

"قدامك قد ايه وتجهزى"

"ساعة بالكثير"

"التليفونات فين"

سكنت مها تفكر

"خلاص بقى...بقالنا ٥ ايام عرسان وقاعدين ف منفى...انام واصحى الايكي تقولى كلمتى ماما

ونرمين...متزوديهاش بقى"

"انا اتكلمت... هجيبه"

قامت على مضض... طلعت التليفونات من وسط قدمها

حذفت الموبايل على السرير

"خد اهو"

قعدت مبوزة وهى بتتسرح... بص لها طه

" في ايه؟"

"طريقتك معايا وحشة اوى ياطه"

"كل ده ووحشة... كل يوم اقول لنفسى معلش متزعلهاش حقها تتدلع شوية بس كفاية بقى"

كان بيكلمها وهو يفتح التلفون

"هتكلمها طبعاً"

"اه"

خرج م الاوضة... خرجت وراه

"انتى مش هتلبسى"

"عايزة اعرف هتقولها ايه"

اتصل طه بعالية

عالية وهى ف الشارع... رن موبايلها

اول ما شافت اسم طه... ردت بكل فرحة وشوق

"الو... طه ازيك"

"ازيك يا عالية... عاملة ايه"

"الحمد لله يا حبيبي... انت عامل ايه وحشتنى اوى"

"انتى فين صوت دوشة"

"رايحة ع البيت"

"كنتى فين"

"كنت عند هدير"

"ليه انتى مش عارفة ان النهاردة خطوبة ميار"

"ايوه عارفة علشان كده رجعت النهاردة من عند هدير"

"النهاردة؟؟ ليه هو انتى عندها من امتى"

عالية بحزن "من يوم جوازك"

طه "ازاى يا عالية... قاعدة عند صاحبتك ٥ ايام"

مها فرحانة وهى جنب طه بالشد اللى بينهم

ارتبكت عالية "ماهو اصل"

"اصل ايه.. هو انا مش موجود تتصرفى بمزاجك"
"انا استأذنت من ماما وهى قالت هتقولك"
وافتكّر طه ان التليفون كان مقفول
"خلاص خلاص... لما اشوفك نبقى نتكلم... هعدى عليكى اخذك"
"حاضر"

قفّل معاها طه... وبص لمها
"ما تقومى البسى بقى"
"الله... انت هتتفرز عليا انا ليه هو انا عملت لك حاجة"
وقامت مها دخلت الاوضة... وطلع طه البلكونة

عالية بتخبط ع الباب... فتحت لها نرمين... بعد ما القت السلام
دخلت عالية على اوضتها... على طول... وقفلت عليها
قعدت على السرير وهى مذهولة من طريقة طه معاها
اسلوبه وهو بيتكلم واول مكالمه بعد الفترة دى يكلمها كده
صعبت عليها نفسها... عيطت من تغيير طه السريع

مها خرجت من الاوضة... وطه قاعد لابس ومستنيها
اول ما شافها
"ايه ده اللي انتى عاملاه ف نفسك"
"ايه ف ايه؟؟"
"رقبتك باينة... ده حجاب ده؟"
"اه... سبانيش علشان الفرحة"
"انا مالي سبانيش ولا بتاع... وال ١٠ كيلو الوان اللي ف وشك دى ازاي كده"
"ايه ياطه... هي تلاكيك ولا ايه"
"مش تلاكيك بس انا خارج مع مراتى مش مع رقاصة"
"والله دى طريقة لبرى ومش جديدة عليك"

"مليش دعوة بقبل كده...هتخففى اللي ف وشك وتغطفى رقبتك ولا انزل انا"
"اااااااه...انت بتتلكك علشان تروح لها لوحداك... ماشى يا طه... هعمل اللي انت عايزه ... اما

نشوف"

خرجت عالية من اوضتها...راحت اوضة نرمين

"هى ماما مش جاية معنا؟"

"لا"

"طه قال جاي ياخذنى...انتي جاية معنا صح؟"

"هو قال جاي؟ هكلمه واشوف"

واتصلت بطه وعالية واقفة

"الو.. ايه ياطه انتوا جايين تاخذونا... قدامك قد ايه؟؟ طيب هنكون جاهزين...سلام"

"جاي امى"

مردتش عليها نرمين...واتصلت بطارق

"الو...انت جاي؟؟ خليك هنعدى عليك احنا...سلام"

"هو طه جاي امى"

"ف السكة...لما يوصل هيرن علينا"

طه قاعد ف العربية...مها جنبه

ظهرت نرمين وعالية خارجين من العمارة

فتح طه الباب وقبل ما يتزل

"نازل ليه"

"اسلم عليهم"

حضنته نرمين اول ما شافته

"مبروك يا طه"

بيحضنها وعينه على عالية...اللى شاف الحزن ف عينها رغم ابتسامتها الباهتة

نرمين بتسلم على مها...اللى مركزة نظرها عليهم

طه سلم على عالية وباسها من خدها
مها بتبص لهم شذرا
نرمين وهى بتركب
"طه هنعدى على طارق ناخده"
ركبت مها تانى جنب طه... وركبت عالية جنب نرمين

طول الطريق وعينين عالية وطه بتنطق بالاشتياق وهما بيتبادلوا النظرات ف المراية
مها ملاحظة... بتحاول تتكلم مع نرمين وكل ما تكلم طه يرد باختصار

وصلوا القاعة... وطالعين السلم
مها ماسكة ف ذراع طه
ونرمين ف ذراع طارق
وعالية ماشية لوحدها وهى مكسوفة

طارق مال على نرمين
"اخوكى فاجر وقادر"
"لم لسانك ع المسا"
"مش بيقولوا جوز الاتنين يافاجر ياقادر... ايه رأيك بقى ان اخوكى ده برنس"
"اشعنى"

"شوفى واحدة ف ايده والثانية وراه... يابخته"
"هتستعبط... ده انت يوم ماتفكر اولع فيك وفيها"
"ليه يعنى ما اخوكى اهو ومتدلع اخر دلع"
"يا حبيبي انا مش عالية... هى ساكنة وراضية انما انا لأ... بس اطمئن مش هتستحمل كثير وهتزيحها
من طريقنا"
"عملتوا عصابة يعنى"
"بذمتك دى لياقتنا ولا شبهنا"

بص وراه بطرف عينه...لمح عالية وهى بتمسح دموعها بطرف مندبل قبل ما تنزل...رجع بص

لنرمين

"لا فعلا مش شبهكم ولا زيكم خالص"

دخلوا القاعة... شافتهم فاتن

سلمت ببرود عليهم كلهم ماعدا عالية سلمت عليها بترحاب شديد

قعدوا كلهم على تراييزة دائرية

طه بين عالية ومها وقدامهم طارق ونرمين

مها طول ماهى قاعدة ماسكة فى ايد طه وبتتدلع وتهمز معاه

طه ساكت...وعالية متحكممة لاقصى درجة ف اعصابها

نرمين"البت ميار المعفنة يتعملها خطوبة هنا"

مها"ابحات يا بنى"

نرمين"اذا كانت القاعة بس كده او مال الشبكة هتبقى شكلها ايه"

مها"يمكن ولا شبكة ولا حاجة وعاملين خطوبة يتمنظروا بيها وخلاص"

نرمين"اما نشوف"

ومالت على طارق

"شايف"

"نعم... ما انا قتلتك نستنى انتى اللى كنتى مسروعة ع الخطوبة"

سكنت نرمين وهى بتبص لمها والاتنين بيحقدوا على ميار اللى لسه موصلتش القاعة

فاتن كل شوية تبص عليهم وهى بتستقبل الناس

حست بقهرة عالية...راحت لهم

فاتن"ما تقومى يا عالية تقعدى معايا شوية...بعد اذنكم"

قامت معاها عالية..وقعدت معاها على نفس التراييزة

لما وصلوا العروسين... وبدأ الفرحة

نرمين" مها... طرحتك اتفكت"

مها بتمسك طرحتها

"فين... معاكى مراية"

طه"مراية ايه هتعدلى هنا... قومي روحى الحمام"

مها"تعالى معايا يانرمين"

قاموا مها ونرمين... راحوا الحمام

طه وطارق قاعدين مفيش بينهم كلام

طه وعالية بيتبادلوا نظرات صامته

طارق بيتفرج عليهم من باب الفضول والتعجب

قام طه فجأة... راح ناحية عالية

عالية وهى شايفة طه جاي ناحيتها... خايفة منه ومن سكوته طول الوقت من ساعة ما كلمها بجفاء

ف التليفون

قرب منها... اخذ ايدها

"قومي معايا"

"فى ايه يا طه؟؟"

"ياللا بس"

قامت معاه وهو ماشى بخطوات سريعة وهى بتمد تحصله وكأنه بيجرها

نزلوا ع السلم... بخطوات اهدا

"مالك ياطه... انا عملت حاجة زعلتك؟"

طلع طه تليفونه وقفله... وحط ايدها ف ذراعه وهما نازلين

"وحشتيني اوى وعائز اقعد اتكلم معاكى كتير اوى... عايز نبقى انا وانتى وبس... بجدك اوى

ياعالية"

عالية من الفرحة حست ان الدنيا كلها بترقص قدامها

مها ونرمين راجعين من الحمام

"بجد؟"

"طبعاً... عندك شك ف كده"

"بصراحة... حسيت انك ناسيني طول الفترة اللي فاتت ولا كلمتني ولا سألت عليا"

طه واتغيرت نبرة صوته لكسوف منها

"متزعليش... انا محبتش اعمل مشاكل بس... انما والله كنتي على بالي وف قلبي... اوعى تشكى لحظة

ف حي ليكي يا عالية"

عالية مبسوطة وحاسة انما ملكت الدنيا كلها

"عارفة يا حبيبي... ربنا ما يحرميني منك"

"ومتزعليش اني اتعرفت عليك ف التليفون... حسيت ان غيابي خلاني مليش كلمة ولا اعتبار وده

ضايقتني اوى"

"والله يومها قلت لماما وافتكركما قالك"

"خلاص مش مهم... المهم اني مبحسش بالسعادة غير واحنا مع بعض... اسمعي يا عالية يومين

وهجيك اقعدي معاكي"

عالية باستغراب وفرحة

"بجد؟"

"اه طبعاً... كفاية اسبوع... ونمشيها بعد كده اسبوع واسبوع علشان مش هينفع يوم ويوم

هتشحطط"

"والله يا طه انا كل اللي يهمني انك تفضل تحبني وتفضل فاكرني"

"انتي روحي"

خلصت الموسيقى... وبدأت ام كلثوم تغني

وطه يغني معاها وهو ماسك ايد عالية وهو سايق

يا حبيبي .. الليل وسماه..

ونجومه وقمره .. قمره وسهره

وانت وأنا.. يا حبيبي أنا .. يا حياتي أنا..

كلنا .. كلنا.. في الحب سوا..

والهوى آه منه الهوى

سهران الهوى يسقينا الهنا .. ويقول بالهنا .. يا حبيبي
يا لا نعيش في عيون الليل
ونقول للشمس تعالى تعالى بعد سنه .. مش قبل سنه
دي ليلة حب حلوه بألف ليله وليله..
بكل العمر .. هو العمر إيه غير ليله زي الليله

مها بتدخل شقتها بعصبية...بتفتح النور وتجرى على اوضة النوم
بتفتحها فجأة ... شافتها مطفية وكل حاجة زي ما سابتها

وقفت تفكر...وتجرب تتصل تاني بطه
"قافله برضه...ليلتك طين...انا تعمل فيا كده والله لاوريك"
بتفكر

"معقول يكون اخدها عند امه!!?... نرمين اللي هتعرف"
واتصلت بنرمين

"الو...انتى فين...لسه موصلتيش البيت يعنى ايه... قدامك قد ايه طيب... قربتى ولا بعيد... خلاص
يا نرمين مش لسه هستناكى لما تتلكعى مع سى طارق...انا هروح اشوفهم بنفسى وخلينى اولع وانتى
عمالة تمشى ولا على بالك"

قفلت معاها وراحت ع الباب وخرجت

مها بتخبط ع الباب بعصبية عند نرجس
نرجس بتكون لسه راجعة وبهدومها ملحقتش تغير
راحت تفتح...انفاجئت بمها داخلية بعصبية
"هما فين؟؟"

نرجس باستغراب

"هما مين...مش كلكم كنتم ف الفرخ"
"البية ابنك خلانى ف الحمام وخذ الزفنة بتاعته ومشى"

قالتها وهى بتهجم على اوضة عالية تفتحها
ملقتش حد والنور مطفى
نرجس قعدت برود... ساكتة...مها بتسألها بعصبية
"لا راحوا البيت ولا هنا...هيكونوا راحوا فين"
نرجس برود"الله اعلم"
"يعنى عاجبك اللى بيعمله ده... يعمل فيا كده ويقفل التلفزيون...والله العظيم ما هعديها"
"ماهى متكلمتش لما قفل تلفونه ال ٥ ايام اللى فاتوا...وانتوا لسه كنتوا مع بعض من ساعتين"
"يعنى ايه...يعنى المفروض اسكت مثلا"
نرجس وهى قايمة
"انا قايمة اغير هدومى...وفهمتلك قبل كده مش من مصلحتك تعاندى مع طه"
وقفت مها متغاظة وهى شايفة نفسها لوحدها
وجربت تالى تتصل بطه

طه وعالية قاعدين بعد ما خلصوا عشا
طه بيطلب الحساب
"ياللا علشان نلحقهم قبل الفرح ما يخلص"
عالية بسعادة بتهاز راسها
عالية وطه خارجين من المطعم... ايدها ف ايده
بايده الثانية طلع التلفزيون...واول ما فتحه...رن
"الو... ايوه يامها... مع عالية... هنجيلكم...مشيتوا؟؟ هوصلها واجي البيت...بعدين
يامها...سلام"
حست عالية انه يتكلم معاها بجدية... مقدرتش تمنع الفرحة الداخلية اللى حست بيها انها معاها ومها
هى اللى بعيد ويكلمها بنفس الاسلوب اللى كلمها بيه ف التلفزيون قبل ما ترجع البيت
فجأة حست بغيره... هتعرف منين بعد ما يروح معاها هيتكلموا ازاي ... هيصالحها ويقولها انه
بيحبها هى وانه بيكون سعيد معاها هى مش عالية... معقول يكون طه كده فعلا

يقول نفس الكلام لكل واحدة فيهم من ورا الثانية

وصلوا لباب العربية

"عالية...مالك سرحانة كده"

عالية وقلبها موجوع من التفكير اللي فكرت فيه

"مفيش... تخيل ان النهاردة اول ليلة هباتها لوحدي من غيرك بعد جوازك"

سكت طه معرفش يرد عليها

حست انها بتتكلم بمنطق تاني غير اللي كانت بتتعامل بيه قبل كده

استغربت نفسها...ايه اللي اتغير وخلا احساسها يتغير كده

مشاعر طه ليها استفزت مشاعرها واطهرت الغيرة؟؟

مكنش فيه وقت تفكر...ركبت العربية بعد ما فتح لها الباب

وهي بتحاول ترجع لاحساس اللحظات اللي فاتت قبل مكالمة مها اللي حسستها بالشك ف مشاعر

طه ناحيتها

حاولت ترجع تفكر بعقلها تاني...مقدرتش...شكها كان اقوى من تفكيرها

وهما ف الطريق

"مالك يا عالية...ايه اللي حصل خلاكي اتغيرتي كده"

"مفيش"

"لا فيه... مش انتي اللي كانت بتضحك مبسوطه من شوية"

"علشان بس حسيت ان السعادة اللي انا فيها دي كلها لحظات...وهتوصلني وتروح لغيري"

طه ساكت...معندوش مبررات يقولها

وصلوا وهما ساكتين...وقف قدام البيت

نزل معاها... وصلها لحد السلم من جوه العمارة

"مش عايزة حاجة؟"

"شكرا"

حضنها سريعا وباسها من خدها

"هبقى اكلمك ويومين واجي اقعد معاكي"

"ماشى"

ابتسمت عالية بجزن وهى طالعة السلم وبتشاور له

طه يفتح الباب وداخل...وقبل ما يقفل

سمع مها بتصرخ فيه

"انت ازاي تعمل كده...بتخوننى ف اول اسبوع جواز"

قفل الباب بسرعة

"اخونك... انتى هتخرفى؟"

"روحوا فين.... لا هنا ولا فبيت مامتك... اخدتها فين؟؟... مش مالية عينك انا... فيها ايه احسن

منى

"بطلى كلام مالوش لازمة... اخدتها وخرجنا شوية"

"كذاب... الطريقة اللي اخدتها بيها تقول انها مش خروجة عادية"

"ولنفرض... هى مش مراتى زيك بالظبط؟"

وصرخت اكثر

"انت معندكش دم ولا احساس... انت بتغيظنى اكثر"

وبرق طه من اسلوبها

"ايه اسلوب الرداحين ده... فيه ست محترمة تكلم جوزها كده"

"رداحين... هوريك اسلوب الرداحين ياطه يجد لو روت لها تانى"

لحظات واقف طه مصدوم

"تمام... انا هروح لها فعلا... ووريني اسلوب الرداحين وانا اوريكى اسلوب الرجالة المحترمة"

مها بقلق وصوت واطى وهى بتلحقه ع الباب

"اخص عليك يا طه... عايز تنزل وتسيبنى"

طه بيبيدها عن طريقه "اوعى يامها"

"خلاص... انا اسفة كنت متنرفة بس... انا بغير عليك غصب عنى"

"معترضتش على غيرتك... انما تردى عليا وتشتمينى ده مقبلوش ابدأ"

"انا اسفة والله... خلاص يا طه... مكنتش اقصد"

"انا مضحككش عليكى وقتلتك هبقى جوزك لوحك... انتى عارفة وراضية بوجود عالية م الاول"

"بس انا لجبك واى واحدة عايزة جوزها ليها لوحدها"

"عالية قبلت بوجودك"

مها وهى بتزقق

"متقارنيش بيها"

"وطى صوتك"

"حاضر... بس متزعلش منى ومتسبنيش"

"اعملى حسابك بعد يومين هبتدى ابقى اسبوع هنا واسبوع هناك"

"لا... مش ممكن ابدا"

"هو ايه اللى مش ممكن"

"عايز تسيبنى من اول اسبوع"

"حق ربنا... العدل"

"والعدل ان انت تقعد معاها لوحدها بييجى ٦ سنين ومستخسر فىا حتى ٦ شهور"

"لما اتجوزتها مكنش فيه غيرها... يومين وهروح لها"

"يرضيك طيب اهلى ومعارفى لما ييجوا يباركولى ابقى لوحدى... عروسة من غير عريس... اسبوع

كمان يا طه... اسبوعين معايا مش خسارة فىا"

طه وهو داخل الاوضة

"هفكر"

عالية على سريرها قاعدة بتفكر

"معقول الحال يتغير وابقى مخنوقة كده وانا هنا... يعنى وجودى ف بيت هدير كان مخفف عنى... ع

الاقبل مكنتش لاحقة اقعد افكر كثير كده... ياترى بتعمل ايه يا طه... بتقولها نفس اللى كنت

بتقولها... بتحسسها انما الوحيدة اللى ف قلبك وانى عبء عليك... ايه يا عالية... انتى كنتى راضية

بحالك ايه اللى حصل... الشيطان مش سايبك وعمال يوسوس لك... استغفر الله العظيم"

قامت راحت الحمام... اتوضت ورجعت تصلى وتدعى ربنا

نرمين ف اوضتها... بتلبس

عالية قاعدة ف الاتريه... الباب يخبط تقوم تفتح

تلاقى طارق... تبعد علشان ميسلمش عليها

تيجى نرمين وهى لسه مش جاهزة للخروج

تسلم على طارق

"حبيى دقايق وهخلص"

والنفتت لعالية

"انتى مش جاية معنا سبوع مها وطه"

عالية بحزن "لا"

نرمين "خلى روحك رياضية ومتقلقيش مش علشان هى احلى واشيك منك معناها ان طه

هيسيبك...متخافيش انتى صعبانة عليه ومش هيرجعك الملجأ تانى"

قالتها وهى رايحة الاوضة...وفرحانة انها اخرجت عالية وغازتها

اتجمدت عالية مكانها...الدموع ملت عينيها من الجرح والاهانة...طارق شايفها واتضايق من اسلوب

نرمين المستفز

جت تقوم تدخل اوضتها... كلمها طارق بصوت واطى

"متزعليش...هى نرمين كده مبتفهمش ف الذوق"

كلامه وملاحظته اهانتها من نرمين وجعتها اكر وكأنا اتعرت قدام غريب

نزلت دموعها غصب عنها

"على فكرة انتى احسن من مها ١٠٠ مرة..وانتى اجمل منها كمان...هما سطحيين مبيصوش غير

على الجمال الخارجى بس"

ردت عليه وهى رايحة اوضتها "شكرا"

لما عدت من جنبه فاجئها ومسح دموعها

اول ما حست بايديه على خدها...انتفضت ورجعت لورا

"فى ايه..خلاص انا مش زعلانة...بعد اذنك"

جريت بسرعة على اوضتها وقفلت عليها

عالية ف اوضتها قاعدة تفكر ف طه

لقيت طه بيتصل بيها...ردت بلهفة

"حبييتى عاملة ايه"

"الحمد لله يا حبييتى...انت عامل ايه"

"بخير... مال صوتك"

"ابدا... مفيش.. ده انا حتى فرحانة انك جاى بكرة وبفكر هطبخ ايه اول يوم هترجع فيه"

سكت طه متردد

"عالية... عايز اقولك حاجة"

"قول... مالك...؟ انت كويس؟"

"اه كويس... بس او عديني متزعليش"

عالية بدأت الافكار تيجي ف دماغها وكلها اسوأ من بعض

"قول يا طه... في ايه؟"

"مش هينفع اجي زى ما اتفقنا... انتي عارفة يعني الناس بتيجي البيت ومينفعش اسببها لوحدها

تستقبل الناس"

عالية بحزن "صح... معاك حق"

"علشان خاطر متزعليش... اسبوع بس والله وهجيلك اقعد معاكى"

"مفيش حاجة ياطه... كل الحكاية بس انك بتوحشني اوى"

"انا راجع الشغل بكرة... هبقى استأذن ساعتين كده واجيلك ونقعد مع بعض شوية"

عالية بلامبالاة "ربنا يسهل"

"انتى مش فرحانة انى جاى لك"

"لا فرحانة... بس خايفة افرح واحط امل انك جاى ومتجيش"

(٢٥)

عالية بتروق البيت الصبح وكل شوية تبص ف الساعة
خلصت ودخلت تحضر الغدا
حست انما مالهاش نفس تطبخ حاجة وهتطبخ لمن؟
خرجت تاني من المطبخ بملل وبصت ف الساعة كانت ١٢
دخلت اوضتها والموبايل جنبها... بتفكر تتصل بظه ولا لأ
نص ساعة قعدتها مترددة... ف الاخر قالت لنفسها
"لا... الانتظار صعب كده... انا اتصل واعرف منه جاى ولا لأ بدل القلق اللي انا فيه ده"
مسكت الموبايل بتاعها... واتصلت وهى مترددة وبتدعى انما تفرح ومتتصدمش... اتصلت... رن
الجرس... رد طه
"الو.. ازيك ياطه"
"الحمد لله يا عالية... عاملة ايه"
"كويسة الحمد لله... رجعت الشغل مش كده؟"
"اه انا ف الشغل اهو"
"شكلك عندك شغل كثير"
"فعلا يا حبيبتى معلش معرفتش استأذن... انتى بتعملى ايه دلوقتى"
"مفيش حاجة فاعدة اهو هتفرج ع التلفزيون شوية"
"طيب يا حبيبتى... مش عايزة حاجة"
"شكرا... ابقى كلمنى ياطه"
"حاضر... مع السلامة"
"الله يسلمك"

قفلت معاه وهى حاسة بكسرة نفس

طه قفل معاه وهو بيضحك... وبيركن العربية تحت البيت
طلع ومعاه شنطة لاب على كتفه... وصل عند باب الشقة

فتح بشويش...وقفل الباب وراه من غير صوت
دخل يتسحب...البيت هادى وساكت
بص ع المطبخ...ملقاش حد
بص على ابواب الاوض... كل باب مقفول ففهم ان كل واحدة ف اوضتها...نرمين اكيد نايمة
وعالية زى ما قالت له بتتفرج ع التليفزيون... راح على باب الاوضة... وفتح الباب فجأة

عالية قاعدة...سمعت الباب بيتفتح عليها فجأة
اتخضت...شهمت... اول ما شافت طه بيضحك
نطت بسرعة من ع السرير على حضنه
"مش مصدقة... انت هنا بجد"
طه بيضحك وهو بيحضنها
"حلوة المفاجئة"
"اخص عليك ياطه..ليه مقلتليش انك جاى"
"علشان اخد الحضن الحلو ده"
حط شنطة اللاب على السرير وقعد وقعدا جنبه وهو حاطط ايده على كتفها
"انت كنت واحشنى اوى"
"وانتى اكثر... احكى لى عاملة ايه"
"لما بشوفك بنسى اى حاجة ممكن تضايقنى... حتى خوفي بنساه"
"خوفك...من ايه؟"
"انك تبطل تحبى"

"والله العظيم يا عالية لولا كلام الناس وان ميصحش اسببها بسرعة كده كنت جيت قعدت معاكى
من تانى يوم...انا مبحسش بالراحة الا جنبك"
"ربنا يريح قلبك...عارف يا طه...انا بقى مبحسش بأنى عايشة غير وانا جنبك...وانت بعيد عنى
بموت"

حضنها اوى... كلامها وصوتها الصادق وجع قلبه
"انا جبت لك هدية"
رجعت عالية لورا...وبصت له
"هدية ايه"

التفت على الشنطة اللي ع السرير
"لاب توب... هو اه مش جديد بس حالته كويسة اوى بتاع واحد زميلي"
"ليه تكلف نفسك بس... انا عارفة ظروفك كويس"
"حسيت انه لقطه... وعايز حاجة تسليكي مش عايزك تزهقي انا عارف ان نرمين قاعدة ليل ونهار
ع الكمبيوتر وماما ف المحل وانتي طول الوقت لوحدك"
"ربنا يخليك ليا"
قام طه وفتح الدولاب... وبدأ يغير هدومه

نرمين قائمة من النوم الساعة ٣
سامعة صوت ف المطبخ...عرفت ان عالية اكيد بتعمل الغدا
دخلت الحمام...وهي بتغسل سناها لاحظت ف المراية سبت الغسيل وفيه مع الهدوم...هدوم طه
...استغربت

"السبت ده كان كان فاضى اول امبارح... هدوم طه ايه اللي حطها هنا؟؟"

خرجت من الحمام...وراحت المطبخ وقفت على الباب وعالية مش شايفاها... شافت عالية واقفة
بتغنى بصوت واطى وهي بتطبخ

"دي ليلة حب حلوه بألف ليله وليله.. بكل العمر.. هو العمر إيه غير ليله زي الليله...زى

الليله...الليله"

"ده ايه الروقان ده كله"

انخفضت عالية وسكنت

"هتغدا ايه النهاردة"

"هعمل مكرونة وفراخ بانيه"

"مش عوايدك تبدأى الاكل متأخر"

ارتبكت عالية ودورت وشها

"ما هو لما بعمله بدرى بيبرد"

"وكل يوم بتسخنيه...مالك النهاردة مش طبيعية"

"مالي بس ما انا كويسة اهو"

"شكلك مبسوطه وبتضحكى وبتغنى... الحمد لله غيرتى البوز اللى ضرباه ف وشى طول النهار"
"انا بضرب بوز... الله يسامحك"
"انتى ليه عايشة ف دور الغلبانة كده على طول... ودايما مكشرة لا بتضحكى ولا بتهزرى... كتيبة
كده"

اتضايقت عالية من كلام نرمين... بس حسست انه الى حد ما صح
"ابدا... اصل كل فرحتى بتكون ف وجود طه... ووطه بمقاش معايا فطبعى ان تروح منى ضحكى
وميقاش ليا نفس اهزر"
خرجت عالية من المطبخ وسابت نرمين لوحدها

مها قاعدة بتتكلم ف التليفون
"ومسألتيهاش وش ليه"
"اتكسفت يامها"
"ما انتى بتقولى هدومه ف الغسيل... ايه اللى هيجيب هدومه عندكم وهو قاعد هنا... اكيد كان
موجود وانتى نايمة ومحسيتيش"
"متهيألى كده... اصلها عمالة تغنى ومبسوطه حتى بعد ما خرجت م المطبخ وشها متغير مش نفس
الكآبة والتكشيرة اللى كانت فيها الايام اللى فاتت"
سمعت مها صوت الباب بيتفتح
"هقفل معاكى دلوقتى... طه جه"
"اوعى تعملى مشكلة واتخط انا ف النص"
"طيب ماشى... مع السلامة"
دخل طه وهى لسه مقفلتتش... قعد
"سلامو عليكو"
قفلت ورد السلام
"وعليكو"
"كنتى بتكلمى مين"
"ليه؟"
"هو ايه اللى ليه؟ بسأل"

"نرمين... انا مبعملش حاجة واداريها"
"كل ده علشان سألتك بتكلمى مين؟ انا بسالك يعنى ماما ولا مامتك ولا نرمين ولا حد من
صحابك... مش محتاج اسمع دفاع"
قام دخل يغير هدومه... وقبل ما يدخل الاوضة
"حضرى الغدا"
"لسه مخلصش"
رجع لها تانى
"مخلصش ازاي... الساعة ٣ ونص"
"ما انا صحيت متأخر وبدأت متأخر ولسه مخلصش... وانت مقلتليش انك عايز تتغدا بدرى"
"هو كده بدرى؟... انا هدخل انام شوية ولما تخلصى صحين... بس ياريت لو تكرمتى يعنى بعد كده
ارجع الاقى الغدا خالص"
"شكلك بتتريق عليا"
"اه... انتى بتتلككى وانا مليش نفس اتخانق"
دخل الاوضة ورزح الباب وراه

طه ومها قاعدين بيتغدوا
طه بيمضغ الاكل ووشه مقلوب
"ايد ده يامها... الاكل طعمه ايه"
"ايه؟"
"طعمه غريب... زى... مش عارف... زى مايكون محروق"
"لا مش محروق... كان هيتحرق ولحفته"
سكت طه وهو بيكمل اكل بقرف
"انت روجت فين النهاردة"
"الشغل"
"بس؟"
"ليه؟"
"بسأل؟"

"لا روح بعد الشغل للميكانيكى"

"احلف؟"

"نعم؟"

"احلف انك روح للميكانيكى ومروحش للزفتة"

"انتى بتسألينى علشان كده؟؟ وبعدين لما تتكلمى عنها تقولى باسمها مش تشتميه"

"ضايقتك اوى الزفتة... طب زفتة وهباة ودى مش شتيمه ده صفة"

"ماشى... بعد كده لو جابت سيرتك هقولها متقوليش مها... قولى زفتة وهباة... المساواة ف الظلم"

"عدل"

"انت بتشتمنى"

"دى مش شتيمه دى صفة... وعلى فكرة اكلك يقرف"

"قام من ع الاكل... دخل الاوضة وهى عمالة ماشية وراه وتكلم وتزعق... حس انها بتتفرز اكثر"

بعد الرد... فقرر يستفزاها

بدأ يلبس

"انت فاكرنى بتهدد... كل شوية هتلبس وتروح لها"

"ملكيش دعوة"

"مفيش نزول يا طه"

ضحك وهو بيكمل لبس

"طيب خلاص متزعلش"

يلبس ومش بيرد عليها... بدأت تتحايل وتتودد له

"دى مش طريقة ابدأ انك تتقمص كل شوية وتهددنى بيها... احنا مش اتفقنا الاسبوع ده"

عندى... علشان خاطر متكسفتيش قدام الناس اللى هتيجى... خالى جاية بالليل تباركلى"

"ماشى هاجى قبل ما ييجوا"

"هتزل ليه طيب... خليك قاعد"

"هروح المحل شوية... اتخنقت م البيت"

عالية بتقوم من النوم... على صوت الموبايل

"الو.. ازيك انت يا حبيبي... اه كنت نائمة احنا الساعة كام... ٨ ياااااه ده انا نائمة من ٥... لا احنا
كويسين الحمد لله... لا مش سامعة صوت بره يمكن نرمين نائمة... انت ف المحل... حاضر وانت
خلى بالك من نفسك... مع السلامة يا حبيبي"
قفلت معاه وهى بتبلع ريقها بصعوبة... من العطش
قامت من السرير وهى بتلم شعرها بايدها وتعدل ديل الحصان اللى اتفك من النوم

من شدة عطشها مقدرتش تستنى تدخل الحمام الاول فراحت تشرب
وهى رايحة ع الانترية... اتفاجئت بطارق ونرمين بيعدوا عن بعض اول ما شافوها... هى اتخضت
من وجودهم لان مكش فيه صوت خالص... شهقت ورجعت بسرعة وهى بتغطى شعرها بايدها
دخلت اوضتها وهى بتفتكر اللحظة اللى شافتهم فيها على الكنبه مع بعض... تقلب وشها باشمزاز

تسمع صوت الباب... وتلاقى نرمين داخله عليها الاوضة
"بصى... اوعى تفهمى غلط"
"انتى هاجمتينى لما قتلتك وجوده هنا لو حدنا غلط ولما لقيت ماما ساكنة سكنت"
"مش اللى فداغك ده والله"
"انتوا مخطوبين يا نرمين يعنى حتى لو مسك ايديكى حرام... انتى كده بتسمحيله بحاجات كثير
وغلط"
"انا عارفة الصبح م الغلط وبحافظ على نفسى كويس"
"لا اللى بتعمليه ده غلط وحرام"
"ملكيش دعوة بيا... احنا بنحب بعض... ولا هو حلال ليكم وحرام على غيركم"
"قصدك ايه"
"طه لما يجيلك متسحب الصبح وانا نائمة وف الايام اللى المفروض يكون فيها عند مها... يبقى حلوا"
"انتى بتقارنى ازاي... طه جوزى"
"وطارق خطيبى... وفيه حدود مبنتهدهاش"
"بلاش كده يا نرمين"
"انتى هتدينى اوامر"
"انا خايفة عليكى"

"لا متخافيش"

"طيب بصى... اتجوزوا... او اكتبوا الكتاب ع الاقل"

"ان شاءالله... هتقولى لحد؟"

"لأ... بس ارجوكى بلاش تحطى مامتك واخوكى ف موقف وحش... بلاش"

خرجت نرمين وهى حاطة راسها ف الارض

طه قاعد ف المحل... حاطط ايده على خده

نرجس بتبص له

"طه"

ينتبه لها

"نعم؟"

"مالك؟"

"مفيش"

"لا انت بقالك فترة كده مش مبسوط... هو لسه برضه؟"

طه بتساؤل حقيقى

"لسه ايه؟"

"لسه مجبلتش... بقالكم ٣ شهور ومفيش حاجة"

"اه لسه... الحمدلله"

"يابنى مالك... ماتقولى فى ايه"

"ندمان... الندم بيقتلنى... اتسرعت بجوازي من مها"

"ليه؟"

"مش مرتاح معاها خالص... مبقتش طايق هيافتها ولساها الطويل وقلة عقلها"

"ايه اللى حصل"

"لو اتخانقنا الاقى اسلوب غبى ونفضل نتخانق ولما تلاقينى هلبس وانزل ثقلب وتبقى كويسة... طيب

ليه من الاول... ده غير عدم احساسها بالمسئولية ولا بتقدر ظروفى سواء ف فلوس ولا تعب ...

وعايزانى كل شوية اخرجها وانا مش فاضى انا برجع مهدود ويوم الجمعة ببقى عايز ارتاح فيه..دى

ابدأ... غير عالية اللى حاطاها فدماعها وكل شوية تتكلم عنها بطريقة تضايقنى... انا بقيت بكره

الايام اللي بكون فيها عندها واحسب هيخلصوا امي علشان اروح لعالية... انا اتسرعت وغلطت

ياماما ولازم الغلط يتصلح"

"يتصلح ازاي يعني؟"

"اطلقها... الحمد لله اني مخلفتش منها... كفاية اوى كده انا محببتش ولا هحسب غير عالية... منكرش

اني نفسي ف طفل... هموت وابقى اب بس ربنا مبيتعاندش... انا تعبت اوى ال ٣ شهور اللي فاتوا

وعايز ارتاح"

نرجس بفرع

"طلاق؟؟ طلاق ليه بس... اعوذ بالله متخليش الشيطان يخرب لك بيتك"

"بيت ايه؟؟ بيتي انا خربتة فعلا لما اتجوزت على عالية وطلعتها م البيت... ماما.. انا مش مرتاح وتعبان

مع مها جدا واللي غلط لازم يصلح غلطه"

"وهي عارفة الكلام ده؟؟؟ طلبته يعني؟"

"لا طبعا"

"وهتطلقها ازاي"

"هو مش انا الراجل واقدر اطلقها"

"اه... بس عارف انت هتدفع قد ايه لو طلقتها"

"ايه؟"

"لأنها مطلبتش يبقى كل حقوقها هتاخذها... مؤخر ومتعة وعفش... معاك تدفع؟"

سكت طه يفكر... لانه مفكرش ف الفلوس

"هاا... معاك تدفع... ولا زي كل مرة انا اللي المفروض ادفع كل حاجة"

"انا مطلبتش منك حاجة ياماما... انتي اللي اختارتني مها وانتي اللي اتفقتي معاها على كل حاجة..."

غلطتي اني سكت على كل ده... منكرش اني كنت مطنش علشان نفسي اخلف بس انا كنت

فاكرها هتبقى كويسة... والله لو كانت كويسة مكنتش فكرت اطلقها وقلت ده نصيب وحصل

وخلاص حتى لو طلعت زي عالية ومخلفتش... انما انا لا حبيتها ولا هي كويسة معايا ولا بتحترم

ظروف عالية ولا حبي ليها"

"يا طه انت بتتكلم ف ايه... انت عايز واحدة تحب ضررها"

"مقلتش تحبها... وحتى لو بتكرها متفضلش تتكلم عنها وحش قدامي احتراماً ليا على الاقل... ما

عالية اهي ياماما... سمعتها مرة بتشتم ف مها ولا بتتكلم عنها باسلوب وحش؟؟ واكيد مش

بتحبها"

سكتت نرجس... وسكت طه
"وبعدين... انا اتهريت مصاريف عليك يا طه وعلى جوازاتك"
"عارف وكفاية اوى كده... هحاول اتصرف"
"متزعش منى علشان الفلوس... وبعدين انا مش معاك ف حكاية الطلاق دى... اصبر شوية يمكن
تخلف"
"انا مش عايز استنى علشان مش عايز منها عيال... مش عايز حاجة تربطنى بيها اكر من كده"
"للدرجة دى؟؟"
"ايوه... انا بعاملها بالمقولة... ان احبها اكرمها وان لم يحبها لم يظلمها... مش هظلمها ولا اظلم
نفسى واظلم عالية وافضل معاها"
"والخلفة... ان مكنتش ارتحت مع مها نشوف واحدة تانية"
رد بحزم "ماما... لا تانية ولا تالته كفاية اللى انا فيه... هستفيد بايه لو خلقت عيل ومُت وملحقتش
اربيه"
"كفى الله الشر انت بتقول ايه"
"ماهو حرق الدم اللى انا فيها من مها ممكن اوى تموتنى"
"خلاص ياطه... انت حر واعمل اللى انت عايزه"
"ممكن نرمين متعرفش حاجة من اللى قلناها دى علشان لسانها طويل وهتروح تقول لمها"
"طيب ولو انى الحركة دى ممكن تقطع علاقتهم ببعض"
"خايفة على صحوبيتهم ومش مهم عيشتى معاها"
"لا خلاص... راحتك تهمنى"

هل يشفع الحب؟ ←

(٢٦)

عالية وطه بيتغدوا... ونرمين معاهم

نرمين... خلصت وقامت

طه وهو قائم "تسلم ايدك يا عالية... مبحسش بطعم الاكل غير من ايدك"

عالية "الف هنا وشفا... اعملك شاي دلوقتي ولا لما تقوم م النوم"

طه بصوت واطى

"متعمليش حاجة عايز اتكلم معاكي"

"حاضر هلم الغدا لحد ماتغسل ايدك واحصلك"

عالية داخله الاوضة... وطه قاعد على السرير

عالية بتقفل باب الاوضة وهى داخله

"خير ياطه... صوتك قلقتني"

قعدت جنبه... مسك ايدها وباسها

"سامحيني على كل اللي حصل الفترة اللي فاتت... كل حاجة هنتصلح قريب ان شاءالله"

طبطبت عليه

"اسامحك على ايه... انا مزعلتش منك علشان اسامحك... انا مقدره ظروفك... كفاية انك مفرطتش

فيا"

"افرط فيكى... يا عالية انتي مش عارفة قيمتك عندي ايه... انتي روحى وحياتي لما يبعد عنك مبحسش

بالحياة"

"ياحبيبي ربنا يخليك ليا"

"انا خلاص.. هصلح كل اللي حصل واطلق مها"

اتفاجئت عالية... فرحت لحظة وفكرت لحظات

"مالك يا عالية... مش ده رد الفعل المتوقع منك"

"تطلقها ليه؟"

"علشان مش مرتاح معاها"

"هى طلبت الطلاق؟"

"لا ومتعرفش حاجة"

"عايز تغدر بيها يا طه... حرام"

"انتى هتجنينى... انا عايز اطلقها علشان ابقى معاكى لوحدك... انتى مش عايزانى معاكى؟"

"ازاى... عايزاك طبعاً... بس انا لما فكرت انى ممكن كنت ابقى اللى مكأنا... حسيت انا غدر"

"ربنا حلل الطلاق"

"لما يكون فيه سبب"

"اخر حاجة كنت اتوقعها انك انتى اللى تدافعى عن مها... مها اللى انا متأكد انك مبتحبهاش وهى

كمان مبتحبكيش... واى موقف بيجمعكم بيتعمد تضايقك... يبقى ازاى كلامك ده"

"انا مبدافعش عن مها... انا مش عايزاك تظلمها... بس"

"خايفة انا تظلم... ومش خايفة انا احنا ال ٣ نبقى مظلومين"

سكنت عالية... فرحانة بكلام طه وف نفس الوقت بتحط نفسها مكان مها... تتضايق

"خلاص يا عالية انا فكرت وقررت واتكلمت مع ماما كمان"

"مامتك عرفت؟؟"

"ايوه"

"وقالت ايه"

"عادى... قالت استنى شوية ولما قتلها انى خلاص مش ظايقها سكنت... بس اللى قابلتني دلوقتي

مشكلة تانية"

"خير"

"طلاق مها هيكلفنى كثير وزى ما انتى عارفة مفيش فلوس وماما شالت ايدها"

"والعمل؟"

"بفكر ابيع العربية"

"ازاى... انت بتسافر بيها علشان تجيب بضاعة للمحل... وكمان بتنفعك ف مشاويرك... هتقدر

تستغنى عنها ازاى"

"مش عارف... ما انا كمان معنديش تصرف تانى"

"مش عارفة ياطه... ربنا يفرجها"

وفجأة خطرت على بال طه فكرة

"جت لي فكرة ثانية"

"ايه"

"ابيع الشقة... ونجيب شقة ثانية بس نطلع فرق... ادفع لمها مؤخرها ونرجع نبدأ العلاج من اول

وجديد وان شاءالله ربنا يكرمنا"

عيطت عالية من الفرحة... حضنت طه

"ياااه... انا بحبك اوى يا طه... ربنا يخليك ليا"

"ويخليكي ليا يا حبيبتي"

طه في المحل مع نرجس

يرن موبايله

"ايوه يامها... كويس... انتي كويسة؟؟ لما مش النهاردة... بكرة بالليل هاجي لك... اه عايزة ايه مش

سايب لك مصروف البيت... بلاش حجج يامها الاسبوع اللي عند عالية مخلصش ومش هاجي

البيت الا بكرة بالليل... ماشي روحى لمامتك لو عايزة تباتي عندها وترجعي بكرة براحتك... مع

السلامة"

قفل مع مها... نرجس كانت سامعاه

"ماهي كويسة اهي يا طه... ماتشيل الفكرة دي من دماغك"

"هتتغري بمكالمة تليفون... العيشة معاها صعبة اوى ولساها طويل... بتتصل بتتججج انها عايزة فلوس

وانا قبل ما اروح لعالية بسبب لها اللي يكفيها وزيادة"

"وتهعمل ايه ف الفلوس"

"كلمت سمسار يشوف مشتري للشقة وابقى اشوف شقة اقل شوية واحد الفرق"

"والعفش"

"على مهلي ابقى اجيب واحدة واحدة... ماهي برضه مش هتاخذ العفش كله... اللي هيتبقى هبقى

اكمله"

"وتهتبع الشقة ازاي وهي مش عارفة... اى مشتري هيبقى عايز يتفرج عليها"

"هقولها... لما اروح لها هقولها... كده كده ايامي عندها بتبقى عكننة فمفيش حاجة هتختلف لما

تعرف"

اول ما ابتسم بفرحة...انسحبت عالية بسرعة ودخلت اوضتها

مها بتبص عليها وهي داخلة اوضتها

"شايف...بدل ما تقولنا مبروك جريت ازاي...غلاوية اوى"

طه بيقول لمامته

"شايفة...شايفة الطريقة اللي بتتكلم بيها"

"مها"وانا قلت حاجة غلط...انت مش شايف"

نرجس"خلاص بقى... هي كمان معذورة...سيبيها"

نرمين"عايزين بقى بنت ولا ولد؟"

مها"نفسك ف ايه ياطه"

طه بأمل"اي حاجة...اللى يجيبه ربنا خير"

مها بتقرب منه وبتقف قصاده

"مش هتغير هدومك علشان نروح"

طه بيرجع لورا

"مش اتفقنا بكرة بالليل"

مها"افرض تعبت وانا لوحدى... يرضيك ابقى لوحدى وعلى فكرة الدكتور قال مش كويس عليا

حرق الدم وممكن يسقطنى...لو مش مصدقنى تعال معايا وسأله"

نرجس"ربنا يكملك على خير... اوعى تزعلنى نفسك ف اى حاجة ابدأ...وترتاحى يامها"

مها"حاضر"

بتبص لظه"ها...يالا بقى..ده انا من امبارح نفسى ف بيترا وشامة ريحتها"

نرجس"ده وحم... جيلها ياطه اللي بتتوحم عليه اوعى متجيلهاش"

مها"يالا بقى يا حبيبي...ابنك نفسه ف بيترا"

عالية ف اوضتها بتعيط بصوت واطى

طه داخل الاوضة... شافها بتعيط

هرب الكلام من على لسانه

"طيب قوليلى اعمل ايه؟؟ انا كنت خلاص هطلقها... مش عارف اقولك ايه...حقك تزعلنى زى ما

انا زعلت ان ابني مش منك انتي"

دمعت عيون طه وهو يبأخذها ف حضنه
"مش هعرف افرح وانتي زعلانة... انا مبقاش ف ايدي حاجة يا عالية... مش هقدر اطلقها بعد ما
الحلم قرب يتحقق... فكرة وجود طفل يبقى ابني... مجرد ما تخيلتها فرحت مابالك لما يبقى حقيقة"
بيتكلم وهو زعلان علشان عالية وفرحان بأمل الطفل
"انا مش زعلانة منك... انا كمان كان نفسى يبقى لى طفل منك بس هعمل ايه... غصب عنى
معرفتش احقق لك الحلم ده"
"ياحبيبتى انا عارف انه غصب عنك... وبقي غصب عنى انما هتفضل معايا"
"وانا مطلبتش منك تطلقها"
"عارف... متعيطيش يا عالية علشان خاطرى"
مسحت دموعها
"حاضر"
قام وقف وهو مرتبك
"انا... اصل الدكتور قالها... هى جت علشان تقولى ان مش هتقدر تقعد لوحدها لتتعب"
هزت راسها
"طبعا... انا مجربة وعارفة... روح معاها يا طه"
قعد جنبها تانى
"انا ميرتاحش غير معاكى"
"هنعمل ايه بقى ف نصيينا... قوم وامتشيلش همى... مبروك ياطه"

عالية قاعدة عند هدير... وماسكة ابن هدير
هدير بتقدم لها طبق كيك
عالية "كل سنة وهو طيب... عقبال ١٠٠ سنة"
هدير "وانتى طيبة يا عالية... احكى لى المنيلة ولدت ولا لسه"
عالية "لسه... بس قربت"
هدير "الهى تفتس وهى بتخلفهم"
عالية "يا شيخه حرام عليكى... ربنا يقومها لولادها بالسلامة"

"ايه دى البت دى راجل زى الفل واول ما اتجوزت حملت ف توأم... صحيح الحظ لما يأتى يخلى

الاعمى ساعاتى"

عالية بتضحك "ضحكتينى يا هدير والله ومن زمان مضحكتش كده"

"يا ختى اضحكى اضحكى... قوليلى وطه عامل ايه معاكى"

"كويس الحمد لله"

"مرجعش لنظامه القديم تانى"

"هه... رجع ايه بس... ده لو جالى وناوى يبات يوم التليفونات تشتغل واشى تعبانه اشى ودينى

للدكتور اشى معرفش ايه"

"ومبتروحش عند امها ليه وتريننا"

"متحججة بجوز امها وانها مش هترتاح الا ف بيتها"

"وطه يعنى مش شايف"

"شايف بس هيعمل ايه... بيكلمنى كل يوم وكل شوية بس طبعا مش قدامها... علشان متعملش

مشاكل"

"وطبعا بعد ما تخلف الوضع مش هيتغير كثير هنتحجج بالعيال"

"اكيد"

"مش عارفة اقولك ايه"

"قوليلى ربنا يصبرنى.. وخصوصا الزفت طارق ده مش عارفة اعمل معاه ايه"

"عمل ايه تانى... مش فضل ميحيش شوية بعد ما شفيتهم"

"شوية ورجع ييجى تانى ف غيابهم ونرمين مقواه طبعا... بعد ما كان مزودها اوى فحركاته ونظراته

.. دلوقتي بقى كلامه كمان ومعرفش جاب رقمى ازاي واتصل بيا بيقولى عايز اقابلك بره من غير

ماحد يعرف"

"وعملت ايه"

"قفلت ف وشه طبعا وبعدها قفلت التليفون ساعة كده وبعدين فتحتة"

"هو انتى ليكى ف كل خرابة عفريت"

"شفتى!!"

"بت يا عالية... طارق ده مش كان معاهم ف الكلية"

"اه"

"يعنى صاحب ربا وسكينة اوى... ليكونوا مسلطينه عليكى علشان يوقعوا بينك وبين طه ولا بعد

الشر يخلوه يطلقك"

عالية باستغراب

"معقول؟؟؟"

"ليه لأ... نر مين علشان تبعدك عنها وتبقى براحتها والتانية طبعا علشان طه"

"يعنى اعمل ايه؟؟ واتصرف ازاي؟؟ خوفتيني"

"جوزك لازم يعرف"

"يعرف ايه... ا قوله انه بيعجى وانى شفتهم"

"لازم يعرف كل حاجة وان الزفت ده بيعاكسك"

"اخاف... انتى متخيلة ممكن يحصل ايه"

"يحصل اللي يحصل... تضمنى منين انما مش خطة عليكى"

"وهيعملوا عليا خطة ليه... انا مبعملش حاجة لحد"

"بس وجودك مضايقتهم... كلهم عارفين طه بيعحك قد ايه... وانتي عارفة غيرة الضراير"

"بس انا مهما غيرت مش ممكن اضرها"

"مش قصدى عليكى... انتى حتى مبتبينيش غيرتك... هى غيرك يا عالية... خلى بالك"

سكتت عالية تفكر فى كلام هدير

"انا هستنى شوية... لو حصل جديد هبقى اقول لظه لما اشوفه"

(٢٧)

مها قاعدة على السرير... بتكلم طه ف التليفون

"الو...انت جاي امتي ياطه"

"انا لسه ف المحل"

"انا تعبانة اوى"

"حاسة بياه"

"ضهرى بيوجعنى"

"اتصلتى بالدكتور"

"لما تيجى انت كلمه"

"ماتكلميه لحد ما اجى"

"افرض قالى تعالى ولا طلعت بولد اعمل ايه...مش لازم تقعد ف المحل للاخر...انا تعبانة وانت

سايينى لوحدى...مش خايف يحصلنى حاجة وانا لوحدى"

"خلاص يامها...شوية وجاى"

"متأخرش...جعانة ومش قادرة اقوم اعمل حاجة آكلها"

"طيب متتعبيش نفسك...اجيالك حاجة وانا جاي"

"هفكر واكلمك تانى"

"ماشى...مع السلامة"

"مع السلامة"

قفلت مها معاه...ومسكت بطنها المنفوخة وهى بتكلم ولادها

"تعبتوني حرام عليكم"

فاتن جاية من المطبخ بصينية حاجة ساقعة

ايمن وميار قاعدين...ومامته وباباه وعبد الحميد

فاتن بتقدم لهم

"منورين يا جماعة والله... ومنور مصر كلها يا ايمن"

ايمن "ربنا يخليكى يا طنط"
ام ايمن "ده من يوم ماجه والفرحة مش سيعانى... ولا لما قال انه مش هيحدد تانى... طرت م
الفرحة... والبركة فيكم لولا انه جاى علشان يتحوز كان زمانه بيحدد تانى"
فاتن "تغور الغربية... هو فيه زى بلدنا"
ام ايمن "اه والله معاكى حق"
ابو ايمن "عايزين نفرح بالعيال يا حاج"
عبد الحميد "ربنا يفرحنا بيهم.. انا عن نفسى وقت ما تقولوا يالا.. احنا جاهزين... مش كده يافاتن؟"
فاتن "اه... ان شاءالله وقت ما تجهزوا هنكمل اللي ناقص"
ابو ايمن "احنا السنة اللي فاتت خلصنا الشقة وبقث جاهزة... بنقول نكتب الكتاب ونحجز للفرح ف
اقرب وقت"
بصت فاتن لميار اللي شافت نظرات الفرحة ف عينيها
فاتن "ايه رأيك يا عبده"
عبد الحميد "اللى تشوفيه... انا عايز افرح بيها النهاردة قبل بكرة"
فاتن "الف مبروك يا ولاد... شوف يا ايمن هتكتب الكتاب امتى وفيين والفرح مش قبل شهر علشان
نلحق نكمل حاجتنا ونفرش"
رد ايمن بسرعة "شهر ايه... كثير"
ضحكوا كلهم بفرحة
ردت عليه فاتن "شوف بس حجز القاعات وربنا يسهل ان شاءالله"

طه ف الشغل الصبح... واقف بره المكتب.. بيتكلم ف التليفون
"صباح الخير يا حبيبتي... لسه نايمة"
"صباح النور... لا صحيت من شوية"
"وعاملة ايه؟"
"الحمد لله كويسة"
"رجعتى امتى امبارح"
"على ١٠ كده"
"١٠ يا عالية... ليه اتأخرتى كده... انتى مش عارفة ان بقلق عليكى"

"معلش ياطه كنت قاعدة مع هدير والوقت اخدنا...متقلقش عليا...طمنى بس عليك انت عامل ايه"

"انا...كويس"

"لا صوتك مش كويس؟"

"مفيش حاجة...كويس والايام شبه بعضها"

"فى ايه بجد؟"

" مفيش متشغليش بالك انتى بس... قوللى هتتخدوا ايه النهاردة"

"محشى...وعاملة تشكيلة"

"ماتعزميني علشان اكلك وحشنى"

"ياريت يا طه...تعالى اتغدا معانا"

"كلى انتى مكانى بقى"

"لا تعالى انت كل بنفسك"

"مش هينفع يا عالية معلش..والله نفسى اجى بس لو جيت هدخل ف متاهات دكتور وعيا وعلاج"

واقعد جنبى علشان تعبانة وانا ما بصدق انزل اصلا... دى كانت امنية وراحت لحالها...المهم انتى

مش عايزة حاجة...ثوانى يا عالية معايا ويتنج"

"طيب ابقى كلمنى"

"حاضر...سلام"

قفل معاها ورد على المكالمة

"الو ازيك يافاتن...فينك من زمان"

"ازيك يا طه عامل ايه"

"الحمدلله...انتى عاملة ايه"

"الحمدلله...بقولك ايه كتب كتاب ميار الجمعة الجاية والفرح كمان اسبوعين ان شاءالله"

"الف مبروك يا فاتن ربنا يتمم لها بخير...هتكبرك بسرعة"

"خليها تكبرنى بس افرح بيها...هستناكم يا طه...وهبعت كارت لابلة نرجس واكلم عالية"

"لا بلاش"

"بلاش ايه"

"متبعتيش حاجة لحد...انتى نسيتى عملوا ايه يوم الخطوبة"

"ما انا هعمل ايه...علشانك والله"

"متقوليش انتى حاجة لحد وهاجى لك انا وعالية ان شاءالله"

" ان شاء الله...تنوروا وهستناكم "

عالية لابسة وخارجه من اوضتها

نرجس قاعدة"انتى نازلة؟"

"اه ياماما...رايحه لهدير"

"طه عارف؟"

"اه"

"طيب مع السلامة"

نزلت عالية...وهى ع السلم قابلت طارق طالع

"عالية!!"

ارتبكت... وخافت... تماسكت

"سلامو عليكو... مستنينك فوق"

نزلت بسرعة من جنبه... نزل وراها بسرعة شدها من ايدها

وزقها ف الحيط ووقف قصادها وهو ساند ايديه الاتين ع الحيط وهى ف النص ومقرب منها اوى

"انتى بتتهرى منى ليه"

من الخوف بدأت ترتعش وتعيط

"انت عايز منى ايه...انا عملت لك حاجة "

"وانتى خايفة كده ليه"

سابها ورجع لورا اشفاقا على خوفها

كانت بتعيط

"متخافيش انا مش هعملك حاجة...بس رد فعلك غريب اوى"

"حرام عليك... انا عمر ما حد مسكنى كده الا جوزى...سيبنى ف حالى الله يخليك انا كل اللى

بترجاه م الدنيا الستر"

"انتى غريبة اوى...جوزك سايبك وعائش حياته مع واحدة تانية وانتى مجرد ما قربت منك من غير ما

المسك عملتى كده"

ردت وهى نازلة تجرى

"مش انا اللى غريبة...اللى بيستحل الحرام هو اللى غريب"

نزلت تجرى وسابته واقف مكانه

طه قاعد ف العربية... في شارع جانبي قريب من البيت
شاف عالية جاية من بعيد... فرح لما شافها... نزل من العربية
لما قربت وشافها معيطة
"مالك؟؟"

"مفيش حاجة يالا بس نمشى من هنا"

ركبت وركب طه ومشى بالعربية

"ايه يا عالية مالك؟"

"مفيش ياطه... افكرت حاجات ضايقتني"

"هو انا مش عارفك... حاجات ايه اللي هتعيظك كده... حد زعلك؟؟ ماما ولا نرمين حد ضايقتك"

"مفيش حاجة من دى والله"

"ماتقولى فى ايه"

عالية وهى بتحاول تهدا

"هقولك بعد كتب الكتاب... ممكن"

"وليه مش دلوقتي"

"علشان نعرف نروح نبارك للناس واحنا كويسين"

"ليه انتي هتقولى ايه"

"بعد كتب الكتاب"

طه وعالية قاعدين جنب بعض... وبعد كتب الكتاب ما خالص

قاموا سلموا على العروسين... وبعدين باركوا لفاتن

فاتن لاحظت تغيير على عالية... خدتها على جنب

"نواين ياطه عايزة عالية اسألها على حاجة لميار"

طه "طيب خدوا راحتكم... هستناكى يا عالية ف العربية"

مشى طه وسألها فاتن

"شكلك مش طبيعي كده ليه...هما عملوا لك حاجة؟"
"لا يا ابلة مفيش حاجة"
"هو انا مش عارفاهم"
"مش هما"
"اومال مين"
"مش وقته شوفي ضيوفك وهبقى اكلمك"
"ضيوفى بيتصورونا مع العروسة والعريس...انتى فيكى ايه"
"خطيب نرمين...مش سايبنى ف حالى"
"نعم...وده عايز منك ايه"
"معرفش بس وانا نازلة قابلته طالع واتهمج عليا ع السلم من ساعتها وجسمى كله بيتنفض"
"وايه اللى مسكتك"
"خايقة...وف نفس الوقت هدير قائلتى ليكون متسلط عليا علشان يخلوا طه يطلقنى"
"احتمال والله"
"يعنى اقول لظه"
"اه طبعا قوليله...ابعدى نفسك عن اللبخ بتاعهم خالص"
"حاضر يا ابلة...معلش دوشتك ارجعى لضيوفك...الف مبروك"
"الله يبارك فيكى...هكلمك بكرة اظمن عليكى"

عالية وطه ف العربية
"هاا قوليلى بقى مالك؟"
"هقولك بس اوعدنى ياطه انك متسرعش ف اى تصرف"
"ليه؟؟ فى ايه؟"
"احلف انك هتتصرف بعقل"
"اخلىصى يا عالية...فى ايه"
"الحكاية بقالها سنة تقريبا...لما روجت فعدت عند مامتك... لقيت ان طارق متعود يروح عادى
ومامتك مش ف البيت"
"لنرمين لوحدها"

"مش لوحدها خالص... يعني قبل ما اروح كانت بتبقى مها ف البيت ولما روجت بقيت اكون

موجودة"

واتنرفز طه

"وكل ده ساكتة ليه"

"مامتك قالت لي ملكيش دعوة وهو بيعجى وانتي ف البيت وكأنك انا وخلص... المهم بعد كده

شفتهم مرة..."

طه بيرق "شفتي ايه"

"لا مش زي ما فهمت... بس يعني وضع كده معجبنيش... ميليقش. مخطوبين... واتكلمت مع

نرمين وبتلوا شوية بعدها"

"شوية... هما رجعوا تاني؟"

"الزيارات بقي تتكرر بس انا مكنتش بسببهم لوحدهم او لو سبتهم مش بتأخر كده يعني... بس

طارق بقاله فترة كبيرة بيضايقني"

"بيضايقك ازاي"

"نظراته... حركاته... من كام يوم كلمني ع التليفون والنهاردة وانا نازلة قابلته ع السلم اتجم

عليا... بس والله ما لحق حتى يلمسني انا سبته ونزلت"

وطلع طه بالعربية بسرعة جنونية

نرمين وطارق قاعدين... ونرجس معاهم

اتفتح الباب بالمفتاح.. دخل طه وعالية معاه

شافهم طارق قام وقف وعينيه مركزة على طه

طه راح ناحيته باندفاع... وضربه ف وشه

صرخت نرمين واتفاجئت نرجس وهي بتزقق لطفه

"في ايه"

طارق بيهجم على طه يضربه... طه كانت عصبته اكبر ومحدث قادر يسيطر على عصبته

نرمين "قلتي لي ايه قلبتيه كده"

طه "اطلع بره والبيت ده متعبوش تاني"

نرجس وهي بتقف بينهم

(٢٨)

عالية وطه ف العربية.... بيسوق بنفس العصبية
"انت قتلتي مش هتتصرف بعصبية...ليه عملت كده"
"كنتي عايزاني ادخل اخده بالحضن...عالية مش عايز كلام تاني ف الموضوع ده بيفور دمي"
"دلوقتي مامتك ونرمين يقولوا عليا ايه... اتسرعت ياطه كنت تجوزهم مش تفسخ خطوطهم"
"اجوزهم...واحد مصاناش البيت اللي دخله هيصون احتى؟"
سكت شوية...وبص لها بقلق
"انتي تعرفي حاجة مقلتيهاش"
"والله ابدا...حاجة ايه؟"
"علاقتهم وصلت لفين"
قالها طه ووشه احمر من الغيظ
"اطمن هي اكدت لي ان محصلش بينهم حاجة تخوف...مفيش غير اللي قتلتك عليه بس"
سكتوا الاتنين...وبصت عالية ف الطريق
"انا هروح فين دلوقتي"
"البيت طبعا"
"بيت مين؟"
"بيتنا"
"وبكل حزم" لا ياطه"
بص لها باستغراب
"لا ايه؟؟"
"مش هروح عند مها...مش هينقع ولا هقدر"
"او مال هتروحي فين...هنروح فين يعني"
"مش عارفة...بس مش هقدر ابقى ضيفة عندها...وضيفة ثقيلة كمان"
"طيب خلاص حاضر"
"هنروح فين"

"توانى"

واتصل بمها

"الو...ايوه يامها...انا هتأخر النهاردة...هتأخر اوى...بعدين...روحي عند مامتك او هاتيها

عندك...خلاص بقى مش وقته"

وقفل ف وشها وبعدين قفل التليفون

"دى لسه هترغى...انا ناقص"

عالية ف العربية... طه بيفتح المحل... دخل اخد فلوس من الدرج... وقفل المحل تانى وركب جنبها

"هنعمل ايه"

"هنشوف اوضة ف اى فندق لحد بكرة ربنا يحلها"

"اخاف اقعد ف فندق لوحدى يا طه"

"متخافيش انا معاكى"

"ومها"

"مش هتاكلها القطة لو باتت ليلة لوحدها...سيبك منها... كفاية علينا اللي حصل النهاردة"

نرمين بتعيط ونرجس بتجيب لها عصير

"الحرابية خربت لى حياتى... اوعى تدخليها هنا تانى... وطه ازاي يطرد طارق... اسمعى انا بحبه

ومش هتجوز غيره"

"لما افهم الاول ايه اللي حصل"

"بتسألينى انا ما تسألينى هي"

"انا اتصلت بأخوكى تليفونه مقفول"

"طيب والله لا طربقها على دماغهم الاتنين"

ومسكت الموبايل ونرجس بتسألها بتعمل ايه مبتردش عليها

"ايوه يامها... جوزك اخد الهانم بتاعته ونزلوا...وقافل تليفونه"

صوت مها بتزقق

"نعم...يعنى لما كلمنى كان معاها...يومه اسود بس لما اشوفه... يخربيتك ياطه يا حارق دى... كان

يوم اسود لما اتجوزتك"

وكملت نرمين وهى بتصرخ

"معرفش قالت له ايه خلته جه ضرب طارق وطرده"

"ودينى لاربيها السوسة دى... ضربت اسفين ف الكل علشان يبقى لها لوحدها..طيب هنشوف انا

ولا هى"

"شوفى انا ف ايه وانتي ف ايه"

"انتي ف ايه... طارق ده يدوب خطيبك انما طه ده جوزى وابو ولادى وانا احق بيه منها"

"انتي مش همك الا نفسك... كل واحد مش هامه الا نفسه... انا كمان مش هيهمنى حد منكم

وهتجوز اللى بحبه غصب عن عين اى حد"

قفلت نرمين مع مها... ونرجس بتبص لها

"غصب عن مين يا بت"

"سى طه.. ولا هو كلمته خلاص انزلت"

"لما افهم ايه اللى حصل وليه عمل كده... واصلا يعنى انتى مخطوبة بقالك سنة ونص... عمل ايه سى

طارق بتاعك ده... اللى ماجاب شبكة ولا شفناله شقة"

"ظروفه كده وانا راضية بيها اتوا زعلانين ليه"

طه وعالية داخلين الاوضة... عالية بتحط شنطة هدومها على السرير

"طه... انت هتنام ازاي"

"بهدومى وخلاص"

"مش عندك شغل الصبح"

"هبقى اروح اغير قبل الشغل"

"وهتسيبنى لوحدى؟"

"هعمل ايه يا عالية... انا لازم اروح الشغل واروح المحل واشوف مها كمان متنسش انها على وش

ولادة"

"طيب وانا؟"

"مش عارف... لما يطلع النهار يبقى ربنا يحلها من عنده... الفندق هنا غالى ومش هقدر اقعدك فيه
كثير"

سكنت عالية وهى مش لاقية اى اقتراح لمكان تروح فيه

مها سمعت صوت الباب قامت مندفة... مقدرتش وغصب عنها قامت ببطء... كان طه وصل

الايضة وقف قدام الدولاب بيطلع هدوم

"انت كنت معاها فين"

طه ساكت

"تسيبنى هنا طول الليل وقافل تليفونك ورايح تقضى معاها وقت لطيف وتروقوا مزاجكوا وانا هنا

يتحرق دمي"

طه خلص تغيير هدومه وراح ع الباب

"استنى هنا فهمنى"

"افهمك ايه... ابوه كنت معاها... بس علشان اتطردت من البيت هناك مش علشان نقضى وقت مع

بعض... كنت معاها علشان رفضت تيجى هنا"

"تيجى فين... انت كنت عايز تجيهاالى هنا"

"شكلك نسييتى انه كان بيتها"

"كاااااااا... فعل ماضى... دلوقتي بقى بيتي وبيت ولادى"

"وعايزة ايه دلوقتي؟"

"متسيينيش تانى... افرض كنت هولدا كنت تسيينى اموت انا وولادك"

"الحمدلله انتى كويسة اهو"

"رايح فين"

"عندى شغل يامها... هتأخر"

"وهى فين"

"ف فندق... انا هتأخر سلام"

"متقفلش تليفونك تانى... انا كنت خايفة اتعب وانا لوحدى"

عالية قاعدة فى الاوضة...خايفة تخرج

كل ماتسمع صوت خطوات تجرى تقف ورا الباب وتسمع لحد ما صوت الخطوات يبعد

رن تليفونها...اتخضت...جريت ترد وهى متوقعة طه

"الو... ازيك يا ابلة... اه حكيت له... هحكيلك"

طه ف العربية وجنبه عالية...واقفين تحت بيت فاتن

"انا هترل بقى"

"عالية...بجد فاتن هى اللى مسكت فيكى"

"اه والله... هى قالتلى ان الوقت ضيق وهى وميار لوحدهم ف الفرش وعازيانى معاهم"

"انتى متضايقه؟... لو مش عايزة تقعدى عندها متعمليش حاجة غصب عنك وقوليلى وانا هتصرف

ف مكان"

"انت عارف انا بحب ابلة فاتن وميار قد ايه...متقلقش عليا انا مش متضايقه"

"معلش ان شاءالله كل حاجة هتتحل قريب"

"ان شاءالله...متشيلش انت بس فوق طاقتك...متخلنيش اقلق عليك"

طبطب عليها"متقلقيش انا كويس.. هكلمك ولو فيه اى حاجة ابقى كلمينى"

"حاضر"

نزلت عالية من العربية... واخذت شنطتها من الكنبه اللى ورا ودخلت العمارة... وطه واقف لحد ما

اخذت ف السلم

نرمين قاعدة بتعيط قدام الكمبيوتر وماسكة تليفونها

بتبع رسالة لطارق ع الفيس

"رد عليا...مرة واحدة بس متسيينيش كده"

واتصلت تانى...رد عليها

"عايزة ايه؟"

"انت هتاخذنى بذنب طه ليه...انا عملتلك ايه"

"خلاص يانرمين... انتهيينا من الموضوع ده بقى"

"انتهينا يعنى ايه... والسنين دى كلها كانت ايه"
"مش اول ولا اخر اتنين قعدوا يجبوا بعض وف الاخر متجوزوش"
"اهون عليك تسييني ياتارق وانا بجبك"
"بكرة تلاقى الاحسن منى... انا مش مستعد لجواز خالص"
"انت ماصدقت بقى علشان تبقى براحتك مع الزبالة اللي تعرفهم"
"مبقاش يخصك... مع السلامة... لا قبل ما اقول... متتصليش بيا تانى علشان مهما عملتى انتى خلاص"
متنفعينيش

وقفل التليفون ف وشها... اتصلت بيه تانى مردش عليها
جت تبعته رسالة تانى... لقيته عملها بلوك
صرخت وعيطت وهى بتقول
"ف ٦٠ داهية"

وقعدت تعيط بحرقة وهى لوحدها

طه داخل المحل... نرجس واقفة مع زباين
قعد لحد ما مشيوا.. راحت قعدت قصاده
"قافل تليفونك ليه"
"فتحته الصبح"

"ايه اللي حصل امبارح خلاك تعمل كده... بتطرد خطيب اختك م البيت"

"انتى زعلانة انى طردته وفسخت الخطوبة"

"ان جيت للحق هو م الاول مش على مزاجى... بس الدخلة اللي دخلتها امبارح مش طبيعية"

"انا هحكملك كل اللي حصل واحكمى بالحق"

مها قاعدة بتتكلم ف التليفون

"قاعدة ياماما اهو... محروق دمي من امبارح... دى ايامها سودة ان شاءالله بس اقوم بالسلامة
وافوق لها... ولا نرمين دى كمان اللي هتشكيلي وتعيط لى على خطيبها وانا كنت هموت من الغيظ
...لا مش هكلمها انا مش قادرة وفيها اللي مكفيني"

وفجأة مسكت بطنها

"ماما... جالى مغص جامد"

اتنهدت بالراحة

"لا خلاص راح... ما تيجى شوية"

نرجس وطه قاعدين بعد ما حكى لها

"وانت ايش ضمنك ان كلامها صح"

"وهى هتكذب ليه"

"معرفش... يمكن غيرانة من اختك"

"والغيرة دى هتظهر فجأة... انتى مش عارفة عالية... الاولى اها تغير من مها مش من نرمين ومع ذلك

مبتجيش سيرتها خالص"

نرجس ساكتة

"ماما... عالية مالهاش حد غيرنا... هنسيها متلظمة كده"

"مش وديتها لفاتن... خلى فاتن تملها من ناحيتنا"

"عالية بتحبكم وحتى لو فاتن اتكلمت هى مش هتسمع لها"

"عايز ايه يعنى"

"عايز اصالحكم على بعض وترجع البيت"

"لما الامور تمدا مش دلوقتي... اختك دلوقتي شايطة"

رن موبايل طه... رد... سمع مها بتصرخ وبتقوله

"ألحقنى يا طه... انا تعبانة اوى"

مها على السرير... وطه قاعد جنبها

"حمدالله ع السلامة"

"هما فين؟؟ كويسين"

"اه الحمدلله"

"ولدين؟؟"

"لا ولد وبنت الحمدلله"

"ميروك يا حبيبي"

"الله يبارك فيكى ... وميروك عليكى انتى كمان"

"شفت ولدت ازاي بسبب حرقة الدم بتاعة امبارح... متزعلنيش تاني علشان خاطر ولادك"

"حاضر"

"هما فين عايزة اشوفهم"

قام طه اخذ واحد من نرجس وخلاها مسكته

وراح جاب البنت من مامه مها

"هااا... نسميهم ايه"

عالية واقفة ف المطبخ ف شقة منار... بترتب دولاب المطبخ

دخلت لها فاتن

"خلصتى يا عالية"

"قربت اهو"

"هكمل معاكى... احنا كده خلصنا الحمد لله نبقى نيجى نفرش السجاد ليلة الفرح"

"ربنا يتمم لها بخير ويسعدها يارب"

"احنا تعبناكى معانا اوى يا عالية"

"بالعكس والله... ده مفيش حاجة بتهون عليا غير وجودى معاكم... انا اللي تقلت عليكم... بقالى

١٠ ايام قاعدة عندكم وطه ولا قالى هيوديني فين"

"احص عليكى... انتى منوراني"

"ربنا يخليكى يا ابلة... انا عارفة انه اتلبخ بولاده ربنا يخليهومله يارب"

"عقبالك... انتى وقفى العلاج؟"

"ايوه"

"ماترجعى للعلاج تاني"

"مينفعش يا ابلة"

"مينفعش ليه"

"اى واحدة بتتعالج علشان الخلفة... لازم يكون جوزها معاها... انما انا طه مش معايا ومن زمان"

"وليه ساكنة... ده جوزك وليكى حقوق عنده"

"فيه حاجات مينفعش تتطلب... ان مكنتش بتيجى تلقائية مش هيبقى لها قيمة... وانا بحب طه
ومقدرة ظروفه..مش زعلانة منه"

نرجس مع نرمين ف البيت...داخلة لها اوضتها

"مش هتقومى تيجى معايا سبوع ولاد اخوكى"

"لا"

"ليه"

"مش عايزة اشوف مها ولا طه ولا ليا نفس افرح"

"بقولك ايه...انتى مش اول واحدة تفسخ خطوبتها...او مال لو كان عدل"

"كنت بحبه...هو ليه محدش حاسس بيا"

"لو بيحبك مكنتش بص لغيرك حتى مرات اخوكى...ده واطى"

"انا غلطانة انى حكيت لك"

"ياريتك حكيتى م الاول...جاية تقوليلى دلوقتى انه بتاع نسوان ولسه ماسكة فيه... انتى ايه"

يابت...انتى كنتى عارفة وساكتة"

"كلها حاجات عابرة بس كان بيحبني انا"

"اه ما هو باين"

"انتى بتقطمينى كده ليه...مش فسختوا الخطوبة...بلاش ازعل"

"زعلتى خلاص...اعملى حسابك عالية هترجع البيت"

"مش هيحصل ياماما"

(٢٩)

عالية قاعدة ف القاعة... ف فرح ميار وايمن... مع هدير وولادها
كل الموجودين فرحانين بالعروسين وهما بيرقصوا بحب وفرحة
عالية قاعدة وعينها ع الباب كل لحظة
والموبايل ف ايديها كل شوية تبص فيه
لحد ما بدأت تفقد الامل لما الساعة عدت ١١ ونص
فاتن رغم كل الموجودين الا انها كل شوية تقعد مع عالية وتقوم وترجع تقعد معاها وهكذا

عالية قاعدة مبتسمة وقلبا حزين
خايفة بيان عليها الحزن ف الفرحة
هدير "انا هقوم يا عالية يدوب ألحق ارواح بالعيال"
عالية "طيب يا حبيبتي خلى بالك منهم"
هدير "هستناكى يا عالية تيجى بكرة او بعده... تعالى اقعدى معايا"
عالية "ما انا عند ابلة فاتن اهو"
هدير "ابلة فاتن مش اقرب لك منى... انتى اختى وبيتى هو بيتك.. وانتى خلاص وقفتى معاها ف جواز
ميار... كفاية"
عالية بترد بكسرة نفس
"هشوف يا هدير واقولك... لازم استأذن طه"
همت هدير انها تتكلم بعصبية... رجعت مسكت نفسها
"مظنش هيقولك لآ لانه مش مهتم... ماعلينا انا قايمه هسلم عليهم وامشى"
قامت هدير سلمت على فاتن وميار وشاورت لعالية وخرجت من القاعة

قعدت عالية مستنية الفرحة يخلص... حسست بجد بيمسكها من كتفها
التفتت... فرحت لما شافت طه
"طه... تأخرت اوى كده ليه"
"معلش يا عالية كنت عند الدكتور بالعيال"

"ماهم؟"

"عندهم برد بس الحمد لله"

"سلامتهم... انا قلت مش جاي"

"انا وعدتك انى جاي... وعندى ليكى خير كويس"

عالية ف اوضة ميار... بتحط هدومها ف الشنطة

وفاتن قاعدة على السرير

"يا عالية ما انتى كنتى منورانا... مستعجلة تمشى من عندنا"

"ربنا يخليكى يا ابلة... انا مش عارفة اقولكم ايه ع المقابلة وحسن الضيافة... سواء انتى ولا الحاج

عبد الحميد ولا ميار... حسستونى انى وسط عيلتى"

"يا خير يا عالية... ليه هو احنا غرب... ده والله عبد الحميد كان معتبرك زى ميار"

"ربنا يكرمكم ويسعدها يارب"

"يارب ويسعدك انتى كمان... مقلتلش انتى ماشية من هنا على اى اساس"

"هرجع البيت تانى... ماما هى اللى قالت لته"

"ونرمين؟"

"قالى انهم مش عايزينا نتعامل مع بعض خالص لحد الامور ما تهدا وترجع المياه لمجاريها"

"وطه؟"

"ماله؟"

"مسألتيهوش عن حقاك ف وجوده معاكى زيها بالظبط؟"

ردت عالية بانكسار

"ماليش عين اقارن نفسى بيها... هى دلوقتى ليها الاهتمام الاكبر... متنسش انها لسه والدة قريب

واتنين يعنى محتاجة وجوده جنبها"

"انتى هتشيلى همها... شيلى هم نفسك"

طه بيفتح الباب بالمفتاح... بيدخل وهو ماسك شنطة الهدوم

بيسمع صوت نرمن بتتكلم ف التليفون ف اوضتها

"تعالى يا عالية... ادخلي"

دخلت وراه... دخل على الاوضة... وهى ماشية وراه

حط الشنطة على الارض... وقعد على السرير ووشه ف الارض

حست عالية انه مش طبعى... قعدت جنبه

"مالك ياطه؟؟ شكلك متغير... ولا مخي حاجة؟؟"

مسك ايدها وباسها

"سامحيني يا عالية... انا بهدلتك اوى معايا"

شافت لمعة دموع ف عينيه... طبطبت عليه

"ليه بتقول كده.. انا كفاية عليا انى ابقى معاك"

"انا حاسس انى بقيت مُسير... بفكر كتير انا ايه اللى خلانى اتسرع وتجاوزت مها... ده لا فيه

حب بيننا ولا تفاهم ولا اى نوع من الاحترام... انا كل يوم بندم انى اتجاوزتها"

"ايه اللى حصل بس لكل ده"

"مش مرتاح... وف نفس الوقت لما ببص ف وش ولادى بنسى تعبي معاها... انا ساعات بسرح

واتخيل انك انتى امهم... واقول ياريتهم كانوا ولادنا"

ردت ودموعها نازلة

"نصيب يا طه... مش مكتوب لى اكون ام... انت تعرف انى ساعات بتخيل واقول ياترى شكلهم

ايه... شبه مين فيكم... نفسى اشوفهم بس مش من حقى اطلب اشوفهم وانا بشوفك انت بالعافية"

مسح طه دموعه... وطلع تليفونه

"اهم... انا مصورهم صور كتير اوى... قلبى واتفرجى"

اخذت عالية الموبايل وفضلت تنفرج على الصور

بتبص لهم بكل حب واشتياق لتحقيق حلم الامومة ودموع

"حلوين اوى يا طه... ربنا يخليهم ملك"

"هبقى اجيبهم تشوفهم اكيد... لما هتشوفهم هتحسى باحساس تانى خالص غير الصور"

لاحظت عالية تغيير نبرة صوته لما بيتكلم عن ولاده.. ونظرته ليهم اللى بتبين قد ايه بيحبهم ومجرد

سيرتهم بتفرحه

عالية قاعدة فى اوضتها... دخلت عليها نرجس

"صاحبة؟"

"ابوه ياماما اتفضلى"

دخلت نرجس وقعدت

"حصل حاجة بينك وبين نرمى؟"

"لا... انا اسفة والله ما كذبت على طه واللى قلته كله حصل"

"خلاص الموضوع ده انتهى... بصى انا وافقت انك ترجعى البيت علشان ده برضه بيتك... وف

نفس الوقت بيت نرمى... انا مش عايزة مشاكل خالص... نرمى مجروحة من اللى حصل

وعايزاكى لو اتكلمت معاكى ولا ضايقتك استحملها"

"حاضر"

"ولما مها تشد حيلها هبقى اعزمهم هنا كل جمعة علشان اشوف العيال واقعد معاهم... وانتي براحتك

لو عايزة تبقى موجودة او لو عايزة اليوم ده تقضيه بره براحتك"

"ياماما انا والله ببحبكم وبحب ولاد طه من قبل ما اشوفهم... وجودهم مش هيضايقتنى انما انتم لو مش

عايزينى اكون موجودة قوليلى"

"انا لو مش عايزاكى مكنتش رجعتك يا عالية... انتى اصيلة وبتحى طه بجد"

"ربنا اللى عالم انى ببحبه وبحب اشوفه سعيد حتى لو مش جنى"

عالية ف المطبخ... دخلت لها نرجس

"خلصتى يا عالية"

"خلصت اهو ياماما"

"طيب تعالى حضرى معايا السفارة لاحسن كلمتهم قالوا جاين ف السكة"

"هتصحى نرمى تتغدا معنا ولا ايه؟"

"اه لما يبقوا ييجوا"

طه ومها ونرمى ونرجس وعالية قاعدين على السفارة بيتغدوا

يسمعوا صوت حد من الاطفال بيعيط

مها"اففف... اهو لاعارفة انام ولا اكل ولا اشرب... قومى يانرمى شوفيهم"

نرمين "وانا هرضعهم... ماتشوفى انتى ولادك"
مها "شايفة ياماما... من ساعة ما اتجوزت طه ونرمين بقت غلاوية اوى وبتغير منى"
نرمين "هغير منك على ايه يامها ماتلمى نفسك شوية... وانت ياطه ساكت لها كده"
طه "هتتخايقوا ومفيش واحدة فيكم هتشوف اللى بيعيط ده"
يسمعوا صوت الاتنين بيعيطوا
عالية "هقوم اشوف... كملوا اتتوا اكل لحد ما اسكتهم"
تزعق مها وعالية قايمه
"لأ... انتى لأ"
تقف عالية مكانها محرجه
طه "لأ ليه؟"
مها "المره اللى فاتت روحنا من هنا العيال عيوا... معرفش اتحسدوا ولا حد كان تعبان اتعمد
يعديهم؟"
سكنت عالية مش عارفة ترد
ردت نرمين
"معاكى حق... اللى تخرب بين اتنين ممكن تعمل اى حاجة... الحقد وحش خلى بالك على
عيالك... قومى شوفيهم انتى"
قامت مها لولادها
دخلت عالية اوضتها بتعيط... دخل طه وراها
"متزعليش يا عالية حقتك عليا"
طه... انا ال ٦ شهور اللى فاتت دى كنت بفكر... انا قاعدة هنا طول الوقت ونرمين مش طايقانى
وبتسمعنى كلام صعب كل شوية وانا ساكنه مبتكلمش... الجمعة اللى بشوفك فيها مها بتسمعنى
كلام اسوأ من نرمين... انت ناسينى خالص وغصب عنك انا عارفة... انا بقيت عبء عليك
ياطه... وكفاية كده"
"انتى بتقولى ايه؟؟ انا مقدرش استغنى عنك"
"لا انت قدرت فعلا... انا مبنامش الليل من التفكير يعنى متفتكرش ان كلامى ده من موقف
النهاردة... انا بفكر بقالى كثير... انا مبقاش ليا وجود ف حياتك غير بمكالمه تليفون... اه بتتكلم كل
يوم واكثر من مرة وبس... ده كل اللى بيربطنا يا طه... مش عايزة افضل اتعذب واعذبك معايا"
"لا يا عالية متقوليش كده... انتى حبيبتى... ده وجودك اللى بيهون عليا حياتى"

عالية"مش هقدر اقعد خلاص ياطه...انا كرهت عيشتى هنا...وروح لها لانك مش هتقدر تستغنى

عن ولادك انا عارفة"

طه"ايوه بحبهم وبحبك انتي كمان"

عالية"هما اولى بيك منى...روح ألحقها انا لازم امشى...سيبنى امشى ارجوك"

غيرت هدومها بسرعة واخذت شنطتها وخرجت

كانت مها قاعدة تعيط ونرجس جنبها بتهديها

مشيت عالية من غير ما حد يقولها استنى

طه قاعد ف الاوضة زى ماهو

دخلت نرجس عليه بابنه ...حطته ف حجره

"ملكش الا مراتك وعيالك يا طه... عيالك اللي كنت بتترجاهم م الدنيا مش بعد ما ربنا رزقك

بيهم تكفر بنعمته"

"وعالية؟"

"انت مسبتهاش... طالما هي اللي طلبت الطلاق سيبها وخليك مع مراتك وعيالك...قوم راضى مها

وهي هتراضى بكلمتين... قوم علشان خاطر ولادك"

طه بالليل صاحى...ومها نايمة والاطفال ف سريرهم

قام طه يبص عليهم... ودموعه نازلة وهو بيفتكر كل ايامه مع عالية وراحته معاها وسعاده اللي مش

حاسس بيها دلوقتي

عالية فى السرير وجنبها هنا... دموعها نازلة وهي بتفتكر ايامها مع طه قبل جوازه...وصبرها

وسكوتها على الذل اللي شافته بعد جوازه

دخلت هدير تتسحب

"انتى صاحية"

مسحت عالية دموعها بسرعة

"اه"

"وبعدين بقى... هتفضلى مقهورة كده... مش انتى مقتنعة باللى طلبتية"
"اه طبعاً... مشكلتى انى لسه بجبه... بس هو فين؟؟ مبقاش معايا"
"معلش يا عالية... مسيرك ربنا يعوضك خير"
"ربنا كريم... قومى نامى وانا شوية وهنام"
"طيب تصبى على خير"

عالية بتلبس... خرجت من الاوضة كان عصام وهدير قاعدين بيظفروا
عصام"رايحة فين ع الصبح كده يا عالية"
عالية"انتى مقولتي لوش يا هدير"
هدير"نسيت معلش... عالية شافت اعلان عن وظائف ف مدرسة خاصة فرايحة تقدم"
عصام"خير بس عالية هتشتغل ايه ف المدرسة"
عالية"هما طالبين مؤهلات كتير دبلومات وبكالوريوسات وكل حاجة"
عصام"ربنا يوفقك... تيجى اوصلك ف طريقى"
عالية"لا روح انت هركب واروح متقلقش"
قام عصام ونزل... وسألته هدير
"هتقولى لظه؟"
"لا... وطول الاسبوع اللى فات بيكلمنى وانا مبردش... خايفة اضعف.. مش خايفة... انا متأكدة لو
سمعت صوته هضعف وارجع له"
"وبعدين... ما هو انتوا لازم تتكلموا"
"مش دلوقتى... على الاقل لما احس انى قويت شوية واقدر اتمسك بالطلاق"

عالية واقفة ف زحمة... ناس كتير جاينين يقدموا
والتقديم معاه اترفيو ف نفس الوقت... سمعت حد بيكلمها
"عالية؟؟"
التفتت اتفاجئت بطارق... ارتبكت مش عارفة ترد ولا تعمل ايه
"ازيك يا عالية عاملة ايه؟"

ردت باقتضاب

"الحمد لله"

مشيت خطوات بعيد عنه... راح وراها

"انا عايز اعتذرلك عن كل اللي حصل منى... بس طمئيني عليكى"

"حصل خير... انا كويسة الحمد لله شكرا"

بعدت خطوات ... راح وراها

"انا عايز اتكلم معاكي يا عالية... حاولت ادور على رقمك اللي كان معايا ملقيتوش خالص... لازم

اتكلم معاكي"

"اسفة معلش مفيش كلام بيننا... مش هقدر اتدخل بينك وبين نرمين لاني سبت البيت هناك... لو

عايز تصالحها تقدر تروح المحل لما متها واخوها"

سألها بفرحة

"انتى سبتى طه؟"

استغربت فرحته ومردتش... كمل كلامه

"انا مش عايز اتكلم على نرمين.. انا عندى كلام يخصك انتى وفرحتينى لما قلتلى انك سبتى طه"

"معلش بس... يفرحك او يزعلك ف ايه؟"

"انا عايز اتجوزك على سنة الله ورسوله يا عالية... انا كنت عارف ان وضعك هناك مش هيستمر

كثير ومسيرك تزهقى"

"انت ايه اللي بتقوله ده... انا متجوزة... انا لسه على ذمة طه"

"لسه على ذمته وسايين بعض ولا عايشين مع بعض؟؟"

ردت بانكسار

"سايين بعض"

"خلاص... يبقى تطلقى وتتجوز"

عالية متفاجئة من كلامه... كمل كلامه

"انا عارف انك شايفانى راجل معندوش اخلاق... بس انا عايزك تفهمى انى اتغيرت والله اتغيرت"

ردت باستنكار

"غريبة"

"انا بعترف انى كنت مش كويس وليا علاقات كتير... وحاولت معاكي لمجرد علاقة عابرة ووقت

اقضيه معاكي وقلت هتبقى سهلة علشان جوزك متجوز وبعيد عنك وفاهم ممكن تحسى بيايه

ومشاعرك هتكون محتاجة حد يهتم بيكى... بس اتفاجئت بقوتك وصدك ليا... انا حتى مزعلتش انك
قلتي لجوزك... انا اتأكدت ان لسه فيه ناس محترمة... يا عالية انتى اللي ابقى مطمئن انى أمنها على
اسمى وشرفى... انتى جوهره نادرة مش اى حد يعرف قيمتك"
عالية متفاجئة من كل كلام طارق... اول حاجة جت على بالها
"انت عايز تتجوزنى وانت عارف انى صعب اخلف؟"
"ايوه طبعا عارف... بس هعمل ايه بعيال تكون امهم مش عارفة تربيههم... وبعدين محدش عارف
النصيب يمكن لما نتجوز ربنا يدينا... ناس كتير الدكاترة غلبت معاهم وخلفوا... الحكاية دى مش
شاغلانى لدرجة انى افرط ف واحدة زيك"
عالية ساكتة ومش عارفة تتكلم... كمل طارق كلامه
"انا اتغيرت... والله ما عملت اى حاجة غلط من يوم ما سبت نرمين انا كمان قربت من ربنا
والتزمت بالصلاة... وحاسس ان ربنا قبل توبتى علشان كده قابلتك النهاردة "
"اه صحيح انت هنا ليه؟"
"جاي مع واحد صاحي... شفقتي الصدفة"
جه عليها الدور ف التقديم... واتنادى على اسمها
"هستناكى يا عالية... عايز اكمل كلام معاكى"

عالية وهدير قاعدين مع بعض
"هى اه حاجة غريبة بس بتحصل... ربنا غفور رحيم.. مترفضيش طارق طالما متقدملك وراضى
بكل ظروفك"
"وطه؟"
"طه خلاص صفحة واتقفلت بقى... انسيه وعيشى حياتك مع حد يقدرك... فكرى يا عالية...
فكرى بعقلك بس"

طه ع السرير... نائم صاحي
مها بتحط ايدها عليه تصحيه فاكره نائم... يتنفض من لمستها
"يا سلام!!!!!!... ايه قرصتك عقربة علشان تنفص كده"

بص ف الساعة... ساها وقام دخل الحمام

وهى ماشية وراه

"هو ايه النكد اللي احنا فيه ده من يوم ست زفته ما مشيت... طلقها وخلصنا انت مستنى ايه"

خرج من الحمام ودخل يلبس

"هى مشيت وسابت لى عفريتها ينكد عليا... طلقها وخلصنا من اى حاجة تربطها بيك... طلقها

وريجنى"

رد بعصبية

"مش هطلقها... سامعة مش هطلقها"

"لا بقى تطلقها... يا تطلقنى انا وملكش عيال عندى"

"انتى بتلوى دراعى علشان عارفة انى متعلق بيهم"

"احسبها زى ما تحسبها"

كامل لبس... ونزل من غير ما يرد عليها

طه قاعد مع نرجس ف المحل

"قوليلى دلوقتي اتصرف ازاى... مش كنتى بتفضلى تقوليلى اتجوز علشان تخلف... ادينى خلقت...
...فين الراحة والسعادة اللي كنت عايشها مع عالية... عالية مش بترد عليا واساسا مش عارف
هقولها ايه لو ردت... انا فعلا قصرت معاها كثير... والثانية اللي بتخيرنى بين عالية والعيال... اعمل
ايه"

"طلق عالية يا طه ده الحل الوحيد"

ونزلت دموعه وهو مخنوق وبيتكلم

"مش هقدر... انا بحبها... وهفضل على ذمتى لحد ما اموت"

"بعد الشر عليك"

"شر... هو فيه اكر من كده شر... انا بموت بالبطئ... انا كنت ممكن مشوفهاش بالايام بس كنت

بكلمها واحكى لها وتحكى لى... هى الحظن الوحيدى اللي كنت بحس فيه بطعم الراحة"

"ومها... هتعمل ايه معاها لو صممت على كلامها"

"مش عارف... انا مش عارف حاجة خالص بس اللي متأكد منه انى مش هطلق عالية ابدا"

بعد شهرين
عالية خارجة من المدرسة... لقيت طارق قدامها
"ازيك يا عالية"
"الحمد لله... جيت ليه؟"
"دى مقابلة برضه؟"
"معلش اصل شكلى كده يعنى"
"شكلك ايه... وحشتيني وحببت اشوفك... مش هنفضل كده كتير يا عالية"
"اعمل ايه طيب"
"اديني كلمة... بقالك شهرين كل ما اكلمك تقوليلي بفكر"
"مينفعش افكر ف جواز وانا على ذمة راجل"
"وهنفضل كده... افرضى مطلقش هنفضل متعلقين كده"
"انا كنت ناوية اطلب منه الطلاق فعلا بس بقاله فترة مبيتصلش خالص"
"خلاص اتصلى بيه انتى واطلبي الطلاق لو رفض ارفعى قضية خلع"
"ربنا يسهل.. معلش يطارق لازم امشى وبلاش تجيلى هنا تانى"
"انا كنت فاكرك هتفرحى لما تشوفيني"
"معلش كل وقت وله ادان... سلام"

مها بتتصل بنرجس فى المحل... المغرب
"الو... هو فين طه... مقموص؟"
"مقموص ايه؟؟ طه لسه مجاش؟"
"مجاش ازاي... او مال راح فين؟"
"معرفش انا مرضيتش اتصل بيه اشوف اتاخر عليا ليه قلت يمكن نائم شوية"
"طه نزل الصبح ف معاد الشغل عادى ومجاش انا قلت جالك"
"ومتصلتيش بيه ليه يامها"
"بتصل الموبايل مقفول"
"انتى هتقلقينى ليه؟"

"لا متقلقيش... حركة قفل الموبايل دى لما بيكون مع الزفتة بتاعته... والله العظيم ماهسكت له تانى"

"انا هتصل بيها واشوف... انتى قلقتيين... مع السلامة"

"ابقى عرفيني لما تكلميه"

عالية قاعدة مع عالية الصغيرة بيكتبوا الواجب

رن موبايلها... بصت لهدير

"دى ام طه"

"ردى عليها شوفى عايزة ايه وخليكى قوية اوعى تسكتى لها على اى حاجة"

ردت عالية"الو.. الحمدلله... طه؟؟؟ لا معرفش انا مشفتوش من يوم ما سبت البيت... ولا كلمنى ولا

كلمته... مع السلامة"

هدير بتسأل عالية بفضول

"فى ايه"

عالية بترد بقلق"بتسأل على طه... من ساعة ما نزل من بيته الصبح مرجعش لا البيت ولا المحل... ربنا

يستر"

عالية ف المدرسة... بتبص ف الساعة ١٠ الصبح

قلقانة على طه غصب عنها من ساعة اتصال نرجس... اتصلت بنرجس

مها الصبح قاعدة ومعها نرجس... الاتنين بيعيطوا

رن موبايل نرجس... ردت بلهفة

"ايوه يا عالية... عرفتى حاجة؟"

"لا... انا كنت عايزة اطمن بس... طه بخير؟؟"

نرجس تعيط

"معرفش... لما روحت بالليل لقيت العربية مركونة تحت البيت وسألت نرمن قالت مجاش ولسه

راجعة من الشغل عنده كنت بسأل عليه قالوا مجاش"

عالية بتسأل ودموعها نازلة

"يعنى ايه؟؟ حصل له ايه؟"

"معرفش...معرفش حاجة وعمرها ما حصلت انه يكتفى كده ومحدش يعرف"

مها بتعيط وبتقول لرجس

"حلفيها انما متعرفش؟؟؟ لو هي عارفة مكانه تقول بس ميكونش حصله حاجة"

سمعتها عالية...ردت قبل ما نرجس تسألها

"والله ما اعرف مكانه ولا شففته من اخر مرة كنت فيها ف البيت"

نرجس"يا حبيبي يا بنى...يكون عمل ف نفسه حاجة... انتوا الاتنين السبب...لو عمل ف نفسه

حاجة يبقى بسببكم كل واحدة فيكم مفكرتش الا ف نفسها بس وهو مبقاش عارف يرضى

مين...منكم لله"

مها بتعيط...وعالية بترد على نرجس

"لا طه اكيد ميغضبش ربنا ويأذى نفسه...انا خايفة يكون حصل له حاجة ومحدش عارف"

نرجس برعب

"قصدك ايه؟؟ هنتصرف ازاي...انا تفكيري اتشل خلاص"

عالية"انا هروح ادور عليه... يارب يكون بخير"

نرجس"طيب انا جاية معاكي... انتي فين"

عالية"انا ف الشغل دلوقتي...بشتغل ف مدرسة مصر التجريبية...هستأذن واكلمك اقولك نتقابل

فين"

نرجس"طيب...ربنا يطمنا يارب"

قفلت نرجس مع عالية...وقامت

مها"هتعملوا ايه"

نرجس"هنروح ندور عليه"

مها"وهتسيبيني لوحدي كده محتاسه بالعيال وقلقانة"

نرجس"اتصلي بمامتك تيجي تقعد معاكي"

مها بصوت واطى

"اتصلت بيها بالليل تيجي تبات معايا قالت مش هينفع تيجي وتسبب بيتها"

نرجس بعد لحظات تفكير

"قومي لبسي العيال وتعالى اقعدى معانا لحد ما نطمئن"

(٣٠)

عالية ونرجس بيدوروا ف المستشفيات وبعد ما سألو عند فاتن ... بلغوا باختفاء طه
وبعد ما خلصوا واقفين مستنيين تاكسى
"انتى قاعدة فين من ساعة ما مشيتى"
"عند هدير"
"وايه حكاية الشغل ده... من امى؟"
"من شهرين... كان لازم ابتدى افكر ف حياتى هتمشى ازاي بعد الطلاق"
"طه كانت نفسيته تعبانة اوى من بعد ما مشيتى... كان يقول مش هيطلقك ابدا... يا حبيبي يابني
اتاريه بيقاسى ومحدث حاسس بيه"
دمعت عالية وقلبها موجوع على طه
"ربنا يرجعولنا بالسلامة"

مها قاعدة ماسكة احمد ونرمين ماسكة اروى
"عملتى فيه ايه يامها خليتيه يطفش"
"هعمل ايه يانرمين انتى اتجننتى"
"ايه اللى يخليه يسيينا كلنا كده ويختفى الا اذا كانت حصلت حاجة كبيرة"
"كبيرة ايه... مفيش حاجة كبيرة... مشا كلنا هي هي من اول ما اتجوزنا كلها عن الزفتة اللى مش
قادر ولا راضى ينساها"
"اهى الزفتة دى اللى كنا بتتريق عليها حظها احسن مننا احنا الاتنين"
"ازاي يا فالحة"
"انتى جوزك طفش وسابك وطول الوقت عارفة انه بيعبها اكر منك... وانا خطيى اللى بحبه سابني
ومن ساعتها لاعارفة احب ولا حد حاول يتقرب منى اصلا"
"اسكتى يانرمين بلا جواز بلا خيبة... عاجبك حالى... اتجوزت وانا فاكرة انى هفرح واعيش مبسوطه
واخلف واعوض احساس الاسرة اللى اتحرمت منه... كنت فاكرة هقدر اخليه ينساها... انما كنت

بحلم... انتى متعرفيش يعنى ايه جوزك يكون بيعحب غيرك وانتى عارفة وهو مش بينكر... حتى لما بعدت هو مش بينساها ويبدأ يبين كرهه ليكى "

"ارحم م الوحدة والفراغ الللى انا فيهم... كل الللى حواليا اتجوزوا... انتى اتجوزتى واتغيرتى معايا... بعد ما اتجوزتى اخويا كنت فاكراكى هتبقى اقرب لى م الاول بعدتى اكثر... البت المفوضة بنت فاتن اتجوزت جوازة حلوة... كل اصحابنا اتجوزوا... مفيش غيرى الللى قاعدة زى ما انا "

"حسدوا الاعمى على وسع عينه"

"حسد... انا هحسدك؟؟... انا مش عارفة كان طه مستحمل طولة لسانك دى ازاي "

"لمى نفسك يانرمين وسيبى ف مصيبتى... طه مش عارفة حصل له ايه وسابى بعيلين وانتى تقولى اتجوزت واتغيرت وكلام خايب كده... ده انتى بقيتى لا تطاقى "

"دلوقتى لا اطاق... انما الاول كنت حلوة... خلصت حاجتى من عند جارتى خلاص "

اتفتح الباب ودخلت نرجس وهى بتزقق لهم

"ايه ده فى ايه؟.. صوتكوا واصل للشارع"

مها"طمنينى الاول فيه جديد؟"

نرمين"لقيتوه؟؟"

نرجس وهى بتقعد

"ولا فيه جديد ولا لقيناه"

وبصت لاحمد واروى وعينيها دمعت

عالية بتعيط بالليل ف الاوضة... تدخل لها هدير

"لسه بتعيطى يا عالية... انا افتكرتك نمى"

"هتجنن ياهدير... هموت واطمن عليه... الايام بتعدى ومفيش لا حس ولا خير ولا عارفة اذا كان عايش ولا بعد الشر حصل له حاجة"

"ربنا يستر... للدرجة دى لسه بتحببه"

"ايوه بحبه... بحبه اوى ونفسى يرجع... حتى لو مش هشوفه خالص بس اعرف انه رجع وكويس هرتاح... انما وانا مش عارفة حصل ايه كده حاسة انى هموت روى بتسحب منى وقلقانة"

"متخافيش... بدل مفيش اى خير وحش بيقى متخافيش... يمكن بيأدهم شوية وهيرجع"

"يارب... ان شاءالله يكون كويس ويرجع بالسلامة"

"عالية... انتى خلاص نهيى مع طارق"

"طبعاً... انا اتأكدت انى بحب طه ومش ممكن هقدر ابقى مع راجل غيره... ممكن افضل لوحدى

انما مبقاش مع غيره ابدأ"

ام مها عندها ف بيت نرجس

احمد واروى قاعدين بيلعبوا على الارض... بتبص عليهم وبتسألها

"كبروا ماشاء الله... نينتهم مش هتعملهم عيد ميلاد؟"

"عيد؟؟ نحتفل ازاي وابوهم منعرفلوش طريق"

"وانتى هتفضلى قاعدة كده... بقاله ٤ شهور لا حس ولا خبر وانتى ساكتة"

"ف ايدى ايه اعمله"

"اطلبى الطلاق طبعاً... انتى لسه صغيرة والف مين يتمناكى"

بصت لها مها باستغراب

"اتطلق؟؟!! سهل طبعاً انى اتطلق بس ولادى اجيبهم واقعد عندك... هتصرفى عليا وعليهم؟؟"

"تعالى اه وسيبهم اهل ابوهم اولى بيهم"

بصت لهم مها

"اسيبهم؟؟ عايزان اسيبهم وهما ف السن ده ويبقوا من غير ام ولا اب... عايزاهم يتربوا زبي صح..."

يكبروا وعمرهم ما حسوا بأمان البيت والاسرة"

مامتها ساكتة مش بترد عليها... كملت مها بحزم

"انا قاعدة هنا لما اشوف جوزى حصل له ايه؟"

"اش اش يا جوزك... من امى يا بت... انتى اتجوزتاه علشان مبسوط وهيعيشك عيشة كويسة
ويهنكى... كل ده طلعت الفاضى لا قاعدة ف شقتك ولا جوزك معاكى يبقى متمسكة بيه على

ايه"

"انا قاعدة هنا علشان مش هقدر اقعد بالعيال لوحدى... لا هعرف اراعيهم لوحدى ولا اصرف

عليهم.. والشقة موجودة ومقفولة هتفيدنى بأيه وجوزى مش معايا"

"وضرتك؟"

"مالها؟"

"مش خايفة تاخذ منك الشقة؟"

ضحكت مها بسخرية

"دى طلعت غير ما كنت فاكرة خالص... هى سابت لى كل حاجة... الشقة وطه وهنا... وكل
اللى هى سابتها انا مش قادرة اتخنى بيه... ياريتها كانت اخدت الشقة وقاسمتنى ف طه بس فضل بيننا

مش سابنا احنا الاتنين"

قامت الام وهى ماشية

"طيب... انا ماشية مش عايزة حاجة؟"

"لا شكرا"

راحت وصلتها ع الباب ورجعت لقت نرمن قدامها

"مها"

"نعم"

"هقولك حاجة بس مش قصدى حاجة وحشة والله"

"قولى"

"امك واطية اوى"

لسه مها هترد عليها... لقت نفسها بتضحك

نرمن "طب وحياتك امك لنعملهم عيد ميلاد بالعند فيها... غاظتنى اوى"

"بس بقى يا نرمن... دى امى برضه"

"بس قوليلى انتى طلعتى بتجى طه اوى كده"

مها بانكسار "مش جوزى وابو ولادى... لما هتخلفى هتعرفى ان جوزك قبل ما يبقى ابو ولادك حاجة

ولما يبقى ابو ولادك تانية خالص"

نرمن بانكسار "تجوز!! انا قربت افقد الامل خلاص"

عالية ف المطبخ عند هدير... سمعت صوت الموبايل ف الاوضة

راحت ترد... بصت ع الرقم... رقم غريب... ردت

"الو"

وسمعت صوت طه

"وحشتينى يا عالية"

صرخت وهى مش مصدقة

"طه.... حبيبي انت فين؟ كده تعمل فينا كده؟؟ انت كويس؟؟؟ انت وحشتني اوى"
"انتى وحشتيني اوى يا حبيبتى... عاملة ايه طمنيني عليكى... بتشوفى ماما واحمد واروى ونرمين"
"ايوه يا طه... بشوفهم وكلهم كويسين... كلنا هنتجنن عليك انت فين طمنى"
"اطمنى... اسمعى الكلام اللى هقولوك ده... افهميه ونفذه بالحرف الواحد"
"خير؟؟"

عالية ماشية ف مطار الكويت بعد ما وصلت
بتدور بعينها على طه... اول ما شافها جرى عليها وجريت عليه
حضنوا بعض بكل شوق وحب وحنين
"وحشتيني اوى يا حبيبتى... اوى"
"حبيبي انا مش مصدقة انى شفتك تانى"
كانت بتعيط من فرحتها... حسست ان الناس متنبهه لهم
"طه الناس بتتفرج علينا"
بص طه حواليه كان فيه ناس بتبتسم وناس مكسوفة
"احم... ايه الاحراج ده... اعمل ايه نسييتيني الدنيا"
"فهمنى بس انت بتعمل ايه هنا وجيت امى"
"انتى قلتي لحد انك جاية؟"
"لا هدير وابلة فاتن بس زى ما قتلنى... بس حرام يا طه كلهم هيتجننوا عليك مامتك ومها ونرمين"
"متجيبليش سيرتها يا عالية"
"حرام يا طه... دى اتكسرت خالص والله وبقت واحدة تانية"
"مش مصدق... يالا بينا بس ونكمل كلامنا ف البيت"

طه بيفتح باب شقة... ويبسبق عالية
"اتفضلى... بيتنا اللى بعيد عن الناس كلها"
دخلت عالية... وهى بتبص حوالياها

"سيبك من البيت اى حته معاك تبقى جنة بالنسبة لى... احكيلى انت اختفيت فين كل ده وازاى
قدرت تبعد عننا كده وبالطريقة دى"

دخلوا وقعدوا... وبدأ يحكى لها

"لما حسيت انك فعلا مش عايزانى ومش راضية تردى عليا وف نفس الوقت مها بتضغط عليا
بولادى كرهت الدنيا وعيشتى وكنت بتمنى الموت كل لحظة... قابلت واحد صاحى بيشتغل ف
مكتب سفريات ولقيت انه عنده عقود عمل مضمونة هنا ف الكويت... مشيت ف الحكاية دى
واستلفت فلوس ودفعتله حق العقد واخذت اجازة بدون مرتب ومقلتش لحد خالص وجيت...

جيت وانا مقرر انى هجيبك نعيش هنا بعيد عن كل حاجة فرقتنا"

"وولادك يا طه؟؟ هانوا عليك تبعد عنهم"

رد بوجع "اه... علشان اتعود لما اطلق مها على بعدهم عنى"

"تطلقها؟؟"

"ايوه؟"

"لا ياطه... المرة دى لاء"

"لاء ليه"

"علشان ولادك مالمش ذنب ف حاجة خالص"

"انا عايزك انتى بس... انا سألت هنا على دكتور كويس وكنت مستنى لما تيجى واحجزلك عنده..."

انا عايز عيال منك انتى يا عالية... ولو مجوش يكفى راحتى معاكى"

"بس عيالك اللى جم فعلا دول متاخدهمش بذنب امهم"

"اعمل ايه؟؟"

"اول حاجة لازم تظمنهم عليك... وبعد كده نبقى نشوف الحياة بيننا كلنا هتمشى ازاى"

مها فى اوضة عالية ف بيت نرجس

ولادها جنبها نايمين وهى بتعيط

تدخل عليها نرجس... تبص لها وتقعده قصادها على طرف السرير

تطبب عليها

"الحمد لله اننا اتظمننا عليه"

مها بتعيط بحرقة

"مش عايزة اضايقك زيادة بس انا قبل جوازك بيوم قلت لك اى مقارنة معاها هيختارها هي... انتى
مسمعتيش الكلام وعاندتى وخيرتبه وقارنتى...وصلتبه انه سابنا كلنا واخذها هي بس معاه"
"هو غلط انى اكون عايزة جوزى ليا لوحدى"
"محدث كذب عليكى... انتى اتجوزتبه وكنتى عارفة كل حاجة"
"انتى مش حاسة بالنار اللى جوايا... انا قاعدة هنا وهى معاه هناك"
"يا مها...هى كمان كانت بتبقى هنا وهو معاكى وكنتى مانعاه يجيها"
"قصداك انى بشرب من نفس الكاس... شمتانة فيا"
"لا اله الا الله...هشمت فيكى ليه بس ده انا شايلاكى انتى والعيال ف عينيا"
مها بتعيط بحرقة... طبطبت عليها نرجس تانى
"هو قالك ايه عامل فيكى كده؟"
"قالى انى لو عايزة اطلق هيطلقنى... ولو مش عايزة هخلينى هنا وهى هتبقى معاه هناك وهيتزل
اجازة كل سنة شهرين"
"انتى عايزة تطلقى؟"
ردت مها وهى بتعيط "لأ مش عايزة"
"خلاص امسحى دموعك واحمدى ربنا انه بخير... ومهما غاب مسيره يرجع ان شاءالله"

عالية وطه قاعدين ف عيادة دكتور
اللاتين متوترين والدكتور بيصص ف الورق اللى قدامه
الدكتور"التحليل متمنعش اننا نجرب العملية تانى"
عالية بقلق"هى ممكن تفشل تانى؟"
الدكتور"وممكن تنجح...خليكى متفائلة"
طه"يعنى يادكتور اى نسبة اكثر...النجاح ولا الفشل"
الدكتور"والله مفيش حاجة تبين انها ممكن تفشل ومع ذلك دى حاجة منقدرش نجزم بيها...لو
موافقين نعمل العملية وربنا يبسر ان شاءالله"
طه وهو بيصص لعالية
"نعمل العملية وتوكل على الله"

عالية على السرير.. وجنبها طه... عالية بتتكلم ف التليفون
"الحمد لله يا ابلة... طه شايلني ف عينيه والله وخصوصا بعد العملية... اه تعبانة شوية بس مبتحركش
من السرير الا بسيط... ميار عاملة ايه هتولد امتي؟؟ لا هي هتسبقني ان شاءالله... ابلة عايزة اقولك
على حاجة... قولي لظه انزل اولد ف مصر... هو مش عايز يتزل اول اجازة علشان زعلان منهم...
اهو معاكى"

ناولت طه التليفون

"ايوه يافاتن ازيك... الحمد لله كويسين... ماتولد هنا وخلص... اه بكلمهم كلهم بس مش عايز
انزل علشان عارف اني هرجع للمشاكل تاني... ربنا يسهل هبقى اعرفك طبعاً... مع السلامة"

بعد ما قفل سألته عالية

"اقنعتك ولا لسه؟"

"الحكاية مش اقتناع... انا ما صدقت بعدنا عن المشاكل"

"حرام ياطه... مامتك واختك نفسهم يشوفوك.. وولادك كبروا من غير ما يعرفوك... ومها برضه

ليها حق عليك"

"يا سبحان الله... ده انتي المفروض تخلصي حقا منها"

"يعني اساعدك ع الظلم؟؟ انا بحبك ومش عايزاك تظلم خالص ياطه... نزل اجازة اولد هناك ونقعد

كلنا مع بعض نحدد نظام حياتنا باللى يرضينا كلنا"

طه وعالية خارجين من المطار... عالية بطنها كبيرة

نرجس ونرمين ومها مستنيينهم... وماسكين احمد واروى ف ايديهم

اول ما شافوهم جريت نرجس على طه وحضنته وهي بتعيط

نرمين سلمت عليه وحضنته... شاف ولاده

نرجس قالت لهم "سلموا على بابا"

حضنتهم طه وهما ساكتين لانهم مش عارفينه

مها واقفة مكانها... قربت منه على استحياء تسلم عليه

سلم عليها... عيطت... حضنها وهو بيطلب عليها

فى بيت نرجس...قاعدين كلهم
طه اخذ ولاده على حجره
مها ونرمين بيحضروا السفرة
طه نادى على مها...راحت له
طه"اقعدى يامها... عاملة ايه؟"
مها"الحمدلله...حمدالله على سلامتكم"
طه"الله يسلمك... جهزى هدومك وهدوم احمد واروى علشان هنروح النهاردة"
بصت له مها وبصت لعالية...حست انها مش فاهمة حاجة
طه"حاليا ... ف الاجازة هنقعد ف بيتنا وعالية هتقعد هنا عند ماما...عالية هتسافر معايا ولو حابة
تسافرى معايا ماشى وهتبقى كل واحدة فيكم ف شقة مش عايزة خليكى هنا والاجازة هبقى
معاكى... لحد ما العقد بتاعى يخلص وهنستقر هنا وكل واحدة فيكم تقعد ف شقة بولادها"
مها"ولادها؟"
طه"اه...اصل عالية حامل ف ٣ توائم...تقريبا انا تخصص توائم يا اما انتم متفقين عليا"
عالية"الحمدلله يا طه انا مكنتش طايلة ضفر عيل"
طه"الحمدلله...وان شاءالله الاخوات يتربوا وهما قريبين من بعض... هااا يا مها قلتي ايه؟؟ تسافرى
معايا ولا تقعدى هنا لحد العقد ما يخلص"
مها بتردد"مش عارفة"
طه"طيب فكرى براحتك ولسه قدامنا وقت"
نرجس تنادى عليهم
"ياللا يا اولاد... الغدا جاهز"

..... تمت
.....